

O LE EKALESIA A IESU KERISO O LE AU PAIA O ASO E GATA AI • ME 2019

O Le Liahona

Saunoaga o le Konafesi Aoao

Ua Uunaia e Peresitene Nelson
ia Aiga ina ia **Saili le Faaeaga**

Ua Lagolagoina Fitugafulu
Fou o le Pulega Aoao ma le Au
Peresitene Aoao o le Aoga Sa

8 Malumalu Fou na Fofogaina,
O Malumalu o le Vaitau o
Paionia o le a Toe
Faaleleia





O LE AU PERESITENE SILI MA LE KORAMA A APOSETOLO E TOASEFULULUA I LE NOFOAGA AUTU MO TAGATA ASIASI O LE MALUMALU O ROMA ITALIA

“E siliā ma le 2,000 tausaga talu ai, sa auuāna atu ai lo tatou Faaola, o Iesu Keriso i le lalolagi, ma faatuina Lana Ekalesia ma Lana talalelei. Sa Ia valaauina Aposetolo ma tuu atu ia i latou le poloaiga ia ‘outou o atu e fai nuu uma lava ma soo’ [Mataio 28:19].

“I o tatou aso, ua toefuatai mai ai le Ekalesia a le Alii. O loo tu le Faaola i le ulu O Le Ekalesia a Iesu Keriso o le Au Paia o Aso e Gata Ai. I le aveā ai ma Aposetolo a Iesu Keriso i aso nei, matou te faasoa atu lea lava savali e tasi i le asō lea na faasoa atu e Aposetolo anamua—o loo soifua le Atua ma o Iesu o le Keriso.”

—Peresitene Russell M. Nelson, a o i ai i Italia mo le faapaiga o le Malumalu o Roma Italia ia Mati.

Sauniga o le Taeao o le Aso Toonai

- 6 **E Mafai Faapefea Ona Ou Malamalama?**
Elder Ulisses Soares
- 9 **Faateete faasaga i le Faasamasamanoa**
Becky Craven
- 11 **O Tali i Tatalo**
Elder Brook P. Hales
- 15 **Galuega Faafaifeautalai: Faasoaina Atu o Mea o Loo i totonu o Lou Loto**
Elder Dieter F. Uchtdorf
- 19 **E Pei ona sa la Faia**
Epikopo W. Christopher Waddell
- 22 **O se Aiga e Afio ai le Agaga o le Alii**
Peresitene Henry B. Eyring

Sauniga o le Afiafi o le Aso Toonai

- 26 **O Le Lagolagoina o Taitai o le Ekalesia**
Peresitene Dallin H. Oaks
- 27 **Lipoti a le Matagaluega Suetusi a le Ekalesia, 2018**
Kevin R. Jergensen

- 28 **O Le Talalelei Moni, Mama, ma Faigofie a Iesu Keriso**
Peresitene M. Russell Ballard
- 31 **Saili le Malamalama e ala i le Agaga**
Elder Mathias Held
- 34 **O Le Mata o le Faatuatua**
Elder Neil L. Andersen
- 38 **Taumamafa Fiafia i le Afioga a Keriso**
Elder Takashi Wada
- 41 **Lagonaina o Lona Siufofoga**
Elder David P. Homer
- 44 **Faauta i le Tamai Mamoe a le Atua**
Elder Jeffrey R. Holland

Sauniga Aoao Perisitua

- 47 **O Lau Tusi Metotia o le Perisitua**
Elder Gary E. Stevenson
- 51 **O Le Korama: O Se Nofoaga o le Auai**
Elder Carl B. Cook
- 54 **Vaai Atu ia Iesu Keriso**
Elder Kim B. Clark
- 58 **O Le Mana o le Faatuatua Lagolago**
Peresitene Henry B. Eyring

- 60 **O Fea O Le A Tau Atu i ai Lenei [Filifiliga]?**
Peresitene Dallin H. Oaks
- 67 **E Mafai Ona Tatou Faia la Lelei Atu ma la Tatou Lelei Atu**
Peresitene Russell M. Nelson

Sauniga o le Taeao o le Aso Sa

- 70 **E Tele Mea e Manuia ai**
Elder Dale G. Renlund
- 73 **O Keriso: O Le Malamalama e Susulu i le Pogisa**
Sharon Eubank
- 76 **Alofa Sili mo Fanau a lo Tatou Tama**
Elder Quentin L. Cook
- 81 **Saunia mo le Toe Afio Mai o le Alii**
Elder D. Todd Christofferson
- 85 **O Le Togiola a Iesu Keriso**
Tad R. Callister
- 88 **"Sau, Mulimuli Mai ia te A'u"**
Peresitene Russell M. Nelson

Sauniga o le Afiafi o le Aso Sa

- 91 **Faamamāina e le Salamo**
Peresitene Dallin H. Oaks
- 95 **Faamalolosi o Tatou Maso Faaleagaga**
Elder Juan Pablo Villar
- 97 **Leoleo Mamoe Lelei, Tamai Mamoe a le Atua**
Elder Gerrit W. Gong
- 101 **Saunia e Maua Mea Manaomia Uma**
Elder David A. Bednar
- 105 **O Le Agalelei Vave o le Atua**
Elder Kyle S. McKay
- 107 **Fausia se 'Olo o le Faaleagaga ma le Puipuiga**
Elder Ronald A. Rasband
- 111 **Malelega Faaiu**
Peresitene Russell M. Nelson
- 64 **O Au Pulega Aoao ma Taitai Aoao o Le Ekalesia a Iesu Keriso o le Au Paia o Aso e Gata Ai**
- 112 **Lipoti Faafuainumera, 2018**
- 113 **Faasino Upu o Tala o le Konafesi**
- 114 **Tala Fou o le Ekalesia**
- 127 **Sau, Mulimuli Mai ia te A'u—Aoao Mai i Savali o le Konafesi Aoao**



O Le Konafesi Aoao Faaletausaga Lona 189

Taeao o le Aso Toonai, 6 Aperila, 2019, Sauniga Aoao

Taitai: Peresitene Dallin H. Oaks
Tatalo Amata: Elder Steven E. Snow
Tatalo Faaiu: Elder Wilford W. Andersen
O musika na saunia e le Aufaipese a le Tape-neko i le Lotoa o le Malumalu; Mack Wilberg ma Ryan Murphy, o faatonu; Richard Elliott ma Andrew Unsworth, o taokeni: “Ia Fiafia Tatou,” *Viiga*, nu. 3; “Le ‘Au Paia Uunai i Luma,” *Viiga*, nu. 44, arr. Wilberg; “Ua Susulu Mai Nei o le La,” *Viiga*, nu. 140, arr. Wilberg; “Fa’aola o Isaraelu,” *Viiga*, nu. 5; “Fanau, ua Leoleo mai le Atua,” *Viiga*, nu. 180, arr. Wilberg; “O Le Atua lo’u Tama,” *Viiga*, nu. 184, arr. Murphy; “Fiafia, o le Ali’i o le Tupu!” *Viiga*, nu. 38, arr. Murphy.

Afiati o le Aso Toonai, 6 Aperila, 2019, Sauniga Aoao

Taitai: Peresitene Henry B. Eyring
Tatalo Amata: Elder Brent H. Nielson
Tatalo Faaiu: Lisa L. Harkness
O musika ua saunia e se aufaipese tuufaatasi mai le Iunivesite o Polika Iaga; Rosalind Hall ma Andrew Crane, o faatonu; Linda Margetts ma Bonnie Goodliffe, taokeni: “Le Tupu o Tupu, Afo Mai,” *Viiga* nu. 25, arr. Kasen; “Ou te Tu ma Ofo,” *Viiga*, nu. 107, arr. Jessop; “Praise to the Lord, the Almighty,” *Hymns*, no. 72; “Sa Fanau Mauualalo Iesu,” *Viiga*, nu. 110, arr. Kasen; “Jesus, Lover of My Soul,” *Hymns*, no. 102, arr. Staheli.

Afiati o le Aso Toonai, 6 Aperila, 2019, Sauniga Aoao Perisitua

Taitai: Peresitene Dallin H. Oaks
Tatalo Amata: Elder John C. Pingree Jr.
Tatalo Faaiu: Elder Brian K. Taylor
O musika na saunia e se aufaipese tuufaatasi a le Perisitua Arona mai siteki i Layton, Iuta; Stephen Schank, faatonu; Brian Mathias, taokeni: “Ieova e, ia Tautai Pea i Matou,” *Viiga*, nu. 47, arr. Wilberg; “Faitau Ou Manuia,” *Viiga*, nu. 151, arr. Kasen; “Faamoemoe o Isaraelu,” *Viiga*, nu. 161; “Beautiful Savior,” *Children’s Songbook*, 62, arr. Schank.

Taeao o le Aso Sa, 7 Aperila, 2019, Sauniga Aoao

Taitai: Peresitene Dallin H. Oaks
Tatalo Amata: Elder Bradley D. Foster
Tatalo Faaiu: Jean B. Bingham
O musika na saunia e le Aufaipese a le Tape-neko i le Lotoa o le Malumalu; Mack Wilberg, faatonu; Andrew Unsworth ma Brian Mathias, taokeni: “Sing Praise to Him,” *Hymns*, no. 70; “Le Fa’avae Malosi,” *Viiga*, nu. 45, arr. Wilberg; “Le Alofa o lou Faaola,” *Tusi’ese a Tamaiti*, 42, arr. Cardon; “O Mai, Fanau a le Ali’i,” *Viiga*, nu. 24; “O Le Papa e Malosi,” *Viiga*, nu. 145, arr. Wilberg; “Mulimuli Mai ia te A’u,” *Viiga*, nu. 62, arr. Wilberg.

Afiati o le Aso Sa, 7 Aperila, 2019, Sauniga Aoao

Taitai: Peresitene Henry B. Eyring
Tatalo Amata: Elder Taniela B. Wakolo
Tatalo Faaiu: Elder Claudio R. M. Costa
O musika na saunia e le Aufaipese a le Tape-neko i le Lotoa o le Malumalu; Mack Wilberg ma Ryan Murphy, faatonu; Bonnie Goodliffe ma Linda Margetts, taokeni: “Le Atua Malie Lau Galuega,” *Viiga*, nu. 82, arr. Murphy; “O Mai ia Iesu,” *Viiga*, nu. 65, arr. Murphy;

“Fa’alogo, Nu’u Uma!” *Viiga*, nu. 165; “I Know That My Savior Loves Me,” Creamer and Bell, arr. Murphy; “Ua Naunau ia te Oe,” *Viiga*, nu. 57, arr. Wilberg.

E Maua Saunoaga o le Konafesi

Ina ia maua saunoaga o konafesi aoao i luga o le initoneti i le tele o gagana, asiasi i le conference.Church of Jesus Christ.org ma filifili se gagana. O loo maua foi lauga i luga o le polokalama feaveai o le Gospel Library. E masani lava i totonu o le ono vaiaso talu ona maea le konafesi aoao, e maua foi lipine faalogologo ma vitio faa-Peretania i faletusi autu. O loo maua faamatalaga e uiga i le konafesi aoao i mamau e mafai ona faaogaina e tagata o le ekalesia e i ai manaoga faapitoa i le disability. Church of Jesus Christ.org.

I Le Faavaa

Luma: Ata na pueina e Leslie Nilsson.
Tua: Ata na pueina e Matthew Reier.

Puega o Ata o le Konafesi

Ata Pue i le Aai o Sate Leki sa pueina e Cody Bell, Janae Bingham, Mason Coberly, Randy Collier, Weston Colton, Ashlee Larsen, Leslie Nilsson, Matthew Reier, ma Christina Smith.



ME 2019 VOL. 43 NU. 5
LIAHONA 18605 890

O le mekasini faavaomalo o Le Ekalesia a Iesu Keriso o le Au Paia o Aso e Gata Ai

O Le Au Peresitene Sili: Russell M. Nelson, Dallin H. Oaks, Henry B. Eyring

O le Korama a Aposetolo e Toasefululu: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, Uliisses Soares

Faatonu: Randy D. Funk

Faufautua: Brian K. Ashton, Randall K. Bennett, Becky Craven, Sharon Eubank, Cristina B. Franco, Donald L. Hallstrom, Larry S. Kacher, Erich W. Kopischke, Lynn G. Robbins

Pule Faatonusili: Richard I. Heaton

Faatonusili o Mekasini a le Ekalesia:

Allan R. Loyborg

Pule o Mea Tau Pisinisi: Garff Cannon

Pule Faatonu: Adam C. Olson

Pule Faatonu Lagolago: Ryan Carr

Faasalalau Lagolago: Camilla Castrillón

Au Tisitusi ma Faatonutonu: Maryssa Dennis, David Dickson, David A. Edwards, Matthew D. Flitton, Garrett H. Garff, Jon Ryan Jensen, Aaron Johnston, Charlotte Larcabal, Michael R. Morris, Eric B. Murdock, Joshua J. Perkey, Jan Pinborough, Richard M. Romney, Mindy Selu, Lori Fuller Sosa, Chakell Wardleigh, Marissa Widdison

Pule Faatonusili o Faatufugaga: J. Scott Knudsen

Faatonusili o Faatufugaga: Tadd R. Peterson

Mamanu: Jeanette Andrews, Fay P. Andrus, Mandy Bentley, C. Kimball Bott, Thomas Child, Joshua Dennis, David Green, Colleen Hinkle, Eric P. Johnsen, Susan Lofgren, Scott M. Mooy, Emily Chieko Remington, Mark W. Robison, K. Nicole Walkenhurst

Faatonu o le Puletaofia o Meatotino: Collette Nebeker Aune

Pule i le Gaosiga: Jane Ann Peters

Gaosiga: Ira Glen Adair, Julie Burdett, Thomas G. Cronin, Bryan W.

Gygi, Ginny J. Nilson, Marissa M. Smith

Tailolomi: Joshua Dennis, Ammon Harris

Faatonusili Lomitusi: Steven T. Lewis

Faatonusili o Faletusi: Troy R. Barker

Mo le okaina o mekasini, alu i le store.lds.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili

i luga o le initoneti i le liahona.lds.org: pe meli mai i le *Liahona*, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O le *Liahona* (o lona uiga i le Tusi a Mamona o le "tapasa" po o se "faatonu") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Iglisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonnesia, Italia, Iapani, Kiripati, Korea, Latvia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaigofieina), Silovenia, Sipaniolo, Suetena, Swahili, Tagaloka, Tahiti, Tai, Toga, Iukureini, Urutu, ma Viatename. (E eese lava gagana.)

© 2019 Puletaofia e le Intellectual Reserve, Inc. Ua toafia aia tatau uma. Lomia i le lumaite Setete o Amerika.

Faamatalaga o le Puletaofia: Vagana ua faailoa mai, e mafai e tagata taitoatasi ona kopi anomea mai le *Liahona* mo lo latou lava faaagaina patino, e le faia ai ni pisinisi (e aofia ai valaauga o le Ekalesia). O leinei aia tatau e mafai ona faaleagaina i soo se taimi. E le tatau ona kopiina ia ata pe afai o loo faaalia le faasaina i le laina o faaaloaloga faatasi ai ma le faatufugaga. Ia auina mai fesili e uiga i le puletaofia i le Intellectual Property Office, 50 E. North Temple St., FL 13, Salt Lake City, UT 84150, USA; email: cor-intellectualproperty@ldschurch.org.

Mo le Aufaitau i le lumaite Setete ma Kanata: May 2019 Vol. 43 Nu. 5, LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 E. North Temple St., Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (American Express, Discover, MasterCard, Visa) may be taken by phone or at store.lds.org. (Canada Post Information: Publication Agreement #40017431)

POSTMASTER: Send all UAA to CFS (see DMM 507.1.5.2).

NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



Faasologa o Failauga

Andersen, Neil L., 34
Ballard, M. Russell, 28
Bednar, David A., 101
Callister, Tad R., 85
Christofferson, D.Todd, 81
Clark, Kim B., 54
Cook, Carl B., 51
Cook, Quentin L., 76
Craven, Becky, 9
Eubank, Sharon, 73
Eyring, Henry B., 22, 58
Gong, Gerrit W., 97
Hales, Brook P., 11
Held, Mathias, 31
Holland, Jeffrey R., 44
Homer, David P., 41
Jergensen, Kevin R., 27
McKay, Kyle S., 105
Nelson, Russell M., 67, 88, 111
Oaks, Dallin H., 26, 60, 91
Rasband, Ronald A., 107
Renlund, Dale G., 70
Soares, Uliisses, 6
Stevenson, Gary E., 47
Uchtdorf, Dieter F., 15
Villar, Juan Pablo, 95
Wada, Takashi, 38
Waddell, W. Christopher, 19

Faasino Autu

Afio Mai Faalua, 81
Agaga Paia, 22, 31, 38, 41
Agalelei, 105
Aiga, 34, 58, 76, 88
Aiga, 22, 101, 107
Ala o faasalalauga, 76
Alofa, 11, 15, 22, 28, 58, 73, 76
Alofa mutimutivale, 91
Aoa atu, 6, 28, 76
Aoaoina, 6, 28, 101
Aoga Sa, 101
Ata o le faaolataga, 60
Auauna atu, 19
Auaunaga, 19, 28, 54, 97
Avea ma Soo, 6, 9, 15, 28, 47, 54, 67, 107, 111
Faaaliga, 31, 38, 41
Faaaumeaina, 51
Faeeaga, 88
Faaleagaga, 70, 47, 95, 107
Faamafanafana, 105, Liua, 19, 31, 38
Faamagaloga, 22
Faamanatuga, 44
Faamanuiga, 70, 105
Faamasinoga, 101, 111
Faamoemoe, 6, 91, 105
Faaosoosoga, 47
Faapotopotoina, 81, 97
Faataitaiga, 6
Faatoaagaina mai, 19
Faatuatua, 6, 22, 34, 58, 70, 95, 107
Faigata, 34, 73, 85
Feagaiga, 9, 54, 73, 88, 101
Fiafia, 9, 22
Filemu, 28
Filifiliga, 60
Galuega faafaifeautalai, 15, 22, 51, 76, 95
Galuega faalemalumalu, 76, 81, 101

Iesu Keriso, 6, 19, 22, 28, 34, 38, 44, 54, 67, 73, 81, 85, 88, 91, 95, 97, 101, 105, 107
Iosefa Samita, 22, 85, 101
Korama a perisitua, 47, 51
Lagolagoina, 58
Laveaiina, 105
Le Atua le Tama, 11
Lototele, 15
Malamalama o Keriso, 73
Malumalu, 22, 111
Migao, 44
Molimau, 107
Musumusuga, 34, 41
Natura paia, 60
Olioli, 28, 60, 88
Onosai, 70, 105
Oti faaleagaga, 85
Oti faaletino, 85
Perisitua, 54, 58, 67
Perisitua Arona, 19, 47, 51
Perofeta, 34
Poto, 34, 41
Salamo, 22, 67, 73, 85, 91
Sapati, 28
Sauniga, 85, 88
Sauniuniga, 101, 107
Suesue i tusitusiga paia, 38
Suiga, 67
Taitai o le Ekalesia, 58
Talafaasolopito o aiga, 76, 81
Taliaina, 73
Tatalo, 11, 22, 58, 70
Taua o le tagata lava ia, 38
Taulaga, 60
Toetu, 81, 91
Togiola, 44, 85, 101, 97
Tulaga faaletamā, 22, 58
Tusi a Mamona, 51, 81
Upumoni, 34, 107
Usiuitai, 70
Usoga, 51
Vavega, 15



Mea na Faamamafa mai mai le Konafesi Aoao Faaletausaga Lona 189

Talu mai ona lagolagoina Peresitene Russell M. Nelson e avea ma Peresitene o le Ekalesia, o le tele o suiga taua ua faasilasila atu i le konafesi aoao.

O lea la ua na o se mea masani le ono tulimatai atu o le au paia i nisi suiga i lenei konafesi. Peitai o loo taulai atu taitai o le Ekalesia i se ituaiga suiga ese—o le suiga e mafai e le Faaola ona galue i totonu o i tatou taitoatasi.

O Se Aioi a se Perofeta

“Pe a fetalai mai Iesu ia te oe ma a’u ia ‘salamo,’ o loo Ia valaauliaina i tatou ia sui,” na saunoa ai Peresitene Nelson.

“... Ia iloa po o a mea na e *taofia* oe mai le salamo. Ona sui lea! Salamo! E mafai e i tatou uma ona faia ia lelei atu ma ia tatou lelei atu nai lo se isi lava taimi muamua.

- Faitau i le valaaulia a Peresitene Nelson ia salamo (itulau e 67).
- Mo nisi [faamatalaga] e uiga i le auala e mafai ona tatou olioli ai i faamanuiaga o le salamo, tagai i saunoaga mai ia:

- Peresitene Dallin H. Oaks (itulau 91)
- Peresitene Henry B. Eyring (itulau 22)
- Tad R. Callister (itulau 85)

Suiga i le Ekalesia

Na saunoa le tele o failauga e uiga i suiga na faasilasila mai muamua. Na uunaia i tatou e Peresitene M. Russell Ballard e aua nei leiloa ia “faamoemoega faaleagaga o nei fetuunaiga ona o le soona naunau i suiga lava ia.”

- Faitau i le valaaulia a Peresitene Ballard e taulai atu i upumoni faigo-fie o le talalelei (itulau 28).
- Aoao mai ia Elder Jeffrey R. Holland i le auala e tatau ai i le suiga o le faasologa o sauniga ona faaleleia ai lo tatou taulai atu i le faamanatuga (itulau 44).
- Saili mai ia Elder David A. Bednar ia taunuuga manaomia o le taulai atu i le aoaoina e faatotonugalemu i le aiga (itulau 101).
- Tagai i se lisi ua faapuupuaina o

suiga na faasilasila atu talu mai ona lagolagoina Peresitene Nelson o se Peresitene, ma mafaufau i o latou faamoemoega faaleagaga (itulau 121).

Malumalu Fou ma Malumalu e Toe Faaleleia

Na tapunia e Peresitene Nelson le konafesi i le faasilasila atu o malumalu fou e valu ma ni suiga tetele ua fuafuaina mo malumalu o le vaitau a paionia. Peitai na ia faamamafa atu le manaomia o le faaleleiga faaletagata lava ia. “Tau ina ia tatou faafouina o tatou olaga e ala i lo tatou faatuatua ma le faalagolago ia te Ia,” na ia saunoa mai ai.

- Faitau i malelega faaiua Peresitene Nelson (itulau 111).
- Sue le lisi o malumalu fou (itulau 124)
- Aoao atili e uiga i fuafuaga mo le Malumalu o Sate Leki i le Church of Jesus Christ.org/go/05194. [Mo gagana, faaoga news.Church of Jesus Christ.org.] ■





Sauniga o le Taeao o le Aso Toonai

SAUNIA E ELDER ULISSES SOARES
O Le Korama a Aposetolo e Toasefululua

E Mafai Faapefea Ona Ou Malamalama?

Pe a tatou saili e aoaoina ma le naunautai, malosi, mausali, ma le faamaoni le talalelei a Iesu Keriso ma aoao atu i le tasi ma le isi, e mafai e nei aoaoga ona liua loto.

O’u uso e ma tuafafine pele, oka se olioli ina a tele i le faatasi ai iinei i lenei konafesi aoao matagofie mo Le Ekalesia a Iesu Keriso o le Au Paia o Aso e Gata Ai i lalo o le taitaiga a lo tatou perofeta pele, o Peresitene Russell M. Nelson. Ou te molimau atu ia te outou o le a tatou maua le avanoa e faalogologo atu ai i le siufofoga o lo tatou Faaola o Iesu Keriso e ala i aoaoga a i latou e tatalo, pepese, ma lauga mai i manaoga o o tatou aso i lenei konafesi.

E pei ona tusia i le tusi o Galuega, sa aoao atu e Filipino le faievagelia le talalelei i se tagata patino Aitiopo se eunuka sa pule i oa taua uma na umia e le masiofo o Aitiopo.¹ Ina ua foi ane mai tapuaiga i Ierusalema, sa ia faitau i le tusi a Isaia. I le uunaia ai e le Agaga, sa faalatalata mai i ai Filipino ia te ia ma faapea atu, “Po ua e [malamalama] ea i mea ua [e] faitauina?”

“Ua fai mai [le eunuka], Ou te mafaia faapefea, pe a le faasino mai e se tasi ia te au? . . .

“Ona tautala atu lea o Filipino, ua

afua i lea lava Tusi ona folafola ia te ia o le tala lelei ia Iesu.”²

O le fesili sa fai atu e lenei tagata Aitiopo o se faamanatu o le tiute paia ua ia i tatou uma ia saili le aoaoina ma ia aoao atu e le tasi le isi i le talalelei a Iesu Keriso.³ O le mea moni, o le



aano o le aoao mai ma le aoao atu o le talalelei, o nisi taimi e pei ai i tatou o le tagata Aitiopo—tatou te manaomia le fesoasoani a se faiaoga faamaoni ma musuia; ma o nisi taimi e pei ai i tatou o Filipino—e manaomia ona tatou aoao atu ma faamalosia isi i lo latou liuaina.

O lo tatou faamoemoega a o tatou saili atu ia aoao mai ma aoao atu le talalelei a Iesu Keriso o le tatau lea ona faateleina le faatuatua i le Atua ma i Lana fuafuaga paia o le fiafia ma ia Iesu Keriso ma Lana taulaga togiola ma ia ausia ai le liuaina tumau. O sea faatuatua faateleina ma le liuaina o le a fesoasoani ia i tatou ia osia ma tausia feagaiga ma le Atua, o le mea lea e faamalosia ai lo tatou manao e mulimuli ia Iesu ma fatu ai se liuga moni faaleagaga i totonu o i tatou—i nisi upu, o le liuaina o i tatou i se tagata fou, e pei ona aoao mai ai le Aposetolo o Paulo i lana tusi i tagata Korinito.⁴ O lenei liuga o le a aumaia ia i tatou se fiafia sili, uluuluola, ma se olaga maloloina ma fesoasoani ai ia i tatou e faatumauina se vaaiga e faavavau. Pe le o le mea tonu ea lenei na tupu i le eunuka Aitiopo ina ua ia aoao e uiga i le Faaola ma liua ai i Lana talalelei? Fai mai le mau ua “alu foi ia i lana malaga ma le olioli.”⁵

O le poloaiga ia aoao mai ma aoao atu le talalelei i le tasi ma le isi e le fou; o loo faia pea lava pea talu mai le amataga o le talafaasolopito o tagata.⁶ I se tasi taimi patino, a o i ai Mose ma lona nuu i fanua valevalenoa o Moapi a o lei ulufale atu i le nuu folafolaina, sa musuia e le Alii o ia e apoapoai atu i lona nuu e faatatau i lo latou tiute-tauave e aoao tulafono ma feagaiga na latou maua mai le Alii ma ia aoao atu i a latou fanau,⁷ o le toatele o i latou sa le’i iloaina mo i latou lava le sopoiaina o le Sami Ulaula po o le faaaliga na tuu atu i luga o le Mauga o Sinai.

Sa apoapoai atu Mose i lona nuu:

“Israelu e, faalogologo mai ia i tulafono ma faamasinoga ou te aoao atu ai ia te outou tou te faia, ina ia outou ola ai ina ia outou o atu ai foi ma fai mo outou le nuu ua foaiina atu ia te outou e Ieova le Atua o outou tama. . . .

“ . . . Ia e [aoao] atu i lau fanau, ma fanau a lau fanau.”⁸

Ona faaiu lea e Mose, i le faapea atu, “O lenei, ia e tausiusi i ana tulafono ma ana poloaiga ou te fai atu ai ia te oe i le aso nei, ina ia manuia ai oe ma au fanau pe a mavae atu oe, ina ia e nofo tulu’i ai i le laueleele ua foai mai ia te oe e Ieova lou Atua i aso uma lava.”⁹

O loo faatonu mai pea e le aunoa e perofeta a le Atua e manaomia ona tatou tausii a’e o tatou aiga i le faafaile-lega ma le apoapoiga a le Alii¹⁰ ma “i le malamalama ma le upumoni.”¹¹ Sa saunua talu ai nei Peresitene Nelson, “I nei aso o le salalau solo o le ola lē mamā ma le vaisu o ponokalafi, ua i ai i matua se tiutetauave paia ia aoao a latou fanau i le taua o le Atua [ma Iesu Keriso] i o latou olaga.”¹²

Uso e ma tuafafine, o le lapataiga a lo tatou perofeta o se isi faamanatu o lo tatou tiutetauave faaletagata lava ia e saili le aoaoina ma ia aoao atu o tatou aiga o loo i ai se Tama i le Lagi e alofa ia i tatou ma o lē ua atiaaina se fuafuaga paia o le fiasia mo Ana fanau; o Iesu Keriso, o Lona Alo, o le Togiola o le lalolagi; ma o le faaolataga e sau mai le faatuatua i Lona suafa.¹³ O o tatou aiga e manaomia ona maua i luga o le papa o lo tatou Togiola, o Iesu Keriso, lea e mafai ona fesoasoani ia i tatou taitoatasi ma o ni aiga ia maua o tatou lava ia uunaiga faalecagaga ia mausali i o tatou loto, e fesoasoani ai ia i tatou ia tumau i lo tatou faatuatua.¹⁴

Atonu tou te manatuaina soo e toaula o Ioane le Papatiso ia sa mulimuli atu ia Iesu Keriso ina ua mavae ona faalogo atu i le molimau a Ioane o Iesu o le Tamai Mamoe a le Atua, o le Mesia. O nei tamalii lelei sa taliaina le valaaulia a Iesu ia “o mai inā matamata”¹⁵ ona latou mafuta lea ma Ia i lona aso. Sa oo ina la iloaia o Iesu o le Mesia, le Alo o le Atua ma mulimuli atu ia te Ia i o la olaga atoa.

I se tulaga faapea, pe a tatou taliaina le valaaulia a le Faalala ia “o mai ina matamata,” e manaomia ona tatou mafuta ma Ia, faatofu i tatou lava i tusitusiga paia, olioli i ai, aoao Lana aoaoga faavae, ma taumafai ia ola i le ala na Ia soifua ai. Ona faato’a mafai lea ona tatou iloa o Ia, o Iesu Keriso, ma iloa Lona siufofoga, ma le iloaia



a tatou o mai ia te Ia ma talitonu ia te Ia, o le a tatou lē fiaai lava pe fia feinu.¹⁶ O le a mafai ona tatou iloaitino le upumoni i taimi uma, e pei ona tupu i na soo e toaula na mafuta faatasi ma Iesu i lona aso.

Uso e ma tuafafine, e lē tupu fua lona mea. O le faaogatusaina o i tatou ma faatosinaga sili ona maua i luga o le amioatua e le o se mataupu faigofie; e manaomia ai le valaau atu i le Atua, ma aoaoina pe faapefea ona faatotonugalemuina le talalelei a Iesu Keriso i o tatou olaga. A tatou faia, ou te folafola atu o le faatosinaga a le Agaga Paia o le a aumaia le upumoni i o tatou loto ma mafaufau ma o le a molimau mai e uiga i ai,¹⁷ ma aoao mai mea uma.¹⁸

O le fesili a le Aitiopie, “Ou te mafaia faapefea [ona malamalama], pe a le faasino mai e se tasi ia te au?” o loo i ai foi se uiga faapitoa i le anotusi o lo tatou tiutetauave taitoatasi ia faatino mataupu faavae o le talalelei ua tatou aoaoina i o tatou olaga. I le tulaga o le Aitiopie, mo se faataitaiga, na ia faatinoina le upumoni na ia aoao mai ia Filipino. Sa talosaga atu o ia e papatiso. Ua oo ina ia iloa o Iesu Keriso o le Alo o le Atua.¹⁹

Uso e ma tuafafine, o a tatou amioga e tatau ona atagia atu i mea ua tatou aoao mai ma aoao atu. E manaomia ona tatou faaali atu o tatou talitonuga e ala i le auala o loo tatou ola ai. O le faiaoga silisili lava o se

tagata o faataitaiga lelei. O le aoao atu o se mea o loo tatou ola moni ai lava e mafai ona faia ai se eseesega i loto o i latou tatou te aoaoina. Afai tatou te mananao i tagata, pe o o tatou aiga pe leai, ia teumalu ma le olioli tusitusiga paia ma aoaoga a aposetolo ma perofeta soifua o o tatou aso i o latou loto, e manaomia ona latou vaaia o loo fiasia i ai o tatou agaga i na mea. E faapena foi, afai tatou te mananao ia latou iloa o Peresitene Russell M. Nelson o le perofeta, tagatavaai, ma talifaaaliga i o tatou aso, e manaomia ona latou vaaia i ai o tatou lima e lagolago o ia ma iloa o loo tatou mulimuli i ana aoaoga musuia. E pei ona fai mai le muāgagana lauiloa a Amerika, “E leotele atu faatinoga i lo upu.”

Atonu o nisi o outou o loo fesili ifo ia te outou i lenei lava taimi, “Elder Soares, ua leva ona ou faia nei mea uma ma ou mulimuli i lenei faataitaiga e le gata o a’u lava ia ae faapea foi o se aiga, ae paga lea, o nisi o a’u uo po o ē pele ia te a’u ua faataumamao i latou lava mai le Alii. O le a se mea e tatau ona ou faia?” Mo outou o loo lagoina i lenei lava taimi nei lagoina o le faanoanoa, tiga, ma atonu o le salamo, faamolemole ia iloa e le o leiloloa atoa latou ona o loo silafia e le Alii le mea o loo i ai i latou ma o loo leoleo ia i latou. Manatua, o i latou foi o Ana fanau!

E faigata ona malamalama i mafuaaga uma pe aisea ua savavali ese ai



nisi tagata i se isi ala. O le mea silisili e mafai ona tatou faia i nei tulaga o le alofa atu pea i ai ma talia i latou, tatalo mo lo latou manuia, ma saili mo le fesoasoani a le Alii ia iloa po o le a le mea e fai ma ta'u atu. Ia olioli ma le faamaoni faatasi ma i latou i o latou tulaga manuia; avea ma a latou uo ma tagai mo mea lelei ia i latou. E lē tatau ona tatou fiu ia i latou ae ia faasaoia a tatou mafutaga. Aua ne'i teenaina pe faamasino atu ia i latou. Tau lava o le alofa atu ia i latou! Ua aoao i tatou e le faataoto o le atalii faaamau oia e faapea a oo ina atamamai le fanau lava ia, e masani lava latou te manao e o mai i le fale. Afai e tupu lena mea i ē pele ia te oe, ia faatumulia o outou loto i le agaalofo, taufetuli atu ia i latou, fusi mai i latou, ma sogi ia i latou, e pei ona faia e le tama o le atalii faaamau oia.²⁰

Mea mulimuli, faaaauu pea ona ola i se olaga agavaa, ia avea ma se faataitaiga lelei o mea ua e talitonu i ai, ma ia faalatalata atili atu i lo tatou Faaola o Iesu Keriso. Ua Ia silafia ma malamalama i o tatou faanoanoaga ma tiga matuitui, ma o le a Ia faamanuia i a outou taumafaiga ma le tuuto atu i o outou aiga pele afai e le o le olaga nei, o le olaga a sau. Ia manatua pea, uso e ma tuafafine, o le faamoemoe o se vaega taua o le fuafuaga o le talalelei.

I le gasologa o le tele o tausaga o auaunaga i le Ekalesia, ua ou vaai i tagata faatuatua o le ekalesia o ē o loo faaogaina pea lava pea nei mataupu faavae i o latou olaga. O le tulaga lenei

sa tupu i se tina nofotoatasi o lē o le a ou ta'ua o "Maria." O le mea e faanoanoa ai, sa oo Maria i se tete'aga leaga. I lena taimi, sa iloa ai e Maria o ana faaiuga aupito sili ona taua e fesootei i lona aiga, o faaiuga faaleagaga. Pe o le tatalo, suesucina o tusitusiga paia, anapogi, ma le auai i le lotu ma le malumalu o le a faaaauu pea ona taua ia te ia?

Sa faamaoni pea Maria, ma i lena taimi sili ona ogaoga i lona olaga, sa ia filifili ai e piimau pea i mea na ia iloa e moni. Sa ia maua le malosi i le "O Le Aiga: O Se Folafofaga i le Lalolagi," lea e faatasi ma le tele o mataupu faavae matagofie, o loo aoao mai ai ua i ai i "matua se tiute paia e tausia a latou fanau i le alofa ma le amiotonu" ma ia aoao i latou ia tausia poloaiga a le Atua.²¹ Sa faaaauu pea ona ia saili atu mo ni tali mai le Alii ma faasoa atu na tali i lana fanau e toafa i faatasiga uma a le aiga. Sa latou talanoaina soo le talalelei ma fefaasoaai o latou aafiaga ma molimau i le tasi ma le isi.

E ui i faanoanoaga na latou oo i ai, ae sa atiae e lana fanau se alofa mo le talalelei a Keriso ma se manao e auauna atu ma faasoa atu i isi. O le toatolu o i latou sa auauna atu ma le faamaoni i ni misiona faamamaluina, ma o le uii o loo auauna atu nei i Amerika i Saute. O lona afafine ulumatua, lea ou te masani lelei lava i ai, ua faaipoipo nei ma o loo malosi lona faatuatua, na faasoa mai e faapea, "Ou te le'i lagonaina lava sa tausii a'e matou e lo'u tina na o ia ona sa i ai i taimi uma le Alii i lo matou

aiga. A o ia faasoa maia lana molimau e uiga ia te Ia, na amata ona matou liliu taitoatasi atu ia te Ia ma a matou lava fesili. Ou te matua faafetai na ia faia le talalelei ia ola i o matou olaga."

Uso e ma tuafafine, sa mafai e leni tina lelei ona faia lona aiga o se nofoaga autu o aoaoga faaleagaga. E talitutusa ma le fesili a le Aitiopie, sa fesili ai Maria ia te ia lava i le tele o taimi, "E mafai faapefea ona aoao la'u fanau se'i vagana ua taiala e se tina i latou?"

A'u soa pele i le talalelei, ou te molimau atu ia te outou pe a tatou saili e aoaoina ma le naunautai, malosi, mausali, ma le faamaoni le talalelei a Iesu Keriso faatasi ma aoao atu i le tasi ma le isi ma se faamoemoe moni ma faia i le faatosinaga a le Agaga, e mafai e nei aoaoga ona liua loto ma musuia ai se manao ia ola e tusa ma upumoni a le Atua.

Ou te molimau atu o Iesu Keriso o le Faaola o le lalolagi. O Ia o le Togiola, ma o loo soifua o Ia. Ou te iloa o loo Ia taitaia Lana Ekalesia e ala i Ana perofeta, tagatavaai, ma talifaaaliga. Ou te molimau atu ia te outou o loo soifua le Atua, e alofa o Ia ia i tatou. E finagalo o Ia ia tatou toe foi atu i Lona afioaga—i tatou uma. E faafogaga mai o Ia i a tatou tatalo. Ou te molimau atu ai i nei upumoni i le suafa o Iesu Keriso, amene. ■

FAAMATALAGA

1. Tagai i le Galuega 8:27.
2. Galuega 8:30–31, 35.
3. Tagai i le Mataupu Faavae ma Feagaiga 88:77–78, 118; 130:18–19; 131:6.
4. Tagai i le 2 Korinito 5:17.
5. Galuega 8:39.
6. Tagai i le Mose 6:52, 57–58; Teuteronome 4:5, 14; 5:1; Mataupu Faavae ma Feagaiga 43:8–9; 130:18–19; 136:32.
7. Tagai i le Teuteronome 4:10.
8. Teuteronome 4: 1, 9.
9. Teuteronome 4:40.
10. Efeso 6:4; Enosa 1:1.
11. Mataupu Faavae ma Feagaiga 93:40.
12. Russell M. Nelson, "Faalatalaga ma le Faaeaga," *Liahona*, Me 2008, 9.
13. Tagai i le Mosaea 3:9.
14. Tagai i le Helamana 5:12.
15. Tagai i le Ioane 1:38–39.
16. Tagai i le Ioane 6:35.
17. Tagai i le Ioane 16:13.
18. Tagai i le Ioane 14:26.
19. Tagai i le Galuega 8:37–38.
20. Tagai i le Luka 15:20.
21. "O Le Aiga: O Se Folafofaga i le Lalolagi," *Liahona*, Me 2017, 145.



SAUNIA E BECKY CRAVEN
Fesoasoani Lua i le Au Peresitene Aoao o Tāmaitai Talavou

Faaeteete faasaga i le Faasamasamanoa

A o faateleina le taliaina e faatosinaga a le lalolagi o mea leaga, e tatau ona tatou tauivi ma le filiga atoa ia tumau mausali i luga o le ala lea e taitai atua i tatou ma le saogalemu i le Faaola.

Sa i ai se taimi na ou vaaia ai se faailoga i se faamalama o se faleoloa na faapea mai: “Fiafia, \$15.00.” Sa matuai ou fia iloina po o le a le tele o le fiafia e mafai ona ou faatauina i le \$15.00 tala lea na ou alu ai i totonu e vaai. O mea sa ou maua o le tele o aitema taugofie ma suvania—e leai se mea se tasi na ou vaaia na mafai moni ona aumaia ia te a’u le ituaiga o fiafia lea na ta’u mai e le faailoga! I le aluga o tausaga, sa ou mafau fau i le tele o taimi e uiga i lena faailoga ma le faigofie o le mafai ona saili mo le fiafia i aitema e taugofie pe lē tumau. I le avea ai ma tagata o Le Ekalesia a Iesu Keriso o le Au Paia o Aso e Gata Ai, ua faamanuiaina i tatou e iloa le auala ma le mea e maua ai le fiafia moni. E maua i le ola ma le faaeteete i le talalelei na faavaeina e lo tatou Alii ma le Faaola, o Iesu Keriso, ma i le taumafai e avea e pei o Ia.

E i ai se ma uo pele o ia o se enisinia nofoaafi. I se tasi aso a o ia aveina se nofoaafi i lona ala, sa ia iloa atu se taavale o tu i luga o le auala nofoaafi i luma atu o ia. Sa vave ona ia iloa

ua mau le taavale ma sa le mafai ona kolosi le auala. Sa vave ona ia tuuina le nofoaafi i le tulaga o faalavelave faafuasei, lea e mau ai taofi o loo i ai i pusa-taavale taitasi ia e oo atu i le tolu kuata maila i tua atu o le afi, o loo aveina se uta e 6,500 tane (5,897 meta tane). Sa leai se avanoa faaletino e mafai ai e le nofoaafi ona tu a o le’i taiaina le taavale, lea lava na taia. O le mea e lelei ai mo tagata sa i totonu o le taavale, sa latou lagona le lapataiga o le faaila a le nofoaafi ma sosola ese ai mai le taavale a o le’i feto’ai. A o talanoa le enisinia ma le leoleo suesue, sa alu atu se fafine ita ia i laua. Sa ia ‘e’ē atu sa ia vaaia le faalavelave atoa ma molimau atu sa le’i taumafai le enisinia e liliu ese ma le auala ina ia faamisi le taavale!

E manino lava, a na mafai e le enisinia ona liliu ma tuua le auala nofoaafi ina ia aloese ai mai le faalavelave, semanu e oti o ia ma maumau lana nofoaafi atoa i le oso ese mai le auala ma semanu e tu faafuasei le nofoaafi a o masau i luma. O le mea e lelei ai mo ia, o u’amea o le auala ia e alu ai i luga lana

nofoaafi na taofimaua uili o le nofoaafi agai i luma i lona taunuuga e ui i le faafitauli sa i luga o lona auala. O le mea e lelei ai mo i tatou, o loo tatou i ai foi i luga o se auala, o se ala o feagaiga na tatou tuuto i ai ina ua papatisoina i tatou o ni tagata o Le Ekalesia a Iesu Keriso o le Au Paia o Aso e Gata Ai. E ui tatou te ono fetaiai ma faafitauli mai lea taimi i lea taimi i luga o le ala, ae o lenei ala o le a faatumauiina lo tatou agai i luma i lo tatou taunuuga tauia e faavavau pe afai tatou te tumau mausali ai i luga.

Ua faaaliga e le faaaliga o le laau o le ola ia i tatou le auala e mafai ai e aafiaga o le faasamasamanoa ona taitai ese i tatou mai le ala o feagaiga. Mafau-fau i le āi u’amea ma le ala lauitiiti ma le vaapiapi, po o le ala o feagaiga, e taitai sa’o atu i le laau o le ola, lea o loo i ai faamanuiaga uma ua saunia e lo tatou Faaola ma Lana Togiola ma ua avanoa mo ē faamaoni. Na iloa foi i le faaaliga se vaitafe na faatusa i le eleelea o le lalolagi. Ua faamatala e tusitusiga paia o lenei vaitafe e “tafe ane” i le ala ae e na ona “latalata” i le laau, ae e le oo i le laau. Ua tumu le lalolagi i mea faalavelave fau ia e mafai ona taufaasese e oo lava i ē ua filifilia, ia latou faasamasamanoa i le ola ai i a latou feagaiga—lea e taitai atu ai i latou e latalata i le laau, ae e le oo i le laau. Afai tatou te lē faaeteete i le ola ai i a tatou feagaiga ma le sa’olele, e ono taitai atu e a tatou taumafaiga faasamasamanoa i tatou i ala faasaina





po o le auai foi ma i latou ua ulu atu i le fale tele ma le ateatea. Afai tatou te lē faaeteete, e mafai foi ona tatou malelemo i le loloto o se vaiatafe eleelea.¹

O loo i ai se auala faaeteete ma se auala faasamasamanoa e faia ai mea uma, e aofia ai le ola i le talalelei. A o tatou iloilo ina la tatou tautinoga i le Faaola, o tatou faaeteete po o faasamasamanoa? Ona o lo tatou natura faaletino, pe tatou te le o fetuunaia ea tatou amioga i nisi o taimi, e i ai taimi e faasino i a tatou amioga o loo *feololo (e le lelei, e le leaga foi)* pe ua fefiloi foi le mea lelei ma se mea e le lelei tele? Soo se taimi lava tatou te faapea atu ai, “ae ui i lea,” “sei vagana” po o le “ae peitai” pe a faatatau i le mulimuli i fautuaga a o tatou taitai perofeta po o le ola ai ma le faaeteete i le talalelei, ua tatou fai atu moni lava, “O lena fautuaga e le faatatau ia te a’u.” E le mafai ona tatou fetuutuunaia mea uma tatou te mananao i ai, ae o le mea moni, *e leai ma se auala sa’o e fai ai le mea sese!*

O le autu a le autalavou mo le 2019 ua aumai mai le Ioane 14:15, lea o loo aoao mai ai le Alii: “Afai tou te alofa mai ia te au, ia outou tausii mai i a’u poloaiga.” Afai tatou te alolofa ia te Ia e pei ona tatou folafola atu, e lē mafai la ona tatou faaalua lena alofa e ala i sina faaeteete atili i le ola ai i Ana poloaiga?

O le faaeteete i le ola ai i le talalelei e le faapea o le fiamamalu po o le fiatagata. Ae o lona uiga o le faatauagafau i o tatou mafaufauga ma amioga i le avea ai ma soo o Iesu Keriso. A o tatou mafaufau loloto i le eeseesega i le va o

le faaeteete ma le faasamasamanoa i lo tatou ola ai i le talalelei, o nisi nei o manatu e mafaufau i ai:

O tatou faaeteete ea i a tatou tapuaiga o le aso Sapatii ma i a tatou sauniuniga e taumamafa i le faamanatuga i vaiaso taitasi?

E mafai ona tatou faaeteete atili i a tatou tatalo ma suesuega o tusitusiga paia po o le punouai mataalia atili i le *Sau, Mulimuli Mai ia te Au—Mo Tagata Taitoatasi ma Aiga?*

O tatou faaeteete ea i a tatou tapuaiga i le malumalu, ma pe o tatou ola ea ma le faaeteete ma le manatu tonu i feagaiga na tatou osia uma i le papatisoga ma i le malumalu? O tatou faaeteete ea i o tatou foliga vaaia ma tauagafau i o tatou laei, aemaise i nofoaga ma tulaga paia? O tatou faaeteete ea i le auala o tatou laeiina ai ofu malumalu paia? Pe o sitaile a le lalolagi na e faatonuina se uiga faasamasamanoa atili?

O tatou faaeteete ea i le auala o loo tatou auauna atu ai i isi ma i le auala o loo tatou faataunuuna ai o tatou valaauga i le Ekalesia, pe o tatou lē popole pe faasamasamanoa i o tatou valaauga e auauna atu?

O tatou faaeteete po o faasamasamanoa i mea tatou te faitau i ai ma mea tatou te matamata ai i luga o le TV ma i luga o a tatou masini feaveai? O tatou faaeteete ea i a tatou gagana? Pe o tatou taliaina faasamasamanoa gagana masoā ma pa’a’a?

O loo i ai i le tamaitusi o le *Mo Le Malosi o le Autalavou* tulaga faatonuina ia, afai e mulimulitaia ma le faaeteete,

o le a aumaia faamanuiaga silisili ma fesoasoani ia i tatou e tumau ai i luga o le ala o feagaiga. E ui sa tusia mo le manuia o le autalavou, ae o ona tulaga faatonuina e lē muta ai iina pe a tatou tuua polokalama a Alii Talavou ma Tamaitai Talavou. E faatatau ia i tatou taitoatasi i taimi uma. O se toe iloilo o nei tulaga faatonuina e mafai ona musuia ai isi auala e mafai ai ona tatou faaeteete atili i lo tatou ola ai i le talalelei.

Tatou te lē tuua i lalo o tatou tulaga faatonuina ina ia faafetaui ai i isi pe ia lagona ai le toafimalie o se isi tagata. O tatou o soo o Iesu Keriso, ma i le avea ai ma soo, o le tatou tiute o le siitia o isi, siitia i latou i se nofoaga maua luga atu ma paia atu lea e mafai foi ona latou selesese ai i faamanuiaga silisili.

Ou te valaaulia i tatou taitoatasi ia saili atu i le taitaiga a le Agaga Paia ia iloa ai po o a fetuunaiga e manaomia ona tatou faia i o tatou olaga ina ia faaeteete atili e faaogatusa ma a tatou feagaiga. Ou te augani atu foi ia te outou ina ia ‘aue ne’i faitio i isi o loo i ai i lena lava faigamalaga e tasi. “O le faamasinoga e a au ia, ua fetalai mai ai le Alii.”² O loo i ai taitoatasi i tatou i le faagasologa o le tuputupu a’e ma suiga.

O le tala ua faamatalaina i le Tusi a Mamona e uiga i le liliu ese o sa Amiliki, e mata’ina ia te a’u. I se auala e ta’u atu ai i isi ua lē toe fesootea i latou ma Iesu Keriso ma Lana Ekalesia, sa latou tuu ai se faailoga manino lanu mumu i o latou muauulu mo tagata uma e vaai i ai.³ I se auala faafeagai, ma i le avea ai ma soo o Iesu Keriso, e faapefea ona tatou faailogaina i tatou lava? E mafai ea e isi ona vaaiagofie Ona fofoga i o tatou foliga ma iloa po o ai o tatou sui ai e ala i le auala tatou te faatautaia ai ma le faaeteete o tatou olaga?

I le avea ai ma se nuu o le feagaiga, e le o faamoemoeina i tatou ia milo faatasi ma le lalolagi. Ua ta’ua i tatou o ni “tagata filifilia”⁴—e ma’eua lea faamamaluga! A o faateleina le taliaina e faatosinaga a le lalolagi o mea leaga, e tatau ona tatou tauivi ma le filiga atoa ia tumau mausali i luga o le ala lea e taitai atu i tatou ma le saogalemu i le Faaola, ma le faalauteleina o le mamao

i le va o lo tatou ola i feagaiga ma faatosinaga faalelalolagi.

A o ou mafaufau i le mauaina o le fiafia tumau, ua ou iloa ai o nisi taimi tatou te taumafai ai e ta'uamiotonu a tatou filifiliga lē lelei. O puao o le pogisa e lē ma'alofia a o tatou malaga ai i luga o le ala o feagaiga. E mafai e faaosoosoga ma le faasamasamanoa ona uunaia i tatou e suia lemu lo tatou ala agai i le pogisa o le lalolagi ma ō ese mai le ala o feagaiga. Mo taimi atonu e tupu ai lenei mea, ua uunaia i tatou e lo tatou perofeta pele, o Peresitene Russell M. Nelson, ina ia toe foi mai i luga o le ala o feagaiga ma ia vave ona fai. E maeu lo'u faafetai mo le meaalofo o le salamo ma mo le mana o le Togiola a lo tatou Faaola.

E le mafai ona ola i se olaga atoatoa. E na o le tasi le tagata sa mafai ona soifua atoatoa a o i ai i luga o lenei paneta telesitila. O Iesu Keriso lea. E ui tatou te lē atoatoa, uso e ma tuagane, ae mafai ona tatou agavaa: agavaa e taumafa i le faamanatuga, agavaa mo faamanuiaga o le malumalu, ma agavaa e maua faaaliga faaletagata lava ia.

Sa molimau mai le Tupu o Peni-amina e uiga i faamanuiaga ma le fiafia e oo mai ia i latou o ē mulimuli ma le faateete i le Faaola: “Ma e lē gata i lea, ou te manao ia outou manatunatu i le tulaga manuia ma le fiafia o i latou o e e tausi i poloaiga a le Atua. Aua faauta, e faamanuiaina i latou i mea uma, i mea uma faaletino ma faaleagaga; ma afai latou te tutumau i le faamaoni e oo i le iuga, e talia i latou i le lagi, ina ia mafai ona latou mau faatasi ma le Atua i se tulaga o le fiafia e lē gata.”⁵

E mafai ea ona faatau le fiafia i le \$15.00 tala? Leai, e le mafai. E oo mai le fiafia loloto ma tumau e ala i le ola ai ma le manatu tonu ma le faateete i le talalelei a Iesu Keriso. I le suafa, o Iesu Keriso, amene. ■

FAAMATALAGA

1. Tagai i le 1 Nifae 8; 15.
2. Mamona 8:20.
3. Tagai i le Alema 3:4.
4. 1 Peteru 2:9.
5. Mosaea 2:41.



SAUNIA E ELDER BROOK P. HALES
O Le Fitugafulu

O Tali i Tatalo

E silafia e le Tama i tatou, silafia o tatou manaoga, ma o le a fesoasoani atoatoa mai ia i tatou.

O se aoaoga faavae taua ma toafimalie o le talalelei a Iesu Keriso e faapea, o loo i ai i lo tatou Tama Faalelagi se alofa atoatoa mo Lana fanau. Ona o lena alofa atoatoa, e le gata ua Ia faamanuiaina i tatou e tusa ma o tatou manao ma mea e manaomia ae e tusa foi ma Lona atamai e lē mafuatia. E pei ona ta'ua manino e le perofeta o Nifae, “Ua ou iloa e alofa [le Atua] i ana fanau.”¹

O se tasi o vaega o lena alofa atoatoa o le aofia ai o lo tatou Tama Faalelagi i auiliiliga o o tatou olaga, e tusa lava pe tatou te lē iloina pe malamalama i ai. Tatou te sailia le taitaiga faalelagi ma le fesoasoani a le Tama e ala i le tatalo faatauina ma le faamaoni.

A tatou faamamaluina a tatou feagai-ga ma taumafai ia avea atili e faapei o lo tatou Faaola, ua tatou agavaa i se gasologa faifai pea² o taitaiga faalelagi e ala i faatosinaga ma musumusuga a le Agaga Paia.

Ua aoao mai i tatou e tusitusiga paia: “Auā ua silafia e lo outou Tamā mea ua outou matitiva ai, a o lei ole atu outou ia te ia,”³ ma ua Ia “silafia mea uma, aua ua i luma o [Ona fofoga] mea uma.”⁴

O le perofeta o Mamona o se faataitaiga o lenei mea. Sa le'i ola o ia e vaai i taunuuga o ana galuega. Ae sa ia malamalama sa taitai ma le faateete o ia e le Alii. Ina ua musuia





fiafia, sa ou tusi atu ia te ia ma fai i ai e foai ese le peleue talu ai e le mafai ona ia faaaogaina.

Na ma maua mulimuli ane le imeli lenei mai ia te ia: “E matuā, malūlū lava iinei. . . . O le matagi e foliga mai e sau sa’o i totonu o i matou, e ui o lo’u peleue fou e maoae ma fai sina mamafa. . . . Na ou tuuina atu la’u [peleue] tuai i [se isi faifeautalai i la matou falemautotogi] o lē sa fai mai sa ia tatalo mo se auala e maua ai se peleue lelei atu. O ia o se tagata liliu mai i nai tausaga ma e na o lona tina . . . ma le faifeautalai na papatisoina o ia o loo lagolagoina o ia i lana misiona ma o le peleue o se tali lea i se tatalo, o lea na ou matuai fiafia ai.”⁶

Na silafia e le Tama Faalelagi o lenei faifeautalai, sa auauna atu i Farani i le 6,200 maila (10,000 kilomita) le mamao mai le aiga o le a manaomia vave se peleue fou mo se taumalulu i Pale ae na leai se tupe i lenei faifeautalai e faatau ai se [peleue]. Na silafia foi e le Tama Faalelagi o le a maua e lo ma atalii mai le faleoloa lavalava i Provo, se peleue o le a matuā laitiiti lava. Na Ia silafia o le a auauna faatasi nei faifeautalai e tolua i Pale ma o le peleue o le a avea ma tali i le tatalo lotomauualalo ma faamaoni a se faifeautalai lea sa i ai se manaoga vave.

Sa aoao mai le Faola:

“E le faitaulia [ea] ni manu iti se lua i le asari? e leai foi so laua e pa’ū i le eleele e aunoa ma lo outou Tama.

“A o outou lauulu lava ua faitaulia uma ia.

“O lea aua tou te matatau ai; e sili outou i manu iti e tele.”⁷

I isi tulaga, pe a le tuuina mai o tatou manaoga agavaa i le auala na tatou faamoemoe i ai, atonu o le mea moni e mo lo tatou lelei silisili. Mo se faataitaiga, o Iosefa le atalii o Iakopo sa lotoleagaina ma itagia e ona uso ma oo ai ina latou fuafuaina le fasiotiga o Iosefa. Ae, sa latou faatauina atu o ia o se pologa i Aikupito.⁸ Afai e i ai se tagata na lagonaina sa le’i taliina ana tatalo i le auala na ia faamoemoe i ai, masalo o Iosefa. O le mea moni, o le lē manuia na ia oo i ai na tupu mai ai ni faamanuiaga maoae ia te ia ma faasaoina ai lona aiga mai le matelaina. Mulimuli ane, ina ua avea o ia ma se taitai

o ia e faaaofia papatusi laiti a Nifae i ana faamaumauga, na tusia e Mamona: “Ma ua ou faia lenei mea mo se faamoemoega poto, ona ua faapea ona musuia ai o a’u, e tusa ma galuega a le Agaga o le Alii ua ia te a’u. Ma o lenei, ou te le iloa mea uma; ae ua silafia e le Alii mea uma e oo mai; o le mea lea, ua galue ai o ia ia te a’u ia ou faia e tusa ai ma lona finagalo.”⁵ E ui lava sa le’i iloa e Mamona le leiloloa ai o itulau e 116 o tusitusiga, na silafia e le Alii ma na saunia se ala e foia ai a o le’i taitai ona tupu.

E silafia e le Tama i tatou, silafia o tatou manaoga, ma o le a fesoasoani atoatoa mai ia i tatou. O nisi taimi e tuuina mai lena fesoasoani i le taimi lava lena po o se taimi vave pe a maea ona tatou ōle atu mo le fesoasoani faalelagi. O nisi taimi o o tatou manaoga faamaoni ma agavaa e lē taliina mai i le auala tatou te faamoemoe i ai, ae tatou te iloa e i ai faamanuiaga silisili a le Atua ua faapolopoloina. Ma o nisi taimi, o a tatou manaoga amiotonu e lē tuuina maia i lenei olaga. O le a ou faaali atu ni tala eseese se tolu o auala e mafai ona tali mai ai lo tatou Tama i le Lagi i a tatou aioiga faamaoni ia te Ia.

Na valaauina lo ma atalii uii e auauna atu o se faifeautalai i le Misiona a Pale i Farani. I tapenaga ina ia auauna atu, sa matou o ma ia e faatau mea masani, o ofutino, suti, fusiua, totini, ma se peleue. Ae paga lea, o le peleue sa ia manao ai sa le’i maua ai le telē na ia manaomia. Peitai, sa ta’u mai e le tagata faigaluega o le faleoloa o le a maua le peleue i ni nai vaiaso ma o le a tiliva atu i nofoaga autu e aoao ai faifeautalai i Provo a o le’i malaga atu lo’u atalii mo Farani. Sa matou totogia le peleue ma lē toe mafaufau i ai.

Na ulufale lo ma atalii i le nofoaga autu e aoao ai faifeautalai ia Iuni, ma na tilivaina atu le peleue i nai aso a o le’i oo i lona taimi faatulagaina e malaga ai ia Aokuso. Na te le’i faataitaia le peleue ae na teu faatopetope i totonu o lana ato faatasi ma ana lavalava ma isi aitema.

Ina ua oo mai le taumalulu i Pale, lea sa auauna atu ai lo ma atalii, na ia tusi mai ia i maua sa ia toso maia i fafo le peleue, faamaulu, ma iloa ai e laitiiti tele. O lea sa ao ai ona ma teuina se isi tupe i lana teugatupe i le faletupe ina ia mafai ona ia faatauina se isi peleue i Pale, lea sa ia faia. Faatasi ai ma sina lē

faatuatua i Aikupito, ma le faatuatua tele ma le potō na ia fai atu ai i ona uso:

“O lenei, aua ne’i tiga outou, pe fai ma mea leaga i o outou manatu ina ua outou faatau mai ia te a’u i le mea nei; auā na auina mai a’u e le Atua e muamua ia te outou e fai ma faaola.

“Aua o ia tausaga e lua ua i ai le oge i le nuu, o loo totoe foi tausaga e lima e le i ai se galuega i le suasolo po o se seleselegasaito.

“Na auina mai foi a’u e le Atua e muamua ia te outou e faasaina outou i le lalolagi, e faaola foi ia te outou i le faaolataga tele.

“O lenei, e le o outou na auina mai a’u iinei, a o le Atua.”⁹

A o i ai i le kolisi, sa faigaluega lo ma atalii ulumatusa i se galuega faavaitaimi manaia a tamaiti aoga lea na faamoemoe e taitai atu i se galuega tumau matagofie pe a maea le faauuga. Na ia galue malosi i lenei galuega a tamaiti aoga mo le fa tausaga, na maua luga le agavaa, ma sa faaaloaloga tele e ana tagata faigaluega ma supavaisa. I le faaiuga o lana tausaga faaii, e pei ona fuafuaina mai le lagi (o le manatu lea a lo ma atalii), na tatata ai le avanoa tumau ma o ia, ma o ia o le sui ta’imua, e moni lava, faatasi ai ma faailoga uma ma faamoemoe, o le a ia mauaina le galuega.

Ia, sa le’i maua e ia. E leai se isi o i matou na malamalama ai. Sa lelei lana tapenaga, lelei le faatalanoaga, o ia le sui sili ona agavaa, ma sa tatata ma le faamoemoe tele ma le talitonuga! Sa matua lofituina ma olopalaina, ma o le mea atoa na tupu matou te le’i malamalama ai. Aisea na tuulafoai ai e le Atua o ia i lona manaoga amiotonu?

Sa le’i iloa seia oo i ni nai tausaga mulimuli ane lea na matua manino mai ai le tali. A na faapea na te mauaina le galuega na moemiti i ai i le maea ai o le faauuga, semanu na te misia se avanoa taua tele na suia ai le olaga lea ua faamaonia nei ua avea ma ona manuia e faavavau. Na silafia e le Atua le faaiuga mai le amataga (e pei ona Ia silafia i taimi uma), ma i lenei tulaga, o le tali i le tele o tatata amiotonu o le leai, ina ia maua se taunuuga silisili atu.

Ma o nisi taimi, o le tali i tatata tatou te sailia ma le amiotonu,

naunautai, ma le faamaoni e le tuuina mai i lenei olaga.

Sa fanau mai Sister Patricia Parkinson o lelei lana vaai, ae i le fitu o tausaga sa amata ai ona tauaso o ia. I le iva o tausaga, na amata auai ai Pat i Aoga i Iuta mo le au Logonoa ma Tauaso i Ogden, Iuta, 90 maila (145 km) mai lona aiga, lea na ao ai ona ia nofotumau i le a’oga—lea sa aafia ai ia ma’i manatu uma e mafai ona lagona e se iva tausaga le matua.

E oo atu i le 11 tausaga, ua le toe mafai atoa ona vaai. Na toe foi Pat i le aiga i le 15 o tausaga e auai i lana a’oga maua luga i le lotoifale. Sa alu i le kolisi ma faauu ma se faailoga maua lalo i faaletonu o fesootaiga ma faalemafau-fau, ma i le maea ai o se tauiviga lototoa e faasaga i taitai masalosalo o le ofisa a le iunivesite, sa ia ulufale atu ai i le aoga faauu ma faamaea se tikeri matuaofaiva i suesuega o faafitauli o gagana tautala. O loo galue nei Pat ma tamaiti aoga e 53 o le aoga tulaga lua ma vaavaia ni

tagata faatekinolosi se toafa o gagana tautala i lana aoga i le itumalo. E i ai lana ia lava fale ma lana ia lava taavale, lea e aveina e uo ma tagata o le aiga pe a manaomia e Pat ona malaga i se mea.

I le 10 o tausaga, na fuafuaina e maua e Pat se isi togafitiga faafomai e taulimaina ai lana vaai ua faaitiitia. Sa ta’u atu lava e ona matua ia te ia mea tonu o le a tupu e tusa ai ma ana togafitiga faafomai, ae mo ni mafuaaga, la te le’i tauina atu ia te ia e uiga i lenei faagasologa faapitoa. Ina ua ta’u atu e ona matua ia te ia ua uma ona faatula-gaina le faagasologa, fai mai lona tina, “sa lē fiafia” Pat. Na tamoe atu Pat i le isi potu ae na toe foi mai mulimuli ane ma fai mai i ona matua faatasi ma sina ita, “Se’i o’u ta’u atu ia te oulua. Ou te iloa, e silafia e le Atua, e ao foi la ona oulua iloa. O le a ou tauaso i lo’u olaga atoa!”

I nai tausaga talu ai, na malaga ai Pat i Kalefonia e asiasi i aiga o ē na aumau ai iina. A o i ai i fafo ma le atalii





o lona tuagane e tolu tausaga, sa ia fai atu ia te ia, “Aunt Pat, aisea e te le fai atu ai i le Tama Faalelagi e avatu ia te oe ni mata fou? Auā a e fai atu i le Tama Faalelagi, o le a Ia avatu ia te oe soo se mea e te manao ai. Tau lava o lou fai atu ia te Ia.”

Na fai mai Pat sa faate’ia o ia i le fesili ae sa tali atu, “Ia, o nisi taimi e le galue le Tama Faalelagi faapena. O nisi taimi e manaomia e Ia ona e aoao se mea, o lea e Na te lē tuu atu ai ia te oe mea uma e te manao ai. O nisi taimi e tataua ona e faatalitali. E sili atu le silafia e le Tama Faalelagi ma le Faaola o mea e lelei mo i tatou ma mea tatou te manaomia. O le mea lea, La te le tuuina maia ia te oe mea uma e te manao ai i le taimi e te manao ai.”

Ua ou iloa Pat mo le tele o tausaga ma sa ta’u atu ia te ia talu ai nei ou te faamemelo i le mea moni faapea, e lelei ma fiafia o ia i taimi uma lava. Sa ia tali mai, “Ia, e te le’i i ai i le fale faatasi ma a’u, a ea? E i ai a’u lava taimi faapitoa. Na ou matua tauivi ma faanoanoaga, sa tele na ou tagi.” Peitai, sa ia faaopoopo mai, “Mai le taimi na amata ai ona ou le iloa se mea, sa ‘ese lava, ae sa ou iloa sa faatasi mai le Tama Faalelagi ma le Faaola i lo’u aiga ma a’u. Sa matou

taulimaina i le ala sili na matou mafaia, ma i lo’u manatu, na matou taulimaina i le auala sa’o. Ua i’u lava ina avea a’u ma se tagata faamanuiaina, ma ua masani lava o a’u o se tagata fiafia. Ou te manatua le i ai o Lona aao i mea uma. Ia i latou o ē fesili mai pe ou te ita ona ua ou tauaso, ou te tali atu: “O ai ou te ita i ai? O loo i ai le Tama Faalelagi faatasi ma a’u i lenei malaga; e lē o tuua na o a’u. O loo faatasi o Ia ma a’u i taimi uma.”

I lenei tulaga, o le manao o Pat ina ia toe vaai e lē tuuina mai i lenei olaga. Ae o lana mau tauave, na aoaoina mai i lona tama, o le “E mavae atu foi lenei mea.”¹⁰

Na ta’ua e Peresitene Henry B. Eyring, “Ua silafia e le Tama i lenei lava taimi outou, o o outou lagona, faatasi ai ma manaoga faaleagaga ma faaletino o tagata uma o siomiaina outou.”¹¹ E mafai ona maua lenei upumoni maoae ma toafimalie i aafiaga e tolu na ou ta’ua.

Uso e ma tuafafine, o nisi taimi e vave ona tali mai a tatou tatolo faatasi ai ma le taunuuga na tatou faamoemoe i ai. O nisi taimi, e lē tali mai a tatou tatolo i le auala na tatou faamoemoe i ai, ae i le gasologa o taimi tatou te

aoao ai o loo i ai faamanuiaga silisili a le Atua ua saunia mo i tatou nai lo mea na tatou muai faamoemoeina. Ma o nisi taimi o a tatou aioiga amiotonu i le Atua o le a lē tuuina mai i lenei olaga.¹² E pei ona saunoa mai Elder Neal A. Maxwell, “O le faatutua foi e aofia ai le faalagolago i le taimi a le Atua.”¹³

Ua ia i tatou le faamautinoaga e faapea o Lana lava ala ma i Lana lava taimi, o le a faamanuia mai i tatou e le Tama Faalelagi ma foia o tatou popolega uma, faailoga tagata, ma ni lē fiafia.

Na faapea mai le Tupu o Peniamina: “Ma e lē gata i lea, ou te manao ia outou manatunatu i le tulaga manuia ma le fiafia o i latou o e e tausi i polo-aiga a le Atua. Aua faauta, e faamanuiaina i latou i mea uma, i mea uma faaletino ma faaleagaga; ma afai latou te tutumau i le faamaoni e oo i le iuga, e talia i latou i le lagi, ina ia mafai ona latou mau faatasi ma le Atua i se tulaga o le fiafia e lē gata. E, ia manatua, ia manatua lava ua moni nei mea; ona ua fetalai mai ai le Alii le Atua.”¹⁴

Ou te iloa e faafofoga mai le Atua i a tatou tatolo.¹⁵ Ou te iloa i le avea ai o se Tama alofa e silafia mea uma, e tali atoatoa mai o Ia i a tatou tatolo, e tusa ai ma Lona atamai e lē mafuatia, ma i auala o le a avea ai ma o tatou manuia silisili ma faamanuiaga. Ou te molimau atu ai i le suafa o Iesu Keriso, amene. ■

FAAMATALAGA

- 1 Nifae 11:17; tagai foi i le 1 Ioane 4:8.
- 2 Tagai i le Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 93–96.
- 3 Mataio 6:8.
- 4 Mataupu Faavae ma Faaigaiga 38:2.
- 5 Upu a Mamona 1:7.
- 6 Tusitusiga patino.
- 7 Mataio 10:29–31.
- 8 Tagai Kenese 37:20, 26–28.
- 9 Kenese 45:5–8.
- 10 Mai se faatalanoaga patino ma Patricia Parkinson, 10 Tes., 2018.
- 11 Henry B. Eyring, “Maua Lona Agaga e Faatasi ma Outou,” *Liahona*, Me 2018, 86–89.
- 12 Tagai i le Jeffrey R. Holland, “O Se Faitaulaga Sili i Mea Lelei Atali,” *Liahona*, Ian. 2000, 42–45.
- 13 Neal A. Maxwell, “Ne’i Faavaivai o Outou Loto ma Outou Le Lavatia,” *Liahona*, Iulai 1991, 96.
- 14 Mosaea 2:41.
- 15 Tagai i le “Power of Prayer,” mormon.org/beliefs/power-of-prayer.



SAUNIA E ELDER DIETER F. UCHTDORF
O Le Korama a Aposetolo e Toasefululua

Galuega Faafaifeautalai: Faasoaina Atu o Mea o Loo i totonu o Lou Loto

*Po o fea lava o e i ai i lenei lalolagi, e anoanoai
avanoa e faasoa atu ai le tala fiafia o le talalelei
a Iesu Keriso.*

I le masina ua te'a sa valaaulia ai le Toasefululua e lo tatou perofeta pele, o Peresitene Russell M. Nelson, e faimalaga faatasi ma ia i le faapaiaga o le Malumalu o Roma Italia. A o faimalaga ai sa ou mafaufau i le Aposetolo o Paulo ma ana malaga. I ona aso, ina ia sau mai Ierusalem i Roma, masalo e ono alu ai le 40 aso. I aso nei, i se tasi o a'u vaalele e sili ona ou fiafia i ai, e itiiti ifo ma le 3 itula.

E talitonu le au popoto o le Tusi Paia sa i ai Paulo i Roma i le taimi na ia tusia ai le tele o ana tusi, ia na avea ma ki i le faamalolosia o tagata o le Ekalesia i na taimi faapea ai ma nei aso.

O Paulo ma isi tagata o le Ekalesia anamua, o *Uluai Au Paia*, sa masani lelei ma osigataulaga. E toatele sa matua sauaina, na oo lava i le oti.

I le 200 tausaga talu ai, sa oo ai foi tagata o le Ekalesia toefuataiina a Iesu Keriso, le *Au Paia o Aso e Gata Ai*, i le tele o ituaiga o sauaga. Ae ui i na sauaga (ma o nisi taimi ona o na sauaga), ua faaaauai ai pea ona tuputupu a'e Le Ekalesia a

Iesu Keriso o le Au Paia o Aso e Gata Ai, ma ua maua ai nei i le lalolagi atoa.

E Tele Na'ua Mea e Fai

Peitai, ae tatou te le'i taoina se keke, fai se pati, ma faamālō ia i tatou lava mo lenei manuia ofoofogia, o le a sili ona lelei lo tatou tuuina o lena tuputupu a'e i se vaaiga manino.

E masalo e fitu ma le afa piliona tagata i le lalolagi, e faatusatusa i sina 16 miliona tagata o Le Ekalesia a Iesu Keriso o le Au Paia o Aso e Gata Ai—o se tama'i lafu itiiti lava.¹

O le taimi lenei, o le aofai o tagata Kerisiano i nisi o vaega o le lalolagi ua faaitiitia.²

E oo lava i le Ekalesia toefuataiina a le Alii—e ui o loo faaaauai pea ona tuputupu a'e le faitau aofai o tagata aoao—ua toatele tele tagata ua lē mauaina faamanuiaga o le auai faisoo i le Ekalesia.

I nisi upu, po o fea lava o e i ai i lenei lalolagi, e anoanoai avanoa e faasoa atu ai le tala fiafia³ o le talalelei a Iesu Keriso i tagata tou te feiloai i ai, aoga faatasi, ma nonofo faatasi pe faigaluega ma tafafao faatasi.

I le tausaga ua mavae, sa ou maua ai le avanoa fiafia ina ia auai punouai ai i gaoioiga a faifeautalai o le Ekalesia i le laolagi atoa. E tele lava ina ou mafaufau loloto ma tatalo e uiga i le poloaiga sili a le Faaola i Ona soo: “O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Alo, ma le Agaga Paia.”⁴

Sa ou tauivi ma le fesili “E mafai faapefea e i tatou, o tagata o le ekalesia ma soo o Keriso, ona faataunuuna sili lena poloaiga sili i o tatou olaga i aso taitasi?”

O le asō ou te valaaulia ai outou ia mafaufau loloto i lena fesili lava e tasi i lou loto ma le mafaufau.⁵





O Se Meaalofa mo le Galuega Faafaifeautalai

Ua faamamafa pea e taitai o le Ekalesia le valaau manino “O tagata uma o se faifeautalai!” mo le tele o tausaga.⁶

O tagata o le Ekalesia a Iesu Keriso—i taimi uma ua tuanai faapea ai ma o tatou taimi—ua faasoa atua ma le naunautai ma le olioli le talalelei i uo ma ē masani. E mumū o latou loto i le molimau ia Iesu Keriso, ma e latou te mananao faamaoni i isi ia lagonaina lea lava olioli e tasi ua latou mauaina i le talalelei a le Faaola.

O nisi tagata o le Ekalesia e foliga mai ua i ai se meaalofa mo lenei mausa. E fiafia i latou e avea ma amapasa o le talalelei. Latou te auauna atu ma le lototoa ma le fiafia ma taitai le galuega o ni faifeautalai o le au paia.

Peitai, o isi o i tatou e matua palaai lava. A talanoaina le galuega faafaifeautalai i fonotaga a le Ekalesia, e punonou lemu ifo a i lalo ulu seia oo ina leiloa atu i tua o nofoa, o mata ua sioa i tusitusiga paia pe moeini foi ma mafaufau loloto ina ia aloese ai mata mai le vaai sao atu i isi tagata.

Aisea e fai ai lena mea? Atonu tatou te lagona le ta’usalaina mo le lē faia o nisi mea se tele atu e faasoa atu ai le talalelei. Masalo tatou te lagona le lē

mautonu pe faapefea ona fai. Pe tatou te lagona foi le fefe e o ese atu i fafo i o tatou tulaga toafimalie.

Ou te malamalama i lenei mea.

Ae manatua, e le o manaomia lava e le Alii ni taumafaiga faafaifeautalai tomai faapitoa ma atoatoa. Ae, “e manaomia e le Alii le loto ma le mafau-fau malie.”⁷

Afai o loo e fiafia lava i le faiga o le galuega faafaifeautalai, faamolemole faaauau pea, ma tu atu o se faataitaiga i isi. O le a faamanuia outou e le Alii.

Peitai, afai e te lagonaina ua tatoso ou vae pe a oo mai i le faasoaia atu o le savali o le talalelei, e mafai ona ou fautua atu ni mea se lima e lē ta’usalaina e mafai ona faia e soo se tasi e auai ai i le poloaiga sili a le Faaola e fesoa-soani ai e faapotopoto Isaraelu?

Lima Fautuaga Faigofie

Muamua, faalatalata i le Atua. O le poloaiga muamua ma le sili o le alofa lea i le Atua.⁸ O le mafuaaga autu lea ua tatou i ai i lenei lalolagi. Fesili ifo ia te oe lava ia, “Ou te talitonu moni ea i le Tama Faalelagi?”

“Ou te alofa ea ma faalagolago ia te Ia?”

O lou latalata atili i lo tatou Tama Faalelagi, o le susulu atili mai foi lena

o Lona malamalama ma le olioli mai totonu ia te oe. O le a matauina e isi o loo i ai se mea tulagaese ma faapitoa e uiga ia te oe. Ma o le a latou fesili e uiga i lena mea.

Lua, faatumu lou loto i le alofa mo isi. O le poloaiga lona lua lena ma le sili.⁹ Taumafai ia vaai atu moni i tagata uma o siomia ai oe o se atalii o le Atua. Auauna atu ia i latou—e tusa lava pe i ai o latou igoa i lisi o uso po o tuafafine o auaunaga pe leai.

Taliē faatasi ma i latou. Olioli faatasi ma i latou. Fetagisi faatasi ma i latou. Faaaloalo ia i latou. Faamalolo, siitia, ma faamalolosia i latou.

Tauivi e faataitai le alofa o Keriso ma maua le agaalofa mo isi—e oo lava ia i latou e agaleaga atu ia te oe, o ē faatauemu atu ia te oe ma mananao e faamanua ia te oe. Alofa ia i latou ma taulima i latou o isi foi fanau a le Tama Faalelagi.

Tolu, tauivi e savavali i le ala o le avea ma soo. A o faalolotoina lou alofa mo le Atua ma Ana fanau, e faapena foi lou tautinoga e mulimuli ia Iesu Keriso.

E te aoa o Ona ala e ala i le taumafa fiafia i Ana afioga ma faalogo ma faa-aoga aoaoga a perofeta ma aposetolo o aso nei. E te tuputupu a’e i le to’afimalie ma le lototele e mulimuli i Ona ala a o

tatou fesootai ma le Tama Faalelagi i se loto aoaoina.

O le savali ai i le ala o le ave ma soo e manaomia ai faatinoga—i aso taitasi, sina mea itiiti, “alofa tunoa mo le alofa tunoa,”¹⁰ “i lea fuaiupu ma lea fuaiupu.”¹¹ O nisi taimi e lua laa i luma ma le laa e tasi i tua.

O le mea e taua ia e lē faavaivai; ia taumafai pea ia faia ia sa’o. O le a i’u lava ina e lelei atili, fiafia atili ma sili ona faamaoni. O le talanoa faatasi ma isi e uiga i lou faatuatuaga o le a oo ina ave ma natura masani. O le mea moni, o le talalelei o le a ave ma se vaega taua ma faapelepele o o outou olaga lea o le a lagona ai o se mea e le masani ai le lē talanoa i isi e uiga i le talalelei. Atonu e le tupu lena mea i se taimi vave—o se taumafaiga i le olaga atoa. Ae o le a tupu lava.

Fa, faasoaina atu o mea o loo i totonu o lou loto. Ou te le o fai atu e te alu e te tu i luga o le auala tele ma se sipika faaleotele leo ma faitau leotele ai fuaiupu o le Tusi a Mamona. O le mea o loo ou fai atu ai o lou tagai lea i taimi uma mo ni avanoa e talanoaina ai lou faatuatuaga i ni fesootaiga tupu fua ma masani ai ma tagata—faafesagai ma tagata faapea ai ma luga i le initoneti. O loo ou talosaga atu ia outou “tutu o ni molimau”¹² o le mana o le talalelei i taimi uma—ma pe a talafeagai ai, ia faaaga upu.¹³

Ona “o le talalelei a Keriso . . . o le mana o le Atua i le olataga,” e mafai ona to’afimalie, lototetele, ma loto-mauualalo pe a e faasoa atua.¹⁴ O le to’afimalie, lototele, ma le lotomauualalo atonu e foliga mai e pei o ni uiga feteenai, ae e leai. O loo atagia atu i nei uiga le valaaulia a le Faaola ia lē natiaina tulaga faatauaina o le talalelei ma mataupu faavae i lalo i le mea e tuu ai saito ae ia faasusulu atu lo outou malamalama, ina ia viia ai lo tatou Tama i le Lagi i a tatou galuega lelei.¹⁵

E tele lava auala masani ma tupu fua e faia ai lenei mea, mai faatinoga i aso taitasi o le agalelei i molimau a le tagata lava ia i luga o le YouTube, Facebook, Instagram, po o le Twitter i talanoaga faigofie ma tagata tou te fetau i ai. O lenei tausaga o loo tatou aoaoina

ai le Feagaiga Fou i totonu o o tatou aiga ma le Aoga Sa. Oka se avanoa inā ofoofogia o le valaaulia o uo ma tuaoi e o mai i le lotu ma o outou aiga e aoao ai e uiga i le Faaola faatasi ma outou. Faasoa atu ia i latou le Gospel Library app, lea latou te maua ai le *Sau, Mulimuli Mai ia te Au*. Afai tou te iloina ni autalavou ma o latou aiga, ave i ai le tamaitusi o le *Mo le Malosi o le Autalavou*, ma valaaulia i latou ia o mai e vaai pe o faapefea ona taumafai a tatou talavou e ola i na mataupu faavae.

Afai e fesili se tasi e uiga i le faaiuga o lou vaiaso, aua le faatuai ona talanoa i ai e uiga i mea e te lagonaina i le lotu. Faamatala i ai le fanau iti o ē tutū i luma o se faapotopotoga ma pepese ma le naunautai i le auala o loo latou taumafai ai ia pei o Iesu. Talanoa e uiga i le vaega o talavou o ē faaalu le taimi e fesoasoani ai i tagata āumatuā i nofoaga mo tagata matutua e tuufaatasi ni talaga faaletagata lava ia. Talanoa e uiga i suiga talu ai nei i le faasologa o sauniga o le Aso Sa ma le auala ua faamanuiaina ai lou aiga. Pe faamalamalama atu i ai le mafuaaga tatou te faamamafaina ai o le Ekalesia lenei a Iesu Keriso ma o i tatou o le *Au Paia* o Aso e Gata Ai, e pei lava ona ta’ua foi tagata o le Ekalesia anamua o le *Au Paia*.

Po o a lava auala e foliga mai e tupu fua ma masani ai ia te oe, faasoa atu i tagata pe aisea e taua ai Iesu Keriso ma Lana Ekalesia ia te oe. Valaaulia i latou ia “*omai ina matamata*.”¹⁶ Ona uunaia lea o i latou e o mai ma fesoasoani. E anoa-noai avanoa nei mo tagata e fesoasoani ai i le tatou Ekalesia.

Aua le tatalo mo na o faifeautalai ia mauaina ē filifilia. Tatalo i aso uma ma lou loto atoa ia e maua i latou o le a o mai inā matamata, o mai ma fesoasoani, ma o mai ma nonofo. Manatua ia faaauai pea faifeautalai faamisiona. E pei i latou o agelu, ua sauni e fesoasoani mai!

A o e faasoa atua le tala fiafia, ia e faia lava i le alofa ma le onosai. Afai o tatou fegalegaleai ma tagata ma se faamoemoega atoa o le a le pine ae latou ofuina se ofusoloatoa paepae ma fesili mai mo se faasinoala i le vai papatiso sili ona lata ane, o loo sese la le tatou faiga.

O nisi e o mai ma matamata masalo o le a lē auai lava i le Ekalesia; o nisi o le a auai i se taimi mulimuli ane. O le latou filifiliga lena. Ae lē faapea la e suia ai lo tatou alolofa mo i latou. Ma e lē suia ai a tatou taumafaiga naunautai e faaauau pea le valaaulia o tagata taitoatasi ma aiga ia o mai inā matamata, o mai ma fesoasoani, ma o mai ma nonofomau.

Lima, faalagolago i le Alii ia galue Ana vavega. Ia e malamalama e le o sau galuega le liuaina o tagata. O le matafaioi lena a le Agaga Paia. O lau matafaioi o le faasoa atu o mea o loo i totonu o lou loto ma ola ia tutusa ma ou talitonuga.

O lea, aua ne’i e lotovaivai pe afai e lē taliaina vave e se tasi le savali o le talalelei. E le o se toilalo patino.

O le mea lena e i le va o le tagata ma le Tama Faalelagi.

Ae o oe, ia e alofa i le Atua ma ou tuaoi.

Talitonu, alofa, fai.

Mulimuli i lenei ala, ma o le a faia e le Atua ni vavega e ala atu ia te oe e manuia ai Lana fanau faapelepele.

O nei fautuaga e lima o le a fesoasoani ia te oe e fai ai mea na faia e soo o Iesu Keriso talu mai aso anamua. O Lana talalelei ma Lana Ekalesia o se vaega taua o lou olaga ma le tagata e i ai oe ma mea e te faia. O le mea lea, valaaulia isi ia o mai inā matamata ma o mai ma fesoasoani, ma o le a faia e le Atua Lana galuega laveai, ma o le a latou o mai ai ma nonofomau.





Ae Ā Pe Afai e Faigata?

Atonu e te fesili, “Ae ā pe afai ou te faia nei mea uma ae lē lelei le tali mai o tagata? Ae ā pe afai e faitio i latou i le Ekalesia? Ae ā pe afai latou te lē toe fiauo ia te a’u?”

Ioe, e ono tupu na mea. Talu mai aso anamua, sa sauaina lava soo o Iesu Keriso.¹⁷ Sa fai mai le Aposetolo o Peteru, “[Olioli a o] . . . tofusua outou faatasi i tiga o Keriso.”¹⁸ Sa olioli na uluai Au Paia “ina ua ta’uaogaina i latou ia [puapuagatia i le maasiasi] ona o lona suafa.”¹⁹

Manatua, e galue le Alii i auala faalilolilo. Atonu o lou tali atu FaaKeriso i se faatautee mai, e mafai ai ona faamalūlūina se loto ma’a’a.

I le avea ai ma se Aposetolo a le Alii o Iesu Keriso, ou te faamanuia ia te outou i le *to’afimalie* e avea ai ma se molimau ola o tulaga faatauaina o le talalelei, faatasi ma le *lototele* ina ia iloa ai oe i taimi uma o se tagata o Le Ekalesia a Iesu Keriso o le Au Paia o Aso e Gata Ai, faatasi ai ma le *lotomaua-lalo* e fesoasoani ai i Lana galuega e avea o se faailoaga o lou alofa mo le Tama Faalelagi ma Lana fanau.

A’u uo pele, o le a outou olioli i le iloina o outou o se vaega taua i le faapotopotoina o Isaraelu ua loa ona muaita’u mai, sauniaina o le afio mai o Keriso i le “mana ma le mamalu tele; faatasi ai ma agelu paia uma.”²⁰

E silafia oe e le Tama Faalelagi. E alofa le Alii ia te oe. O le a faamanuia oe e le Atua. O lenei galuega ua faauiina e Ia. E mafai ona e faia lenei mea. E mafai ona tatou faia uma faatasi lenei mea.

Ou te molimau atu ai i le suafa o Iesu Keriso, amene. ■

FAAMATALAGA

1. Na vaai le perofeta maoae o Nifae i le faaaliga lea na ui lava na salalau atu le Ekalesia a le Tamai Mamoe a le Atua “i luga o le lalolagi atoa,” ona o le amioleaga i le lalolagi o lona aofai atoa “o [le a] ititi” (1 Nifae 14:12 tagai foi i le Luka 12:32).
2. Mo se faataitaiga, o se suesuega talu ai nei e le Pew Research Center na maua ai i totonu o le Iunaita Setete, “o le pasene o tagata matutua (vaitausaga 18 ma matutua atu) o ē na faamatalaina i latou lava o ni Kerisiano na pa’ū i le toeitiiti valu pasene i le na o le fitu tausaga, mai le 78.4% i le . . . 2007 i le 70.6% i le 2014. I le aluga o le vaitau lava lea e tasi, o le pasene o tagata Amerika e le fesootai ma se lotu—e faamatalaina i latou lava o ni tagata e le talitonu i le Atua (atheist), agnostic pe ‘leai foi se vaega patino’—na oso i luga i le silia ma le ono pasene, mai le 16.1% i le 22.8%” (“America’s Changing Religious Landscape,” Pew Research Center, May 12, 2015, pewforum.org).
3. O le upu *talalelei* o lona uiga o le “tala fiafia.” O le tala fiafia o Iesu Keriso na faia se Togiola atoatoa o le a togiolaina ai tagata uma mai le tuugamau ma tauia ai tagata taitoatasi e tusa ai ma ana galuega. O lenei Togiola sa amata i Lana taimi faatulagaina i le muai olaga, sa faaauau i Lona soifuaga faaletino, ma faamutaina ai i Lona Toetu mamalu. O faamaumauga faatusi paia o Lona

soifuaga faaletino, auaunaga, ma le taulaga ua ta’ua o Evagelia: Mataio, Mareko, Luka, ma Ioane.

4. Mataio 28:19.

5. “E moni Ou te fai atu ia te outou, o a’u uo, Ou te tuu atu nei upu ia te outou tou te mafaufau i ai i o outou loto” (Mataupu Faavae ma Feagaiga 88:62).

“Faauta, Ou te fai atu ia te oe, e ao ina e suesue i ai i lou mafaufau; ona ao lea ona e ole mai ia te a’u pe ua sao, ma afai ua sao, o le a Ou faia ia mu lou loto i totonu ia te oe; o lea, o le a e lagona ai ua sao” (Mataupu Faavae ma Feagaiga 9:8).

6. Sa uunaia e Peresitene Tavita O. MaKei “tagata uma [ia avea] o se faifeautalai” a o ia pulefaamalumalu i le Misiona a Europa mai le 1922 i le 1924, ma na ia faasoa atu ai lena lava savali e tasi i le Ekalesia i le konafesi aoao i le amataga o le 1952 (tagai i le “Every Member a Missionary” Motto Stands Firm Today,” *Church News*, Feb. 20, 2015, news.ChurchofJesusChrist.org).

7. Mataupu Faavae ma Feagaiga 64:34.

8. Tagai i le Mataio 22:37–38.

9. Tagai i le Mataio 22:39.

10. Mataupu Faavae ma Feagaiga 93:12.

11. Isaia 28:10.

12. Mosaea 18:9.

13. O lenei manatu e tele ina faamamaluina ai Sagato Faranisisi o Assisi; tagai foi i le Ioane 10:36–38.

14. Roma 1:16.

15. Tagai i le Mataio 5:15–16.

16. Ioane 1:46; ua faapoopoo le faamamafa.

17. Tagai i le Ioane 15:18.

18. 1 Peteru 4:13, Lomiga Laugatasia FaaPeretania; tagai foi i fuaiupu 1–19 mo nisi faamatalaga e uiga i le auala e tatau ai ona tagai soo o Keriso i mafatiaga ona o le talalelei.

19. Galuega 5:41.

20. Mataupu Faavae ma Feagaiga 45:44.



SAUNIA E BISHOP W. CHRISTOPHER WADDELL
Fesoasoani Lua i le Au Epikopo Pulefaamalumalu

E Pei ona sa Ia Faia

A tatou saili e auauna atu e pei ona sa la faia, o le a tatou maua avanoa e faagalo ai i tatou lava ae siitia a'e isi.

Pe tusa ma le 18 masina talu ai, i le tautoulu o le 2017, na faailoa mai ai e lo'u uso o Mika e 64 tausaga ua maua o ia i le kanesa o le ate. Sa ia ta'u mai ia te a'u sa ia maua se faamanuiaga faaleperisitua mai lona faiaoga o aiga, lea sa la feiloai foi ma lana epikopo. Sa ia tesi mai foi ia te a'u se ata o le Malumalu o Oakland Kalefonia na pu'e mai le falema'i i le mea sa faia ai ona togafitiga, ma le faaupuga "Tagai i le mea e mafai ona ou vaai i ai mai lo'u potu i le falema'i."¹

Sa ou te'i i ana faamatalaga e uiga i faiaoga o aiga, faamanuiaga

faaleperisitua, epikopo, ma malumalu e pei lava foi e uiga i le kanesa. Tou te silafia, o Mika, o se ositaulaga i le Perisitua Arona, na seasea auai i le lotu mo le toeitiiti 50 tausaga.

I le avea ai ma se aiga, sa toetoe tutusa le matou naunau atu i lona alualu i luma faaleagaga e pei o lona alualu i luma i le tauviga ma le kanesa, masalo ona o ana fesili faisoo i le taimi nei e uiga i le Tusi a Mamona, le mana o faamauga, ma le olaga pe a mavae le oti. A o faagasolo masina ma sosolo pea le kanesa, o se manaoga mo nisi togafitiga sili atu ona faapitoa na

aumai ai Mika i Iuta ma le Huntsman Cancer Center.

I se taimi puupuu talu lona taunuu, na asia ai Mika e John Holbrook, taitai misiona a le uarota lea e i ai le nofoaga tausimai lea o loo ia nofo ai nei. Fai mai John, "na manino ia te a'u o Mika o se atalii o le Atua" ma sa lei umi ae la atia'e se sootaga ma se faigauo, lea na oo atu ai i le avea o John ma uso o auau-naga mo Mika e ui e le'i tofia. Sa i ai se valaaulia vave e asiasi mai faifeautalai, lea na teena ma le faaaloalo e lo'u uso, ae o le masina talu le la faigauo, na toe fesili ai John, ma faamalamalama atu ia Mika, "Ou te manatu o le a e fiafia e faalogo i le savali o le talalelei."² O le taimi la lea na taliaina ai le valaaulia, ma taitai atu ai i feiloaiga faifaiepa ma faifeautalai, atoa ai foi ma asiasiga mai ia Epikopo Jon Sharp, o ana talanoaga na i'u ina taitai atu ai i le mauaina e Mika o lona faamanuiaga faapeteriaka, 57 tausaga talu lona papatisoga.

I le amataga o Tesema o le tausaga ua mavae, i le mavae ai o masina o togafitiga, na filifili ai Mika e taofi togafitiga o le kanesa, lea e mafua ai ni aafiaga ogaoga, ae tuu po o a lava taunuuga e oo i ai. Sa faailoa mai ia i matou e lana foma'i pe toe tolu masina e ola ai Mika. I lea lava taimi, sa faaauau pea fesili o le talalelei—faapena foi ma asiasiga ma le lagolago o ana taitai perisitua i le lotoifale. I a matou asiasiga ia Mika e masani ona matou vaaia se kopi o le Tusi a Mamona o tatala i luga o le laulau o le moega a o matou talanoa i le Toefuataiga o le talalelei, ki o le perisitua, sauniga o le malumalu, ma le natura e faavavau o le tagata.

E oo atu i le ogatotonu o Tesema, faatasi ai ma lona faamanuiaga faapeteriaka i lona lima, na foliga mai ua maua e Mika le malosia ma o lona faamoemoe ia aulia se isi tolu masina na foliga lelei mai. Sa matou faia foi ni fuafuaga mo ia e faatasi ma i matou mo le Kerisimasi, le Tausaga Fou ma tala atu. I le aso 16 o Tesema, sa ou maua se valaau faate'ia mai ia Epikopo Sharp, e ta'u mai ai ia te a'u sa la faatalanoaina ma le peresitene o le siteki ia Mika, o loo agavaa o ia e maua le Perisitua Mekisateko, ma fesili mai po o afea ou te avanoa ai e





auai atu. Sa faatulagaina le sauniga mo le Aso Faraile, aso 21 o Tesema.

Ina ua oo i lea aso, sa ma tau-nuu atu ma lo'u toalua, o Carol, i le nofoaga tausimai ma faafuasei lava ona faafeiloai ma'ua i le auala savali e lata i lona potu ma logo mai ai e le o tata [le fatu] o Mika. Sa ma ulu atu i le potu ma tau atu i le peteriaka, lona epikopo, ma lona peresitene o le siteki o loo faatali mai—ona pupula mai lea o Mika. Sa ia iloina a'u ma faailoa mai e mafai ona ia lagonaina mai a'u ma ua sauni ina ia maua le perisitua. Limasefulu tausaga talu ona faauuina Mika o se ositaulaga i le Perisitua Arona, sa ou maua le avanoa, ma le fesoasoani a ona taitai faalelotoifale, e faaee atu ai le Perisitua Mekisateko ma faauuina lo'u uso i le tofi o le toaaina. I le lima itula mulimuli ane, na maliu ai Mika, ma laasia ai le veli e feiloai ma o ma'ua matua o se tasi e umia le Perisitua Mekisateko.

I le na o le tasi le tausaga ua mavae, na tuuina mai ai se valaau e Perisitene Russell M. Nelson mo i tatou taitoatasi e tausia o tatou uso ma tuafafine i se "auala maua atu, ma paia atu."³ O le talanoa ai e uiga i le Faaola, na aoao mai ai Perisitene Nelson faapea "ona o Lana Ekalesia lenei, o i tatou o Ana auauna o le a auauna atu i le tasi, e pei ona sa Ia faia. O le a tatou auauna atu i Lona suafa, i Lona mana ma le pule, ma i Lona agalelei alofa."⁴

I le tali atu i le valaaulia a se perofeta a le Atua, o loo faagasolo ni taumafaiga ofoofogia e auauna atu ai i le toatasi i le lalolagi atoa, i taumafaiga tuufaatasia uma, a o faataunuu ma le faamaoni e tagata o le ekalesia o latou tofiga faaleaunaga, faapea foi ma le mea ou te ta'ua o le auaunaga "e lei fuafuaina", faapea ma le tele o le faaaliga o le alofa FaaKeriso i le tali atu i avanoa e le'i faamoemoeina. I lo matou lava aiga, sa matou molimauina patino, leni ituaiga o auaunaga.

E masani ona ta'u e John, lea sa avea ma se peresitene o le misiona, le uo a Mika ma le uso o auaunaga, i ana faifeautalai faapea, "afai e fai mai se tasi o loo i le lisi 'e le o manao i ai,' aua e te faavaivai ai. E suia tagata." Ona ia ta'u mai lea ia i matou, "na maoae le suiga o Mika."⁵ Na muamua avea John ma se uo, tuuina atu faamalosiuga ma le lagolago faifai pea—ae sa le'i muta lana auaunaga i asiasiga faaleuo. Na silafia e John o se auaunaga e sili atu nai lo se uo ma e faalauteleina lena faigauo a o tatou auauna atu.

E le manaomia mo se tasi o mafatia mai se ma'i o loo lamatia ai le ola ona manaomiaina se tautua faaleaunaga. O na manaoga e oo mai i foliga eseesee, tetelē, ma tulaga eseesee. O se matua nofotoatasi, se ulugalii e le toaaga mai, se talavou o loo tauivi, tina lofituina, se tofotofoga o le faatuatua, faafitauli tau tupe, soifua maloloina, po o

faaipoipoga—e toetoe lava a le muta le lisi. Peitai, faapei o lo'u uso o Mika, e leai lava se tasi ua oo i se tulaga e le manaomia ai se fesoasoani, ma e le o tuai lava mo le aapa mai ma le alofa o le Faaola.

Ua aoaoina i tatou i le uepisaite o Auaunaga a le Ekalesia faapea, "e ui ina tele faamoemoega o le auaunaga, ae o a tatou taumafaiga e tatau ona taialaina e le manao e fesoasoani i isi e ausia se liua loloto patino ma avea atili ai e pei o le Faaola."⁶ Sa saunoa mai Elder Neal A. Maxwell i le ala lenei:

"O se tagata e i ai se loto lelei e mafai ona fesoasoani i se tasi e fai se pa'u [ua pa], ave se tuaoi i le fomai, fai se taumafataga o le aoauli ma se tasi o faanoanoa, pe 'ata'ata ma fai atu talofa e faafiafia ai se aso.

"Ae o sē mulimuli i le poloaiga muamua o le a faaopoopo lava e pei ona masani ai i nei faatinoga taua o le auaunaga."⁷

O le mamaluina ai o a tatou auu-naga ia Iesu Keriso, e taua ona manatua o Ana taumafaiga e alofa, siitia, auauna atu, ma faamanuia atu sa i ai se sini maua atu nai lo o le taulimaina o le manaoga vave. Na Ia silafia manino lava o latou manaoga i lea aso ma lea aso ma sa i ai le agaalofa i o latou mafatiaga i le taimi a o Ia faamaloloina, fafaga, faamagalalo, ma aoao atu. Ae sa finagalo o Ia e faia ni mea se tele atu nai lo o le taulimaina o le asō. Na Ia finagalo

ia i latou na siomiaina o Ia e mulimuli atu ia te Ia, iloa o Ia, ma ausia o latou faamoemoega paia.⁸

A tatou saili e auauna atu “e pei ona sa Ia faia,”⁹ o le a tatou maua avanoa e faagalo ai i tatou lava ae siitia a’e isi. O nei avanoa atonu e tele ina lē faigofie, o le tofotofoina o lo tatou manao ia avea atili faapei o le Matai, o lē ana le auau-naga silisili o auau-naga uma, o Lana Togiola le i’u, sa le’i faigofie. I le Mataio mataupu 25, ua faamanatu mai ai ia i tatou lagona o le Alii e uiga ia i tatou, pe a pei o Ia, tatou te nofouta i tauiviga, tofotofoga, ma luitau o fetaiai ma le toatele, ae e masani ona laaloa ai le vaai:

“O mai ia, o outou ua faamanuiaina e lo’u Tama, ia fai mo outou tofi le malo ua saunia mo outou a o lei faavacina le lalolagi:

“Aua na ou fia ‘ai ona outou avane ai lea ni mea ou te ‘ai ai; na ou fia inu, ona outou avane ai lea ni vai ou te inu ai, sa fai a’u ma tagata ese, ona outou talia lea o a’u. . .

“Ona tali mai ai lea ia te ia o e amio-tonu, e faapea mai, Le Alii e, o anafea ua matou iloa ai oe ua fia ‘ai ma matou fagina oe? po o fia inu, ma matou avane e te inu ai?

“O anafea foi na matou iloa ai oe o le tagata ese, ma matou talia oe? . . .

“Ona tali atu ai lea o le Tupu, e faapea atu ia te i latou, E moni, ou te fai atu ia te outou, aua na faia e outou i le tasi o e aupito itiiti o o’u uso nei, o a’u lea na outou faia i ai.”¹⁰

Pe o tatou auauna atu o ni uso po o tuafafine o auau-naga, pe na o le taimi lava tatou te iloa ai se tasi o mafatia, ua uunaia i tatou e saili le taiala ma le taitaiga a le Agaga—ona faatinoa lea. Atonu tatou te mafaufau po o le a le auala sili e auauna atu ai, ae e silafia e le Alii, ma e ala atu i Lona Agaga o le a taitaiina ai i tatou i a tatou taumafaiga. E pei o Nifae, o lē “sa taitai. . . e le Agaga, ona sa ou le muai iloa muamua mea e tatau ona [ia] faia,”¹¹ o le a taitaiina foi i tatou e le Agaga a o tatou taumafai e avea ma meafaigaluega i aao o le Alii e faamanuia Ana fanau. A o tatou saili atu i le taitaiga a le Agaga ma faalagolago i le Alii, o le a tuu i tatou i ni tulaga ma avanoa e mafai ai ona



tatou galulue ma faamanuia atu—i nisi upu, auauna atu.

Atonu e i ai nisi taimi tatou te iloa ai se manaoga ae lagona e le gafatia ona tali atu i ai, ma manatu ai e lē lava mea ua ia i tatou e ofo atu. O le faia “e pei ona sa Ia faia”¹² o le auauna atu lea e ala i le tuuina atu o mea tatou te mafai ona tuuina atu ma faatuatuaaina o le a faalateleina e le Alii a tatou taumafaiga e faamanuia “ē o tatou tagata malaga faatasi i lenei faigamala o le olaga.”¹³ Mo nisi, atonu o le tuuina atu o le meaalofo o taimi ma taleni; mo isi, atonu o se upu alofa po o se fesoasoaniga faaletino. E ui atonu tatou te lagona le lē lava o a tatou taumafaiga, ae na faasoa mai e Peresitene Dallin H. Oaks se mataupu faavae taua e faatatau i le “laitiiti ma faatauvaa.” Na ia aoao mai faapea o galuega laiti ma faatauvaa e mamana ona latou te valaauliaina “le mafutaga a le Agaga Paia,”¹⁴ o se soa e faamanuia uma lē e foai ma lē e taliaina.

O le iloina o le a lē umi ae maliu o ia, na fai mai ai lo’u uso o Mika, “E ofo-fogia le ala e mafai ai e le kanesa o le ate ona faia oe ia e taulai atu i mea e sili ona taua.”¹⁵ Faafetai i alii ma tamaitai lelei o ē na iloa atu se manaoga, sa le’i faamasino atu, ae na auauna atu faapei o le Faaola, sa le’i tuai lea mo Mika. Mo nisi, o suiga e ono oo vave mai; mo isi,

masalo o tua atu o le veli. Peitai, e tatau ona tatou manatua e le tuai lava ma e leai se tasi ua sē mamao ese mai le ala latou te lē mafai ai ona maua le Togiola le i’u a Iesu Keriso, lea e lē faatapulaaina lona umi ma le lautele.

I le konafesi aoao ia Oketopa ua te’a, na aoao mai ai Elder Dale G. Renlund faapea “pe o le a le umi tatou te le’i i ai i le ala . . . o le taimi lava tatou te filifili ai ia sui, e fesoasoani mai le Atua ia tatou toe foi mai.”¹⁶ Peitai, o le filifiliga e sui e masani lava o le taunuuga o se valaaulia, e pei o le “ou te manatu o le a e fiafia e faalogo i savali o le talalelei.” E pei lava ona le o tuai tele mo le Faaola, e le o vave tele foi e tuuina atu se valaaulia.

Ua toe tuuina mai foi i lenei vaitau o le Eseta, se avanoa mamalu e tomanatu ai i le taulaga togiola maoae a lo tatou Faaola o Iesu Keriso, atoa ai ma mea sa Ia faia mo i tatou taitoatasi i se tau maoae—o se tau na tautino mai lava e Ia “na oo ai ia te [Ia], o le ua silisili i tagata uma, le gatete ona o le tiga.” “E ui i lea,” na Ia fetalai mai, “sa Ou inu ma faauma ai a’u tapenapenaga mo le fanauga a tagata.”¹⁷

Ou te molimau atu ona ua Ia “faaumaina,” e lē muta le faamoemoe. I le suafa, o Iesu Keriso, amene. ■

FAAMATALAGA

1. Liua patino.
2. Talanoaga ma John Holbrook.
3. Russell M. Nelson, “Malelega Amata,” *Liahona*, Nov. 2018, 6.
4. Russell M. Nelson, “Auauna Atu i le Mana ma le Pule a le Atua,” *Liahona*, Me 2018, 69.
5. Talanoaga ma John Holbrook.
6. Mataupu Faavae o le Auaunaga: O Le Faamoemoega O Le A Suia Ai A Tatou Auaunaga,” *Liahona*, Ian. 2019, 8; tagai foi i le ministering.ChurchOfJesusChrist.org.
7. Neil L. Andersen, “A Holier Approach to Ministering” (Brigham Young University devotional, Apr. 10, 2018), 3, speeches.byu.edu.
8. Tagai i le “O Le Faamoemoega O Le A Suia Ai A Tatou Auaunaga,” 8–10.
9. Tagai i le 3 Nifae 17:9–10, 20–21.
10. Mataio 25:34–35, 37–38, 40.
11. 1 Nifae 4:6.
12. Tagai i le 3 Nifae 17:9–10, 20–21.
13. Thomas S. Monson, “Alofa—o le Ute o le Talalelei,” *Liahona*, Me 2014, 91.
14. Dallin H. Oaks, “O Mea Laiti ma Faatauvaa,” *Liahona*, Me 2018, 90.
15. Liua patino.
16. Dale G. Renlund, “Ina Filifili Ia o Outou i le Aso Nei,” *Liahona*, Nov. 2018, 106.
17. Mataupu Faavae ma Feagaiga 19:18–19.



SAUNIA E PERESITENE HENRY B. EYRING
Fesoasoani Lua i le Au Peresitene Sili

O se Aiga e Afio ai le Agaga o le Alii

O le a e mauaina nisi o olioli silisili i au taumafaiga ia faia lou fale o se nofoaga o le faatuatua i le Alii o Iesu Keriso ma se nofoaga e faatumulia i le alofa.

Ou uso e ma tuafafine pele, ou te faafetai lava ua valaauliaina a'u e lauga atu ia te outou i lenei Konafesi Aoao Faaletausaga Lona 189 o Le Ekalesia a Iesu Keriso o le Au Paia o Aso e Gata Ai. I lenei aso i le 1830, sa faatulagaina ai e Iosefa Samita le Ekalesia i lalo o le taitaiga a le Alii. Sa faia i le fale o le aiga o Uitimera i Feiete, Niu Ioka. E toaono tagata o le ekalesia ma pe tusa e 50 isi tagata naunau sa i ai iina i lenei aso.

E ui ou te le iloa po o a mea na saunoa i ai le Perofeta o Iosefa pe faape'i foi ona fofoga a o tu i luma o lenei vaega toalaiti, ae ou te iloa mea sa lagonaina e na tagata faatuatua ia Iesu Keriso. Sa latou lagonaina le Agaga Paia, ma sa latou lagonaina sa latou i ai i se nofoaga paia. Sa latou lagonaina moni lava sa autasi i latou i le loto e tasi.

O lenei lagona faavavega o le mea lea tatou te manaomia uma i totonu o o tatou aiga. O se lagona e oo mai, e pei ona faamatalaina e Paulo, o le "loto i la le Agaga."¹

O lo'u faamoemoega i le aso o le aoao atu lea o mea ua ou iloa i auala

e mafai ai ona tatou agavaa mo lenei lagona ia maua soo ma valaaulia ia tumau i totonu o o tatou aiga. E pei ona outou silafia mai aafiaga, e le faigofie ona faia lenei mea. O finauga, faamaualuga, ma le agasala e ao ona taofia. O le alofa mama o Keriso e tataua ona oo mai i totonu o loto o tagata i totonu o lo tatou aiga.

O Atamu ma Eva, Liai ma Sarai, ma isi matua ua tatou iloa mai tusitusiga paia na iloaia o se luitau faigata lenei mea. Ae o loo i ai ni faataitaiga faamalosiua o le fiafia faifai pea i totonu o auaga ma aiga e toe faamautinoa ai ia i tatou. Ma o na faataitaiga tatou te iloa ai le auala e mafai ai ona tupu mo i tatou ma o tatou aiga. Tou te manatua le tala mai le 4 Nifae:

"Ma sa oo ina leai se finauga i le laueleele, ona o le alofa o le Atua sa mau i loto o tagata.

"Ma sa leai se mataua, po o ni feeseeseaiga, po o ni faanununu, po o ni faitaaga, po o ni pepelo, po o ni fasiotiga tagata, po o soo se mea faamaataitu; ma e moni e le mafai ona i ai o ni tagata e sili atu ona fiafia i totonu o tagata uma na foafoa e le aao o le Atua.

"Sa leai ni faomea, po o ni fasioti tagata, sa leai ni sa Lamanā, po o soo se ituaiga o tagata; ae sa tasi i latou, o le fanau a Keriso, ma o sul i le malo o le Atua.

"Ma sa faamanuiaina tele lava i latou! Aua sa faamanuiaina i latou e le Alii ia latou mea uma na fai; ioe, sa faamanuiaina lava ma faauluolaina i latou seia oo ina mavae atu le selau ma le sefulu o tausaga; ma sa oo ina mavae atu le tupulaga muamua mai ia Keriso, ma sa leai se finauga i le laueleele atoa."²

E pei ona outou silafia, o lenei taimi fiafia sa le'i tumau e faavavau. O le tala i le 4 Nifae o loo faamatalaina ai faailoga mulimuli ane o le vaivaiga faaleagaga i



se vaega o tagata lelei. O se mamanu lea o loo tupu i le aluga o tausaga i tagata uma, i faalapopotoga, ma, sili ona faanoanoa, i aiga. E ala i le suesueina o lena mamanu, e mafai ai ona tatou iloa auala tatou te ono puipuia ai ma faateleina lagona o le alofa i totonu o o tatou aiga.

O le mamanu lena o le vaivaiga na tupu i le mavae o le 200 tausaga o le ola ai i le filemu atoatoa e aumaia e le talalelei:

E tolotoi mai i totonu le faamaualuga.

Sa lē toe fetufaa i tagata a latou mea i le tasi ma le isi.

Sa amata ona latou vaai ia i latou lava i vaega i luga atu po o lalo ifo o le tasi ma le isi.

Sa amata ona latou faaitiitia lo latou faatuatua ia Iesu Keriso.

Sa amata ona latou faitagai

Sa amata ona latou solia ituaiga uma o agasala.

O matua atamamai o le a nofouta lelei e matau na faailoga pe a aliae mai i tagata o o latou aiga. Ioe, o le a latou popole. Ae o le a latou iloa o le pogai autu lava, o faatosinaga a Satani o loo taumafai e taitai i lalo tagata lelei i se ala i le agasala ma o lea latou te lē maua ai le faatosinaga a le Agaga Paia. O lea la, o le a vaai atu le matua poto i lena avanoa o taoto i le taitaiina o tamaiti taitasi, ma i latou lava, ia talia atoatoa atili le valaaulia a le Alii ia o mai ia te Ia.

Atonu e tapulaa sou tulaga manuia, mo se faaitaiga, i le valaau atu i se tamaitiiti ia salamo mai le faamaualuga. Atonu e te taumafai e faatauina le fanau ia foai atu ma le lotoalofa atili mea ua latou maua. E mafai ona e fai atu ia i latou e tuu le manatu e sili atu i latou nai lo isi i le aiga. Ona e sau lea i le faailoga sa ou faamatalaina muamua “Sa amata ona latou faaitiitia lo latou faatuatua ia Iesu Keriso.”

O le ki lena i le taitaiina o lou aiga ia tutulai a’e i lena nofoaga paia e te manao ai mo i latou—ma mo oe ina ia i ai iina faatasi ma i latou. A o e fesoasoani ia i latou ia tuputupu a’e i le faatuatua, o Iesu Keriso o lo latou Togiola alofa, o le a latou lagonaina se manao e salamo. A latou faia, o le a



amata ona suitulaga e le lotomauualalo le faamaualuga. A o amata ona latou lagonaina mea ua foai atu e le Alii ia i latou, o le a latou mananao e foai atu ma le lotoalofa atili. O le faatautavā mo tulaga lauiloa po o le fia iloa o le a faaitiitia. O le a tuliesea e le alofa le inoino. Ma le mea mulimuli, e pei ona faia mo le nuu na faaliliuina e le Tupu o Peniamina, o le manao e faia mea lelei o le a faamalosi ai i latou e tetee i faaososoga ia agasala. Sa molimau mai le nuu o le Tupu o Peniamina sa lē toe i ai so latou manao e fai le leaga.³

O lea, o le fausiaina o le faatuaua ia Iesu Keriso o le amataga lea o le toeaveesea o vaivaiga faaleagaga i lou aiga ma i lou fale. O lena faatuatua o le a aumaia le salamo nai lo le tala’i atu e tetee i faailoga taitasi o vaivaiga faaleagaga.

O le a e taitai i le auala silisili e ala i faaitaiga. E tatau ona vaai tagata o le

aiga ma isi ia te oe o loo e tuputupu a’e i lou lava faatuatua ia Iesu Keriso ma i Lana talalelei. Talu ai nei na tuuina atu ai ia te oe se fesoasoaniga tele. Ua faamanuiaina lava matua i le Ekalesia i se mataupu aoaoina musuia mo aiga ma tagata taitoatasi. Pe a e faaaogaina, o le a e fausiaina ai lou faatuatua ma le faatuatua o lau fanau i le Alii o Iesu Keriso.

Tuputupu a’e i le Faatuatua

Ua faatupulaia lou faatuatua i le Faaola ina ua e mulimuli i le fautuaga a Peresitene Russell M. Nelson ia toefaitauina le Tusi a Mamona. Sa e makaina fuaitau ma upu e faasino i le Faaola. Sa tuputupu a’e lou faatuatua ia Iesu Keriso. Ae, e pei lava o se laau toto fou, o se faatuatua faapena ia Iesu Keriso o le a mamae vagana ua e maua se naunautaiga faifai pea e mafaufau loloto ma tatalo ia faateleina.



O lau faataitaiga o le tuputupu a'e i le faatuatua atonu e lē mulimulitaia e tagata uma o lou aiga i le taimi nei. Ae e te maua le mafanafana mai le aafiaga o Alema le Itiiti. I lona manaoga tiga mo le salamo ma le faamagaloga, sa ia manatua ai le faatuatua o lona tama ia Iesu Keriso. Atonu e manatua e lau fanau lou faatuatua i le Faaola i se taimi pe a latou matua manaomia ai le salamo. Sa fai mai Alema i se taimi faapena:

“Ma sa oo ina a'o faapea ona falo tigaina o au i le mafatia, a'o lagā au i le atuatuvaile i le manatuaina o au agasala e tele, faauta, sa ou manatuaina foi lo'u faalogo i lo'u tamā o vavalo atu i tagata e uiga i le afio mai o se tasi o Iesu Keriso, o se Atalii o le Atua, e togiola mo agasala a le lalolagi.

“O lenei, ina ua tau ane lou mafau-fau i lenei manatu, sa ou tagi ifo i totonu o lo'u loto: E, Iesu e, oe le Alo o le Atua, ia e alofa mutimutivale mai ia te au, o se ua i ai i le au oona, ma ua sio-mia faataamilo e filifili tumau-faavavau o le oti.

“Ma o lenei, faauta, ina ua ou mafau-fauina lenei mea, sa ou le toe manatuaina o'u tiga; ioe, sa ou le toe lagā atuatuvaileina au i le manatuaina o au agasala.”⁴

Tatalo ma le Alofa

E faaopoopo atu i au faataitaiga o le tuputupu a'e i le faatuatua, o a outou

tatalo o se aiga e mafai ona faia ai se vaega taua i le faia o le aiga o se nofoaga paia. E masani lava ona filifilia se tagata se toatasi e fai ma leo e tatalo atu mo le aiga. A manino le tatalo i le Atua mo tagata o loo tootutuli ma faalogologo, e tuputupu a'e le faatuatua i totonu o i latou uma. E mafai ona latou lagonaina faailoaga o le alofa mo le Tama Faalelagi ma mo le Faaola. Ma a ta'ua e le tagata o loo tatalo i latou o loo tootutuli i lena li'o o le aiga o ē o loo mafatia, e lagona uma e tagata le alofa mo, ma mai tagata taitoatasi o le aiga.

E tusa foi pe le o nonofo tagata o le aiga i le fale, e mafai lava e tatalo ona fausia sootaga o le alofa. O tatalo i totonu o le aiga e mafai ona oo atu i le lalolagi atoa. E sili atu ma le faatasi na ou iloa o se tagata o le aiga e mamao ese sa tatalo i se taimi lava e tasi mo se mea lava e tasi na ou tatalo ai. Mo a'u, o le muagagana anamua “O le aiga e tatalo faatasi e tumau faatasi” e mafai ona faalauteleina i le “O le aiga e tatalo faatasi e mau faatasi, e tusa lava pe vāvā mamao i latou.”

Aoao Atu ia Vave Ona Salamo

Ona e leai ma se tasi o i tatou e atoatoa ma e faigofie ona faamanualia lagona, e faatoo mafai ona avea aiga ma ni malutaga paia pe afai e vave ona tatou salamo faamaoni. E mafai ona seti e matua se faataitaiga. O upu malolosi po o mafaufauga agaleaga e mafai ona

vave salamoina ma le faamaoni. O se “Ou te faamalie atu” faigofie e mafai ona faamaloloina ai loto manu'a ma valaau ai uma le faamagaloga ma le alofa.

O le perofeta o Iosefa Samita o se faataitaiga mo i tatou a o ia taulimaina ni osofaiga matuia faapea ai ma tagata taufaalata. Na vave ona ia faamagaloga atu e ui sa ia iloa e ono toe osofai mai foi le fili. Sa ia talosagaina le faamagaloga, ma sa ia foai fua atu.⁵

Faafaileleina o le Agaga Faafaifeautalai

Sa naunau atalii o Mosaea e ofo atu le talalelei i tagata uma. Sa oo mai lenei manao mai i o latou aafiaga patino i le salamo. Sa le mafai ona latou tatalia le mafaufau atu i soo se tasi o mafatia i aafiaga o le agasala e pei o i latou. O lea sa latou feagai ai ma tausaga o le teenaina, faigata, ma le lamatiaina a o ofo atu le talalelei a Iesu Keriso i o latou fili. I le faagasologa, sa latou maua ai le olioli i le toatele sa salamo ma lagonaina le olioli o le faamagaloga e ala i le Togiola a Iesu Keriso.

O le a tuputupu a'e tagata o o tatou aiga i o latou manaoga e faasoa atu le talalelei a o latou lagonaina le olioli o le faamagaloga. E mafai ona latou o mai a o latou faafouina feagaiga pe a latou taumamafa i le faamanatuga. O le a tuputupu a'e le agaga faafaifeautalai i o tatou aiga a o lagonaina e fanau ma

matua le olioli o le faamagaloga i le sauniga faamanatuga. E ala i a latou faataitaiga o le migao, e mafai uma e matua ma le fanau ona fesoasoani i le tasi ma le isi ia lagonaina lena olioli. E mafai ona saofagā tele lena olioli i le liuaina o tatou fale e aveā ma nofoaga autu e aoao ai faifeautalai. Atonu e lē auauna atu uma i ni misiona, ae o le a lagona uma le manao e faasoa atu le talalelei, lea sa aumaia i latou ia lagonaina le faamagaloga ma le filemu. Ma pe o auauna atu i le taimi nei i se misiona faamamaluina pe leai, e mafai e tagata uma ona lagonaina le olioli i le ofoina atu o le talalelei isi.

Asiasi atu i le Malumalu

O matua uma ma fanau, o le malumalu o le avanoa silisili lea e maua ai se lagona mo, ma se fialia i nofoaga faalelagi. E faapitoa le moni o lena mea i le taimi o laiti le fanau. E fananau mai fanau ma le Malamalama o Keriso. E oo lava i se pepe e mafai ona lagonaina e paia se malumalu. Ona e alolofa matua i a latou fanau, e fai le malumalu ma faatusa ia i latou o le faamoemoe e mafai ona latou maua fanau e alolofa i ai i o latou aiga e faavavau—faavavau lava.

O nisi o outou o loo i ai ata o malumalu i totonu o o outou fale. A o faaopopo atu pea malumalu i le lalolagi atoa, e mafai e le toatele o matua ona asiasi atu i lotoa o malumalu ma o latou aiga. E mafai foi e nisi ona auai i fale tatala pe a fausia malumalu. E mafai e matua ona fesili i fanau pe faape'i o latou lagona i le latalata ai i se malumalu.

E mafai e matua uma ona molimau atu i le uiga o se malumalu ia te i la'ua. Sa saunoa soo Peresitene Ezra Taft Benson, o lē fialia i malumalu, e uiga i le vaai pea i lona tina o auli ma le faateete ona lavalava o le malumalu.⁶ Sa ia saunoa i mea na ia manatuaina o se tamaitiiti o vaai i lona aiga a o latou tuua le aiga ia auai i le malumalu.

Ina ua aveā o ia ma Peresitene o le Ekalesia, sa ia auai i le malumalu i le aso e tasi o vaiaso taitasi. Na te faia i taimi uma galuega faalemalumalu mo se tuua. Sa oo mai i se tulaga lautele mai le faataitaiga a ona matua.

O La'u Molimau

O le a e mauaina nisi o olioli silisili i au taumafaiga ia faia lou fale o se nofoaga o le faatuatua i le Alii o Iesu Keriso ma se nofoaga e faatumulia i le alofa, le alofa mama o Keriso. O le Toefuataiga o le talalelei na amata i se fesili faatauavaa na mafaufauina loloto i totonu o se fale faatauavaa, ma e mafai ona faaauau pea i totonu o o tatou fale taitasi a o tatou faaauau pea ona faamautuina ma faatino mataupu faavae o le talalelei iina. O lo'u faamoemoe lava lea ma lo'u manaoga sili ona loloto talu mai lo'u tamaitiiti. Ua tofu uma outou ma sina vaaiga o ni aiga faapea. E toatele outou ua fatuina ni aiga faapena faatasi ma le fesoasoaniga a le Alii.

O nisi na taumafaia i le loto atoa mo lena faamanuiaga, ae e le'i maua lava. O la'u folafolaga ia te outou o se tasi o folafolaga na faia e se uso o le Korama a Aposetolo e Toasefululua ia te a'u i se tasi taimi. Sa ou fai atu ia te ia, ona o filifiliga ua faia e nisi o le matou aiga lautele, ou te lē talitonu ai e mafai ona toe faatasia matou i le lalolagi a sau. Sa ia fai mai, e pei ona ou manatuaina lelei ai, "O loo e popole i se faafitauli sese. Tau lava o lou ola agavaa mo le malo selesitila, ma o le a sili atu le matagofie o faatulagaga o le aiga nai lo le mea e mafai ona e mafaufauina."


Ou te talitonu o le a ia faalautele mai lena faamoemoe fialia i soo se tasi o i tatou i le olaga faaletino o ē ua faia mea uma e agavaa ai i tatou lava ma tagata o o tatou aiga mo le ola e faavavau. Ou te iloa o le fuafuaga a le Tama Faalelagi o se fuafuaga o le fialia. Ou te molimau atu o lana fuafuaga ua mafai ai mo i tatou taitoatasi o ē ua faia le mea sili tatou te mafaia ina ia faamauina ai se aiga e faavavau.

Ou te iloa o ki o le perisitua na toefuatai mai ia Iosefa Samita na tuufaa-solo mai i se laina lēmamotusiaina e tau mai ia Peresitene Russell M. Nelson. O na ki ua mafai ai ona faamauina aiga i aso nei. Ou te iloa e alofa le Tama Faalelagi ia te i tatou, o Ana fanau agaga, i se alofa atoatoa. Ou te iloa lena mea ona o le Togiola a Iesu Keriso, e mafai ona tatou salamo, ma faamamaina, ma agavaa e ola i ni aiga alolofa e faavavau faatasi ma lo tatou Tama Faalelagi ma faatasi ma Lona Alo Pele, o Iesu Keriso. Ou te molimau atu ai i le suafa o Iesu Keriso, amene. ■

FAAMATALAGA

1. Roma 8:6.
2. 4 Nifae 1:15–18.
3. Mosaea 5:2.
4. Alema 36:17–19.
5. Tagai i le Aoaoga a Peresitene o le Ekalesia: Iosefa Samita (2007), 391–98.
6. Tagai i le Aoaoga a Peresitene o le Ekalesia: Ezra Taft Benson (2014), 167.





Sauniga o le Afiafi o le Aso Toonai

FOFOGAINA E PERESITENE DALLIN H. OAKS
Fesoasoani Muamua i le Au Peresitene Sili

O Le Lagolagoina o Taitai o le Ekalesia

O le a ou tuuina atu nei le Au Pulega Aoao, Fitugafulu Eria, ma au Peresitene Aoao o Ausilali o le Ekalesia mo le palota lagolago.

E tuuina atu tatou te lagolagoina Russell Marion Nelson o le perofeta, tagatavaai, ma talifaaaliga ma o le Peresitene O Le Ekalesia a Iesu Keriso o le Au Paia o Aso e Gata Ai; Dallin Harris Oaks o le Fesoasoani Muamua i le Au Peresitene Sili; ma Henry Bennion Eyring o le Fesoasoani Lua i le Au Peresitene Sili.

O i latou e finagalo ai, ia faailoa mai.

O i latou e faatuiese, pe afai e i ai, ia faailoa mai.

E tuuina atu tatou te lagolagoina Dallin H. Oaks o le Peresitene o le Korama a Aposetolo e Toasefululua ma M. Russell Ballard o le Sui Peresitene o le Korama a Aposetolo e Toasefululua.

O i latou e finagalo i ai, faamolemole ia faailoa mai.

Ai se faatu'iese ia faailoa mai.

E tuuina atu tatou te lagolagoina e avea ma uso o le Korama a Aposetolo e Toasefululua: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit

Walter Gong, ma Ulisses Soares.

O i latou e finagalo ai, faamolemole ia faailoa mai.

Ai sē faatuiese, ia faailoa mai.

E tuuina atu ia tatou lagolagoina ia fesoasoani i le Au Peresitene Sili ma le Korama a Aposetolo e Toasefululua o ni perofeta, tagatavaai, ma talifaaaliga.

O i latou uma e lagolagoina, faamolemole faailoa mai.

O e au ese ai, pe afai e i ai, ia faailoa mai.

E tuuina atu ina ia faamaloloina uso nei mai la latou auaunaga o ni Fitugafulu Eria: Elders Victorino A. Babida, L. Todd Budge, Peter M. Johnson, John A. McCune, Mark L. Pace, James R. Rasband, ma Benjamin M. Z. Tai.

O i latou e fia aufaatasi ma i matou e tuu atu le agaga faafetai i nei uso mo la latou auaunaga tuuto ia faailoa mai i le siitia o le aao.

Ua tuuina mai ina ia tatou faamaloloina mai ma le agaga faafetai Brother Tad R. Callister, Devin G. Durrant, ma Brian K. Ashton o le Au Peresitene Aoao o le Aoga Sa.

O i latou e fia aufaatasi ma i matou e tuu atu le agaga faafetai i nei uso mo la latou auaunaga maoae, faamolemole ia faailoa mai.

E tuuina atu ina ia tatou lagolagoina uso nei e avea ma Au Pulega Aoao o



Fitugafulu: Rubén V. Alliaud, Jorge M. Alvarado, Hans T. Boom, L. Todd Budge, Ricardo P. Giménez, Peter M. Johnson, John A. McCune, James R. Rasband, Benjamin M. Z. Tai, and Alan R. Walker.

O i latou uma e lagolagoina, faa-molemole faailoa mai.

O i latou e au ese ai, i lea lava faailoga.

E tuuina atu tatou te lagolagoina uso nei e avea ma Fitugafulu Eria: Solomon I. Aliche, Guillermo A. Alvarez, Daren R. Barney, Julius F. Barrientos, James H. Bekker, Kevin G. Brown, Mark S. Bryce, A. Marcos Cabral, Dunstan G. B. T. Chadambuka, Alan C. K. Cheung, Christian C. Chigbundu, Paul N. Clayton, Karim Del Valle, Hiroyuki Domon, Mernard P. Donato, Mark D. Eddy, Zachary F. Evans, Henry J. Eyring, Sapele Fa'alogu Jr., David L. Frischknecht, John J. Gallego, Efraín R. García, Robert Gordon, Mark A. Gottfredson, Thomas Hänni, Michael J. Hess, Glenn M. Holmes, Richard S. Hutchins, Tito Ibañez, Akinori Ito, Jeremy R. Jaggi, Kelly R. Johnson, Christopher Hyunsu Kim, H. Moroni Klein, 'Inoke F. Kupu, Stephen Chee Kong Lai, Victor D. Lattaro, Tarmo Lepp, Itzcoatl Lozano, Kevin J. Lythgoe, Edgar P. Montes, S. Ephraim Msane, Luiz C. D. Queiroz, Ifanomezana Rasolondraibe, Eduardo D. Resek, Tomás G. Román, Ramon E. Sarmiento, Jonathan S. Schmitt, Vai Sikahema, Denelson Silva, Luis Spina, Carlos G. Süffert, Voi R. Taoalii, Sergio R. Vargas, ma Markus Zarse.

O i latou uma e lagolagoina, faailoa mai.

I latou e faatuiese ai, pe afai e i ai.

Ua tuuina mai ina ia tatou lagolagoina Mark L. Pace e auuina atu o se Peresitene Aoao o le Aoga Sa ma Milton da Rocha Camargo o le Fesoasoani Muamua ma Jan Eric Newman o le Fesoasoani Lua.

O i latou e finagalo ai, ia faailoa mai.

A i ai se faatuiese faailoa mai.

Ua tuuina mai tatou te lagolagoina isi Au Pulega Aoao, Fitugafulu Eria, ma

Au Peresitene Aoao o Ausilali e pei ona i ai nei.

O i latou uma e lagolagoina, faailoa mai.

I latou e faatuiese ai, pe afai e i ai.

Peresitene Nelson, ua faamauina le palota. Matou te valaaulia i latou o e na faatuiese i soo se tofiga ia

faafesootai tou peresitene o siteki.

Uso e ma tuafafine, matou te faafetai atu mo lo outou faatuatua faifai pea ma tatalo mo taitai o le Ekalesia.

Matou te valaaulia nei le Au Fitugafulu fou o le Pulega Aoao ma le Au Peresitene Aoao o le Aoga Sa e susu mai i tou nofoaga i le tulaga. ■

Lipoti a le Matagaluega Suetusi a le Ekalesia, 2018

FOFOGAINA E KEVIN R. JERGENSEN

Pule Faatonusili, Matagaluega Suetusi a le Ekalesia

I Le Au Peresitene Sili o Le Ekalesia a Iesu Keriso o le Au Paia o Aso e Gata Ai

Uso Pele: E pei ona faatonuina ai i le faaaliga o loo tusia i le vaega e 120 o le Mataupu Faavae ma Feagaiga, o le Aufono e Faafocina ia Sefuluai—lea e aofia ai le Au Peresitene Sili, o le Korama a Aposetolo e Toasefululua, ma le Au Epikopo Pulefaamalumalu—e faatagaina tupe faaalu o tupe a le Ekalesia. E faaaogaina e totino o le Ekalesia tupe ia ogatusa ma paketi, aiaiga faavae, ma faiga faavae ua faamaoniaina e le Ekalesia.

O le Matagaluega Suetusi a le Ekalesia, lea e aofia ai ni tamalii faapolofesa ma e tutoatasi lava mai isi matagaluega uma a le Ekalesia, ua i ai le tiutetauave e faatino ai suegatusi mo le faamoemoega o le tuuina atu o le faamautinoaga talafeagai e tusa ai ma saofaga na tauaaoina, o tupe na faaalu, ma le malupuipua o aseta a le Ekalesia.

E tusa ai ma suegatusi ua faatinoina, ua manatu ai le Matagaluega Suetusi a le Ekalesia e faapea, i tulaga uma o meatotino, o saofaga na mauaina, o tupe na faaaluina, ma aseta a le Ekalesia mo le tausaga 2018 ua faamaumauina ma faatautaia e tusa ma paketi, o aiaiga faavae, ma faiga masani faatausitusi ua faamaoniaina e le Ekalesia. O loo mulimulitaia e le Ekalesia ia faiga masani o loo aoaoina atu i ona tagata o le ola lea i se paketi, aloese mai le nofoaitalafu, ma le sefeina o ni tupe mo se taimi e manaomia ai.

E tuuina atu ma le faaaloalo lava,
Matagaluega Suetusi a le Ekalesia
Kevin R. Jergensen
Pule Faatonusili ■



SAUNIA E PERESITENE M. RUSSELL BALLARD
Sui Peresitene o le Korama a Aposetolo e Toasefululua

O Le Talalelei Moni, Mama, ma Faigofie a Iesu Keriso

*O le alofa i le Atua ma le alofa i o tatou tuaoi o
 le faavae lea o le aoga faavae o le auaunaga;
 aogaina e faatotonugalemu-i-le-aiga ma
 lagolagoina-e-le-Ekalesia; tapuaiga faaleagaga
 i le aso Sapatu; ma le galuega o le faaolataga.*

O’u uso e ma tuafafine pele, e faigata ia ona ou talitonu o le 71 tausaga talu ai, i le 1948, sa avea ai a’u o se faifeautalai i Egelani ma le 44 tausaga ua mavae sa ma ave ai ma Barbara lo matou aiga i Kanata ina ua ou avea ma peresitene o le Misiona a Toronto, Kanata. A o auauna atu ai iina ia Aperila 1976, na valaauina ai a’u i le Korama Muamua a Fitugafulu, ma faafuasei lava i le 1985, na valaauina ai a’u i le Korama a Aposetolo e Toasefululua. E lē pei o o’u valaauga na muamua atu sa aofia ai ni faamalologa i le lumanai, o lo’u faamalologa mai lo’u valaauga i le Toasefululua e le o se filifiliga sili lea i le taimi nei; peitai, ou te tatalo o le a oo mai lena aso pe a maea uma mea na valaauina a’u e le Alii e fai.

I le mafafau ai i o’u tausaga muli-muli e 43 o auaunaga o se Pulega Aoao ma le avanoa na ou maua e auauna atu

ai i fanau a le Tama Faalelagi, ua ou iloa atili ai e finagalo o Ia i Ana fanau uma ia maua le filemu, olioli, ma le fiafia i o latou olaga.

Na aoao mai le perofeta o Liae, “Ua i ai [alii ma tamaitai], ina ia latou maua

le olioli.”¹ E tele mafuaaga e mafai ai ona tatou lē maua le filemu, olioli, ma le fiafia i lena olaga, e aofia ai le mativa, taua, faalavelave faalenatura, ma faafitauli e lei faamoemoeina i galuega, soifua maloloina, ma mafutaga faaleaiga.

Ae e ui lava e le mafai ona tatou pulea le tele o na malosiaga mai fafo lea e aafia ai o tatou olaga iinei i le lalolagi, ae a o tatou taumafai e avea ma soo faamaoni a le Alii o Iesu Keriso, e mafai ona tatou maua le filemu, olioli, ma le fiafia e ui lava i faafitauli faalelalolagi o siomia ai i tatou.

Sa fai mai se tasi o la’u fanau i se tasi taimi, “Tama, ou te tuufesili lava pe o le a mafai ca ona ou oo i ai.” Sa ou tali atu, “Pau lava le mea o loo finagalo ai le Tama Faalelagi ia i tatou o le faia o le mea sili tatou te mafaia i aso taitasi.” Uso e ma tuafafine, fai le mea sili tou te mafaia i lea aso ma lea aso, ma i se taimi vave lava, o le a e iloa ai e silafia oe e lou Tama Faalelagi ma e alofa o Ia ia te oe. Ma pe a e iloa lena mea—iloe moni lava—o le a i ai se faamoemoeaga ma se uiga moni o lou olaga, ma o le a faatumuina oe i le olioli ma le filemu.

I le avea ai ma Malamalama o le Lalolagi, ua fetalai mai ai le Faaola, “Ina ia le tumau pea i le pouliuli se tasi e faatuatua mai ia te a’u.”²

“O Iesu Keriso o le suafa lea ua tuu mai e le Tamā, ma ua leai se isi igoa ua tuu mai e mafai ona faaolaina ai [i tatou];

“O le mea lea, e ao i alii uma [ma tamaitai] ona latou ave i o latou luga le suafa ua tuu mai e le Tamā.”³



Ua aoao mai i tatou e tusitusiga paia e manao Satani e taitai tagata i le pouliuli. O ana taumafaiga uma o le polokaina lea o le malamalama ma le upumoni a Iesu Keriso ma Lana talalelei. E pei ona aoao atu e Liae lana fanau, o loo “saili [le tiapolo] ia pagatia tagata uma pei o ia.”⁴ Afai o le “galuega ma [le] mamalu [o le Tama Faalelagi]” o le “aumaia [o] le tino ola pea ma le ola faavavau o [alii ma tamaitai],”⁵ o le “galuega” la a Lusifelo o le aumaia o le faanoanoa ma le tagiaue e le gata i fanau a le Atua. O le agasala ma le solitulafono e faaitiitia ai le Malamalama o Keriso i o tatou olaga. O le mafuaaga lena ua avea ai le olioli atoatoa i le Malamalama o Keriso ma a tatou sini faamoemoeina, lea e aumaia le filemu, olioli, ma le fafia.

I le 18 masina talu ai, na musuia ai e le Alii Lana perofeta ma Aposetolo e faatino le tele o ni fetuunaiga [ma suiga] matagofie. Peitai, ou te popole ina ne’i lē talisapaiaina atoatoa faamoemoea faaleagaga o nei fetuunaiga ona o le soona naunau i suiga lava ia.

Na saunoa Iosefa F. Samita: “O le talalelei moni, mama, faigofie a Iesu Keriso ua toefuatai mai. E nafa i tatou ma le faatumauiina [o le talalelei] i luga o le fogaelele.”⁶ Na ia faaopopo mai o le talalelei moni, mama, ma faigofie o le “aoaoga faavae faaola lea a Keriso.”⁷

Sa aoao mai le Perofeta o Iosefa Samita e faapea “e ala i le Togiola a Keriso, e mafai ai ona faaolaina tagata uma, e ala i le usiusitai i tulafono ma sauniga o le Talalelei.”⁸

O uluai mataupu faavae o le talalelei o le faatuatua i le Alii o Iesu Keriso, salamo, papatisoga, le meaalofo o le Agaga Paia, ma le tumau seia oo i le iuga. Na aoao mai lona uso o Ailama: “Ia talai atu pea lava pea: o le a outou iloina ai mai lea aso i lea aso o le faaalia mai ia te outou ni manatu fou ma le malamalama faaopopo e faatatau i ai. E mafai ona outou faalauteleina . . . ia matuai malamalama manino i ai. Ona mafai lea ona outou matuai faafaigofieina ina ia malamalama ai i latou [tou] te aoaoina.”⁹

O auala sili lava mo i tatou e vaai ai i faamoemoea faaleagaga a le Ekalesia



o le ola ai i aoaoga moni, mama, ma faigofie a Keriso ma faaoga ia poloaiga sili e lua a le Faaola: “Ia e alofa atu i le Alii lou Atua ma lou loto atoa. . . . Ia e alofa atu i lē lua te tuaoi e pei o oe lava ia te oe.”¹⁰

O le usiusitai ai i na poloaiga sili e lua e saunia ai se auala ia lagona atili ai le filemu ma le olioli. Pe a tatou alolofa ma auauna atu i le Alii ma alolofa ma auauna atu i o tatou tuaoi, o le a tatou lagonaina lava le fafia atili lea e oo mai ia i tatou i se auala e sili atu.

O le alofa i le Atua ma le alofa i o tatou tuaoi o le faavae lea o le aoaoga faavae o le auaunaga; aoaoina e faatotonugalemu-i-le-aiga ma lagolagoina-e-le-Ekalesia; tapuaiga faaleagaga i le aso Sapati; ma le galuega o le faaolataga i itu uma e lua o le veli e lagolagoina e Aualofa ma korama a toeaina—o nei mea e faavae i luga o poloaiga faalelagi o le alofa i le Atua ma le alofa i o tatou tuaoi. O nei mea e faavae i luga o poloaiga faalelagi o le alofa i le Atua ma le alofa i o tatou tuaoi. E mafai ona i ai se isi faavae e sili atu, sili atu ona taua, ma sili atu ona faigofie nai lo lena?

O le ola ai i le fuafuaga moni, mama, ma faigofie o le talalelei o le a tuuina mai ai ia i tatou nisi taimi e asiasi ai i

tina ua oti a latou tane, tamā ua oti a latou avā, o ē matuaoti, tuuatoatasi, mama’i, ma ē matitiva. O le a tatou maua le filemu, olioli, ma le fafia i le olaga pe a auauna atu i le Alii ma o tatou tuaoi.

O fetuunaiga i le aso Sapati lea e faamamafa ai le aoaoina ma le suesueina o le talalelei e faatotonugalemu-i-le-aiga ma lagolagoina e le Ekalesia o se avanoa e toe faafou ai o tatou agaga ma lo tatou tuuto atu i le Atua i totonu o puipui o o tatou lava fale. O le a se mea e sili atu ona faigofie, taua, ma loloto? Uso e ma tuafafine, e mafai ona tou silafiaina o le aoaoina ma le aoao atu o le talalelei i o tatou aiga o se auala taua lea e saili ai le olioli ma le fafia i o tatou olaga?

O le saunoa ai e uiga i le Sapati, na fetalai mai ai le Faaola, “Aua e moni o se aso lenei ua tofia mo oe e te malolo ai mai au galuega, ma avatu ai au tapuaiga i le Silisili Ese.”¹¹ Na Ia faaopopo mai, “Ina ia atoatoa lou olioli . . . [e ala i le] olioli ma le tatalo. . . . [tatau ona e] faia o nei mea ma le faafetai, ma loto ma mata fafia . . . ma le loto ma le mata fafia.”¹²

Faamolemole ia matau nisi o upu autu i lenei faaaliga: *olioli, fafia, faafetai*,



loto fiafia, ma mata fiafia. E foliga mai ia te a'u o le tausia o le aso Sapati e tatau ona aumai ai ni ataata i o tatou foliga.

A o tatou auauna atu i se auala maualuga atu ma paia atu, faamolemole ia mafaufau i le taua o lo tatou faafeiloaia o tagata uma o ē o mai i a tatou sauniga Lotu, aemaise lava tagata fou ma tagata asiasi mai. E tatau ia i tatou uma ona fiafia i le lagiina o viiga ma faalogologo ma le toto'a i upu o tatalo o le faamanatuga ma se loto ma se mafaufau matala.

O molimau o le faatuatua i a tatou sauniga anapogi ma molimau e taitaia e se uso o le au epikopo, o lē e faasoa maia se molimau puupuu e taulai atu i le fuafuaga o le fiafia ma le talalelei moni, mama, ma faigofie a Keriso. E tatau i isi tagata uma ona mulimuli i lene faataitaiga. E manaomia ona tatou manatua o loo i ai isi nofoaga talafeagai e faamatalaina ai ni tala pe faasoa atu ai ni tala o ni faigamalaga. A o tatou tausia a tatou molimau ia faigofie ma taulai atu i le talalelei a Keriso, o le a Ia saunia se toefaafouga faaleagaga a o tatou faasoa atua a tatou molimau ma le tasi ma le isi.

O auaunaga mataalia e sili ona malamalama i ai e ala i le mafaufau i le alofa i le Atua ma le alofa i o tatou tuaoi. I se faaupuga faigofie, tatou te auauna atu ona tatou te alolofa i lo tatou Tama Faalelagi ma Ana fanau. O a tatou taumafaiga faaleaunaga o le a sili atu ona

faamanuiaina pe afai tatou te tausisia le faafaigofieina o a tatou auaunaga. O le olioli sili e sau mai mea faigofie o le olaga, o lea e manaomia ai ona tatou faaeteete e aua ne'i mafaufau faapea e tatau ona faapoopo nisi mea i soo se fetuunaiga ua tatou maua e fausia ai le faatuatua ma molimau malolosi i loto o fanau a le Atua.

Aua tatou te faafaigatania mea i le faia o ni fonotaga faapoopo, o mea e faamoemoeina, po o nisi tulaga manao-mia. Ia Faafaigofie. O lene faafaigofie o le a e maua ai le filemu, olioli, ma le fiafia lea na ou talanoa atu ai.

Mo le tele o tausaga o faamoemoeaga o taitaiga o le Ekalesia, e pei ona ta'ua i le *Tusitaulima 2*, o ni taunuuga ia e manino ma faigofie.

“E faamalosiaina e taitai ia tagata uma o le ekalesia ia maua sauniga tatau uma o le perisitua, ia tausia feagaiga e faatatau i ai, ma ia agavaa mo le faaega ma le ola e faavavau. . . .

“**Tagata Matutua:** Ia uunai tagata matutua taitoatasi ina ia agavaa mo le mauaina o sauniga o le malumalu. Aoao tagata matutua uma ia faailoa o latou augatuaa ma faia sauniga e fai ma sui mo i latou i le malumalu.

“**Autalavou:** Fesoasoani e saunia alii talavou taitoatasi ia maua le Perisitua Mekisateko, ia maua sauniga o le malumalu, ma ia agavaa e auauna atu i se misiona faamamaluina. Fesoasoani e saunia tamaitai talavou taitoatasi ina

ia agavaa e osia ma tausia feagaiga paia ma maua sauniga o le malumalu. Ia faamalolosia le autalavou e ala i le auai i gaoioiga ‘anoa.

“**Tagata Uma o le Ekalesia:** Fesoasoani i taitai perisitua ma ausilali, aufono a uarota, faifeautalai o le uarota ma faifeautalai faamisiona, ma le au paia e galulue soosoo tau'au i se taumafaiga paleni e laveai mai tagata taitoatasi, faamalolosia aiga ma iunite o le Ekalesia, ia faateleina le toaaga i le perisitua, ma faapotopoto mai Isaraelu e ala i le liua, faatumauiina, ma le faatoaagaina mai. Ia aoao tagata o le au paia ia saunia mea e manaomia mo i latou lava ma o latou aiga, ma ia fesoasoani atu i ē matitiva ma ē le tagolima i le ala a le Alii.”¹³



O la'u auaunaga i le Ekalesia ua faamanuiaina ai a'u i le tele o aafiaga faaleagaga ofoofogia ma faapitoa. O a'u o se molimau o loo taitaiina e le Alii Lana Ekalesia e faataunuu ai Ana faamoemoega. Ua ou mauaina se taitaiga faalelagi e sili atu nai lo lo'u gafatia. O le olioli i le ola ai i le talalelei mo a'u na faatotonugalemuina i le aoaoga faavae ma le talalelei moni, mama, ma faigofie a Iesu Keriso.

Ua ou galue i lalo o ki ma taitaiga a ni perofeta ma Peresitene e *toaono* o le Ekalesia mai ia Spencer W. Kimball e oo mai ia Russell M. Nelson. Ou te molimau atu o i latou taitoatasi sa avea ma o loo avea o se perofeta filifilia a le Atua. Ua latou aoao mai ia i tatou ni mataupu faavae taua e uiga i le Ekalesia ma le ma le talalelei ma le mataupu faavae a Keriso. O loo ave e Peresitene Nelson le galuega a le Alii i luma i se tulaga saosaoa ofoofogia. Ou te fai atu "ofoofogia" ona e na o ia o le Usoga e matua atu ia te a'u, ae ua fai si faigata mo a'u le tautulituli atu o ia! O a'u o se molimau o ki o le perisitua ma le valaauga o se perofeta a le Atua ua i ai i ona luga. Ua aoao atu e Peresitene Nelson le talalelei moni, mama, ma faigofie a Iesu Keriso. Ou te molimau atu o Iesu o le Keriso, ma o Lana Ekalesia lenei—ou te molimau atu ai ma le lotomauualalo, i le suafa paia o Iesu Keriso, amene. ■

FAAMATALAGA

1. 2 Nifae 2:25.
2. Ioane 12:46.
3. Mataupu Faavae ma Feagaiga 18:23–24.
4. 2 Nifae 2:27.
5. Mose 1:39.
6. Joseph F. Smith, "Principle, Not Popularity," *Improvement Era*, July 1906, 732.
7. Joseph F. Smith, "Principle, Not Popularity," 732.
8. Mataupu Faavae o le Faatuatua 1:3.
9. Ailama Samita, i le "O Le A Lo'u Faamoemoega i le Avea ai ma se Faifeautalai?" *Tala'i La'u Talalelei: O Se Taiala mo le Galuega Faafaifeautalai*, rev. ed. (2019), 6.
10. Mataupu Faavae ma Feagaiga 59:5-6; tagai foi Levitiko 19:18; Teuteronome 6:5; Mataio 22:36–40.
11. Mataupu Faavae ma Feagaiga 59:10.
12. Mataupu Faavae ma Feagaiga 59:13–15.
13. *Tusitalima 2: Taitaiina o le Ekalesia* (2010), 3.4.



SAUNIA E ELDER MATHIAS HELD
O Le Fitugafulu

Saili le Malamalama e ala i le Agaga

E tatau ona tatou aoao ia iloatino le upumoni e le gata i o tatou mafaufau manino ae e ala foi i le leo filemu ma le itiiti o le Agaga.

Uso e ma tuafafine pele, ua ta'u soo mai e le Alii ia i tatou ia "saili i le aoao e faapea foi i le suesue ma le faatuatua."¹ E mafai ona tatou maua le malamalama ma le malamalamaaga e le gata i manatu talafeagai o o tatou mafaufau, ae faapea foi i le taitaiga ma musumusuga a le Agaga Paia.

O lenei punavai faaopoopo o le malamalama e le'i avea i taimi uma ma se vaega o lo'u olaga.

Sa ma auai ma lo'u toalua pele, o Irene i le Ekalesia i le 31 tausaga ua mavae ina ua faato'a ma faaipoipo lava. Sa ma ola a'e uma i Kolomupia, ae i nai masina talu ona uma le ma faaipoipoga, ae ma malaga ma nonofo i Siamani ona o la'u galuega. Sa ma laiti lava ma sa i ai ni faamoemoega ma ni tulimataiga sili; o se taimi matuai faagaetia ma fiala mo i ma'ua.

A o o'u taulai atu i la'u galuega, na lagona e Irene o le a ma mauaina se ituaiga o savali mai le lagi, e aunoa ma le iloaina pe faapefea po o afea. O lea, sa ia faatagaina ai i totonu o le ma fale soo se tagata faatau oloa o i ai ni tusi o faamatalaga i soo se autu [encyclopedias], masini mitipefu, tusikuka, masini

mo le umukuka, ma isi mea faapena, ma faatalitali ai pea mo lena savali uiga ese.

I se tasi afiafi sa ia ta'u mai ai ia te a'u e toalua ni alii talavou i ni suti paauli na tu'itu'i i le ma faitotoa ma sa ia lagona se uunaiga matuai manino ma tulagaese e faataga i la'ua i totonu. Sa la fai mai la te fia talanoa ia te ia e uiga i le Atua ae e toe o mai pe a ou i ai foi i le fale. Pe le o le savali faamoemoeina ea lenei?



Sa amata ona la asiasi mai ia i ma'ua, faatasi ai ma le la taitaiga, sa ma faitau i tusitusiga paia ma oo ai ina malamalama i le taua tele o Iesu Keriso o lo tatou Faaola ma Togiola. Sa le'i pine ae ma salamo ona sa ma papatiso o ni pepe laiti, lea sa le'i avea o se feagaiga na malamalama i ai. Peitai, o le toe papatisoina o lona uiga foi o le avea ma ni tagata o lenei Ekalesia fou, o lea la e tataua ona ma matuai malamalama muamua i mea uma e faatatau i ai.

Ae e faapefea la ona ma iloa pe o mea o loo ta'u mai ia i ma'ua e faifeau-talai e uiga i le Tusi a Mamona, Iosefa Samita, ma e uiga i le ata o le faaolagata e moni uma lava? Ia, sa ma malamalama mai afioga a le Alii e mafai ona ma "iloa i latou i o latou fua."² O lea la, i se faiga na matua faatulagaina lelei, na amata ai ona ma sutesueina le Ekalesia e ala i le sailia o na fua i mata o o ma'ua mafaufau manino. O le a le mea sa ma vaaia? Ia, sa ma vaaia:

- Tagata faauo ma fiafia ma aiga mata-gofie o ē na malamalama e tatou ona tatou lagona le olioli i lenei olaga ae le na o le mafatia ma le faanoanoa.
- O se lotu e leai se faifeau e toto-gia ae o se lotu e taliaina e tagata o le ekalesia o latou tofiga ma tiutetauave.
- O se lotu e totonugalemu mea uma ia Iesu Keriso ma aiga, lea e anapopogi ai e faatasi i le masina le tagata ma foai atu e fesoasoani i ē matitiva ma lē tagolima, le nofoaga e faalauiiloa ai mausa faalesoifua malololoina, aoaoina i tatou ia aloese mai fualaau ma vailaau faasaina.

E le gata i lea:

- Na ma fiafia i le faamamafaina o le tuputupu ae faaletagata lava ia, i a'oga, galue malosi ma le ola-tutoatasi.
- Sa ma aoao e uiga i le polokalama ofoofogia o fesoasoaniga alofa.
- Ma sa faagaecetia i ma'ua e ala i konafesi aoao ma musika matagofie atoa ai ma matupu faavae faaleagaga loloto o loo faasoa mai ai iina.

O le vaaia o nei mea uma, na lē mafai ai ona maua se mea sese i le Ekalesia. I le isi itu, sa ma fiafia tele i mea uma sa ma vaaia. Peitai, sa lē mafai lava ona ma filifili ia papatiso ona sa ma mananao ia iloa mea uma ae ma te le'i [papatiso].

Ae, e ui i le ma lē mautonu, sa saunia ma le onosai i ma'ua e le Alii, na Ia mamaniua i ma'ua, ma sa Ia fesoasoani ia i ma'ua ia iloa e tatou ona ma aoao ia iloaitino le upumoni e le gata i o ma mafaufau manino ae e ala foi i le leo filemu ma le itiiti o le Agaga, lea e talanoa faapitoa mai i o tatou loto.

Na oo mai lena leo ma le taunuuga o lagona i se tasi afiafi ina ua mavae le 10 masina o le aoaoina o le talalelei, ina ua ma faitau i le Mosaea 18: "Ona ua outou mananao e . . . tauave avega a le tasi, . . . ma faamafanafana atu ia te i latou o e manaomia le faamafanafanaga, . . . afai o le manao lea o o outou loto, se a se mea tou te tetee ai i le papatisoina i le suafa o le Alii?"³

Na ulufia e lena fuaitau mai le Tusi a Mamona o ma'ua loto ma agaga, ma sa faafuasei lava ona ma lagonaina ma iloa e leai lava se mafuaaga o le a lē papatiso ai. Sa ma iloa e manaoga na ta'ua i nei mau o moomooga foi na o ō ma'ua loto ma na matua taua lava na mea. E i ai mea e sili ona taua nai lo le malamalama i mea uma aua ua lava mea ua uma ona ma iloa e. Sa



ma faalagolago lava i le aao taiala o se Tama Faalelagi alofa ma sa mautinoa ai o le a faaaauu pea ona Ia taialaina i ma'ua.

I lena lava aso, sa ma setiina ai se aso mo lo ma papatisoga, ma sa le'i pine ae ma papatiso, ua taunuu lava!

O le a se mea na ma aoaoina mai lena aafiaga?

Muamua, sa ma aoaoina e mafai ona ma faalagolago atoatoa atu i se Tama Faalelagi alofa, o lē o loo taumafai pea e fesoasoani ia i tatou e avea ma tagata ua Ia silafia e mafai ona tatou avea ai. Sa ma faamaoniaina le moni a'ia'i o Ana afioga ina ua Ia fetalai atu: "Ou te tuu atu i le fanauga a tagata lea fuaitau i luga o lea fuaitau, ma lea mataupu i luga o lea mataupu, o sina mea itiiti i i ma sina mea itiiti i o; ma e manuia lava i latou o e faalogologo i a'u mataupu, . . . ona o le a latou aoaoina le poto; ona o ia o lē na te taliaina o le a Ou tuu atu atili i ai."⁴

Ma le lona lua, na ma aoaoina faapea, e le gata i o tatou mafaufau manino, o le isi vaega i le mauaina o le malamalama e mafai ona tuu maia ia i tatou le taitaiga ma le malamalamaaga. O le leo filemu ma le itiiti lea o Lona Agaga Paia o loo talanoa mai i o tatou loto faapea foi i o tatou mafaufau.

Ou te fia faatusatusaina lenei mataupu faavae i lo tatou gafatia e vaai ai. Ua tuuina mai ia i tatou e lo tatou Tama o i le Lagi e le na o le tasi, ae lua ni mata faaletino. E mafai ona tatou vaai lelei lava i le na o le tasi le mata, ae o le mata lona lua ua tuuina mai ia i tatou se isi vaaiga. A tuufaatasia vaaiga uma e lua i o tatou faiai, la te gaosiaina se ata e tolu itu o lo tatou siosiomaga.

E faapena foi, ua tuuina mai ia i tatou ni punavai se lua o faamatalaga, e ala mai i o tatou gafatia faaletino ma faaleagaga. E gaosia e lo tatou mafaufau le tasi o vaaiga e ala atu i o tatou lagona faaletino ma e ala atu i lo tatou mafaufau manino. Ae e ala atu i le meaalofa o le Agaga Paia, ua saunia ai foi e le Tama mo i tatou se vaaiga lona lua, o se mea lea e sili ona taua ma moni, aua e sau sa'o lava mai ia te Ia. Ae, talu ai o musumusuga a le Agaga e masani ona matua maaleale, e toatele



tagata e le o nofouta ma le iloa lena punaoa faaopoopo.

A tuufaatasia nei vaaiga e lua i o tatou agaga, e faali mai e se ata atoa e tasi le moni o mea e pei ona i ai moni lava. O le mea moni, e ala mai i le vaaiga faaopoopo a le Agaga Paia, o “mea moni,” faapitoa, e pei ona atagia tonu mai e ala i lo tatou malamalamaaga faalemafaufau, e mafai ona faaalua mai o se taufaasese po se measese lava ia. Ia manatua upu a Moronae: “O le mana o le Agaga Paia e mafai ona outou iloa ai le moni o mea uma lava.”⁵

I le 31 tausaga o lo’u avea ai ma se tagata o le Ekalesia, ua ou iloa i le tele o taimi afai e na o lo tatou mafaufau manino tatou te faalagolago i ai ma faafitia pe tuulafoaiina le malamalamaaga faaleagaga e mafai ona tatou maua e ala i musumusuga a le Agaga Paia, e pei lava la o tatou ola i le olaga i le na o le tasi o le mata. Ae, i se uiga faafaatusa, ua uma ona tuuina mai ia i tatou ni mata se lua. Ua na o le tuufaatasiga o vaaiga uma e lua e mafai ai ona tuuina mai ia i tatou le ata moni ma le ata atoa o mea moni uma ua tatou lagonaina i o tatou olaga,

faapea foi ma le malamalama atoatoa ma le loloto i lo tatou faasinomaga ma le faamoemoega o ni fanau a se Tama Faalelagi soifua.

Ua faamanatu mai ia te a’u mea na aoao ai i tatou e Peresitene Nelson i le tausaga ua mavae ina ua ia saunoa mai faapea, “I aso a sau, o le a le mafai ona ola ai faaleagaga e aunoa ma le taiala, taitaiga, faamafanafanaga, ma le faato-sinaga faifai pea a le Agaga Paia.”⁶

Ua ou iloa ma le mautinoa a’ia’i e faapea:

- E i ai so tatou Tama o i le Lagi alofa, ma ua tatou ioe uma e o mai i lenei lalolagi o se vaega o se fuafuaga faalelagi.
- O Iesu o le Keriso, o loo soifua o Ia ma o lo’u Faaola ma le Togiola.
- Ou te iloa o Iosefa, o se tama faifaatoaga lotomauualalo, sa valaauina ma avea ma perofeta maoae lea na amataina lenei tisipenisione o le atoaga o taimi, faatasi ai ma ki uma, mana, ma le pule o le perisitua paia a le Atua.
- Ou te iloa o le Tusi a Mamona o se molimau lona lua ia Iesu Keriso ma

o aiga e tatau ona tumau faatasi e faavavau.

- Ma ou te iloa o lo tatou Alii, o Iesu Keriso, o loo taitaia lenei ekalesia, Lana Ekalesia toefuataiina, e ala atu i lo tatou perofeta soifua, o Peresitene Russell M. Nelson, i le asō.

O upumoni taua nei ma le tele o isi ua avea ma mataupu faavae ua atiae ai lo’u faaleagaga o loo fesoasoani mai ai le Atua ia ou avea ai. Ma ou te tulimatai atu i le tele o aoaoga fou o loo finagalo pea o Ia mo a’u—ma oe—ia mauaina a o tatou ola ai i lenei olaga matagofie ma “aoao . . . e ala lava i le suesue ma le faatuatua foi.”

Ou te iloa e moni nei mea uma ma molimau atu ai i le suafa o Iesu Keriso, amene. ■

FAAMATALAGA

1. Mataupu Faavae ma Feaiga 109:7; tagai foi Mataupu Faavae ma Feaiga 88:118.
2. 3 Nifae 14:16.
3. Mosaea 18:8–10.
4. 2 Nifae 28:30.
5. Moronae 10:5.
6. Russell M. Nelson, “Faaliga mo le Ekalesia, Faaliga mo o Tatou Olaga,” *Liahona*, Me 2018, 96.



SAUNIA E ELDER NEIL L. ANDERSEN
O Le Korama a Aposetolo e Toasefululua

O Le Mata o le Faatuatua

A tatou pikiina ma filifilia mea ua tatou taliaina i le folafolaga, ua tatou faapogisaina lo tatou vaaiga e faavavau, i le soona tuu o le faataua tele i lo tatou olaga iinei ma le taimi nei.

A o toeitiiti oo i Lona faasatauroga, na avatu ai Iesu i luma o Pilato i le fale faamasino. “O oe ea le Tupu o Tagata Iutaia?” Na fesili atu ai Pilato ma le inoino. Na tali atu Iesu: “E le mai le lalolagi nei lo’u malo. . . . Na ou [sau] i le lalolagi, ina ia ou molimau [e uiga] i le upu moni. O i latou uma lava o i le upu moni, e faalogo mai i latou i lo’u leo.”

Na fesili Pilato ma le masalosalo, “O le a le upumoni?”¹

I le lalolagi i le asō, o le fesili “O le a le upumoni?” e mafai ona matuā tiga i tagata e le talitonu i tapuaiga faalelotu.

O se sailiga i le Google mo le “O le a le upumoni?” e aumaia ai le silia ma le miliona tali. E sili atu le tele o faamatalaga ua tatou maua i luga o a tatou telefoni feaveai nai lo tusi uma o

se faletusi. O loo tatou ola faatasi ma le anoanoa’i o faamatalaga ma manatu. O loo tuliloaina i tatou e leo o faaoso-osoga ma faatosinaga i itu uma.

I le siomia ai i fenumiaiga o nei aso, e leitioa a toatele ē talitonu i upu na tautalagia i le 2,500 tausaga talu ai e [le fai filosofia o] Protagoras [i le fai filosofia talavou] o Socrates: “O mea e moni mo oe,” na ia fai mai ai, “e moni mo oe, ma o mea e moni mo a’u e moni mo a’u.”²

Upumoni e ala i le Talalelei Toefuataiina a Iesu Keriso

I le faamanuiaina i le talalelei toefuataiina a Iesu Keriso, tatou te folafola atu ma le lotomauualalo o loo i ai nisi o mea e moni atoatoa ma tonu a’ia’i. O nei upumoni e faavavau e tutusa mo atalii ma afafine uma o le Atua.

Ua aoao mai tusitusiga paia, “Ma o le upumoni o le iloa lea o mea e pei ona i ai, ma e pei ona sa i ai, ma e pei ona o le a oo mai.”³ O loo i ai i upumoni mea na tutupu ma mea o le a tutupu, e faalatele ai le vaaiga o mea o loo tutupu i le taimi nei.





Na fetalai mai Iesu, “O a’u nei le ala, ma le upu moni, ma le ola.”⁴ E faaali mai e le upumoni ia i tatou le ala i le ola e faavavau, ma e na o lo tatou Faaola, o Iesu Keriso e auala mai ai. E leai lava se isi auala.

Ua aoao mai i tatou e Iesu Keriso i le auala tatou te ola ai, ma, e ala i Lana Togiola ma le Toetu, ua Ia ofoina mai le faamagaloga mai i a tatou agasala ma le tino ola pea i talaatu o le veli. E moni atoatoa lenei mea.

Ua Ia aoao mai i tatou e faapea e le afaina pe o tatou mauoa pe matitiva, lauiloa pe lē mailoa, atamai pe faatauva. Ae, o lo tatou sini o le olaga faaletino o le faamalosia lea o lo tatou faatuatua i le Alii o Iesu Keriso, filifili lelei i lo le leaga, ma ia tausi Ana polo-aiga. A o tatou patipatia fatufatua’iga faasaaienisi ma vailaau, o upumoni a le Atua o loo i ai le tele atu o mea nai lo nei mea na maua.

I le tetee atu i upumoni o le faavavau, ua i ai pea mea taufaasese e tosoesea fanau a le Atua mai le upumoni. O finauga a le tiapolo e tutusa i taimi





E ala i le mafaufau lotoloto ma le agaga tatalo i le folafolaga i le aiga e ala i mata o le faatuatua, tatou te malamalama atili ai i le auala e fesootai ai ma le matagofie ia mataupu faavae, lagolagoina o le tasi ma le isi, ma faaali mai ai le fuafuaga a lo tatou Tama mo Lana fanau.

uma. Faafofoga i [upu] nei, na fofogaina mai i le 2,000 tausaga ua mavae:

“E le mafai ona [outou] iloa ia mea [tou] te le vaavaai i ai. . . . [O soo se mea e faia e se tagata] e le o se solitulafono.”

“[E le o faamanuaina outou e le Atua, ae] [e manuia tagata] taitoatasi e tusa ma lona [lava] atamai.”⁵

“E lē o se mea ua tonu i le mafaufau [faapea o se tagata e pei o] . . . Keriso . . . [o le a avea ma] Alo o le Atua.”⁶

“[O le mea ua tou talitonu i ai o se sitaili faavalevlea ma o se] faavaleaina o o outou mafaufau.”⁷ E pei ua [tatou] faalogo i ai i aso nei, a ea?

Faatasi ai ma le Toefuataiga o le talalelei, ua tuuina mai ai e le Atua ia i tatou le ala e aoao ma iloa ai upumoni taua faaleagaga: tatou te aoao i latou e ala i tusitusiga paia, o a tatou tatalo faaletagata lava ia, o o tatou lava ia aafiaga, e ala i fautuaga a perofeta ma aposetolo soifua, ma e ala i le taitaiga a le Agaga Paia, o lē e mafai ona fesoa-soani mai ia i tatou e “iloa ai le moni o mea uma lava.”⁸

O Le Upumoni o Le Iloaitino Faaleagaga

E mafai ona tatou iloa mea a le Atua pe a tatou sailia i latou faaleagaga. Na saunoa mai Paulo, “E le iloa e se tasi mea a le Atua, ae e ala i le Agaga o le

Atua. . . . [Aua] ua faamasinoina latou faaleagaga.”⁹

Tagai i le ata lenei na saunia e Michael Murphy. Mai i lenei vaaiga, e faigata ona e talitonu o se faatinoga o le faatufugaga o se mata o se tagata. Ae ui i lea, a o e vaai i togitogi mai se vaaiga e ese mai, e te vaaia le matagofie o le foafoaga a le faatufugaga.

E faapena foi, tatou te vaai i upumoni faaleagaga a le Atua e ala i le vaaiga o se mata o le faatuatua. Na saunoa mai Paulo: “E le talia e le tagata faaletino o mea a le Agaga o le Atua: aua o mea valea ia ia te ia, na te le mafai foi ona iloa, aua e faamasinoina faaleagaga.”¹⁰

O tusitusiga paia, o a tatou tatalo, o o tatou lava ia aafiaga, o perofeta o aso nei, ma le meaalofo o le Agaga Paia e aumaia ia i tatou se vaaiga faaleagaga o le upumoni e taua mo la tatou malaga i i nei i le lalolagi.

O Le Folafolaga e ala i le Mata o le Faatuatua

Se’i tatou tagai i le folafolaga e uiga i aiga e ala i mata o le faatuatua.

Sa faalauiloa mai e Peresitene Gordon B. Hinckley le “O Le Aiga: O Se Folafolaga i le Lalolagi” i le faamatataga lenei: “Ona o le tele o mataupu

sese ua manatu le lalolagi o upumoni ia, faatasi ma le tele o le taufaasese e faatatau i tulaga faatonuina ma tulaga faatauaina, faatasi ai ma le tele o faaosoosoga ma faatosinaga o loo pisia lemu ai mai le lalolagi, ua matou lagona ai ia lapatai [outou].”¹¹

E amata le folafolaga: “O tagata uma—tane ma tamaitai—na foafoaina i le faatusa o le Atua. O i latou taitoatasi o se atalii po o se afafine agaga faapelepele a ni matua faalelagi, ma, o lea ua tofu ai ma se natura paia ma se taunuuga.”

O upumoni nei e faavavau. O oe ma a’u e le o se mea na tupu faafuaveta o le natura.

Ou te fafia i upu nei: “I le muai olaga, na silafia ma tapuai atalii ma afafine agaga i le Atua o lo latou Tama e Faavavau ma na taliaina Lana fuafuaga.”¹²

Sa tatou ola ae tatou te le’i fananau mai. O la tatou faasinomaga patino o se vaega o i tatou e faavavau. I auala tatou te lē malamalama atoatoa i ai, o lo tatou tuputupu ae faaleagaga iina i le muai olaga ua faatosinaina ai tagata ua tatou i ai iinei.¹³ Na tatou taliaina le fuafuaga a le Atua. Na tatou iloa o le a tatou oo i faigata, tiga, ma le faanoanoa i le lalolagi.¹⁴ Na tatou iloa foi o le a afio

mai le Faaola ma afai tatou te faamaonia lo tatou agavaa, o le a tatou tutu i le Toetutu, ma maua “[mamalu] faaopopo i luga o o [tatou] ulu e faavavau ma faavavau lava.”¹⁵

E tuusa’o le folafolaga: “Matou te ta’utino atu o le ala ua foafoaina ai le ola faitino, ua faatuina i le finagalo paia. Matou te faamaonia le paia o le ola ma lona taua i le fuafuaga e faavavau a le Atua.”

E uunaia e le fuafuaga a lo tatou Tama se tane ma le ava e aumai fanau i le lalolagi ma uunaia i tatou e tautatala i le puipuia o pepe e le’i fananau mai.

O Mataupu Faavae o le Folafolaga E Matagofie le Fesootaiina

A tatou pikiina ma filifilia mea ua tatou taliaina i le folafolaga, ua tatou faapogisaina lo tatou vaaiga e faavavau, i le soona tuu o le faatau tele i lo tatou olaga iinei ma le taimi nei. E ala i le mafaufau loloto ma le agaga tatalo i le folafolaga e ala i mata o le faatuatua, tatou te malamalama atili ai i le auala e fesootai ai ma le matagofie ia mataupu faavae, lagolagoina o le tasi ma le isi, ma faaali mai ai le fuafuaga a lo tatou Tama mo Lana fanau.¹⁶

Pe tatau ea ona faate’ia tatou pe a folafola mai e perofeta a le Alii Lona finagalo ma, mo nisi, e tuufesili pea? Ioe, o nisi e vave lava ona teenaina siufofoga o perofeta,¹⁷ ae o isi e mafaufau loloto ma le agaga tatalo i a latou fesili faamaoni—o fesili e taliaina i le onosai ma se mata o le faatuatua. A na faapea na faaali mai le folafolaga i le aiga i se isi seneturi, o le a i ai pea fesili, ae o ni fesili e ese ai nai lo fesili o aso nei. O le tasi faamoemoega o perofeta o le fesoasoani lea ia i tatou ia foiaina ni fesili faamaoni.¹⁸

A o le’i avea ma Peresitene o le Ekalesia, na saunoa mai Peresitene Russell M. Nelson: “E silasila agai i luma Perofeta. Latou te vaai i tulaga lamatia faigata ua tuuina e le tiapolo pe o le a tuuina i lo tatou ala. E muai vaaia foi e perofeta avanoa silisili ma faamanuiaga o faatalitali mai ia i latou o ē faalogo *ma le faamoemoe e usiusitai*.¹⁹

Ou te molimau atu i le moni ma le mana faaleagaga o siufofoga autasi o



le Au Peresitene Sili ma le Korama a le Toasefululua.

O Le Lalolagi o loo Savali ‘Ese

I lo’u olaga atoa, ua tatou vaaia se suiga matautia i talitonuga a le lalolagi e uiga i le tele o mataupu faavae ua aoaoina i le folafolaga. I le taimi o lo’u talavou ma le amataga o tausaga o le faaiipoipoina, e toatele tagata i le lalolagi na savavali ese mai tulaga faatonuina a le Alii ua tatou ta’ua o le tulafono o le ola mama, e faapea o sootaga faalefeusuaiga e na o le va lava o le alii ma le tamaitai ua uma ona faaiipoipoina faaletulafono e faatino ai. I lo’u vaitausaga 20 ma le 30, na toatele [tagata] na o ese mai le puipuga paia o pepe e le’i fananau mai, aua sa amata ona talia tele le faapa’ū pepe. I le tele o tausaga talu ai nei, e toatele tagata na o ese mai le tulafono a le Atua e faapea o le faaiipoipoga o se tuufaatasiga paia i le va o le alii ma se tamaitai.²⁰

O le vaavaai atu i le toatele o tagata o loo savavali ese mai i tuaoi ua faatulagaina e le Alii, ua faamanatu mai ai ia i tatou lena aso i Kapanaumi ina ua tautino atu e le Faaola Lona paia ma e faanoanoa ai “[e toatele] o ona soo . . . e lei toe feoi i latou ma ia.”

Ona faliu atu lea o le Faaola i le Toasefululua: “Pe tou te fia o ese foi?”

Na tali Peteru:

“Le Alii e, a matou o ea ia te ai? O ia te oe upu o le ola e faavavau.

“Ua matou talitonu, ma ua matou iloa o oe o le Keriso, o le Alo o le Atua soifua.”²¹

E Le o Tagata Uma e Fetaui Lelei [Lagona] i totonu o le Folafolaga

O loo i ai le toatele o tagata, talavou ma matutua, o ē faamaoni ma faatuatua i aoaoga a perofeta, e ui e le fetaui lelei o latou lagona o i ai i le taimi nei ma le folafolaga i le aiga: o fanau ua fesouā’ina olaga ona o le tete’a o matua; o talavou e i ai uo ua faatauemu i le tulafono o le ola mamā; o tamaitai ma alii ua tetea ua matuā faamanualia ona o le lē faamaoni o se toalua; o tane ma avā ua lē mafai ona maua ni fanau; o tamaitai ma alii ua faaiipoipo atu i se toalua e le tutusa o la’ua faatuatuaga i le talalelei toefuataiina; o tamaitai ma alii nofofua o ē, mo ni mafuaaga e tele, ua lē mafai ai ona faaiipoipo.

O se tasi o uo mo le toetiiti atoa le 20 tausaga, ou te faamemelo tele i ai, e le’i faaiipoipo ona o le tosina atu i le itupa e tasi. Na tumau faamaoni o ia i ana feagaiga o le malumalu, faalautele ana taleni fatufatua’i ma faapolofesa, ma na auauna atu ma le mamalu i le Ekalesia ma le nuu. Na ia fai mai talu ai nei ia te a’u, “Ou te malamalama lelei ia i latou o i lo’u tulaga o ē filifili e lē tausua le tulafono o le ola mama i le lalolagi o loo tatou ola ai. Ae e le’i fetalai mai ea Keriso ia i tatou ina ia “‘aue ne’i avea ma ni ō o lenei lalolagi? E manino lava o tulaga faatonuina a le

Atua e ese mai i [tulaga faatonuina] a le lalolagi.”

O tulafono a tagata e tele lava ina o i fafo atu o tuaoi ua faatulagaina e tulafono a le Atua. Mo i latou e manao e faafiafia le Atua, o le faatuatua, onosai, ma le filiga e mautinoa lava e manaomia.²²

Na ma masani ma lo’u toalua, o Kathy, i se tamaitai nofofua, pe tusa ua 45 ona tausaga, e talenia i ana tomiai faapolofesa ma e auauna atu ma le lototoa i lana uarota. Sa ia tausia foi ia tulafono a le Atua. Na ia tusia:

“Sa ou moemiti i le aso o le a faamanuiaina ai a’u i se tane ma se fanau. O loo o’u faatali pea. E i ai taimi, e aumai ai e lo’u faafitauli lagona o le faagaloina ma le tuuatoatasi, ae ou te taumafai e aveese le taulai i mea ou te lē o maua, ae [taulai] atu i mea ua ou maua ma le auala e mafai ai ona ou fesoasoani atu i isi.

“Na fesoasoani ia te a’u le auauna atu i lo’u aiga lautele, i la’u uarota, ma i le malumalu. E le o faagaloina a’u pe tuuatoatasi aua o a’u o se vaega o, ma o i tatou uma o se vaega o se aiga e toatele atu.”

O Loo i ai le Toatasi o Lē e Malamalama

O le a fai mai nisi, “E te lē malamalama i lo’u faafitauli.” Atonu ou te lē malamalama i ai, ae ou te molimau atu o loo i ai le Toatasi e malamalama i ai.²³ O loo i ai le Toatasi o lē, ona o Lana taulaga na faia i le faatoaga ma i luga o le satauro, e silafia a outou avega. A outou saili atu ia te Ia ma tausii i Ana poloaiga, ou te folafola atu ia te outou

o le a Ia faamanuiaina outou ma aveese avega ua mamafatū tele o loo tauave toatasi. O le a Ia tuu atu ia te outou ni uo e faavavau ma avanoa e auauna atu ai. Ae sili atu ona taua, o le a Ia faatumulia outou i le Agaga mamana o le Agaga Paia ma faasusulu atu Lana faamaoniga faalelagi i luga o outou. E leai se filifiliga, e leai se isi auala, e teenaina le mafutaga a le Agaga Paia po o faamanuiaga o le faavavau, e agavaa mo a tatou iloiloaga.

Ou te iloa o loo soifua le Faaola. Ou te molimau atu o Ia o le puna o upumoni uma lea e sili ona taua ma o le a Ia faataunuu faamanuiaga uma ua Ia folafola mai ia i latou o ē tausii Ana poloaiga. I le suafa o Iesu Keriso, amene. ■

FAAMATALAGA

1. Ioane 18:33, 36–38.
2. William S. Sahakian and Mabel Lewis Sahakian, *Ideas of the Great Philosophers* (1966), 28.
3. Mataupu Faavae ma Feagaiga 93:24.
4. Ioane 14:6.
5. Alema 30:15, 17.
6. Helamana 16:18.
7. Tagai i le Alema 30:14, 23, 27.
8. Moronae 10:5.
9. Faaliliuga a Iosefa Samita, 1 Korinito 2:11 [i le 1 Korinito 2:11, vaefaamatalaga i]; 1 Korinito 2:14.
10. 1 Korinito 2:14.
11. Gordon B. Hinckley, “Ia Tu Malosi e Tetee atu i Togafiti a le Lalolagi,” *Liahona*, Ian. 1996, 119. Na faamatala talu ai nei e Peresitene Russell M. Nelson nisi o talafaasolopito o le folafolaga, e pei ona aotele e Sheri Dew i le *Insights from a Prophet’s Life: Russell M. Nelson* (2019), 208:
“I se tasi aso i le 1994, sa faaalu ai e le Korama a Aposetolo e Toasefululua se aso i le latou potu fono i le Malumalu o Sate Leki i le talanoaina o faafitauli o loo siomia ai le aiga. Sa latou iloiloaina mea uma mai le pogai

o le faateteleina o le salalau solo o ponokalafi e oo i ituaiga esese o tulafono taufaaofi e tetee ai i le aiga. E le o se talanoaga fou lea, ae o lena aso o le mataupu talanoaina atoa lava sa taulai atu i lena lava autu taua e tasi.

“Sa iloiloaina e le Toasefululua mea uma e lua, o aoaoga faavae ma aiaiga faavae, i le iloiloaina ai o mea na e le mafai ona suia—aoaoga faavae—ma mea na e ono avefa ma—aiaiga faavae. Sa latou talanoaina faafitauli na vaai ua oo mai, e aofia ai se tui malosi faalesosaiete e faataga faaipoipoga o le itupa e tasi atoa ai ma aia tatou o tagata e sui ai o latou itupa. ‘Ae e le o le mutaaga lena o mea na matou vaaia,’ sa faamalamalama mai ai Elder Nelson. ‘Sa mafai ona matou iloaina taumafaiga a nuu esese e o ese mai tulaga faatonuina uma ma tapulaa o gaioiga faafeusuaiga. Sa matou vaaia le fenuniaiga o itupa. Sa mafai ona matou vaaia le oo mai o ia mea uma.

“O lena talanoaga faaumiumi, faatasi ai ma isi talanoaga mo se vaitaimi, na taitai atu ai i le faaiuga e tatou i le Toasefululua ona saunia se pepa o faamatalaga, masalo o se folafolaga, e oototo atu ai le tulaga o le Ekalesia e uiga i le aiga ma tuuina atu i le Au Peresitene Sili mo le iloiloaga.”

12. “O Le Aiga: O Se Folafolaga i le Lalolagi,” *Liahona*, Me 2017, 145.
13. Na saunua mai Peresitene Dallin H. Oaks: “O le faitau afe o tagata soifua na fananau mai i lena lalolagi na filifilia le fuafuaga a le Tama ma tau mo lea mea. O le toatele o i tatou na asia foi feagaiga ma le Tama e faatatau i mea tatou te faia i le olaga faitino. I auala e le’i faaalia mai lava, o a tatou faatinoga i le lalolagi o agaga e uunaia ai i tatou i le olaga faitino” (“The Great Plan of Happiness,” *Ensign*, Nov. 1993, 72).
14. Tagai i le Dallin H. Oaks, “Upumoni ma le Fuafuaga,” *Liahona*, Nov. 2018, 25–28.
15. Aperaamo 3:26.
16. Na saunua Peresitene Dallin H. Oaks:
“E talitonu le Au Paia o Aso e Gata Ai ua liuaina, o le aoaoga faavae i le folafolaga i le aiga, lea na fofogaina mai i le toetoe atoa le kuata seneturi talu ai, o le toefamamafa lea a le Alii i upumoni o le talalelei e manaomia ona tatou tausii ai i tatou ia manumalo i luitau o i ai nei i le aiga. . . .

“Ou te molimau atu o le folafolaga i le aiga o se malelega o le upumoni e faavavau, o le finagalo o le Alii mo Ana fanau o ē sailia le ola e faavavau. Ua avefa pea ma faavae o aoaoga ma faatinoga a le Ekalesia mo le 22 tausaga talu ai ma o le a faaauau pea mo le lumanai. Mafaufau i ai, aoao atu, ola ai, ma o le a faamanuiaina outou a o outou fetaomi atu i luma agai i le ola e faavavau. . . .

“... Ou te talitonu o o tatou uiga e faatatau i le folafolaga i le aiga ma lona faaogaina o se tasi lea o na tofotofoga mo lena tupulaga. Ou te tatolo mo tagata uma o le Au Paia o Aso e Gata Ai ia tutu mausali i lena tofotofoga” (“O Le Fuafuaga ma le Folafolaga,” *Liahona*, Nov. 2017, 30–31).

17. Na saunua mai Peresitene Russell M. Nelson: “E i ai i latou e faailogaina i tatou [o ni] tagata faailogalanu, ae o tagata faailogalanu o i latou ia latou te lē faatagaina i tatou e



lagona mea e pei ona tatou lagonaina ae mananao ia i tatou e faatagaina i latou ia lagona mea e pei ona latou lagonaina. O lo tatou tulaga e faavae atoa i le tulafono o le ola mama. O Tulafono e Sefulu o loo aoga pea. E le'i aveesea lava [pe faaleaogaina]. . . E le o sa tatou aia le sui o tulafono ua faatulafonoaina e le Atua" (i le Dew, *Insights from a Prophet's Life: Russell M. Nelson*, 212).

18. "A o osofaia ai le aiga i le lalolagi atoa, o upumoni o le folafolaga i le aiga o le a faamallosia ai oe.

"O outou le autalavou o le tofi tautupu e manaomia ona malamalama i taunuuga ogaoga o fetauaiga a le lalolagi i le taimi nei i le faauigaga moni o le faaiipoipoga. O le finauga i le vaitau leni o le fesili lea pe mafai ona faaiipoipo ni tagata se toalua o le itupa e tasi. Afai e i ai sau fesili e uiga i le tulaga o le Ekalesia e faatatau i leni mea po o soo se faafitauli taua lava, ia mafaufau loloto i ai ma le agaga tatalo, ona gauai atu lea i savali faaperofeta i le konafesi aoao a le Ekalesia o loo loma ia Oketopa. O na lauga musuia, faaopoopo i ai ma musumusuga mai le Agaga Paia, o le a aumaia se malamalamaaga atoatoa i lou mafaufau" (Russell M. Nelson, "Youth of the Noble Birthright: What Will You Choose? [Church Educational System devotional for young adults, Jan. 13, 2013], broadcasts.lds.org

19. Russell M. Nelson, "Tutu Atu o ni Tagata Moni o le Meleniuma," *Liahona*, Oke. 2016, 53.

20. Sa saunua mai Peresitene Nelson:

"O faigamalo i le lotoifale ua malosi le faatosinaina e faiga faaagafesootai ma filosofia faalelalolagi a o latou tusia, ma toe tusia, ma faamalolosia tulafono. Po o a lava tulafono faalemalalo e ono faavaeina, o le aoaoga faavae a le Alii e faatatau i le faaiipoipoga ma le ola mama e le mafai ona suia. Ia manatua: o le agasala, e tusa lava pe ua faatagaina e tagata, o le agasala lava i le silafaga a le Atua!" ("O Faaiuga mo le Faavavau," *Liahona*, Nov. 2013, 108).

21. Ioane 6:66–69.

22. Tagai i le Alema 32:41–43; E faagaetia pea a'u i taimi uma i leni mataupu maoae e uiga i le tuputupu a'e o lo tatou faatuatua, uiga mama o le faatuatua, onosai, ma le filiga ia e ta'ua faatasi i fuaiupu taitasi o fuaiupu mulimuli e tolu.

23. Tagai i le Alema 7:12; E le gata na puapugatia Iesu Keriso mo a tatou agasala ae mo o tatou foi vaivaiga: "O le a ia ave i ona luga le oti, ina ia mafai ona ia tatalaina noataga o le oti ia ua noatia ai ona tagata; ma o le a ia ave i ona luga o latou vaivaiga, ina ia mafai ona faatumuina ona loto i le alofa mutimutivale, e tusa ai ma la le tino, ina ia mafai ona ia silafia e tusa ai ma la le tino, le ala e fesoasoani ai i ona tagata, e tusa ma o latou vaivaiga." (O upu uiga tutusa mo vaivaiga o le ma'i, le atoatoa, mafatiaga, faaletonu.) Tagai i le Mataupu Faavae ma Feagaiga 88:6: "Na afio ifo o ia i lalo o mea uma, lea na malamalama ai o ia i mea uma, ina ia mafai ona i ai o ia, o le malamalama o le upumoni, i mea uma ma ala atu i mea uma."



SAUNIA E ELDER TAKASHI WADA
O Le Fitugafulu

Taumamafa Fiafia i le Afioga a Keriso

O le taumamafa fiafia i afioga a Keriso e mafai ona tupu i soo se taimi ma i soo se tulaga, pe afai tatou te saunia o tatou loto.

E alofa lo tatou Tama Faalelagi ia i tatou. Ua Ia saunia se fuafuaga atoatoa mo i tatou ina ia iloilo ai i Ana faamanuiaga. I leni olaga, ua valaaulia i tatou uma ina ia o mai ia Keriso ma maua le talalelei toefuataiina a Iesu Keriso e ala i le papatisoga, mauaina o le meaalofo o le Agaga Paia, ma ola faamaoni i le talalelei. Ua faamatala e Nifae lo tatou tautinoga ina ia papatiso-ina, o le ulufale atu i se "ala lauitiiti ma le vaapiapi," ma ua ia faamanatu mai ia i tatou ina ia faaauau pea ona "fetaomi

atu i luma ma le tumau ia Keriso, . . . ma taumamafa fiafia i le afioga a Keriso, ma tumau e oo i le iuga," ina ia maua faamanuiaga uma ua faapolopolo e le Tama Faalelagi mo i tatou (2 Nifae 31:19–20).

Ua toe faamanatu mai e Nifae ia i tatou e faapea afai tatou te "taumamafa fiafia i le afioga a Keriso," latou te "ta'u mai ai ia te [i tatou] mea uma e tatau ona [tatou] faia" (2 Nifae 32:3) ma o le a tatou maua le mana e manumalo ai i "ufanafana mu a le fili" (1 Nifae 15:24).





O le a le Taumamafa Fiafia?

A o ou laitiiti, sa ou manatu o le taumamafa fiafia o le tau lava o le mauaina o se meaai telē ma le araisa, sushi, ma le sosi. Ua ou iloa nei o le taumamafa fiafia e sili atu i lo le olioli i se taumafataga manogi. O se aafiaga o le olioli, faafaiilelega, faafiafiaga, fetufaaiga, faailoaina o le alofa i aiga ma ē pele, tuuina atu o a tatou faafetai i le Atua, ma le fausiaina o sootaga a o olioli i le anoano o meaai ua matua sasala le manogi. Ou te talitonu a tatou taumamafa fiafia i afioga a Keriso, e tatau ona tatou mafau fau i lea lava aafiaga e tasi. O le taumamafa fiafia i tusitusiga paia e le na o le faitau i ai. E tatau ona aumaia ia i tatou le olioli moni ma fausia ai o tatou sootaga ma le Faaola.

O loo manino le aoaoina mai o lenei mea i le Tusi a Mamona. Manatua le miti a Liae lea sa ia vaaia ai se laau “o ona fua sa manaomia lava e faafiafia ai le tagata.” O le fua lenei ua fai ma faatuga o le alofa o le Atua, ma a o tofo Liae i le fua, “ua . . . sili ona suamalie, nai lo o mea uma sa [ia] tofo muamua i ai.” Sa “faatumulia [lona] agaga i le olioli tele” ma o se mea sa ia manao e faasoa atu i lona aiga (1 Nifae 8:10–12).

A tatou taumamafa fiafia, o le a mafai foi ona tatou iloa atonu e le afaia le telē po o le ituaiga o meaai tatou te aai ai, pe afai e faatumulia o tatou

loto i le faafetai. Sa ola le aiga o Liae i aano mata i le vao, ae sa faamatalaina e Nifae lenei tofotofoga faigata, e faapea, “Sa matua tele lava faamanuiaga a le Alii” o “o matou fafine . . . sa malolosi” ma mafai ona fanauina fanau “e aunoa ma le muimui” (1 Nifae 17:1–2).

O le taumamafa fiafia o nisi taimi e aofia ai le faataitaiina ma le tofoina. Na talanoa Alema e uiga i se fatu lelei e toto i o tatou lotu. A o tatou faataitai i ai, o le a tatou iloaina o le fatu e amata “ona suamalie” (tagai i le Alema 32:28–33).

Taumamafa Fiafia i le Afioga a Keriso

O faamanuiaga o le taumamafa fiafia i le afioga a Keriso e mamana ma e suia ai olaga. E tolu [faamanuiaga] faapitoa ou te manao e valaaulia outou e faaoga i o outou olaga.

Muamua, o afioga a Keriso e mafai ona fesoasoani ia i tatou ia “faateleina lo [tatou] gafatia faaleagaga e maua ai faaaliga” (Russell Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 96) ma taiala ai ma le saogalemu i tatou i o tatou olaga. Ua aoa mai Mamona o afioga a Keriso ua i ai “se uiga malosi e taitai atu ai tagata ia latou faia le mea [ua] tonu,” ma e sili ona malosi ai i latou i lo soo se mea e mafai e “le pelu” ona

faataunuaina (Alema 31:5). A o ou saili mo le atamai o le Atua i le taulimaina o o’u lava luitau, i taimi uma ou te faataitai ai le “mana o le afioga a le Atua” (Alema 31:5), na ou lagona le musuia ma le gafatia e faia faaiuga poto, faatoilalo faaosoosoga, ma faamanuia lo’u olaga i le faatuatua faateleina ia Keriso ma le alofa mo i latou o siomia a’u. Na aoa mai i tatou e lo tatou perofeta, o Russell M. Nelson, e faapea “i aso a sau, o le a le mafai ona ola ai faaleagaga e aunoa ma le taiala, taitaiga, faamafanafanaga, ma le faatosinaga faifai pea a le Agaga Paia” (“Faaaliga mo le Ekalesia, Faaaliga mo o Tatou Olaga,” 96). O le a oo mai faaaliga e manaomia pe a tatou faataitai le “mana o le afioga,” ma o lena afioga o le a sili atu ona mamana nai lo se isi mea e mafai ona tatou faataitai pe mafau fauina.

Lua, pe a tatou tauivi ma o tatou lava faasinomaga ma le leai o se taua faaletagata lava ia, o le “afioga malie a le Atua” (Iakopo 2:8) i tusitusiga paia o le a fesoasoani ia tatou iloa po o ai moni i tatou ma tatou maua ai le malosi e sili atu i lo tatou lava malosi. O le iloaina o lo’u faasinomaga o se atalii o le Atua o se tasi lea o taimi sili ona matagofie ua ou lagonaina. I tausaga o lo’u talavou, sa ou le iloa se mea e uiga i aoaoga a le Faaola. Ina ua ou faato’ā



faitau i le Feagaiga Fou, na faamalolo moni e afioga a Keriso lo’u agaga mafatia. Na ou iloina e le o tuuatoatasi a’u ma o a’u o se atalii o le Atua. A o o’u iloina lo’u faasinomaga moni i luma o le Atua, sa ou iloa lo’u gafatia lemafua-tia e ala i le Togiola a Keriso.

Sa faasoa mai foi e Enosa lona aafiaga patino e uiga i le faamaninoga lea e oo mai le mafau-fau i afioga a Keriso. A o tuu e Enosa afioga na aoao atu e lona tama ia te ia e faatatau i le “ola e faavavau, ma le olioli o le Au Paia, [e gotouga] ifo i [lona] loto,” sa “mate-laina [lona] agaga; ma sa [ia] tootuli i lalo i luma [o lona] Tufuga . . . i le tatalo malos” (Enosa 1:3–4). I lona tatalo sa oo ina ia iloa le Faaola ma aoao ai e i ai so tatou taua tele, e alofaina ma e mafai ona faamagaloina a tatou mea sese, ma o fanau moni a le Atua.

Tolu, e mafai ona tatou siitia olaga o isi e ala i afioga a Keriso. E pei foi ona oo i ai Enosa i lona lava taimi ma le nofoaga na pa’i atu ai afioga a Keriso i lona loto, e faia foi e le Alii Lana vaega e pa’i atu ai i loto o i latou tatou te mananao e faasoa atu i ai le talalelei. Atonu o le toatele o i tatou e lagona le faavaivai pe a tatou taumafai e valaaulia se tasi e faalogi o le talalelei ona e le’i tupu le mea na tatou mananao e tupu. E ui lava i le taunuuga, ae ua valaaulia i tatou e le

Alii e tatala o tatou gutu ma faasoa atu le savali o le talalelei ia i latou.

I le lua tausaga talu ai, na pa’i mai le Alii i le loto o lo’u tina pele, lea na fesoasoani ia te ia e filifili e talia le sauniga o le papatisoga. Sa ou faatalitali mo lona aso ina ia tupu mo le toeitiiti 35 tausaga. Ina ia mafai e ia ona faia lona faaiuga, sa auauna moni le toatele o tagata o le Ekalesia ia te ia e pei ona faia e Keriso. I se tasi aso Sa, sa ia lagona e tataua ona ia alu i le lotu. Sa ia mulimuli i le musumusuga. A o saofai o ia i le atulaina pito i luma ma faatalitali mo le sauniga faamanatuga e amata, sa tu i ona luma se tamaitiiti e fa tausaga ma tilotilo atu ia te ia. Sa ia faafeiloaia o ia i se ataata. Sa vave ona tuua o ia e le tamaitiiti ma toe savali atu i lona lava nofoa, lea sa i ai i le isi itu o le atulaina sa saofia ai lo’u tina. Sa piki i luga e le tamaitiiti se mea mai lona nofoa ma toe foi atu ma tuu atu i lo’u tina se tusipese ma toe savali atu i lona nofoa. Sa matauina e lo’u tina sa tuu se tusipese i isi nofoa uma o le falesa. Sa ono faigofie lava ona ia pikiina se [tusipese] mai le nofoa sa i ona autafa. Peitai, sa fiafia tele o ia i le faatinoga mamā o le agalelei o le tamaitiiti, lea na ia aoaoina i lona aiga ma i le lotu. Sa o se taimi faagaecetia mo ia. Sa ia maua se uunaiga malos sa valaaulia o ia e le Atua e sau ma mulimuli i

le Faaola. Sa ia lagona e tataua ona papatiso o ia. Sa le’i sailia e lenei tamaitiiti se faamamaluga mo le mea na ia faia, ae sa tau lava o lona faia o le mea silisili e ola i le afioga a le Atua ma ia alofa atu i lona tuaoi. Na fatuina e lona agalelei se suiga taua i le loto o lo’u tina.

O afioga a Keriso o le a pa’i atu ma le malos i loto ma faapupula mata o i latou e lei vaai lava ia te Ia. I luga o le ala i Emau, sa savavali ai ni soo se toalua faatasi ma Iesu. Sa la faanoanoa ma sa le’i malamalama na manumalo le Faaola i le oti. I lo la faavavau, sa la le iloina ai o loo latou savavali faatasi ma le Keriso soifua. E ui sa “faamatala e [Iesu] ia te i laua o mea ua tusia ia te ia i Tusi uma,” ae sa la le’i iloina o Ia o le Faaola toetu seia oo ina latou saofafai ma tofitofi le areto faatasi ma Ia. Ona pupula ai lea o laua “mata”. Pe a tatou—po o a tatou uo, paaga, ma tuaoi—taumamafa fiafia ma tofitofi faatasi ma Ia le areto, o le a pupula o tatou mata o le malamalama. Ina ua mafau-fau soo i Emau i lo la taimi faatasi ma le Faaola toetu, sa la fai mai sa mu o laua loto i totonu o i laua a o Ia tatalaina Tusi ia i laua (tagai i le Luka 24:27–32). E moni lenei mea mo i tatou uma.

Faaiuga

I le faaiuga, ou te molimau atu o le taumamafa fiafia i afioga a Keriso e mafai ona tupu i soo se taimi ma i soo se tulaga, pe afai tatou te saunia o tatou loto e taliaina. O le taumamafa fiafia i afioga a Keriso o le a aumaia ai faaaliga e lagolagoina le olaga, toefaa-mautu lo tatou faasinomaga moni ma le taua i luma o le Atua i le avea ai ma Ana fanau, ma taitai atu a tatou uo ia Keriso ma le ola e faavavau. Se’i ou faaiu atu i le faaleoina o le valaaulia a Nifae lea na ia fai mai: “E tataua ai ona outou fetaomi atu i luma ma le tumau ia Keriso, ma se susulu atoatoa o le faamoemoe, ma le alofa i le Atua ma tagata uma. O le mea lea, afai o le a outou fetaomi atu i luma, ma taumamafa fiafia i le afioga a Keriso, ma tumau e oo i le iuga, faauta, ua faapea ona fetalai mai le Tama: o le a outou maua le ola e faavavau” (2 Nifae 31:20). I le suafa, o Iesu Keriso, amene. ■



SAUNIA E ELDER DAVID P. HOMER
O Le Fitugafulu

Lagonaina o Lona Siufofoga

I se lalolagi ma le tele naua o leo faatautavā, ua faia e lo tatou Tama Faalelagi ina ia mafai e i tatou ona lagonaina ma mulimuli i Lona [siufofoga].

I le taeao po ananei le taeao, na tuu atu ai e le tuagane o lo’u toalua ia te ia se tusi sa ia tusia i lona tina i le tele o tausaga ua mavae. I lona taimi, o Sister Homer sa na o se teineitiiti laitiiti. I se vaega, o lana tusi e faitauina, “Tina Pele, ou te faamalie atu ou te le’i faasoaina atu la’u molimau i le asō—ae ou te alofa ia te oe.” A o matou o atu mo le taumafataga o le aoauli, sa ou manatu e manaia lona mea. O lea sa ou nofo ai i lalo, ma sa ou tusia se tusi e faapea, “Peresitene Nelson pele, ou te faamalie atu ou te le’i tuuina atua la’u lauga i le asō—ae ou te alofa ia te oe.” Ae i se itu, e le’i sa’o le lagona i lona mea. O lea la ua tatou i ai iinei, ma ua ou fiafia e faaopoopo atu a’u upu i [na saunoaga] ua fofogaina i lenei sauniga i le asō.

I le tele o tausaga ua mavae, sa ou malaga ai i se tama’i vaalele na faafoeina e se pailate faatoa maua se laisene. I le faaiuga o le matou faigamalaga, sa kilia mai i matou e tulaueleele. Ae ina ua matou latalata atu i le laueleele, sa ou faalogoina se faailo i le potu o le avevaalele o lapataia le pailate e “alu i

luga.” Na tepa atu le pailate i le pailate fesoasoani atamai atu, lea na faasino atu i le itu i lalo, na mamao ese mai le auala o le vaalele, ma fai atu, “Ia!”

Na vave ona me’i le matou vaalele i le itu agavale ma lalo, ona toe masagi lea i luga i se maua luga talafeagai, toe foi i le mamau e tulaueleele ai, ma tau-nuu saogalemu ai i lo matou nofoaga faamoemoeina. Sa matou iloa mulimuli ane sa i ai se isi vaalele na kilia e lele ese

atu. Pe ana matou mulimuli i faatonuga o le faailo, semanu matou te lele sa’o lava i ai, nai lo lele ese, mai le vaalele o loo sau. O lenei aafiaga na aoao ai a’u i ni lesone taua se lua: Muamua, i taimi sili ona taua i o tatou olaga, o le a tatou faalogoina ai ni leo se tele o faatautavā mo lo tatou gauaiga. Ma le lona lua, e taua lo tatou faalogoina i leo sa’o.

Leo Faatautavā

O loo tatou ola i se lalolagi e tele leo o loo sailia lo tatou gauaiga. Faatasi ai ma talafou uma i mea o loo tutupu i le taimi nei, tuiti, poloka, podcasts, ma fautuaga faatauina mai ia Alexa, Siri, ma isi, ua faigata ai ona tatou iloa po o fea leo e faatuatua. O nisi taimi tatou te fesili mo ni manatu taiala i o tatou olaga, ma le manatu o le a aumaia e le toatele ni punavai sili ona lelei o mea moni. O nisi taimi tatou te “faaletonu i manatu e lua,”¹ filifili “e le malulu pe vevela.”² O nisi lava taimi tatou te mulimuli i mea e faigofie, taulai atu i se leo e tasi po o se mataupu e taitaia i tatou, po o le faalogolago atoa atu i lou lava tomali e mafaufau ai

E ui e ono aoga nei auala taitasi, ae o loo aoao mai e aafiaga e le faatuatua na mea i taimi uma. E le faapea o mea e tautaua o mea sili ia i taimi uma. O le faaletonu i ni manatu se lua e le aumaia se taitaiga. O le faigofie e seasea ona taitai atu i ni mea e taua. O le taulai atu i se leo e tasi po o se mataupu e mafai ona faalelei ai lo tatou tomali e iloa ai. Ma o le faalogolago atoa atu i lo tatou lava mafaufau e mafai ona taitai





ai i upumoni taua ia sa ia tuulafoaia, sa ia auē ai, “Sa ou iloa i taimi uma lava.”⁷

Ona aisi solo lea o Korioa mo se meaai scia oo ina solia o ia ma oti ai e se vaega o sa Sorama.⁸ O le fuaiupu mulimuli i lana tala o loo i ai lenei manatunatuga manino: “Ma ua faapea ona tatou vaai ai e le lagolagoina e le tiapolo ana fanau i le aso o gataaga, ae vave ona ia toso i lalo i latou i seoli.”⁹

O Le Leo Sa’o

Talu ai e finagalo lo tatou Tama Faalelagi i mea sili ona lelei mo i tatou, ua Ia faia ai ina ia mafai ona tatou lagona Lona siufofoga. O le tele o taimi, tatou te lagona o Ia e ala i uunaiga e tuuina mai e le Agaga Paia. O le Agaga Paia o le tagata lona tolu o le Aiga Atua. E moli-mau mai o Ia i le Tama ma le Alo,¹⁰ na auina mai e “aoao [i tatou] i mea uma,”¹¹ ma o le a “faaali mai ia te [i tatou] mea uma e tatau ona [tatou] faia.”¹²

E talanoa le Agaga i tagata esecese i auala esecese, ma e atonu Na te talanoa i le tagata lava e tasi i ni auala esecese i taimi esecese. O se taunuuga, o le aoaoina o auala e tele e talanoa mai ai o Ia ia i tatou o se sailiga lea o le olaga atoa. O nisi taimi, e fetalai mai o Ia i o tatou “mafaufau ma [o tatou] loto”¹³ i se leo itiiti, ae mamana, ma e āti “i le totonugalemu o i latou o e na faalogo i ai.”¹⁴ O nisi taimi, i Ana uunaiga o “i ai . . . [i o tatou] mafaufau” pe “uunai . . . i [o tatou] lagona.”¹⁵ O nisi taimi, o le a “mu i totonu [o o tatou loto].”¹⁶ O nisi lava taimi, Na te faatumulia o tatou agaga i le olioli, faamalamalamaina o tatou mafaufau,¹⁷ pe talanoa mai e uiga i le filemu i o tatou loto mafatia.¹⁸

Mauaina o Lona Siufofoga

O le a tatou mauaina le siufofoga o lo tatou Tama i le tele o nofoaga. O le a tatou mauaina pe a tatou tatalo, pe a tatou suesue i tusitusiga paia, ma pe a tatou auai i le lotu, gauai atu i talanoaga faamaoni, po o le alu i le malumalu. E mautinoa lava, o le a tatou mauaina i le konafesi i le faaiuga o lenei vaiaso.

O le asō na tatou lagolagoina ai ni tamalii e toa 15 o ni perofeta, tagata-vai, ma talifaaaliga. O o latou tulaga faaleagaga ma aafiaga e tuuina atu ai ia

atu ai i tatou ia faalagolago i o tatou lava mafaufauga papa. Afai tatou te le faaeteete, e mafai e leo sese ona tosoe-sea i tatou mai le totonugalemu o le talalelei i nofoaga e faigata ai ona faatumauiina le faatuatua, ma tatou maua ai sina mea e sili teisi lava ma le tuugao-gaoina, lototiga, ma le le faamalieina.

Faalogo i le Leo Sese

Se’i o’u faataitaia atua le uiga o la’u tala i le faaogaina o se tala faatusa ma se faataitaiga faatusitusiga paia. E masani ona faasino atu tagata a’e mauga i mea mauualuluga i luga atu o le 8,000 mita o se “sone o le oti” aua, i na maualuga, e le lava le okesene e lagolago ai le ola. E i ai se tulaga tutusa faaleagaga i le sone o le oti. Afai tatou te faaaluina tele se taimi i ni nofoaga e le maua ai le faatuatua, o le a aveesea mai ia i tatou e leo e foliga mai e lelei le okesene faaleagaga tatou te manaomia.

I le Tusi a Mamona, ua tatou faitau i ai ia Korioa, o le sa i ai sea ituaiga aafiaga. Sa fafia o ia i le lauiloa tele ona o ana aoaoga sa “logolelei [i le] mafaufau faaletino.”³ Fai mai o ia sa aoao e mātua ma perofeta uputuu valea ua mamanuina e faaitiitia ai le saolotoga ma faaauau ai le le iloa o se mea.⁴ Sa ia finau e tatau i tagata ona saoloto e faia soo se mea latou te filifili e fai aua o poloaiga ua na o ni tapu ua faigofie ona fuafuaina.⁵ Ia te ia, o le talitonuga i le Togiola a Iesu Keriso o le “fua lea o se mafaufau valea,” na fatuina e se talitonuga i se tagata e le mafai ona tino mai ona e le mafai ona vaia o Ia.⁶

Na fatuina e Korioa le tele o vevesi lea na aumai ai o ia i luma o le faamasino sili ma le faitaulaga sili. O iina, sa ia tulai atu ai “i upu leotetele,” ma faitiaina taitai ma manao i se faailoga. Na tuuina atu se faailoga. Sa taia o ia ina ia le mafai ona toe tautala. Ona iloa lea e Korioa sa faaseseina o ia, ma mafaufau

i latou se vaaiga tulagaese lea tatou te matuai manaomia tele. O a latou savali e faigofie le mauaina ma talanoaina ma le manino atoatoa. Latou te ta'u mai ia i tatou mea e finagalo le Atua ia tatou iloa, pe e lauiloa pe leai.¹⁹

O le sailia o Lona siufufoga i se nofoaga se tasi o nei nofoaga, e lelei, ae o le sailia i le tele o na [nofoaga], e sili atu ona lelei. Ma pe a tatou lagonaina, e manaomia ona tatou mulimuli i le faatonuga o loo tuuina mai. Fai mai le Aposetolo o Iakopo, “Ia fai outou ma e anaana i le upu, a e aua le na ona faalogologo i ai.”²⁰ Ma na aoao mai Peresitene Thomas S. Monson i se tasi taimi: “Tatou te mata'itu. Tatou te faatalitali. Tatou te faalogologo mo lena leo itiiti ma le filemu. A fetalai mai, e usiusitai alii ma tamaitai popoto.”²¹

Pe A Tuai le Oo Mai o le Faatonuga

I le amataga o lo'u olaga faalegaluega, sa talosagaina ai i ma'ua ma Sister Homer e talia se suiga i se tofiga faalegaluega. I lea taimi, sa foliga mai ia i ma'ua o se filifiliga *tēle* tele. Sa ma suesue, sa ma anapogi, ma sa ma tatalo, ae sa tuai ona oo mai se tali. Na i'u lava, ina ma faia se faaiuga ma agai atu i luma. A o ma faia, sa ma lagona le toafimalie ma vave ona iloina o se tasi o faaiuga sili ona lelei ua ma faia.

O se taunuuga, na ma iloina ai o nisi taimi e tuai lava ona oo mai ni tali. E mafua lenei mea ona e lē o le taimi sa'o, ona e lē manaomia se tali, pe ona e faatuatua ina i tatou e le Atua e faia ni a tatou lava faaiuga. Na aoao mai e Elder

Richard G. Scott i se tasi taimi faapea e tatau ona tatou loto faafetai mo ia itu-aiga o taimi ma faia ai lenei folafolaga: “Afai e te ola agavaa ma o loo ogatusa lau filifiliga ma aoaoga a le Faaola ma ua manaomia ona e gaoioi, ia faia loa ma le faatuatua. . . . O le a lē tuuina outou e le Atua e agai ese mamao atu e aunoa ma se uunaiga o le lapataiga pe afai na outou faia ni faaiuga sese.”²²

E Tatau Ona Tatou Filifili

Ma o lea, e manaomia ona tatou filifili po o fea o leo eseese uma ia o le a tatou usiusitai i ai. Pe o le a tatou mulimuli ea i leo e le faatuatua ina o loo fautua mai e le lalolagi, pe o le a tatou faia le galuega manaomia e faataga ai le siufofoga a lo tatou Tama e taialaina i tatou i a tatou faaiuga ma puipua i tatou mai tulaga lamatia? O lo tatou sailia ma le filiga atili o Lona siufofoga, o le a faigofie atili ai ona tatou lagonaina. E le faapea o le a sili atu ona leotele Lona siufofoga ae ia faateleina lo tatou gafatia e lagonaina ai. Ua folafola mai e le Faaola afai tatou te “faalogologo i [Ana] mataupu, ma ua'i o [tatou] taliga i [Ana] fautuaga,” “o le a [Ia] tuu mai atili [ia i tatou].”²³ Ou te molimau atu e moni lenei folafolaga—mo i tatou taitoatasi.

Toeitiiti atoa le tausaga talu ona malii lo'u uso matua i se faalavelave matautia tau taavale. O le olaga talavou o Ioane sa tumu i folafolaga ma ausiaga. Ae a o ia faasolo ina matua, o ma'i o le tino ma le tuai o le mafaufau na matuai faigata ai le olaga. E ui e

lei oo mai le faamalologa i lona olaga lea na ia faamoemoe i ai, ae sa tumau pea Ioane i lona faatuatua, naunau ia tumau, i le mea sili na te mafaia, seia oo i le iuga.

I le taimi nei, ou te iloa sa lei atoatoa Ioane, ae sa ou mafaufau po o le a le mea lea na tuuina atu ia te ia lea itu-aiga o onosai. O le tele o leo na valaauliaina o ia ia masalosalo ma taumamao, ae sa ia filifili e leai. Ae, sa ia faia le mea sili na te mafaia ia taula lona olaga i le totonugalemu o le tala-lelei. Sa ia ola ai i lona olaga iina, aua sa ia iloa o le a ia maua ai le siufofoga o lona Matai iina; sa ia ola ai i lona olaga iina, aua sa ia iloina o iina o le a aoaoina ai o ia.

Faaiuga

Uso e ma tuafafine, i se lalolagi ma le tele naua o leo faatautavā, ou te molimau atu ua faia e lo tatou Tama Faalelagi ina ia mafai e i tatou ona lagonaina ma mulimuli i Lona [siufofoga]. Afai tatou te filiga, o le a La tuuina mai faatasi ma Lona Alo ia i tatou le taitaiga o loo tatou sailia, le malosi tatou te manaomia, ma le fiafia o loo tatou mananao uma i ai. I le suafia, o Iesu Keriso, amene. ■

FAAMATALAGA

1. 1 Tupu 18:21.
2. Tagai i le Faaaliga 3:15–16.
3. Alema 30:53; tagai foi i le Alema 30:18.
4. Tagai i le Alema 30:14, 23–24, 27.
5. Tagai i le Alema 30:17, 23, 27.
6. Alema 30:16; tagai foi i le Alema 30:13, 15, 26, 28.
7. Alema 30:31, 52; tagai foi i le Alema 30:23, 28, 43, 50, 53.
8. Tagai i le Alema 30:56, 58–59.
9. Alema 30:60.
10. Tagai i le 2 Nifae 31:18.
11. Ioane 14:26.
12. 2 Nifae 32:5; tagai foi i le 2 Nifae 32:1–4.
13. Mataupu Faavae ma Feagaiga 8:2.
14. 3 Nifae 11:3.
15. Mataupu Faavae ma Feagaiga 128:1.
16. Mataupu Faavae ma Feagaiga 9:8.
17. Tagai i le Mataupu Faavae ma Feagaiga 6:14–15; 11:13.
18. Tagai i le Mataupu Faavae ma Feagaiga 6:22–23.
19. Tagai i le Mataupu Faavae ma Feagaiga 1:38.
20. Iakopo 1:22.
21. Thomas S. Monson, “O Le Agaga E Ola Ai,” *Liahona*, Iuni 1997, 4.
22. Richard G. Scott, “Faagaogaina o le Meaalofa Faalelagi o le Tatalo,” *Liahona*, Me 2007, 10.
23. 2 Nifae 28:30.





SAUNIA E ELDER JEFFREY R. HOLLAND
O Le Korama a Aposetolo e Toasefululua

Faauta i le Tamai Mamoe a le Atua

O a tatou sauniga ua fetuunaia o le Aso Sa ua faamamafa ai le faamanatuga o le Tausamaaga a le Alii e fai ma taulaiga autu paia, ma faamamaluina o lo tatou aafiaga i tapuaiga i vaiaso taitasi.

Sa ou lelei lava seia oo ina ou vaaia loimata o na tagata talavou i lenei aufai-pese. O na loimata o se lauga e sili atu ona mamana nai lo se [lauga] e mafai ona ou tuuina atu.

I le vaai atu mai le si'uvai, i talaatu o le motu o tagata naunautai o loo saili mo lona papatisoina o i latou, sa iloa atu ai e Ioane le Papatiso i se mea mamao lona tausoga, o Iesu le Nasareta, o loo savali sa'o atu ia te ia e fai atu lea lava talosaga e tasi. Ma le faaaloalo, ae leotele lelei mo i latou na latalata ane na lagonaina, sa fai atu ai Ioane ma le faamemelo i upu ia o loo uunaia ai pea i tatou i le lua meleni-uma mulimuli ane: “Faauta i le Tamai Mamoe a le Atua.”¹

E taua ona iloa o lenei teuteu-ala ua loa ona valoia mo Iesu sa le'i valaau-ina o Ia ia “Ieova” po o le “Faaola” po o le “Togiola” ia po o le “Alo o le Atua”—o suafa talafeagai uma ia. Leai, na filifilia e Ioane le faatusa sili ona leva ma masalo o le faatusa sili ona

taatele i le tumasani faalelotu o lona nuu. Na ia faaaogaina le faatusa o se tamai mamoe mo taulaga e ofo atu mo le togiolaina o agasala ma faanoanoaga o se lalolagi pa'ū atoa ai ma tagata pa'ū'ū uma o loo i ai.

Faamolemole faataga a'u se'i faama-talaina teisi lena talafasolopito.

Ina ua tuliesea mai le Faatoaga o Etena, sa feagai Atamu ma Eva ma se lumanai lofituina. O le tatalaina ai o le faitotoa i le oti ma le olaga faaletino mo i tatou, sa la'ua tapunia ai le faitotoa i le tino ola pea ma le ola e faavavau mo i la'ua lava ia. Ona o se solitulafono sa la'ua filifili ma le loto i ai e fai, ua la feagai nei ma se oti faaletino ma se tafiesega faalecagaga, vavaeesea mai le afioaga o le Atua e faavavau.² O le a le mea e ao ona la faia? E i ai ea se auala e sao ai mai lenei pagatia? Tatou te lē mautinoa po o le a le tele o mea na faatagaina le toalua lenei e manatua e uiga i faatonuga na la maua a o i ai pea i le faatoaga, ae sa la'ua manatua *lelei* sa ao ona la osi atu e le aunoa se taulaga i le Atua i se tamai mamoe mamā ma le lē ponā, o le uluai po'a o le la lafu.³

Mulimuli ane sa oo mai se agelu e faamalamalama mai o lea taulaga o se ituaiga, o se muaifaatusa o le taulaga o le a faia mo i latou e le Faaola o le lalolagi o lē o le a afio mai. “O lenei mea o se faatusa lea o le taulaga a le Toatasi na Fanaua e le Tamā,” na fetalai atu ai le agelu. “O le mea lea, . . . ia e salamo ma valaau atu i le Atua i le suafa o le Alo e faavavau.”⁴ O le mea e lelei ai, sa i ai se ala i fafo ma luga.

I aufono i le muai olaga i le lagi, sa folafola atu ai e le Atua ia Atamu ma Eva (ma i tatou uma) lena fesoasoani o le a oo mai mai Lona Alo Ulumatua mamā ma le lē ponā, le Tamai Mamoe a le Atua “na fasia talu ona faavaeina o le lalolagi,”⁵ e pei ona faamatala mulimuli



ai o Ia e le Aposetolo o Ioane. E ala i le ofoina atu o ā latou lava tama'i mamoe e fai ma faatusa i le olaga nei, sa faailoa atu ai e Atamu ma ana fanau lo latou malamalamaaga ma le faalagolagoga i le taulaga togiola a Iesu Lē ua Faauuina.⁶ Mulimuli ane, o le falefētāfā'i i le vao na avea ma tulaga mo lenei sauniga ma, i le mavae ai o lēna, sa fausia ai le malumalu o Solomona,

Ae paga lea, i le avea ai ma se faatusa o le salamo faamaoni ma le ola faatuatua, sa le'i galue lelei tele ai lenei taulaga faalesauniga o tamai mamoe lē pona, e pei ona faaalua i le tele o le Feagaiga Tuai. O nisi taimi, o le nautauga mamā sa tataua ona ō faatasi ma na taulaga, sa na o sina taimi lava na tumau ai. I soo se tulaga, sa le'i lava lona tumau e puipua ai le uluai fasioti tagata, i le fasiotiga e Kaino o lona uso o Apelu i le uluai tupulaga.⁷

Faatasi ma ia tofotofoga ma faafitauli sa faifai pea mo seneturi, e leitoa pepese agelu o le lagi i le olioli ina ua i'u ina soifua mai Iesu—le Mesia lava Ia ua loa na folafola mai. Ona sosoo ai lea ma Lana auunaga puupuu i la le tino, o lenei mamoe sili ona mamā o mamoe uma o le Paseka, sa sauniaina Ona soo mo Lona maliu e ala i le faailoa atu o le faamanatuga o le Tausamaaga a le Alii, o se ituaiga o sauniga e sili atu ona patino lea sa faalauiloa mai i fafo mai o Etena. O le a i ai pea se foai, o le a aofia ai pea se taulaga, ae o le a faia i se faatusa e sili atu ona loloto, sili atu ona faamatuā'ia ai se tasi e mafaufau loloto ma patino nai lo le fasia o se tamai mamoe ulumatua. I le au sa Nifāē, i le mavae ai o Lona Toetu, na fetalai atu ai le Faaola:

“Ma ia outou le toe osia mai ia ia te au se taulaga i le faamaligiina o le toto. . . .

“ . . . Ma ia outou osi mai mo se taulaga ia te au le toto momomo ma le agaga salamo. Ma o soo se tasi e sau ia te au ma le toto momomo ma le agaga salamo, o ia lea o le a ou papatisoina i le afi ma le Agaga Paia. . . .

“ . . . O lea, salamo, . . . ma faaolaina ai.”⁸

O'u uso e ma tuafafine pele, faatasi ai ma le faamamafa fou faagaetiaina i



le faateleina o le aoaoina o le talalelei i totonu o le aiga, e taua tele mo i tatou ona manatua o loo poloaiina pea i tatou ia “o atu i le fale tatalo ma osi a’e i luga au faamanatuga i lo’u aso paia.”⁹ E faaopoopo atu i le faaavanoaina o taimi mo aoaoga o le talalelei e faatotonugalemu-i-le-aiga, o a tatou sauniga o le Aso Sa ua fetuunaia ina ia faaitiitia ai le faigata o faasologa o sauniga i se auala e faamamafa lelei ai le faamanatuga o le Tausamaaga a le Alii e fai ma taulaiga autu paia, ma faamamaluina o o tatou aafiaga i tapuaiga i vaiaso taitasi. E ao ona tatou manatuaina i se ala sili ona patino tatou te mafai ai, na maliu Keriso mai se loto nutimomoia i Lona tauaveina atoa na o Ia o agasala ma faanoanoaga o le aiga atoa o le tagata.

Talu ai na tatou saofagā i lēna avega matautia, o se taimi faapena e matua manaomia ai lo tatou faaaloalo. O lea, ua uunaia ai tatou ia o mai vave ma le faaaloalo ia tatou sauniga, laei ma le talafeagai ia auai i se sauniga paia. O “laei sili o le Aso Sa” ua tau galoma

atu lona uiga moni i o tatou taimi, ma o le faaalua o le faaaloalo mo Ia o Lē e Ana le [sauniga] lea tatou te o mai i ai, e tataua ai ona tatou toefuatai maia lēna tumasani o foligavaaia ma laei tauagafau i le taimi ma le nofoaga e tataua ai.

Ae mo le vave mai [i sauniga], e tataua ona tatou onosai ma malamalama i nai tina e faananati mea uma ma le vevesi o le mafaufau, e tapena tamaiti, o pepa keke, o pampers, ia e laki ae maua mai le faamanatuga. Ma le isi, o le a i ai isi o le a lē maalofia le tau atu i a latou povi o pa’ū’ū i le lua i se taeao o se Aso Sa. Peitai, i le vaega lea e tauai mai lava, matou te faapea atu o se tauai *mai lea taimi i lea taimi* e malamalama lava i ai, ae afai e pa’u soo lau povi i totonu o le lua i Aso Sa *uma* lava, ona matou fautua malosi atu lea e faatau ese lau povi pe faatumu le lua.

I lēna lava agaga e tasi, matou te fai atu ai se talosaga faaaposetolo ia faaitiitia le pisapisao i le saogalemu o o tatou falelotu. Tatou te fiafia e feiloai i le tasi ma le isi, ma e tataua ai—o se tasi lea o



olioliga o le auai i le Lotu—ae e *lē* tatau lava ona faia i nofoaga ua faapaiaina faapitoa mo tapuaiga. Ou te popole i tagata asiasi e le o nisi o lo tatou faatuatuga e faate'ia i nisi taimi i le fe'ei ma le *lē* migao i totonu o se nofoaga e tatau ona faailogaina [e fai ai] tatalo, [maua ai] faaaliga, ma le filemu. Masalo e faate'ia ai foi le lagi latou ia.

O le a faapoopo atu i le agaga o a tatou sauniga faamanatuga pe afai e i ai le au pule faamalumalu i luga o le tulaga ae le'i taitai amata sauniga, faalogologo i musika muai tataina ma faia ma le migao le faataitaiga mo isi uma o i tatou e tatau ona mulimuli i ai. Afai o loo faia ni talanoaga i luga o le tulaga, e *lē* tatau la ona faate'ia i tatou i talanoaga i lalo i le faapotopotoga. Matou te faamālō atu i na au epikopo ua aveesea faasilasilaga ia e faaitiitia ai le agaga o a tatou tapuaiga. Mo a'u, e *lē* mafai ona ou vaai faalemafaufau i se ositaulaga e pei o Sakaria—iina i totonu o le malumalu anamua o le Alii, o le a auai i le avanoa faaositaulaga lava e tasi o le a oo mai ia te ia i lona olaga atoa—e *lē* mafai ona ou vaai faalemafaufau ia te ia o tu i luma o le fata faitaulaga e faamanatu mai ia i tatou e toe ono vaiaso fai le tolauapiga ma o le a faagata le lesitala [e pei e leai se sauniga paia o faia].

Uso e ma tuafafine, o lenei itula ua faauuina e le Alii o le itula aupito sili ona paia lea i lo tatou vaiaso. E ala i le

poloaiaga, ua tatou potopoto ai mo le sauniga sili ona maua soo e tagata o le Ekalesia i le lalolagi atoa. Ua faia lea e manatua ai o Ia o *lē* na *ō*le atu pe mafai ona aveese le ipu o le a Ia inuina, ae sa faaauau pea aua sa Ia silafia ona o lo tatou manuia e *lē* mafai ai ona aveese [lea ipu]. O le a fesoasoani pe afai tatou te manatuaina o se faatusa o lona ipu [po o le taulaga] o loo faasolo lemu mai i le laina nofoa agai mai ia i tatou i lona lava taimi.

Pe a oo mai le itula paia e tuu atu ai a tatou meaalofoa ua taulagaina i le Alii, ua i ai a tatou lava agasala ma vaivaiga ia foiaina. Ae atonu e sili atu ona faamanuina i tatou i se salamo faapena pe afai tatou te mafaufau i isi loto momomo ma agaga salamo o loo siomiaina i tatou. O loo nonofo e *lē* mamao mai ia i tatou nisi atonu o loo fetagisi—iloo atu loimata po o tagi le loto—i le taimi atoa o le viiga faamanatuga. Tau ina ia tatou ofo atua a tatou fasi falaoa o le faamafanafanaga ma tamai ipu vai o le agaalofoa mo i latou—e mafai ona tatou tuuina atu ia i latou? pe mo le tagata o tagi ma tauivi o *lē* e *lē* o i ai i le sauniga ma, se'i vagana ai ua tatou faia se faatinoga laveai, o le a *lē* toe i ai foi iina i le vaiaso e sosoo ai? pe agaalofoa atu foi o i tatou uso ma tuafafine e le o ni tagata o le Ekalesia ae o o tatou uso ma tuafafine? E *lē* toe muta lava mafatiaga

i lenei lalolagi, totonu o le Ekalesia ma fafo atu, o lea ia vaai ai i soo se itu ma o le a e maua ai se tasi o ona tiga e foliga mai ua mamafatū tele e tauave ma o *lē* e foliga mai e *lē* toe uma lona lototiga. O le tasi auala ia “manatua [ai] pea o ia”¹⁰ o le auai lea ma le Fomai Sili i Lana galuega *lē* muta o le aveesea o avega mai ia i latou o *ē* mafatia ma aveese tiga o i latou o *ē* faanoanoa.

Uo pele, a o tatou lotogatasi ai i le lalolagi atoa i vaiaso taitasi i le mea ua tatou faamoemoe o se faamamaluga paia faateleina o le meaalofoa mamalu o le togiola a Keriso i tagata uma, tau ina ia tatou aumaia i le fata faitaulaga o le faamanatuga “nisi loimata mo ona faanoanoaga [ma] nisi tiga e faavauvau ai o ia.” A o tatou manatunatu ai, tatalo, ma faafou feagaiga, tau ina ia tatou ave *mai* lona taimi paia se “onosai [atili] i tiga, . . . [ma viia atili] se mapusaga.”¹¹ Mo sea onosai ma le toomaga, mo sea paia ma le faamoemoe, ou te tatalo ai mo i tatou uma i le suafa o Ia o *lē* na tofitofia le areto faapelepele o le faamagaloga ma liligi le uaina paia o le togiola, o Iesu Keriso lava lea, le Tamai Mamoe faapelepele ma le alofa mutimutivale a le Atua, amene. ■

FAAMATALAGA

1. Ioane 1:29.
2. Tagai i le 2 Nifae 9:8–9.
3. Tagai i le Mose 5:5; tagai foi Esoto 12:3–10.
4. Mose 5: 7–8; tagai foi i le Mose 5:9.
5. Faaaliga 13:8.
6. Tagai i le, “Anointed One”; tagai foi i le Taiala i Tusitusiga Paia, “Anointed One,” scriptures.ChurchofJesusChrist.org.
7. I se tulaga matautia, o le fiasiotiga e Kaino o Apelu, o se faatinoga sa faatonutonu mulimuli ane e Satani, atonu sa fesootai i le ita o Kaino i le taimi muamua i ana taulaga osi sa teenaina e le Alii ae taliaina taulaga a Apelu.
“Sa saunia e le . . . Atua se taulaga i le meaalofoa o Lona lava Alo, o *lē* e tatau ona . . . tatalaina se faitotoa lea e mafai ai e le tagata ona ulufale atu i le afioaga o le Alii. . . .
“E ala i le faatuatua i lenei togiola po o le fuafuaga o le togiola, na osi atu ai e Apelu i le Atua se taulaga sa taliaina, o ulumatua ia o le lafu. Na ofoina atu e Kaino ia fua o le elele, ma sa lei taliaina. . . . [O lona taulaga sa tatau ona aofia ai] le faamaligiina o le toto” (Aoaaga a Peresitene o le Ekalesia: Iosefa Samita [2007], 48; tagai foi 107–8).
8. 3 Nifae 9:19–20, 22.
9. Mataupu Faavae ma Feagaiga 59:9.
10. Moronae 4:3; 5:2.
11. “Faapaia Mai A'u,” *Viiga*, nu. 70.



Sauniga Aoao Perisitua

SAUNIA E ELDER GARY E. STEVENSON
O Le Korama a Aposetolo e Toasefululua

O Lau Tusi Metotia o le Perisitua

Fatu sau oe lava tusi metotia o auala o le a e faamaonia ai oe lava ia o se soo o Keriso.

Ia Tesema talu ai, na tuuina mai ai e le Au Peresitene Sili se faamatalaga e faasilasila mai ai e faapea o tama e tai 11 tausaga le matutua o le a “amata ona auai . . . i korama a le Perisitua Arona . . . i le amataga o Ianuari o le tausaga e atoa i ai lo latou 12.”¹

O se taunuuga, o le vaega muamua o lenei tausaga, na i ai ni nai 11 tausaga le matutua na tete’i, na faapea o le a latou nonofo i le Peraimeri seia oo i lo latou aso fanau e sosoo ai ae ua tufa nei le faamanatuga i Aso Sa o ni tiakono faauuina sili ona fou o le Ekalesia.



Ou te mafaufau po o ai na sili ona faate’ia i le suiga—o tiakono fou po o o latou matua. O le toatele o nei tiakono fou toeitiiti 80,000, o loo faatasi ma i tatou i lenei po i lenei Maota Autu maoae mo Konafesi pe o loo auai mai e ala i tekinolosi. Susū maia i le usoga tele o le Perisitua!

O lenei suiga ua avea ai lenei sauniga ma se [sauniga] faasolopito—masalo o le vaega aupito i toatele o ē umia le Perisitua Arona *ua i ai* ua auai i se sauniga perisitua aoao o le konafesi aoao. I le mafaufau ai i lenei sauniga faapitoa, e faasino tonu la’u lauga i alii talavou o le Perisitua Arona.

Lesona ua Aoaina mai i Taaloga

I le avea ai ma tamaiti aoga, o le toatele o outou o loo atiae foi a outou taleni, mea e naunau i ai, ma mea e fafia ai e ala i gaioiga faaopoopo i le aoga po o lesona patino, o ‘au, ma vaega i fafo atu o le aoga, e aofia ai taaloga.

I le fafia ai i taaloga i lo’u olaga atoa, ou te faamemelo lava ia i latou o ē atiae o latou tomai faaafefeti i le tulaga latou te faatino ai i tulaga mauafuluga. Mo se tasi ina ia *matuā* lelei lava i soo se mea, e faaopoopo atu i le taleni natura,

e manaomia ai se lotopulea tele, ositaulaga, ma itula lēmafaitaulia o toleniga ma faataitaiga. O ia tagata afeleti e masani ona faalogo i nisi taimi i faitioga matuia a faiaoga ma naunau e tuu ese mea latou te mananao ai i le taimi nei mo se mea e sili atu i le lumanai.

Tatou te iloa tagata o le Ekalesia ma taitai perisitua o ē ua oo i le faamanuiaina i tulaga sili ona mauafuluga o afeleti faapolofesa. O loo i ai le tele o faataitaiga lelei, ae e na o ni nai [faataitaiga nei] ua mafai ona ou lisiina atu iinei ona o le taimi. Atonu e te iloina nisi o tagata taaalo nei: i le peisipolo, o Jeremy Guthrie ma Bryce Harper; i le pasiketipolo, o Jabari Parker ma Jimmer Fredette; i le soka, o Ricardo Rojas; ma le lakapi liki, o William Hopoate; ma i le lakapi Amerika, o Taysom Hill ma Daniel Sorensen. Ua faia e [i latou] taitoatasi se sao taua i lana taaloga.

E ui ina matuā faamanuiaina i latou i ā latou taaloga, ae o nei tagata afeleti o le a muamua ona tautino mai e lē o i latou o ni tagata afeleti atoatoa po o ni tagata soifua atoatoa. Latou te galulue malosi ina ia silisili ona lelei i a latou taaloga—ma ia ola i le talalelei. Latou te tutu i luga pe a latou pa’ū ma taumafai e tutumau e oo i le iuga.

Suesue le Tusi Metotia

I ‘au o taaloga, e atinae metotia mo tulaga faapitoa o taaloga ma tuufaatasia i totonu o se tusi metotia. E aoao e tagata afeleti a latou tofiga faapitoa mo metotia taitasi. E suesue mae’ae’a e tagata taaalo faamanuiaina le tusi metotia lea, pe a valaau mai se metotia, latou te iloa lelei, toetoe o le taimi lava lena, le mea e o i ai ma le mea e fai.

I se auala talitutusa, o i tatou o ē umia le perisitua e i ai foi i se ‘au (o se korama) ma se tusi metotia (o tusitusiga paia ma upu a perofeta o aso nei).

O e faamalositia tagata o lau ‘au?

O le a le lelei ua e suesueina ai lau tusi metotia?

Ua e malamalama atoatoa i lou tofiga?

Faafetaia’ia o le Itu Faafeagai

Ina ia faalautele atili le talafaatasa, e iloa e faiaoga maoae ia malosiaga

ma vaivaiga o le latou ‘au faapena foi ma ‘au latou te taaalo. Latou te fatu se fuafuaga o le taaloga lea o le a tuu atu ai ia i latou le avanoa sili e manumalo ai. Ae a oe?

Ua e iloina po o a faasoosoga e sili ona e vaivai ai, ma e mafai ona e muai iloa auala o le a taumafai ai le fili e taofi ma faavaivai oe. Pe ua e fatuina se fuafuaga patino o le taaloga ma le tusi metotia lea o le a e iloa ai le auala e te tali atu ai pe a feagai oe ma le itu faafeagai?

Pe a e fetaiai ai ma faasoosoga eese o le ola mamā—pe o e i ai faatasi ma isi pe ua na o oe o loo sioa atu i se lau [screen]—ua e iloa lau fuafuaga o le taaloga. Afai e fautua atu se uo ia e inu i meainu malolosi pe faataitai i fualaau faasaina, ua e iloa le metotia. Ua e faataitai ma iloa le auala e te vave tali atu ai.

Faatasi ai ma se fuafuaga o le taaloga, se tusi metotia, ma se tautinoga mautu e faataunuu lau matafaioi, o le a e iloa ai e itiiti le puleaina o oe e faasoosoga. Ua uma ona e faia le faaiuga pe o le a faapefea ona e tali atu ma po o a mea o le a e faia. E te lē tau manao-mia ona faia se faaiuga i taimi uma e te fetaiai ai ma faasoosoga.

Na faasoa mai e se tasi o le Toasefululua se tala e faaalai ai leni mataupu faavae. I le avea ai ma se ositaulaga i le aoga maua luga, sa ia tafao faatasi ma ana uo. I le maea ai ona fai o se meaai, sa latou tietie solo ae fautua mai loa se tasi latou te o i se ata tifaga faapitoa. O le faafitauli sa ia iloa o se ata tifaga e lē tataua ona ia matamata ai. E ui lava sa ia lagona i le taimi lava lena le mamafa ma le popole i lea tulaga, ae sa ia fuafua

lava mo leni mea. O le itulau leni na aumai sa’o mai i lana tusi metotia o le perisitua.

Sa mōnava loloa ma taumafai ina ia maua lona lototele, na ia faasilasila atu ai, “Ou te lē fiafia i lena ata tifaga. Na o le ave lava o a’u i le matou fale,” lea na latou faia. O se metotia faigofie na taitai atu i se manumalo! I ni tausaga muli-muli ane, na faamatalaina e se tasi o ana uo lea na faatasi ma ia i lena po le auala na faamaonia ai o leni faataitaga sa avea ma malosiaga tele mo ia e feagai ai ma le lototele i tulaga talitutusa faapea i lona lava olaga.

Itulau mai le Tusi Metotia

Sa ou talosagaina nisi o le Usoga e fautua mai ni metotia e te ono faaafia-ina i lau tusi metotia. O nisi nei o a latou fautuaga musuia.

- Tatalo i aso uma mo le malamalama sili atu ma se molimau ia Iesu Keriso.
- Faalogo toto’a i aoaoga a ou matua, lou epikopo, ma ou taitai o Alii Talavou ma le korama.
- Aloese mai ponokalafi ma ano-mea lē mamā o ala o faasalalauga faaagafesootai.
- Ia manatua folafolaga na e faia i le Atua, ma galue e tausia i latou.
- Suesue i tala o tusitusiga paia e uiga i perofeta maoae, ma mulimuli i o latou uiga lelei.
- Ia faamanuia fanau a le Tama Faalelagi e ala i auaunaga.
- Ia saili ni uo lelei e fesoasoani ia te oe ina ia avea ma tagata e te manao e avea ai oe.
- Ia avea ma se tagata atamai i le

polokalama o le FamilySearch, ma saili lau oe lava talafaasolopito o aiga.

- Fuafua nofoaga o le saogalemu ia e mafai ona e solaese ai mai i faatosi-naga leaga.
- Alofa ma fesoasoani e faamalosi isi tagata o lau korama o le perisitua.

Sa ou fesootai atu foi i tagata afeleti o o latou ata ia sa tatou matamata ai i le taimi ua sola. Sa mata’ina lo’u iloina latou te lē faailoa maia i latou lava e ala i mea latou te *faia*, o ni tagata afeleti faapolofesa, ae e ala i tagata e *i ai* i latou, o ni atalii o se Tama Faalelagi alofa ma o ē umia le perisitua a le Atua.

Ia se’i o tatou faalogo atu nei i o latou manatu:

- O Jimmer Fredette, o i o se tiakono, o loo aoao e fai lona fusiua, ua fai mai: “Ua ou aoao e faalagolago malosi i lo’u iloa ma le faatuatua i le moni o le talalelei. Ua taitai a’u e leni mea ina ia avea ma . . . sē e umia ma le agavaa le perisitua ma e sili i lo mea uma—o se faataitaga lelei.”
- Bryce Harper, o i o se tane, ua ia tusia: “Sa ou faapea o le lauiloa, mauoa, ma se tau o le MVP o le a ou fiafia ai. Sa i ai se mea na misi. O lea, sa ou . . . saunia ai ma [ulufale atu] i le malumalu. Ua ou i ai nei i luga o se ala e [toefoi] atu i lo’u Tama Faalelagi ma faia se aiga e faavavau—o le olioli aupito silisili lea i le lalolagi!”
- O Daniel Sorensen, o i o se faifeau-talai, fai mai: “O se tusi metotia lelei o se fuafuaga lea e faaoga ai taleni



Jimmer Fredette



Bryce Harper



Daniel Sorensen



Jeremy Guthrie



ma malosiaga o tagata taitoatasi o le au. . . . A o ou sutesue ma faataitai aoaoga o le talalelei a Iesu Keriso, e mafai ona ou iloa le auala e faaoga ai o'u malosiaga e auauna atu ai i le perisitua."

- O Jeremy Guthrie, o i, o loo auauna atu o se peresitene o se misiona i le taimi nei, na faasoa mai: "A o avea ma se tiakono 12-tausaga-le-matua . . . [Sa ou lagona] le Agaga o molimau mai ia te a'u [e faapea] 'o le olaga lenei o le taimi lea . . . e saunia ai e feiloai ma le Atua."² O le fuafuaga o le taaloga o le faatuatua i le Atua i le faatinoga [ma le] salamo e ala atu i le Faaola. . . . O le tusi metotia o loo maua i tusitusiga paia ma e ala mai i perofeta soifua."
- O Jabari Parker, o i, i lona faauuga i le tofi o le toeaina, ua fai mai: "E le

mafa'i ona ou vaai faalemafaufau i le tagata semanu ou te avea ai pe ana ou lē faia lena faaiuga ina ia papatiso. . . . Ou te matuai ou faafetai tele ua ou maua le Atua i lo'u olaga e taiala a'u i aso uma."

- O Ricardo Rojas, o i, o loo auauna atu ai o se peresitene o se paranesi i le taimi nei, sa fai mai: "E ala i le perisitua [a le Atua] e mafai ai ona [tatou] fesoasoani i Lana galuega. Ua valaauina i tatou ina "ia faamalosia ma ia lototele"³ i le puipuiga o le upumoni." Sa fesoasoani ai lenei mea ia te ia ia manuia uma i luga o le malae ma i le avea ai foi ma sē umia le perisitua.
- O Taysom Hill, o i, i le avea ai ma se faifeautalai, ua ia lagonaina o le talalelei a Iesu Keriso ua avea ma se tusi metotia mo ia i lona olaga. Na ia faasoa mai, "O le talitonu i le fuafuaga [a le Atua] ma le faia o le mea sili ou te mafaia e faataunuu la'u matafaioi i le fuafuaga ua ou maua ai se lagona faagaetiaina o le filemu ma le fiasia i lo'u olaga, i le iloina o loo fiasia mai le Atua i a'u taumafaiga."
- O William Hopoate, o i, i le faamanuaina o le pepe a lona atalii o le tupulaga fa, fai mai o le talalelei ua fesoasoani ia te ia e "iloina togafiti a le itu faafeagai ma maua ai le mataalia faaleagaga e tete'e atu ai i ū fanafana mu ma auauna lelei atu ai i isi."

Ae a oe? O e iloina lou faasinomaga *maualuga atu* ma *paia atu* o se atalii o le Atua, o loo umia Lana perisitua paia? I le mafaufau ai i lenei faasinomaga e faavavau, fatu sau fuafuaga o le taaloga

ma le tusi metotia o le perisitua o le a taialaina oe i taimi o faaosoosoga ma faigata. Mafaufau i fuafuaga uma o osofaiga ma puipuiga.

O fuafuaga o osofaiga e fesoasoani e faamalosia ai molimau ma faateleina le naunautaiga e tumau i luga o le ala lauitiiti ma le vaapiapi. O faataitaga e aofia ai tatalo faisoo, sutesueina o tusitusiga paia, auai i le lotu ma le malumalu, tofogi sefuluai, ma le mulimuli i fautuaga o loo maua i le tamaitusi o le *Mo le Malosi o le Autalavou*.

O auala o puipuiga e aofia ai le fuafuaina mamao pe faapefea ona e fetaiai ma faaosoosoga. A faaosoosoina e fetuunai ou lava ia tulaga faatonuina, e te iloa vave le mea o le a e faia.

E te manaomia se tusi metotia mo lena mea.

Ae a pe a lē fia tatalo i le asō? Ua oo i le taimi e faataunuu ai le metotia ua uma ona e fuafuaina mo le taaloga.

O e lagonaina ua vaivai lau molimau? E i ai sau metotia mo lena mea. Ua e iloina le mea e fai.

O Tagata Silisili i Fofoga o le Atua

O outou o loo tauaveina le perisitua paia a le Atua. O lau tautinoga e pipii mau i le āi u'amea o le a suia oe i le tagata e faavavau lea na foafoa oe e avea ai.

E silafia e le Atua oe ma alofa ia te oe. O le a Ia faamanuia oe ma taiala ou laasaga.

Atonu e te mafaufau e le o oe o se tagata taua, ma e lē lava lou lelei e avea ai ma se tagata ta'uta'ua o le taaloga. Ae e lē moni lena mea. E te iloa ua folafola mai e le Atua, "O le a oo mai mea vaivai



Jabari Parker



Ricardo Rojas



Taysom Hill



William Hopoate



o le lalolagi ma gau i lalo mea tautaua ma le malolosi?"⁴

O e lagonaina la se vaivai? le aogā? Faamalo atu, ua e sao i le au fili!

O e lagonaina se lē taua? maualalo? Atonu o oe le tagata tonu o loo manao-mia e le Atua.

O le a se isi faataitaiga sili o i ai nai lo Tavita na la'a atu i le malae o le taua e faasaga i se fili taufaafefe, o Koliata? I le faalagolago ai i le Alii, faatasi ma se fuafuaga, e le gata na faasaoina e Tavita o ia lava ae o le autau a Isaraelu!⁵ Ia iloa o le a faatasi le Alii ma oe a o e maua lou lototele ina ia i ai i Lana itu. "Afai ua au ma i tatou le Atua, o ai se e faasagatau mai?"⁶

E mafai ona ia tatala faitotoa [o avanoa] ma fesoasoani ia i tatou ia maua le malosia ma tomiai tatou te le'i iloaia o loo ia i tatou.⁷

Faalogo i o outou faiaoga faatua-tuaina e pei o o outou matua, epikopo, ma taitai o Alii Talavou. Aoa le tusi metotia. Faitau tusitusiga paia. Suesue i upu a perofeta o aso nei. Fatu sau oe lava fuafuaga o le taaloga i auala o le a e faamaonia ai oe lava ia o se soo o Keriso.

Ia vave ona iloa au metotia o le a e faaaogaina e faamalosi ai lou agaga ma

aloese ai mai i faasoosoga a le fili.

Fai le mea lenei ma o le a mautinoa lava le faaaogaina o oe e le Atua.

Ia, atonu o loo i ai nisi ua vavaeeseina i latou lava mai le talalelei ma ua se ese. O isi e nonofo i le falematamata ma matamata i le taaloga mai se mea mamao. O nisi e filifili e nonofo i nofoa faaleoleo, e ui ina taumafai le faiaoga e ave i latou i totonu. *Ou te valaaulia outou ia laveai mai, lagolago, ma alolofa ia i latou o se uso a tagata o le tou 'au!*

O isi e mananao e feosofi i totonu o le taaloga—ma taaalo. O le mea e sili ona taua e le o le talenia o i latou ae o lo latou naunautaiga e tuu i latou lava i luga o le malae. Latou te le faatali se'i tau valaau mai a latou numera ona ua latou iloa ua fai mai tusitusiga paia, "Afai ua ia te outou le manao e auauna atu i le Atua, ua valaaulia outou i le galuega."⁸

E mafai ona e tuu oe lava ia i le au fili.

E te faia lenei mea pe a e suesueina ma le faatinoina lau tusi metotia o le perisitua.

I le aluga o le ala o le a mautinoa lava e te faia ni mea sese ma pa'ū ai—masalo i le tele ma le tele o taimi. E te

lē atoatoa; o le pa'ū o se vaega o le faagasologa o le faagavaaina lea e mafai ai ona faaleleia lau amio ma auauna atu ai i se ala sili atu ma agalelei atu. Ua saunia e le Faaola ma Lana Togiola le i'u le auala e manumalo ai i a tatou mea sese e ala i le salamo faamaoni.

E faaaluina e tagata taaalo maoae le fia selau itula e faaatoatoa ai se vaega itiiti o le latou taaloga. I le avea ai ma sē e umia le perisitua, e te manaomia foi lea lava mafauafau e tasi. Afai e te toilalo, ia salamo ma aoao mai ai. Faatitai ina ia e faia lelei atu i le isi taimi e sosoo ai. I le iuga, e pule lava oe. E mafai ona e aoaoina le tusi metotia?

Ou te uunaia outou: Faalagolago i le Alii. Ofu le ofutau atoa a le Atua,⁹ ma oso i totonu o le taaloga.

E lē toatele i latou e taaalo i taaloga faapolofesa i tulaga sili ona maua-luga, ae a oo mai i le avea ma soo, e toatele ua filifili e mulimuli ia Keriso.

O le mea moni, o lau misiona lena i lenei olaga—ia aoao auala a le Alii, ulufale atu i le ala o le avea ma so'o, ma taumafai e ola e tusa ma le fuafuaga a le Atua. O le a lagolagoina ma faamanuia oe e le Atua a o e liliu atu ia te Ia. E mafai ona e faia lenei mea ona o oe o se tagata silisili i Lana silafaga.

Ou te tatalo o le a outou faia le tautinoga e ola agavaa mo le perisitua paia ua outou umia ma taumafai e faatino lau matafaioi paia i aso uma. Ou te faamanuia ia te outou i le tomiai ma le manao e faia ai. Ou te faaopopo atu la'u molimau i le mana o le perisitua ua outou umia, o perofeta soifua, ma ia Iesu Keriso ma Lana matafaioi i le avea ai ma o tatou Faaola ma le Togiola. I le suafa, o Iesu Keriso, amene. ■

FAAMATALAGA

1. "Siitaga Faavaega i Vaitausaga mo Tamaiti ma le Aulavou," Tusi a le Au Peresitene Sili, 14 Tes., 2018.
2. Alema 34:32.
3. Iosua 1:9.
4. Mataupu Faavae ma Feagaiga 1:19.
5. Tagai i le 1 Samuelu 17.
6. Roma 8:31.
7. Tagai i le Eteru 12:27.
8. Mataupu Faavae ma Feagaiga 4:3.
9. Tagai i le Mataupu Faavae ma Feagaiga 27:15–18.



SAUNIA E ELDER CARL B. COOK
O Le Au Perisitene o Fitugafulu

O Le Korama: O Se Nofoaga o le Auai

E finagalo le Alii ia outou faamautuina se korama malosi. A o la faapotopotoina Lana fanau, latou te manaomia se nofoaga e auai ma tuputupu a'e ai.

I le 2010, o Andre Sebako o se alii talavou sa saili mo le upumoni. E ui sa ia le'i faia muamua se tatalo faamaoni, ae sa ia filifili e faataitai. Sa le'i pine lena, ae feiloai o ia i faifeautalai. Sa la tuu atu ia te ia se kata e tufa solo sa i ai se ata o le Tusi a Mamona. Sa lagona e Andre se mea ma fesili atu pe mafai ona faatau atu e faifeautalai ia te ia le tusi. Sa la fai atu e mafai ona ave ma ia le tusi e leai se totogi pe afai e sau o ia i le lotu.¹

Sa auai atu Andre na o ia i le taimi lena faato'a faatu lava le Paranesi a Mochudi i Botswana, Aferika. Ae o le paranesi o se vaega alolofa ma vavalatala o tagata pe tusa ma le 40.² Sa latou faafeiloai ia Andre ma lima mafola. Sa ia maua lesone a faifeautalai ma papatiso ai. Sa matagofie!

Ona a lea? O le a faapefea ona tumau le toaga o Andre? O ai o le a fesoasoani ia te ia e alualu i luma i le ala

o feagaiga? O le tali e tasi i lena fesili o lana korama perisitua!³

O ē uma e umia le perisitua, po o a lava ona tulaga, e manuia mai se korama malosi. O'u uso talavou o loo umiaina le Perisitua Arona, ua finagalo le Alii tou te faamautuina se korama malosi, o se nofoaga o le auai mo alii talavou uma taitoatasi, o se nofoaga e afio ai le Agaga o le Alii, o se nofoaga e talileleia ma faatauaina ai uso uma o le korama. A o faapotopotoina e le Alii Lana fanau, latou te manaomia se nofoaga e auai ma tuputupu a'e ai.

O outou taitoatasi o uso o au perisitene o le korama e taitaia le ala a o outou saili atu i musumusuga⁴ ma atia'e le alofa ma le usoga i uso uma o le korama. Tou te gauai faapitoa atu ia i latou o uso fou, o ē ua le toaaga mai, po o i latou e i ai ni manaoga faapitoa.⁵ Faatasi ma le mana o le perisitua, tou te fausia ai se korama malosi.⁶ Ma o se korama malosi ma lotogatasi na te faia le eseesea atoa i le olaga o se alii talavou.

Ina ua faasilasila mai e le Ekalesia se polokalama fou o le faatotonugalemu-i-le-aiga e taulai atu i le aoaoina o le talalelei,⁷ sa mafaufau nisi i tagata o le ekalesia e pei o Andre ma fesili, "Ae faapefea tagata talavou e o mai mai se tulaga faaleaiga lea e le o aoaoina ai le talalelei ma le mea e le o i ai se siosiomaga o le aoaoina ma le ola ai i le talalelei i le aiga? Pe o le a tuulafoaiina ea i latou?"

Leai! E leai se tasi e ono tuulafoaiina! E alofa le Alii i alii talavou taitasi ma tamaitai talavou taitasi. O i tatou, i le avea ai ma ē umiaina le perisitua, o aao o le Alii. O i tatou o le lagolagosua faale-Ekalesia i taumafaiga e faatotonugalemu-i-le-aiga. I tulaga o loo tapulaa ai se lagolagosua i le aiga, e leoleo e korama a le perisitua ma isi taitai ma uo ma lagolago tagata taitoatasi ma aiga taitasi pe a manaomia.

Ua ou vaaia le aoga. Ua ou oo i ai. Ina ua ono o'u tausaga, sa tete'a o'u matua ma sa tuua e lo'u tama lo'u tina ma le fanau e toalima. Sa amata ona faigaluega lo'u tina e tautusi i matou. Sa ia manaomia se galuega lona lua mo se vaitaimi, faapea ai foi ma se a'oga



"O le Vaega o Uso" mai se korama a perisitua i Mochudi, Botswana.

faapoopo. Sa itiiti se taimi mo ia e faafaillei ai [matou]. Ae o matua matutua, o uncles, o aunties, o epikopo, ma faiaoga o aiga sa tutu mai e fesoasoani i lo'u tina ofoofogia.

Ma sa i ai sa'u korama. Ou te matua faafetai lava mo a'u uo—o'u uso—o ē na alolofa ma lagolagoina a'u. O la'u korama o se nofoaga o le auai. Atonu o nisi na manatu o a'u e mamao mai se tulaga manuia ma o se tasi e vaivai ona o tulaga o lo'u aiga. Atonu sa ou faapena. Ae o korama a le perisitua sa suia na mea le lelei. Sa lagolagoina a'u e la'u korama ma faamanuiaina lo'u olaga i tulaga le mafaatusalia.

O loo i ai le tulaga mamao mai le manuia atoa ma tagata vaivai o loo siomia ai tatou uma. Masalo o loo tatou i ai uma i le tasi po o le isi. Ae o i tatou taitoatasi iinei e tofu ma sana korama, o se nofoaga e mafai ona tatou maua uma ai le malosi ma tuu atu ai le malosi. O le korama o “tagata uma mo le tasi ma le tasi mo tagata uma.”⁸ O se nofoaga tatou te aoao ai le tasi ma le isi, auauna atu ai i isi, ma fausia ai le lotogatasi ma le usoga a o tatou auauna atu i le Atua.⁹ O se nofoaga e tutupu ai vavega.

Ou te fia ta'u atu ia te outou e uiga i nisi o vavega na tutupu i le korama a Andre i Mochudi. A o ou faasoa atua lenei faataitaiga, tagai mo ni mataupu faavae o loo faamalosi ai korama uma o le perisitua o loo faaogaina na [mataupu faavae].

Ina ua mavae le papatisoga o Andre, sa ia malaga faatasi ma faifeautalai a o la aoaoina isi alii talavou e toafa, o ē sa papatisoina foi. O lea la ua toailima alii talavou. Sa amata ona latou faamalosi le tasi ma le isi ma le paranesi.

O se alii talavou lona ono, o Thuso, sa papatisoina. Sa faasoa atu e Thuso le talalelei i ana uo e toatolu, ma sa le'i pine ae toaiva i latou.

O soo o Iesu Keriso e masani ona faapotopoto i le ala lenei—e toailaiti i le taimi e tasi, pe a valaaulia e a latou uo. I anamua, ina ua maua e Aneterea le Faaola, sa vave ona ia alu atu i lona uso o Simona ma “aumai foi o ia ia Iesu.”¹⁰ E faapena foi, sa le'i pine ona avea Filipino ma se soo o Keriso, ae ia valaaulia lana uo o Natanielu ia “sau ina matamata.”¹¹



I Mochudi, sa le'i pine ae auai se alii talavou lona 10 i le Ekalesia. Sa maua e faifeautalai le lona 11. Ma sa papatisoina le alii talavou lona 12 ina ua mavae ona ia vaai i aafiaga o le talalelei i ana uo.

Sa faagaetia tagata o le Paranesi o Mochudi. O nei alii talavou sa “faaliliuina . . . i le Alii, ma faatasia i le ekalesia.”¹²

Sa faia e le Tusi a Mamona se matafaioi taua i lo latou liuaina.¹³ E manatua e Thuso, “Sa amata ona ou faitauina le Tusi a Mamona . . . i taimi uma sa ou avanoa ai, i le fale, i le a'oga, i soo se mea.”¹⁴

Sa tosina atu Oratile i le talalelei ona o le faataitaiga a ana uo. Na ia faamatala mai, “Sa foliga mai na suia i latou i le emo o le mata. . . . Sa ou mafaufau na mafua . . . i le tama'i . . . tusi sa latou amata feavea'ia solo i le . . . a'oga. Sa mafai ona ou vaaia ni alii lelei ua avea ai i latou. . . . Sa [ou] manao ia sui foi.”¹⁵

Sa faapotopoto ma papatisoina alii talavou uma e 12 i totonu o le lua tausaga o le tasi ma le isi. O i latou taitoatasi sa na o le pau lea o le tagata o le Ekalesia i lona aiga. Ae sa lagolagoina i latou e lo latou aiga faale-Ekalesia, sa aafia ai ma Peresitene Rakwela,¹⁶ lo latou peresitene o le paranesi; Elder ma Sister Taylor,¹⁷ o se ulugalii matutua faamisiona; ma isi tagata o le paranesi.

O Uso Junior,¹⁸ o se taitai korama, sa valaauliaina alii talavou i lona fale

i aoauli o Aso Sa ma aoao i latou. Sa sutesue faatasi e alii talavou tusitusiga paia ma faia ni afiafi faaleaiga e le aunoa.

Sa ave e Uso Junior i latou e asiasi tagata o le au paia, o tagata sa aoao e faifeautalai, ma soo se tasi na manaomia se asiasiga. Sa feosofi uma alii talavou e 12 i tua o le loli a Uso Junior. Sa momoli i latou i fale i soa taitoalua pe taitoatolu ma toe piki i latou i se taimi mulimuli ane.

E ui sa faato'a aoaoina e alii talavou le talalelei ma sa le'i lagonaina na latou iloa ni mea se tele, ae sa ta'u atu e Uso Junior ia i latou e faasoa atu se mea se tasi pe lua ua latou iloa i tagata latou te asiasi i ai. O nei uso talavou o loo umiaina le perisitua sa aoao atu, tatalo, ma fesoasoani e leoleo i le Ekalesia.¹⁹ Sa latou faataunuaina o latou tiutetauave o le perisitua ma lagonaina le olioli o le auauna atu.

Sa fai mai Andre, “Sa matou tatalo faatasi, toē faatasi, fetagisi faatasi, ma avea o se usoga.”²⁰ O le mea moni, ua latou ta'ua i latou lava “o le Au Uso.”

Ua latou setiina faatasi se sini o le a latou auauna uma i ni misiona. Talu ai sa na o i latou tagata o le Ekalesia i o latou aiga, sa tele ni o latou faaifitauli na faatoilaloina, ae sa latou fesoasoania'i i le tasi ma le isi i na faigata.

Sa taitoatasi ma maua e alii talavou valaauga o misiona. O i latou na

ō muamua sa tusi atu ni tusi i aiga ia i latou sa sauniuni pea, faasoa atu i ai aafiaga ma faamalosiau atu ia i latou ia auauna atu. E sefulutasi alii talavou sa auauna atu i misiona.

Na faasoa atu e nei alii talavou le talalelei i o latou aiga. O tina, tuafafine, uso, uo, faapea ai foi ma tagata na latou aoaoina i a latou misiona, sa liliu mai ma papatisoina. Na tutupu vavega ma sa faamanuiaina olaga lemafaitaulia.

E mafai ona ou faalogo atu i nisi o outou o mafaufau e faapea masalo o se vavega faapena e mafai ona tupu i se nofoaga e pei o Aferika, o se laufanua lauusi o loo faanatinatiina ai le faapotopotoina o Isaraelu. Peitai, ou te molimau atu o mataupu faavae o loo faaagaina i le Paranesi o Mochudi e moni i soo se mea. Po o fea lava o e i ai, e mafai ona tuputupu a’e lau korama e ala i le faatoaagaina ma le faasoa atu o le talalelei. E oo lava i se soo se toatasi e aapa atu i se uo, o le tasi e mafai ona avea ma lua. O le lua e mafai ona avea ma fa. O le fa e mafai ona avea ma valu. Ma le valu e mafai ona avea ma sefululua. O paranesi e mafai ona avea ma uarota.

Na aoa mai le Faaola, “Aua o le mea ua faapotopoto ai se toalua [pe sili atu] i lo’u igoa, [faauta] ou te i ai faatasi ma i latou.”²¹ O loo sauniaina e le Tama Faalelagi mafaufau ma loto o tagata o siomia ai tatou. E mafai ona tatou mulimuli i uunaiga, tuu atu se lima o le faaumea, faasoa atu le upumoni, valaaulia isi ia faitau le Tusi a Mamona, ma alolofa ma lagolago i latou a o latou o mai ia iloa lo tatou Faaola.

Ua toetoe 10 tausaga talu ona amatalia faatasi e le Au Uso a Mochudi la latou malaga, ma o loo avea pea i latou o se au uso.

Sa saunoa Katlego, “Atonu o loo matou valavala i nofoaga mamao, ae o loo matou i ai pea iina mo le tasi ma le isi.”²²

O la’u tatalo ia tatou taliaina le valaaulia a le Alii ina ia lotogatasi faatasi ma Ia i a tatou korama o le perisitua ina ia avea korama taitasi ma se nofoaga o le auai, o se nofoaga e faapotopoto ai, o se nofoaga e tuputupu a’e ai.



O Iesu Keriso o lo tatou Faaola, ma o Lana galuega lenei. Ou te molimau atu ai i le suafa o Iesu Keriso, amene. ■

FAAMATALAGA

1. Tagai i le Mark and Shirley Taylor, comp., *The Band of Brothers* (Mochudi Branch conversion stories and testimonies, 2012–13), 4, Church History Library, Salt Lake City.
2. Fesootaiga patino, Letanang Andre Sebako, Band of Brothers resource files, 2011–19, Church History Library, Salt Lake City.
3. Sa saunoa mai Peresitene Boyd K. Packer: “A umia e se alii le perisitua, e auai o ia i se mea telē atu nai lo ia lava. O se mea lea e i fao o ia lava lea e mafai ai ona ia faia se tautinoga atoatoa” (“The Circle of Sisters,” *Ensign*, Nov. 1980, 109–10).
4. Sa faamalalamala e Peresitene Russell M. Nelson le auala e saili atu ai i faaaliga ma faapea mai, “A e faisooa lenei faagasologa i lea aso ma lea aso, masina ma lea masina, tausaga ma lea tausaga, o le a e ‘ola ai i le mataupu faavae o faaaliga” (“Faaaliga mo le Ekalesia, Faaaliga mo o Tatou Olaga,” *Liahona*, Me 2018, 95; tagai foi *Aoaoga a Peresitene o le Ekalesia: Iosefa Samita* [2007], 132).
5. Tagai i le *Tusitaulima 2: Taitaaina o le Ekalesia* (2010), 8.3.2.
6. E fesoasoani foi isi, e aofia ai uso o au epikopo ma faufautua. Sa ta’ua e Elder Ronald A. Rasband e faapea o se tasi o tulaga manuia o le toefaatulagaina o korama o le Perisitua Mekisateko, sa faasilasilaina i le aso 31 Mati, 2018, o le “mafi lea e le epikopo ona faasafua atu isi mau tiutetauave i le korama a toaina ma peresitene o le Aualofa ina ia mafai ai ona taulai atu le epikopo ma ona fesoasoani i o latou tiute autu—aemaise ai le pulefaamalumalu i tamaitai talavou, ma alii talavou o loo umiaina le Perisitua Arona” (“Faauta! O Se Autau Tupu,” *Liahona*, Me 2018, 59). O le a fesoasoani mai foi agelu. O e umia le Perisitua Arona e umiaina ki o

- asiasiga a agelu (tagai i le Mataupu Faavae ma Feagaiga 13:1; tagai foi i le Dale G. Renlund and Ruth Lybbert Renlund, *The Melchizedek Priesthood* [2018], 26). Sa saunoa Elder Jeffrey R. Holland: “E masani lava o [agelu o auaunaga] e le vaaia. O nisi taimi e vaaia ai i latou. Ae pe vaaia pe le vaaia, e latalata mai lava i latou i taimi uma. O nisi taimi, e matua malualii ma taua o latou tofiga mo le lalolagi atoa. O nisi taimi o savali e sili ona patino. E i ai taimi o le faamoemoe faaagelu o le lapatai. Ae o le tele lava o taimi o le faamafanafana, e tuuina mai sina gauai alofa, ma se tomatauga i taimi faigata” (“O Le Auaunaga a Agelu,” *Liahona*, Nov. 2008, 29). Afai tou te manaomia se fesoasoani, e mafai ona outou “ole atu ia ona outou maua ai lea” (Ioane 16:24).
7. Tagai i le Russell M. Nelson, “Malelega Amata,” *Liahona*, Nov. 2018, 6–8.
 8. Tagai i le Alexandre Dumas, *The Three Musketeers* (1844).
 9. Tagai i le *Tusitaulima 2*, 8.1.2.
 10. Tagai i le Ioane 1:40–42.
 11. Tagai i le Ioane 1:43–46.
 12. 3 Nifae 28:23.
 13. Tagai i le D. Todd Christofferson, “The Power of the Book of Mormon” (address given at the seminar for new mission presidents, June 27, 2017).
 14. Thuso Molefe, i le Taylor, *The Band of Brothers*, 22.
 15. Oratile Molosankwa, i le Taylor, *The Band of Brothers*, 31–32.
 16. Lucas Rakwela, Mochudi, Botswana.
 17. Mark and Shirley Taylor, Idaho, USA.
 18. Cilvester Junior Kgosiemang, Mochudi, Botswana.
 19. Tagai i le Mataupu Faavae ma Feagaiga 20:46–47, 53–54.
 20. Fesootaiga patino, Letanang Andre Sebako, Band of Brothers resource files.
 21. Mataupu Faavae ma Feagaiga 6:32.
 22. Katlego Mongole, i le “Band of Brothers 2nd Generation” (unpublished compilation), 21.



SAUNIA E ELDER KIM B. CLARK
O Le Fitugafulu

Vaai Atu ia Iesu Keriso

A tatou vaai atu ia Iesu Keriso, o le a la fesoasoani mai ia tatou ola i a tatou feagaiga ma faalautele o tatou valaauga o ni toeaia i Isaraelu.

A o savalia e Iesu se auala e latalata i Kapanaumi¹ faatasi ma se motu o tagata e toatele na siomiaina o ia, o se fafine sa mafatia i se ma'i ogaoga mo le sefululua tausaga na aapa atu ma pa'i i le tuupao o Lona ofu. Na vave lava ona faamaloloina o ia.²

Na tusia i tusitusiga paia faapea o le iloaina e Iesu “ua alu atu le [mana] nai ia te [Ia],”³ “ona faliu lea o ia i le motu o tagata”⁴ ma “silasila solo . . . ina ia silafia lē ua faia lea mea.”⁵ “Ua iloa e le fafine ua le lilo o ia,”⁶ sa ia “faapa’ū o ia i ona luma, ma tautino atu le tonu ia te ia.”⁷

Sa fetalai atu Iesu ia te ia, “Afafine, ina faalototeleina ia oe: ua e ola i lou faatuatua; ina alu ia oe ma le manuia.”⁸

Na faasaoia e Iesu Keriso le fafine. Na faamaloloina faaletino o ia, ae ina ua faliu atu Iesu e silasila atu ia te ia, sa ia tautino mai lona faatuatua ia te Ia ma sa Ia faamaloloina lona loto.⁹ Sa Ia fetalai atu ia te ia ma le alofa, faamautinoia atu ia te ia Lana faamaoniga, ma faamanuia o ia i Lona filemu.¹⁰

Uso e, i le avea ai ma ē umia le perisitua paia, ua tatou auai i le galuega o le faaolataga. I le tausaga ua te’a, sa tuuina mai ai e le Alii le taitaiga o lenei galuega e faapitoa lava i luga o tau’au o toeaia i Isaraelu.¹¹ Ua ia i tatou se poloaiga musuia mai le Alii—galulue

faatasi ai ma o tatou tuafafine, e tatau ona tatou auauna atu i se auala e paia atu, faatelevave le faapotopotoina o Isaraelu i itu uma e lua o le veli, faamautu o tatou fale e avea ma malutaga o le faatuatua ma le aoaoina o le talalelei, ma saunia le lalolagi mo le Afio Mai Faalua o Iesu Keriso.¹²

E pei ona i ai i mea uma, ua faali mai e le Faaola ia i tatou le ala: e manaomia ona tatou vaai atu ma auauna atu ia Iesu Keriso a o Ia silasila atu ma auauna atu i Lona Tama.¹³ Na

fetalai atu le Faaola i le auala lenei i le Perofeta o Iosefa:

“Vaai mai ia te a’u i mafaufauga uma; aua le masalosalo, aua le fefefe.

“Matau i manu’a ua tuia ai lo’u itu, ma tulaga fao foi i o’u lima ma o’u vae; ia faamaoni, taus i a’u poloaiga, ma o le a oulua ma tofi ai i le malo o le lagi.”¹⁴

I le malo i le muai olaga na folafola atu ai e Iesu i Lona Tama o le a Ia faia le finagalo o Lona Tama ma avea ma o tatou Faaola ma Togiola. Ina ua fesili Lona Tama, “O ai se ou te auina atu?”¹⁵ Sa tali atu Iesu:

“O A’u lenei, auina atu au.”¹⁶

“Lou Tama e, ia faia lou finagalo, ma ia ia te oe pea le mamalu e faavavau.”¹⁷

I Lona soifuaga atoa faaletino, sa soifua ai Iesu i lona folafolaga. I le loto-mauualalo, agamalu, ma le alofa sa Ia aoao atu ai aoaoga faavae a Lona Tama ma faia le galuega a Lona Tama i le mana ma le pule na tuuina atu e Lona Tama ia te Ia.¹⁸

Na tuuina atu e Iesu Lona loto i Lona Tama. Sa Ia fetalai mai:

“Ou te alofa i le Tama.”¹⁹

“Ou te faia pea lava o mea lelei [e fiafia ai o] . . . ia.”²⁰

“Ou te lei [sau] . . . e fai lo’u lava loto, a o le finagalo o [le Tama o lē] ua auina mai a’u.”²¹

I Lona tiga i Ketesemane na Ia tatalo ai, “A e aua le faia o lo’u loto, a o lou finagalo.”²²





Pe a valaau mai le Alii i tocaiina i Isaraelu e “vaai mai ia te a’u i mafaufauga uma” ma “mataui manu’a” i Lona tino toetu, o se valaau ia liliuese mai le agasala ma le lalolagi ma liliu atu ia te Ia ma le alofa ma usiusitai ia te Ia. O se valaau e aoao atu Lana aoaoga faavae ma faia Lana galuega i Lana ala. O lea la, o se valaau ina ia faalagolago atu atoa ia te Ia, gauai ma tuuina atu o tatou loto ia te Ia, ma e ala atu i Lona mana togiola e avea ai faapei o Ia.²³

Uso e, afai tatou te vaai atu ia Iesu Keriso o le a Ia faamanuiaina i tatou e avea ma *Ana* tocaiina i Isaraelu—lotomauualalo, agamalu, usiusitai, tumu i Lona alofa.²⁴ Ma o le a tatou aumaia le olioli ma faamanuiaga o Lana talalelei ma Lana Ekalesia i o tatou aiga ma o tatou uso ma tuafafine i itu uma e lua o le veli.

Ua valaau mai Peresitene Russell M. Nelson ina ia tatou vaai atu ia Iesu Keriso tau lava o le auala lenesi: “E le faigofie pe otometi le avea ma ni soo mamana faapena. O la tatou taulaiga e tataua ona tāmāu i le Faaola ma Lana talalelei. E faigata faalemaufau le taumafai e vaai atu ia te Ia i mafaufauga

uma. Ae a tatou faia, e ō ese o tatou masalosologa ma popolega.”²⁵

O le *Rivet* o se upu maoae. O lona uiga o le faapipii mau, ia tosina atu ma taofimau atoatoa.²⁶ Tatou te tāmāu lo tatou taulaiga ia Iesu Keriso ma Lana talalelei e ala i le ola ai ia tatou feagaiga.

A tatou ola ai i a tatou feagaiga, latou te faatosinaina mea uma tatou te fai atu ai ma faia. Ua tatou ola i se olaga o feagaiga²⁷ e tumu i faatinoga faigofie o aso uma o le faatuatua lea e faataulai atua i tatou ia Iesu Keriso: tatalo mai le loto i *Lona* suafa, taumafa fiafia i *Ana* afioga, liliu atu ia te *Ia* ina ia salamo i a tatou agasala, tausia o *Ana* poloaiga, taumamafa i le faamanatuga ma tausii *Lana* Sapati ia paia, tapuai atu i totonu o *Lona* malumalu paia i le faatele e mafai ai, ma faaoga *Lana* perisitua paia e auauna atu ai i fanau a le Atua.

O nei faatinoga o le tuuto atu i feagaiga e tatala ai o tatou loto ma mafaufau i le mana togiola o le Faaola ma le faatosinaga faapaiaina a le Agaga Paia. O le a suia e le Faaola i lea fuaitau i luga o lea fuaitau lo tatou lava natura,

o le a tatou liua loloto atili atu ia te Ia ma o le a tino mai a tatou feagaiga i o tatou loto.²⁸

O folafolaga tatou te tautino atua i lo tatou Tama Faalelagi o le a avea ma tautinoga mausali, o o tatou manaoga loloto. O folafolaga a le Tama Faalelagi ia i tatou e faatumulia ai i tatou i le lotofaafetai ma le olioli.²⁹ O a tatou feagaiga o le a le toe avea ma tulafono tatou te mulimuli i ai ae o le a avea ma mataupu faavae faapelepele e musuia ma taiala i tatou ma tāmāu ai la tatou taulaiga ia Iesu Keriso.³⁰

O nei faatinoga o le tuuto o loo avanoa i tagata uma, laiti ma matutua. O outou alii talavou o loo umia le Perisitua Arona paia, o mea uma na ou fai atu ai i lenesi po e faatatau ia te outou. Ou te faafetai i le Atua mo outou. Ua outou faia sauniga ma feagaiga paia ia avanoa mo le faitau miliona o le Au Paia o Aso e Gata Ai i vaiaaso uma. Pe a outou saunia, faamanuia, pe tufatufa atu le faamanatuga; auauna atu; papatiso i le malumalu; valaaulia se uo i se gaoioiga, pe laveai mai se tagata o la outou korama, ua outou faia le galuega o le faaolataga. E mafai foi ona



i ai o Ia. A tatou aoao atu, e aoao atu foi o Ia. A tatou faamafanafana atu, e faamafanafana atu foi o Ia. A tatou faamanuia atu, e faamanuia atu foi o Ia.³⁸

Uso e, pe le o se pogai ea lea tatou te olioli ai? Ioe! Ua tatou umia le perisitua paia a le Atua. A o tatou vaai atu ia Iesu Keriso, ola i a tatou feagaiga, ma tãmau lo tatou taulaiga ia te Ia, o le a tatou auai faatasi ma o tatou tuafafine ma auauna atu i se auala paia atu, faapotopoto mai Isaraelu ua faataapeapeina i itu uma e lua o le veli, faamalosia ma faamauina o tatou aiga, ma saunia le lalolagi mo le Toe Afio Mai Faalua o le Alii o Iesu Keriso. O le a tupu. Ou te molimau atu ai.

Ou te faaiu ma le tatalo lenai mai lo'u loto, mo i tatou uma, tagata uma, ia vaai atu ia Iesu Keriso i mafaufauga uma. Aua le masalosalo. Aua le fefefe. I le suafa o Iesu Keriso, amene. ■

outou vaai atu ia Iesu Keriso ma ola ai i a outou feagaiga i aso uma. Ou te folafola atu afai o le a outou faia, o le a avefa outou ma auauna faatuatuaia a le Alii i le taimi nei ma, i se aso a sau, o ni toeaia malolosi i Isaraelu.

Uso e, ou te iloa atonu o nei mea uma e foliga taufaafefe. Ae faamole-mole ia manatua upu nei a le Faaola: "A ou te le toatasi lava, aua ua ia te a'u le Tama."³¹ E faapena foi i tatou. E le o tuua na o i tatou. E alofa le Alii o Iesu Keriso ma lo tatou Tama Faalelagi ia i tatou, ma o loo faatasi i La'ua ma i tatou.³² Ona sa silasila atu Iesu i Lona Tama ma faamaeaina le taulaga togiola maoae, e mafai foi ona tatou vaai atu ia Iesu Keriso ma le faamautinoaga o le a Ia fesoasoani mai ia i tatou.

E leai se tasi o i tatou e atoatoa. O nisi taimi tatou te le alualu ai i luma. E i ai mea e faalavelave pe faalotovaivaia i tatou. Tatou te faia ni measese. Ae a tatou vaai atu ia Iesu Keriso ma se loto salamo o le a Ia siitia i tatou i luga, faamama i tatou mai le agasala, faamagalo i tatou, ma faamalolo o tatou loto. E onosai ma agalelei o Ia; o Lona alofa togiola e le muta ma e le toilalo.³³ O le a Ia fesoasoani mai ia tatou ola i a tatou feagaiga ma faalautele o tatou valaauga o ni toeaia i Isaraelu.

Ma o le a faamanuiaina i tatou e le Tama ma mea uma e manaomia e faataunuu ai Ona faamoemoega: "o mea uma i le lagi ma i luga o le lalolagi, o le ola ma le malamalama, o le Agaga ma le mana, na auina mai i le finagalo o le Tamã, e ala mai ia Iesu Keriso, lona Alo."³⁴

Pe a tafe mai le malamalama ma le mana faalelagi i o tatou olaga e tolu mea faavavega o le a tutupu:

Muamua, e mafai ona tatou vaai! E ala i faaaliga tatou te amata ai ona vaai atu e pei ona silasila atu Iesu i le fafine: e le o foligavaaia i fafo a o totonu o le loto.³⁵ Pe a tatou vaai atu e pei ona silasila mai Iesu, Na te faamanuiaina i tatou ia alolofa atu ia i latou tatou te auauna i ai ma Lona alofa. Faatasi ai ma Lana fesoasoani, o i latou tatou te auauna i ai o le a vaai atu i le Faaola ma lagona Lona alofa.³⁶

Lona lua, ua ia i tatou le mana o le perisitua! Ua tatou maua le pule ma le mana e galue ai i le suafa o Iesu Keriso ina ia "faamanuiaina, taialaina, puipuia, faamalosia, ma faamaloloina isi ma aumaia vavega ia i latou [tatou te] alolofa i ai ma tausia [a tatou] faaipoipoga ma aiga ia saogalemu."³⁷

Lona tolu, tatou te o ma Iesu Keriso! O le mea tatou te o i ai, e afio

FAAMATALAGA

1. James E. Talmage places Jesus in "the vicinity of Capernaum" when this healing occurred (see *Jesus the Christ* [1916], 313).
2. Tagai i le Luka 8:43–44; tagai foi i le Mataio 9:20–21; Mareko 5:25–29.
3. Luka 8:46.
4. Mareko 5:30.
5. Mareko 5:32.
6. Luka 8:47.
7. Mareko 5:33.
8. Luka 8:48.
9. Na tusia e James E. Talmage e faapea, o le mea na taua atu i le fafine nai lo le faamalologa faaletino o le faamautinoaga lea na taliaina e le Faaola le manao o lona loto, ma na taliaina e Ia lona faatuatua (tagai *Jesus the Christ*, 318). Sa faamaloloina o ia faaletino ma le faaleagaga e Iesu ma tatala atu ia te ia le ala i le faolataga.
10. O se mea aoga le faatasi ai o Iairo, o se pule o le sunako, ma Iesu i le taimi na tupu ai lenai faamalologa. Sa malaga atu Iesu i le fale o Iairo i le mea o le a Ia faatuina ai le afafine o Iairo mai le oti. O le fafine lea na faamaloloina e Iesu atonu na tulieseina mai le sunako ona o ona mafatiaga. Ina ua faamaloloina o ia e Iesu, na Ia faamanino atu foi ia i latou uma na i ai iina, e aofia ai Iairo, o ia o se afafine faapelepele, o se tamaitai faatuatua, ma e atoatoa i le tino ma le agaga.
11. Tagai i le D. Todd Christofferson, "O Le Korama a Toeaina" (*Liahona*, Me 2018, 55–58) mo se talanoaga o fetuunaiga e faatu se korama e tasi a le Perisitua Mekisateko i le uarota. O le faamoemoega o lena suiga sa faamatalaina i lenai auala i le vaega o Fesili e Fesiligia Soo o le uepisaite o Auaunaga: "O le i ai o se korama se tasi o le Perisitua Mekisateko i se uarota e tuufaatasia ai i latou e umia le perisitua e faataunuu vaega uma

o le galuega o le faaolataga, e aofia ai ma galuega o le malumalu ma talafaasolopito o aiga ia na faamaopoopoina talu ai e le taitai vaega o faitala sili” (“This Is Ministering: Frequently Asked Questions,” question 8, ministering.ChurchOfJesusChrist.org).

O fetuunaiga mulimuli ane ua tuu ai le taitai misiona a le uarota ma le taitai fou o malumalu ma talafaasolopito o aiga i le uarota i lalo o le taitaiga a le au peresitene o le korama a toeaia. Faatasi ai ma le auuana atu i aiga ua uma ona i ai i lalo o taitaiga a le au peresitene, o nei suiga ua tuuina atu ai le taitaiga o le galuega o le faaolataga i korama a toeaia, fesoasoani i ai Aualofa. O le mea moni, e umia e le epikopo ia ki i le galuega o le faaolataga i le uarota, ae na te faamatuu atu le tiutetauave ma le pule mo lena galuega i le peresitene o le korama a toeaia ina ia mafai e le epikopo ona faaaluina se taimi sili atu ma lona lava aiga, faamalosia o le autalavou, ma le auuana atu o se faamasino o Isaraelu.

12. Tagai i le Russell M. Nelson, “Faamalosia Ia I Le Galuega Nei,” *Liahona*, Me 2018, 118–19; Russell M. Nelson, “Avea ma Faataitaga Lelei o le Au Paia o Aso e Gata Ai,” *Liahona*, Nov. 2018, 113–14; Quentin L. Cook, “Liuaia Loloto ma Tumau i le Tama Faalelagi ma le Alii o Iesu Keriso,” *Liahona*, Nov. 2018, 8–12.
13. Na auina mai e le Tama Iesu Keriso i le lalolagi (tagai i le Ioane 17:18).
14. Mataupu Faavae ma Feagaiga 6:36–37.
15. Aperaamo 3:27.
16. Aperaamo 3:27.
17. Mose 4:2.
18. E tele mau i tusitusiga paia o loo tusia ai faamatalaga na faia e Iesu e uiga i le faia o le galuega a Lona Tama ma le aoao atu o

aoaoga faavae a Lona Tama. Tagai, mo se faataitaga, Ioane 5:19 (Ua faia e Iesu mea na Ia vaai o faia e le Tama); Ioane 5:36 (na tuuina atu e le Tama i Lona Alo le galuega e faia); Ioane 8:26 (na aoao atu e Iesu mea na Ia mauaina mai i Lona Tama); Ioane 14:28 (na tautino mai e Iesu, “E Sili Lo’u Tama ia te A’u”); 3 Nifae 11:32 (o Lana aoaoga faavae o le aoaoga faavae lea na tuuina mai e Lona Tama ia te Ia).

19. Ioane 14:31.
20. Ioane 8:29.
21. Ioane 6:38; tagai foi i le Ioane 5:30.
22. Luka 22:42.
23. O le upu *vaai* i lenei fuaitau (tagai i le Mataupu Faavae ma Feagaiga 6:36–37) e i ai uiga e ogatusa ma le valaau a le Alii: ia faafesagai (pe liliu atu i); ia taitaia le gauai o le tagata i; ia faalagolago i ai; ia saili mo; ia faatalitali ma le faamoemoe; ia mafaufau i ai o se iuga; e faamoemoe pe fuafua (tagai i le “Look,” Merriam-Webster.com).
24. Tagai i le Mataupu Faavae ma Feagaiga 121:41–42. O uiga FaaKeriso o loo ta’ua i tusitusiga paia o ni meaaloa faa Agaga lea e oo mai e ala i le alofa mutimutivale ma le alofa tunoa o Iesu Keriso. O mea ia ua avea ai toeaia i Isaraelu o *Ana* toeaia.
25. Russell M. Nelson, “Mauaina o le Mana o Iesu Keriso i o Tatou Olaga,” *Liahona*, Me 2017, 39.
26. Tagai i le merriam-webster.com, “rivet.”
27. Mo se talanoaga o le mataupu o se olaga o le feagaiga, tagai i le Donald L. Hallstrom, “Living a Covenant Life,” *Ensign*, June 2013, 46–49. Na siiina mai lenei tusiga mai se lauga e umi atu na tuuina atu i le BYU-Idaho ia Me 2011. Mo le lomiga umi atu, tagai i le Donald L. Hallstrom, “A Covenant Life” (Brigham Young University–Idaho devotional, May 10, 2011), byui.edu.
28. Tagai i le Jeremia 31:31–33, lea na tautino mai ai e le Alii o le Ia osia se feagaiga fou ma le aiga o Isaraelu e tusia i o latou loto. O lenei ata o feagaiga na tusia i o tatou loto, po o feagaiga e ola mai i o tatou loto, o loo maua foi i tusitusiga a Paulo (tagai i le 2 Korinito 3:3; Eperu 8:10). Mo se talanoga e uiga i le liuaina ma le loto, tagai i le David A. Bednar, “Faaliliuina i le Alii,” *Liahona*, Nov. 2012, 106–9.
29. O le tatolo o le faamanatuga o le areto o loo faaalai matagofie mai ai le natura o a tatou sootaga i feagaiga ma lo tatou Tama Faalelagi. I le fuafuaga o le faaolataga a le Tama tatou te osifeagaiga ai ma lo tatou Tama Faalelagi, ae o faamoemoe o feagaiga ua iloina ma e tatou te agavaa mo faamanuiaga na folafolaina mai e ala mai i le Alii o Iesu Keriso; o Ia o le Puluva. I le sauniga o le faamanatuga tatou te molimau atu ai i le Tama (i lona uiga, osifeagaiga ai ma Ia) ua tatou loto e tauave i o tatou luga le suafa o Iesu Keriso, manatua pea o Ia, ma tauti Ana poloaiga ina ia tatou maua pea Lona Agaga (o le Agaga Paia lea) e faatasi ma i tatou.

O meaaloa i folafolaga a le Tama e oo mai e ala i le mana togiola ma le faamalosia o Iesu Keriso. Mo se faataitaga, e pei ona aoao mai e Peresitene Russell M. Nelson, o Iesu

Keriso “o le puna o olioli uma” (tagai “Olioli ma le Ola ai Faaleagaga,” *Liahona*, Nov. 2016, 82). O le mea lea, o le tãmau o la tatou taulaiga ia Iesu Keriso e aumai ai le olioli i o tatou olaga e tusa lava po o a o tatou tulaga.

30. Na pu’eina e Peresitene Ezra Taft Benson le aafiaga o lenei suiga i uiga faaalai ma tulaga faamasani ina ua ia saunao, “Pe a oo ina tuu le avea o le ususitai ma mea faanoono ac avea ma a tatou sailiga, o le taimi lena o le a faace mai ai e le Atua le mana ia i tatou” (i le Donald L. Staheli, “Obedience—Life’s Great Challenge,” *Ensign*, May 1998, 82).
31. Ioane 16:32.
32. Mo nisi talanoaga e uiga i le tulaga moni o le popolega o le Tama ma le Alo mo, fiafia i, alofa mo, ma le aafia i o tatou olaga, tagai i le Jeffrey R. Holland, “O Le Silisiliese o le Atua,” *Liahona*, Nov. 2003, 70–73; Henry B. Eyring, “Savali faatasi ma A’u,” *Liahona*, Me 2017, 82–85. Tagai foi Mataitu 18:20; 28:20; Mataupu Faavae ma Feagaiga 6:32; 29:5; 38:7; 61:36; 84:88.
33. Tagai i le Roma 8:35–39; 1 Korinito 13:1–8; Moronae 7:46–47.
34. Mataupu Faavae ma Feagaiga 50:27. Ia manatua e aumai e le Alii ia i latou taitoatasi ua faauuina ma auina atu lenei folafolaga e faatatau i, ma e faatapulaina e ala, i tofiga faapitoa ua tuuina atu ia te ia:
“O ia o lē ua faauuina e le Atua ma auina atu, o ia lava lea ua tofia ia avea ma lē ua sili, e ui ina o ia e aupito faatauvaa ma o le auuana a tagata uma.
“O le mea lea, ua maua e ia mea uma; ona ua pule o ia i mea uma, o mea uma i le lagi ma i luga o le lalolagi, o le ola ma le malamalama, o le Agaga ma le mana, na auina mai i le finagalo o le Tamā, e ala mai ia Iesu Keriso, lona Alo.
“Ac e leai se tagata na te mauaina mea uma vagana ua ta’umama ma faamamaina o ia mai agasala uma.
Ma afai ua ta’umama ma faamamaina outou mai agasala uma, soo se mea tou te ole atu ai i le suafa o Iesu o le a faia lava” (Mataupu Faavae ma Feagaiga 50:26–29).
35. Tagai i le 1 Samuella 16:7; 1 Korinito 2:14. Mo se faataitaga o lenei faamanuiaga o le vaai atu e pei ona silasila mai Iesu, tagai i le faamatalaga a Peresitene Henry B. Eyring e uiga i lona aafiaga i le avea ai ma se epikopo o se alii talavou na faia se solitulafono. Na fetalai atu le Alii ia Epikopo Eyring i lena taimi, “O le a Ou tuu atu ia te oe ina ia vaai atu ia te ia e pei ona Ou vaai ia te ia” (“Savali faatasi ma A’u,” 84).
36. O le folafolaga ma le poloaiga lenei na tuuina atu e le Faaola i tagata i le malumalu i Nuumau. Na Ia poloaia i latou ina ia latou ola ina ia i ai Lona malamalama ma Lana faataitaga ia i latou, ina ia mafai ona latou uuina o Ia i luga e avea ma malamalama i le lalolagi i o latou olaga ma ia latou valaaulia i isi e o mai ia te Ia. E pei ona soifua ma valaaulia e Ona soo, o le a lagona e isi o Ia ma vaai ia te Ia i auuana a le Alii. (Tagai i le 3 Nifae 18:24–25.)
37. Tagai i le Russell M. Nelson, “O Le Tau o le Mana o le Perisitua,” *Liahona*, Me 2016, 68.
38. Tagai i le Mataupu Faavae ma Feagaiga 84:88.





SAUNIA E PERESITENE HENRY B. EYRING
Fesoasoani Lua i le Au Peresitene Sili

O Le Mana o le Faatuatua Lagolago

E ala i le siiina o lou lima e lagolagoina, ua e osia se folafolaga ma le Atua, o lē āna auauna nei, o le a e lagolagoina i latou.

O le tele o taimi ou te faalogo ai i taitai perisitua o tuuina atu le faafetai mo le faatuatua lagolago o i latou latou te auauna atu i ai. Mai le lagona i o latou siufofoga, e te iloa ai e loloto ma faamaoni lo latou agaga faafetai. O lo’u faamoemoega i le asō o le faailoa atu o le talisapaia e le Alii o lo outou lagolagoina o Ana auauna i Lana Ekalesia. Ma ia uunaia ai foi outou e faaoga ma tuputupu a’e i lenei mana e lagolagoina ai isi i lou faatuatua.

Ae e te le’i fanau mai, sa e faaalua lenei mana. Toe mafaufau i tua i mea tatou te iloa e uiga i le lalolagi o agaga ae tatou te lei fananau mai. Na tuuina atu e lo tatou Tama Faalelagi se fuafuaga mo Ana fanau. Sa tatou i ai iina. O Lusifelo, lo tatou uso agaga, na tetee i le fuafuaga lea o le a aumaia ia i tatou le saolotoga e filifili ai. O Ieova, o le Alo Pele o le Tama Faalelagi, na lagolagoina le fuafuaga. Na taitaiina e Lusifelo se fouvalega. Na manumalo le siufofoga lagolago o Ieova, ma sa Ia ofofua atu e avea ma o tatou Faola.

O lou i ai i lenei olaga faitino ua faamautinoa mai ai ia i matou na e lagolagoina le Tama ma le Faola. Na

manaomia ai le faatuatua ia Iesu Keriso e lagolago ai le fuafuaga o le fiala ma le tulaga o Iesu Keriso i le [fuafuaga] i le taimi sa itiiti ai lava ni mea na e iloina e uiga i luitau o le a fetaiai ma oe i le olaga faitino.

O lou faatuatua e lagolagoina auauna a le Atua na i ai lava i le fatu o lou fiala i lenei foi olaga. Ina ua e taliaina se lu’i a se faifeautalai e tatalo ia iloa ai o le Tusi a Mamona o le a fioga a le

Atua, na e maua le faatuatua e lagolago ai se auauna a le Alii. Ina ua e taliaina le valaaulia e papatiso, na e lagolagoina se auauna faatauva a le Alii.

Ina ua e faatagaina se tasi e tuu [ona] lima i luga o lou ulu ma fai atu, “Talia le Agaga Paia,” na e lagolagoina o ia o sē umia le Perisitua Mekisateko.

Talu mai lenei aso, ua e lagolagoina, e ala i le auauna atu faamaoni, i tagata taitasi o ē na faaee atua le perisitua i ou luga ma i latou taitoatasi o ē na faauuina oe i se tofi i lenei perisitua.

I le amataga o lou aafiaga faaleperisitua, o le lagolagoina taitasi o se gaoioiga faigofie lea o le faatuatua o se auauna a le Atua. I le taimi nei, o le toatele o outou ua siitia atu i se tulaga lea e manaomia ai nisi mea se tele i le lagolagoina.

E te filifili pe lagolagoina tagata uma ua valaauina e le Alii—i soo se mea lava ua valaauina i ai latou e le Alii. O lenei filifiliga e tupu i konafesi i le lalolagi atoa. Ua tupu i lenei [konafesi]. I ia ituaiga o sauniga, o suafa o tamalii ma tamaitai—o auauna a le Atua—e tolaulu atu, ma e valaaulia oe e sii lou lima e lagolagoina. E mafai ona e taofia lau palota lagolago, pe e te tautino mai lou faatuatua lagolago. E ala i le siiina o lou lima e lagolagoina, ua e faia ai se folafolaga. Ua e osia se folafolaga ma le Atua, o lē āna auauna nei, o le a e lagolagoina i latou.

O nei tagata e le atoatoa, e pei lava o oe. O le tausia o au folafolaga o le a



manaomia ai le faatuatua lē maluelue faapea na valaauina i latou e le Alii. O le tausia o na folafolaga o le a aumai ai foi le fiafia e faavavau. O le lē tausaiaina o i latou o le a aumaia ai le faanoanoa ia te oe ma i latou e te alofa i ai—ma e oo lava i le toesea o mea e le mafai e lou malosī ona mafaufauina.

Atonu na fesiligia oe, pe o le a fesiligia, pe e te lagolagoina lou epikopo, peresitene o le siteki, le au Pulega Aoao, ma Taitai Aoao o le Ekalesia. Atonu e tupu a o talosagaina oe e lagolagoina au ofisa ma taitai i se konafesi. O nisi taimi atonu o se faatalanoaga ma se epikopo po o le peresitene o le siteki.

O la’u fautuaga ia e fai muamua na fesili ia te oe lava ia, ma mafaufau ma le faaeteete ma le agaga tatalo. A o e faia, atonu e te toe tepa i tua i ou manatu, o upu, ma galuega faato’a uma a na fai. Taumafai ia manatua ma faaupu tali o le a e tuuina atu pe a faatalanoaina oe e le Alii, i le iloina o le a Ia faia i se aso. E mafai ona e saunia e ala i le fesili ifo ia te oe lava ia i fesili faapenei:

1. Pe sa ou mafaufau pe na talanoa i ni vaivaiga faaetagata o tagata na ou tautino atu e lagolagoina?
2. Pe sa ou vaavaai mo se faamaoniga o loo taitaiina i latou e le Alii?
3. Pe sa ou mulimuli ma le faaeteete ma le faamaoni i la latou taitaiga?
4. Pe sa ou talanoa e uiga i le faamaoniga na ou vaaia o i latou o auauna a le Atua?
5. O o’u tatalo soo ea mo i latou [ma ta’u o latou] igoa faatasi ai ma lagona o le alofa?

O na fesili o le a taitai atu ai le toatele o i tatou i se lagona o le lē toafimalie ma se mana’oga ia salamō. Ua poloaiina i tatou e le Atua e aua le faamasino atu i isi ma le amioletonu, ae o le faatinoga, tatou te iloa le faigata o le aloese mai lena mea. Toetoe lava o mea uma tatou te faia e galulue faatasi ai ma tagata e taitaiina atu lava i tatou i le iloiloina o i latou. Ma e toetoe lava o vaega uma o o tatou olaga, tatou te faatusatusa ai i tatou i isi. Atonu tatou te faia mo le tele o mafuaaga, o nisi e



talafeagai, ae e masani lava ona taitai atu ai i tatou i le faitio.

Na tuuina mai e Peresitene George Q. Cannon se lapataiga lea ou te tuuina atu ia te outou e fai ma a’u lava [lapataiga]. Ou te talitonu sa ia saunoa i le upumoni: “Ua filifilia e le Atua Ana auauna. Na fetalai mai o Ia o Lana aia tatau o le ta’usalaina o i latou, pe a manaomia le ta’usalaga. Na te le’i tuuina mai ia i tatou taitoatasi ia faitio ai ma ta’usalaina ai i latou. E leai se tagata, po o le a lava le malosī o i ai lona faatuatua, po o le a lava le maua-luga o le Perisitua, e mafai ona tautala leaga e uiga i ē ua faauuina a le Alii ma saili masei i le pule a le Atua i luga o le fogaeleele e aunoa ma le faatupuina o Lona lē fiafia. O le a aluese le Agaga Paia mai sea tagata, ma o le a alu atu o ia i le pogisa. O sea tulaga, e te le o iloa ea le taua o le tatau ona tatou faaeteete?”¹

O la’u matauga o tagata o le Ekalesia i le lalolagi atoa e masani lava ona faamaoni le tasi i le isi faapea ma i latou o ē pulefaamalumalu ia i latou. Peitai, o loo i ai ni faaleleiga e mafai ma e tatau ona tatou faia. E mafai ona tatou tutulai maua-luga atu i lo tatou malosī e lagolago ai le tasi ma le isi. O le a manaomia ai le faatuatua ma taumafaiga. O fautuaga nei e fa ou te tuuina atu mo i tatou ia galulue ai i lenei konafesi.

1. E mafai ona tatou faailoaina ni faatinoga faapitoa ia na fautua mai e failauga ma ia amata i le asō ona faataunuaina. A tatou faia, o le a faateleina lo tatou mana e lagolagoina ai i latou.

2. E mafai ona tatou tatalo mo i latou a o latou saunoa mai ina ia molioo e le Agaga Paia a latou upu i loto o tagata faapitoa tatou te alofa i ai. A tatou iloina mulimuli ane na taliina a tatou tatalo, o le a faateleina lo tatou mana e lagolago ai na taitai.
3. E mafai ona tatou tatalo ina ia faamanuiaina ma faalauteleina ni failauga faapitoa a o latou tuuina maia a latou savali. A tatou vaaia ua faalauteleina i latou, o le a tatou tuputupu a’e i lo tatou faatuatua e lagolagoina i latou, ma o le a tumau.
4. E mafai ona tatou faalogo i savali mai failauga ia e sau o se tali ia tatou tatalo faaetagata lava ia mo se fesoasoani. A oo mai ni tali, ma o le a oo mai lava, o le a tatou tuputupu a’e i lo tatou faatuatua e lagolagoina ai auauna uma a le Alii.

E le gata i le faaleleia o le lagolagoina o i latou o ē o auauna atu i le Ekalesia, ae o le a tatou iloina o loo i ai se isi nofoaga lea e mafai ai ona tatou faateleina sea mana. O iina, e mafai ona aumaia faamanuiaga sili atu ia i tatou. O loo i le fale ma le aiga.

Ou te talanoa atu i le talavou laitiiti o umia le perisitua o loo nofo i le fale ma lona tamā. Se’i o’u tau atu ia te oe mai lo’u lava aafiaga le uiga o le lagoina e se tama o lou faatuatua lagolago. Atonu e foliga toafimalie o ia ia te oe. Ae o loo ia feagai ma luitau sili atu nai lo mea o loo e iloina. I nisi taimi e le mafai ona ia iloa atu le ala i faaifitauli i ona luma.

O lou faamemelo mo ia o le a i ai sina fesoasoani mo ia. O lou alofa mo ia

o le a fesoasoani atili. Ae o le mea o le a sili ona fesoasoani o upu faamaoni e pei o upu nei: “Tama, sa ou tatalo mo oe, ma sa ou lagona o le a fesoasoani le Alii ia te oe. O le a lelei mea uma. Ou te iloa o le a lelei.”

O upu e pei o na upu e i ai foi le mana i le isi itu, tamā i le atalii. Pe a fai e se atalii se mea sese ogaoga, masalo i se tulaga faaleagaga, atonu na te lagonaina ua ia toilalo. I le avea ai ma ona tamā, i lena lava taimi, atonu e te te’i pe a, uma ona e tatalo ia iloa le mea e fai, o le a tuu e le Agaga Paia upu i lou gutu: “Atalii, ou te lagolagoina oe, po o le a lava. E alofa le Alii ia te oe. Faatasi ai ma Lana fesoasoani, e mafai ona e toe foi mai. Ou te iloa o le a e mafaia ma o le a e faia. Ou te alofa ia te oe.”

I le korama a perisitua ma i le aiga, o le faateleina o le faatuatua e lagolago ai le tasi ma le isi o le ala lea e faatu ai Siona lea e finagalo le Alii tatou te fausiaina. Faatasi ai ma Lana fesoasoani, tatou te mafaia ai ma o le a tatou faia lava. O le a manaomia ai le aoaoina ia alofa atu i le Alii ma o tatou loto atoa, mafaufau, manatu, ma le malosi atoa ma alofa le tasi i le isi e pei ona tatou alolofa ia i tatou lava.

A o tatou tuputupu a’e i lena alofa mama o Keriso, o le a faamalulūina o tatou loto. O le a faalotomauualaloina i tatou e lena alofa ma taitai i tatou ia salamo. O le a tuputupu a’e lo tatou talitonuga i le Alii ma isi. Ona tatou agai atu lea i le avea ma ē tasi [le loto], e pei ona folafola mai le Alii tatou te mafaia.²

Ou te molimau atu e silafia ma alofa le Tama Faalelagi ia te oe. O Iesu o le Keriso soifua. O Lana Ekalesia lenei. Ua tatou umia Lana perisitua. O le a Ia faamamaluina a tatou taumafaiga e tuputupu a’e i lo tatou mana e faaoga ma lagolagoina ai le tasi ma le isi. Ou te molimau atu ai i le suafa paia o Iesu Keriso, amene. ■

FAAMATALAGA

1. *Gospel Truth: Discourses and Writings of President George Q. Cannon*, ed. Jerreld L. Newquist (1974), 1:278.
2. Tagai i le Mataupu Faavae ma Feagaiga 35:2.



SAUNIA E PERESITENE DALLIN H. OAKS
Fesoasoani Muamua i le Au Peresitene Sili

O Fea O Le A Tau Atu i ai Lenei [Filifiliga]?

Tatou te faia filifiliga ma faaiuga lelei atu pe afai tatou te vaai atu i isi filifiliga ma mafaufau loloto po o fea o le a tau atu i ai.

Ua uunaia e le talalelei toefuataina a Iesu Keriso i tatou ia mafaufau e uiga i le lumanai. Ua ia faamalamalamaina le faamoemoega o le olaga faaletino ma le moni o le olaga e sosoo ai. Ua ia aoao mai manatu maoae e uiga i le lumanai e taiala ai a tatou faatinoga i le aso nei.

I se eseesega, ua tatou iloa uma ni tagata e na o nei lava e popole i ai: faaalu uma i le aso nei, olioli i le aso nei, ma e leai ma se mafaufau mo le lumanai.

O le a fafia atu lo tatou taimi nei ma lo tatou lumanai pe afai tatou te magafagafa i taimi uma mo le lumanai. A o tatou faia ni faaiuga i le taimi nei, e tatau ona tatou fesili i taimi uma, “O fea o le a tau atu i ai lenei filifiliga?”

I.

O nisi faaiuga o ni filifiliga i le va o le faia o se mea po o le lē faia o se mea. Sa ou faalogo i se faataitaiga o lenei ituaiga o filifiliga i se konafesi



faalesiteki i le Iunaite Setete i le tele o tausaga ua alu.

O le nofoaga [o le tala] o se lotoa matagofie o se kolisi. O se motu o tamaiti a'oga laiti sa nonofo i luga o le mutia. O le failauga sa faamatalaina lenei tulaga sa fai mai sa latou matamata i se squirrel ma sona siusiu fulufulua telē o taalo solo i lalo o se laau failaupapa matagofie. O nisi taimi sa taalo i luga o le palapala, o nisi taimi o luga ma lalo ma faataamilo i le oga-laau. Ae aisea na tosina atu ai se motu o tamaiti a'oga i lenei vaaiga masani?

O loo fālōlō ma ta'oto i luga o le mutia e lata ane se ituaiga taifau Aialani. O ia o loo taulai i ai tamaiti a'oga, ae o le squirrel o loo taulai i ai le taifau. O taimi uma e lē vaaia ai le squirrel o faataamilo i le laau, e tolotolo lemu atu ai le taifau i luma i ni nai inisi ona toe taotooto foi lea e peisea'i e lē āno i le mea o tupu. O le mea lenei sa tosina i ai tamaiti a'oga. Sa filemu ma leai se minoi, sa tāmāu o latou mata i le mea o loo tupu lea sa faateleina le manino mai o lona taunuuga.

Sa i'u lava ina latalata tele atu le taifau ma puna atu i le squirrel ma pu'e i lona gutu. Sa manu ā'e se manuō ma le fefe, ma sa taufetuli atu le motu o tamaiti a'oga ma se'i ese le tamai manu mai le taifau, ae sa fai si tuai. Ua pe le squirrel.

Sa ono mafai ona lapata'ia e soo se tasi o tamaiti le squirrel i soo se taimi e ala i le talotalo atu o lona lima pe alalaga atu, ae leai ma se tasi na faia. Sa na o na latou matamata atu a o latalata mai pea le taunuuga mautinoa. E leai ma se tasi na fesili, "O fea o le a tau i ai lenei filifiliga?" Ina ua tupu le mea sa faamoemoeina, sa tele'a'i atu uma e taofi le taunuuga, ae ua fai si tuai. Sa na o le salamo ma loimata na mafai ona latou ofo atua.

O lenei tala moni o se ituaiga foi o tala faataoto. E faatatau i mea tatou te vaai i ai i o tatou lava olaga, ma i olaga ma tulaga o siomiaina i tatou. A tatou vaai atu i ni mea taufaamatau o tolotolo atu i tagata po o mea tatou te alolofa i ai, o loo ia i tatou le filifiliga o le tautatala atu po o le minoi ia po o le lē pisa. E sili lava lo tatou fesili ifo ia



i tatou lava, "O fea o le a tau i ai lenei filifiliga?" I tulaga e vave ma ogaoga ai taunuuga, e le mafai ona tatou lē faia se mea. E tatau ona tatou faaleo atu ni lapataiga talafeagai pe lagolago i taumafaiga talafeagai e puipuia manū o loo i ai pea le taimi.

O faaiuga ia faato'a uma ona ou faamatalaina atu e aofia ai filifiliga i le va o le faia o nisi o faatinoga po o le leai foi o ni faatinoga e faia. O filifiliga sili ona taatele o filifiliga na e i le va o le tasi faatinoga po o le isi. Ua aofia ai i nei filifiliga, o filifiliga i le va o le lelei po o le leaga, ae e tele lava o filifiliga i le va o ni mea lelei se lua. O i foi e manaomia ai pea ona fesili po o fea o le a tau i ai lenei filifiliga. Ua tatou faia le tele o filifiliga i le va o ni mea lelei se lua, e tele ina aofia ai le auala o le a tatou faaaluina ai o tatou taimi. E leai ma se leaga i le taaalo i taaloga vitio po o le tesi po o le matamata i le TV po o le talanoa i se telefoni feaveai. Ae o nei mea taitasi e aofia ai le mea ua ta'ua "tau o le avanoa," o lona uiga afai tatou te faaaluina le taimi e fai ai se

mea se tasi, tatou te maumauina le avanoa e faia ai se isi mea. Ou te mautinoa e mafai ona outou vaaia e manaomia ona tatou manatu ma le faaeteete i mea o loo tatou maumauina i le taimi tatou te faaaluina ai i se gaoioiga se tasi, e tusa lava po o se mea e lelei atoatoa.

I sina taimi ua leva atu sa ou faia ai se lauga e ta'ua "Lelei, Lelei Tele, Lelei Silisili." I lenei lauga sa ou fai atu ai e faapea "ona o se mea e lelei e lē lava lea mafuaaga e fai ai. O le aofaiga o mea lelei e mafai ona tatou faia, e sili mamao atu i lo le taimi e maua e faataunuu ai. O nisi mea e sili atu i le na o le lelei, ma e i ai mea e tatau ai ona ave i ai le faamuamua i o tatou olaga. . . . E ao ona tatou tuuese nisi o mea lelei ina ia filifili ai isi mea e lelei atu pe silisili ona lelei."¹

Ia vaai mamao. O le a le aafiaga o lo tatou lumanai ona o faaiuga tatou te faia i le taimi nei? Manatua le taua o le mauaina o le a'otauina, suesueina o le talalelei, faafouina o a tatou feagaiga e ala i le taumamafa i le faamanatuga, ma le auai i le malumalu.

II.

“O fea o le a tau i ai lenei filifiliga?” e taua foi i le filifilia o le auala tatou te faailogaina ai pe manatu ai ia i tatou lava. O le mea e sili ona taua, o i tatou taitoatasi o se atalii o le Atua faatasi ma se taunuuga faamoemoeina o le ola e faavavau. O isi faailoga uma, e aofia ai tulaga faalegaluega, ituaiga, uiga faaletino po o mamalu, e lē tumau pe lē taua i tuutuuga e faavavau. Aua ne’i filifili e faailoga outou lava pe manatu ia te outou lava i tuutuuga e tuuina se tapulaa i se sini e te ono taumafai i ai.

O’u uso e ma o’u tuafafine, o e o ono maimoaina pe faitau i mea o o’u talanoa ai iinei, ou te faamoemoe tou te iloina le mafuaaga ua avatu ai e tou taitai aoaoga ma fautuaga ua matou avatu. Matou te alolofa ia te outou, ma e alofa foi lo tatou Tama Faalelagi ma Lona Alo, o Iesu Keriso, ia te outou. O le La fuafuaga mo i tatou o le “fuafuaga sili o le fafia” (Alema 42:8). O lenei fuafuaga ma a La poloaiga ma sauniga ma feagaiga e taitai atu ai i tatou i le fafia ma le olioli silisili i lenei olaga ma i le olaga a sau. I le avea ai ma auauna a le Tama ma le Alo, matou te aoa atu ma fautua atu e pei ona La’ua faatonu i matou e ala i le Agaga Paia. E leai so matou manao e ese mai nai lo lē talanoa atu i mea e moni ma ia uunaia outou e fai mea ua La’ua otooto maia i le ala i le ola e faavavau, “le meaalofo silisili lea o meaalofo uma a le Atua” (Matatupu Faavae ma Feagaiga 14:7).



III.

O le isi faataitaiga lenei o le aafiaga o lo tatou lumanai ona o faaiuga tatou te faia i le taimi nei. O lenei faataitaiga e faatatau i le filifiliga ia osia se taulaga i le taimi nei e ausia ai se sini taua i le lumanai.

I se konafesi faalesiteki i Cali, Kolomupia, sa faamatala ai e se tuafafine lo la mananao ma lana manamea ina ia faaiipoipo i le malumalu, ae i lenei taimi o le malumalu sili ona lata ane sa mamao i Peru. Mo se taimi umi, sa la sefeina ai a la tupe mo le totogi o le pasi. Mulimuli ane sa la malaga loa i le pasi i Bogotá, ae ina ua la taunuu iina, sa la iloa ai ua leai ma se nofoa avanoa i le pasi e alu i Lima, Peru. Sa ono la toe-foi i le fale e aunoa ma le faaiipoipoga pe faaiipoipo foi i fafo o le malumalu. O le mea na lelei ai, sa i ai se isi filifiliga. Sa mafai ona la tietie i le pasi i Lima pe afai la te loto e saofafai i luga o le fola o le pasi mo le malaga atoa e lima aso lima po. Sa la filifili e fai lenei mea. Sa ia fai mai sa faigata, e ui o nisi taimi sa tuu atu ai e nisi o tagata o latou nofoa e saofafa’i ai ina ia mafai ona latou fālō i luga o le fola.

O le mea na faagaetia ai a’u i lana lauga o le faamatalaga a lenei tuafafine faapea sa faafetai o ia na mafai e i la’ua ma lona toalu ona o i le malumalu i lenei auala, ona sa suia ai le auala sa la’ua lagonaina e uiga i le talalelei ma le auala na la lagonaina e uiga i le faaiipoipo i le malumalu. Sa tauia i la’ua e le Alii i le tuputupu a’e lea e sau

mai le ositaulaga. Sa ia matauina foi o le la malaga lima-aso i le malumalu sa ausiaina ai se mea tele lava i le fausiaina o lo la faalecagaga nai lo le tele o asiasiga i le malumalu e leai se osigataulaga na faia ai.

I le tele o tausaga talu ona ou faalogo i lenei molimau, sa ou mafaufau ai lava pe faape’i se eseese o le olaga o lenei ulugalii talavou pe ana faapea la te faia se isi filifiliga—e lē faia le osigataulaga na tatou ai ina ia faaiipoipo i le malumalu.

Uso e, tatou te faia le mau filifiliga lēmafaitaulia i le olaga, o nisi e tetelē ma o nisi e foliga mai e laiti. Pe a toe tepa i tua, e mafai ona tatou vaaia se eseese tele na faia e a tatou filifiliga i o tatou olaga. Tatou te faia filifiliga ma faaiuga lelei atu pe afai tatou te vaai atu i isi filifiliga ma mafaufau loloto po o fea o le a tau atu i ai. A tatou faia, o le a tatou mulimuli i le fautuaga a Peresitene Russell M. Nelson ia amata ma le taunuuga i le mafaufau.² Mo i tatou, o le taunuuga o loo i ai pea i luga o le ala o feagaiga e ui atu i le malumalu e tau i le ola e faavavau, le meaalofo silisili lea o meaalofo uma a le Atua.

Ou te molimau atu ia Iesu Keriso ma aafiaga o Lana Togiola atoa ai ma isi upumoni o Lana talalelei e faavavau i le suafa o Iesu Keriso, amene. ■

FAAMATALAGA

1. Dallin H. Oaks, “Lelei, Lelei Tele, Lelei Silisili,” *Liahona*, Nov. 2007, 104, 107.
2. Tagai ia Russell M. Nelson, “A’o Tatou Agai Faatasi Atu i Luma,” *Liahona*, Apr. 2018, 7.



O LE AU PERESITENE SILI



Dallin H. Oaks
Fesoasoani Muamua



Russell M. Nelson
Peresitene



Henry B. Eyring
Fesoasoani Lua

O LE KORAMA A APOSETOLO E TOASEFULULUA



M. Russell Ballard



Jeffrey R. Holland



Dieter F. Uchtdorf



David A. Bednar




Quentin L. Cook



D. Todd Christofferson



Neil L. Andersen



Ronald A. Rasband



Gary E. Stevenson



Dale G. Renlund



Gerrit W. Gong



Ulisses Soares

O LE AU PERESITENE O FITUGAFULU



L. Whitney Clayton



Patrick Kearon



Carl B. Cook



Robert C. Gay



Terence M. Vinson



José A. Teixeira



Carlos A. Godoy

AU PULEGA AOA O FITUGAFULU (i le faasologa faalafapeta)



Marcos A. Adrikatis



Rubén V. Allaud



Jose L. Alonso



Jorge M. Alvarado



Willford W. Andersen



Ian S. Arden



Steven R. Bangenter



W. Mark Bassett



David S. Baxter



Randall K. Bennett



Hans T. Boom



Shayne M. Bowen



Mark A. Bragg



L. Todd Budge



Matthew L. Carpenter



Craig C. Christensen



Kim B. Clark



Weatherford T. Clayton



Lawrence E. Conrudge



Valeri V. Cordón



J. Devin Cornish



Claudio R. M. Costa



Joaquim E. Costa



LeGrand R. Curtis Jr.



Massimo De Feo



Benjamin De Hoyos



Edward Dube



Kevin R. Duncan



Timothy J. Dyches



David F. Evans



Enrique R. Fabella



Bradley D. Foster



Eduardo Gavarret



Jack N. Gerard



Ricardo P. Giménez



Taylor C. Godby



Christoffel Golden



Walter F. González



O. Vincent Haleck



Brook P. Hales



Donald L. Hallstrom



Kevin S. Hamilton



Allen D. Haynie



Mathias Held



David P. Homer



Paul V. Johnson



Peter M. Johnson



Jörg Klebingat



Joni L. Koch



Erich W. Kopischke



Hugo E. Martínez



James B. Martino



Richard J. Maynes



John A. McCune



Kyle S. McKay



Peter F. Meurs



Hugo Montoya



Marcus B. Nash



K. Brett Natress



S. Clifford Nielsen



Brent H. Nielson



Adrián Ochoa



Addison de Paula Parrella



Kevin W. Pearson



Anthony D. Perkins



Paul B. Pieper



John C. Pingree Jr.



Rafael E. Pino



James R. Rasband



Michael T. Ringwood



Lynn G. Robbins



Gary B. Sabn



Evan A. Schmutz



Joseph W. Sitati



Steven E. Snow



Vern P. Stanfill



Benjamin M. Z. Tai



Brian K. Taylor



Michael John U. Teh



Arnulfo Valenzuela

O LE AU EPIKOPO PULEFAAMALUMALU



Dean M. Davies
Fesoasoani Muamua



Gérald Causé
EpiKOPO Pulefaamalumalu



W. Christopher Waddell
Fesoasoani Lua

TAITAI AOA



Milton Camargo
Fesoasoani Muamua



Mark L. Pace
Peresterie



Jan E. Newman
Fesoasoani Lua



Michelle D. Craig
Fesoasoani Muamua



Bonnie H. Gordon
Peresterie



Becky Craven
Fesoasoani Lua



Sharon Eubank
Fesoasoani Muamua




Jean B. Bingham
Peresterie



Reyna I. Aburto
Fesoasoani Lua



Lisa L. Harkness
Fesoasoani Muamua



Joy D. Jones
Peresterie



Cristina B. Franco
Fesoasoani Lua



Douglas D. Holmes
Fesoasoani Muamua



Stephen W. Owen
Peresterie



M. Joseph Brough
Fesoasoani Lua

PERAIMERI

ALII TALAVOU

AOGA SA

TAMATAI TALAVOU

AUALOFA





SAUNIA E PERESITENE RUSSELL M. NELSON

E Mafai Ona Tatou Faia Ia Lelei Atu ma Ia Tatou Lelei Atu

Ia i ai lou taulaiga i le salamo i aso taitasi ia matuā taua i lou olaga lea e mafai ona e faaaogaina ai le perisitua i le mana sili atu nai lo se isi lava taimi muamua.

O’u uso pele, e musuia le vaavaai atu i lenei faapotopotoga tele o le autau a le Alii o ē umiaina le perisitua. Oka se malosiaga tele mo lo outou lelei! Matou te alolofa ia te outou. Matou te tatalo mo outou. Matou te matuā faafetai atu mo outou.

Talu ai nei sa ou tosina atu ai i le faatonuga a le Alii na tuuina mai e ala mai i le Perofeta o Iosefa Samita: “Ia leai se mea e te fai atu i lenei tupulaga tau lava o le salamo.”¹ O lenei folafolaga e masani ona ta’ua soo i tusitusiga paia.² E uunaia ai se fesili manino: “Pe manaomia ea e tagata uma ona salamo?” O le tali o le ioe.

Ua toatele naua tagata e mafaufau i le salamo o se faasalaga—o se mea e ao ona aloese ai vagana ai tulaga sili ona matuā. Ae o lenei lagona o le faasalaina e mafua mai ia Satani. E taumafai o ia e poloka i tatou mai le vaai atu ia Iesu Keriso,³ o lē tu mai ma aao mafola,⁴ ma le faamoemoe ma le naunautai e

faamalolo, faamagalo, faamamā, faamalosia, ma faapaiaina i tatou.

O le upu *salamo* i le FaaElenei i le Feagaiga Fou o le *metanoeo*. O le muai

fasi upu (prefix) o le *meta* o lona uiga o le “sui.” O le fasi upu mulia’i o le *noeo* e fesootai i upu Eleni e uiga ma le “mafaufau,” “iloa,” “agaga,” ma le “mānava.”⁵

O lea la, pe a fetalai mai Iesu ia te oe ma a’u ia “salamo,”⁶ o loo Ia valaauliaina i tatou ia sui o tatou mafaufau, lo tatou iloa, o tatou agaga—e oo lava i le auala tatou te mānava ai. O loo Ia talosagaina i tatou ia sui le ala tatou te alolofa atu ai, mafaufau ai, auauna atu ai, faaalu ai o tatou taimi, taulimaina ai a tatou avā, aoao atu ai a tatou fanau, ma le tausiga o o tatou tino.

E leai se mea e sili atu ona saoloto, sili atu ona malualii, pe sili atu ona taua i lo tatou alualu i luma faaletagata lava ia nai lo se taulaiga masani i aso taitasi i le salamo. O le salamo e le o se mea e faa-tasi ona tupu; ae o se faagasologa. O le ki i le fiafia ma le filemu o le mafaufau. Pe a vaavaalua ma le faatua-tua, e tatala e le salamo lo tatou faitotoa e maua ai le mana o le Togiola a Iesu Keriso.⁷

Pe o e malaga ma le filiga i luga o le ala o feagaiga, pe ua see ese pe laa ese mai le ala o feagaiga, pe ua lē mafai ona vaai atu i le ala mai le mea o e i ai i le taimi nei, ou te aioi atu ia te oe ia salamo. O le lagonaina o le mana faamalosiāu o le salamo i aso taitasi—o le faia ma le avea ma se tagata lelei teisi atu i aso taitasi.



A tatou filifili e salamo, ua tatou filifili e sui! Ua tatou faatagaina le Faaola e suia i tatou i o tatou lava ituaiga tagata silisili. Tatou te filifili e tuputupu a'e faaleagaga ma maua le olioli—le olioli o le togilaina ia te Ia.⁸ A tatou filifili e salamo, ua tatou filifili ia avea atili e faapei o Iesu Keriso!⁹

Uso e, e manaomia ona tatou *faia* ia lelei atu ma *ia* tatou lelei atu ona o loo tatou i ai i se taua. O le taua ma le agasala e moni. Ua matuā faateleina e le tiapolo ana taumafaiga e faavaivaia molimau ma taofia le galuega a le Alii. O loo ia faaaupegaina ana au i meatau malolosi e taofia i tatou mai le mauaina o le olioli ma le alofa o le Alii.¹⁰

O le salamo o le ki lea e aloese ai mai le faanoanoa ua mafua mai i mailai a le tiapolo. E le o faamoemoeina e le Alii se atoatoa mai ia i tatou i lenei taimi i lo tatou alualu i luma e faavavau. Ae ua Ia faamoemoeina i tatou ia faateleina lo tatou mamā. O le salamo i aso taitasi o le ala lea i le mamā, ma le mamā na te aumaia le mana. O le mamā faaletagata lava ia e mafai ona faia i tatou e avea ma meafaigaluega mamana i aao o le Atua. O lo tatou salamo—lo tatou mama—o le a faamainaina i tatou ia fesoasoani i le faapopotoina o Isaraelu.

Sa aoao e le Alii le Perofeta o Iosefa Samita e faapea “o aiā a le perisitua ua fesootai e lē mavavaeseina ma mana o le lagi, ma o mana o le lagi e lē mafai

ona pulea pe faaaogaina tau lava i mataupu autu o le amiotonu.”¹¹

Ua tatou iloa mea o le a tatou maua ai le avanoa tele atu i mana o le lagi. Ua tatou iloa foi mea o le a faalavelave i lo tatou alualu i luma—o mea e manaomia ona tuu e lē toe faia e faateleina ai lo tatou mauaina o mana o le lagi. Uso e, saili ma le agaga tatalo ia malamalama po o a mea na o loo faalavelave i le ala o loo salamo. Ia iloa po o a mea na e *taofia* oe mai le salamo. Ona sui lea! Salamo! E mafai e i tatou uma ona faia ia lelei atu ma ia tatou lelei atu nai lo se isi lava taimi muamua.¹²

O loo i ai ni auala maoti ia e mafai ona tatou faaleleia. O le tasi o le auala tatou te taulimaina ai o tatou tino. Ou te tu ma ofo i le vavega o le tino o le tagata. O se foafoaga ofoofogia, e taua i lo tatou agai faasolosolo i luga i lo tatou gafatia sili faalelagi. E lē mafai ona tatou alualu i luma e aunoa ma [le tino]. I le tuuina mai ai ia i tatou o le meaalofo o se tino, ua faatagaina ai i tatou e le Atua ia faia se laasaga taua i le avea atili e faapei o Ia.

Ua malamalama Satani i lenei mea. Ua lē fiafia o ia i le mea moni, ona o lona tetee i le muai olaga ua tumau ai lona lē agavaa i lenei faamanuiaga, ma tuua ai o ia i se tulaga tumau o le lotoleaga ma le ita. O lea o le tele, pe afai e le o le anoano o faaososoga na te tuu i o tatou ala e mafua ai ona tatou faaleaga o tatou tino po o tino o isi.

Ona ua pagatia Satani e *aunoa* ma se tino, ua ia manao ai ia tatou pagatia *ona* o o tatou tino.¹³

O loo tino o loo malumalu patino lea, na foafoa e faofale ai loo agaga e faavavau.¹⁴ O loo tausiga o lena malumalu e taua. Ou te fesili atu nei ia outou, uso e, o sili ea loo naunau e fai ou laei ma teuga o loo tino ia fiafia i ai le lalolagi nai lo le faafiafiaina o le Atua? O lau tali i lenei fesili e avatu ai se feau tuusao ia te Ia e uiga i ou lagona e faatatau i Lana meaalofo ofoofogia ia te oe. I lenei faaaloalo mo o tatou tino, uso e, ou te manatu e mafai ona tatou faia ia lelei atu ma ia tatou lelei atu.

O le isi auala e mafai foi ona tatou faia ia lelei atu ma ia tatou lelei atu ai o le auala tatou te faamamaluina ai tamaitai i o tatou olaga, e amata i o tatou taitoalua ma afafine, o o tatou tina ma tuafafine.¹⁵

I masina ua alu, sa ou maua ai se tusi lotonutimomoia mai se tuafafine pele. Sa ia tusi mai: “Ua [ou lagonaina ma la’u fanau teine] o loo matou i ai i se tauvaga matautia mo le gauaiga lē faalavelaveina a lo’u toalua ma ona atalii, i taaloga 24/7, taaloga vitio, fefaatauiga o mea fou, [ma le] iloilogia ma le mata-mataina le muta o taaloga uma e mafai ona mafaufauina. E foliga mai ua lē toe taua i matou i lo’u toalua ma atalii ona o o latou taimi ua faamuamua tumau i [taaloga ma isi faafiafiaga].”¹⁶

Uso e, o loo tiute muamua ma le sili o sē umia le perisitua o le alofa ma loo popole lea mo loo toalua. Ia tasi ma ia. Ia avea ma ana soa. Ia faafaigofie mo ia ona manao ia fai o ia ma ou au. E leai se isi faaunauga i le olaga e tatau ona ave i ai le faamuamua i lo le fausiaina o se mafutaga e faavavau ma ia. E leai ma se mea i le TV, se masini feaveai, po o se komepiuta e sili atu ona taua nai lo lona tulaga manuia. Ia fai se saililiga o le auala o loo faaalu ai loo taimi ma po o fea foi o tuuto atu i ai loo malosii. O iina o le a ta’u atu ai ia te oe le mea o loo i ai loo loto. Tatalo ia ogatusa loo loto ma le loto o lau avā. Saili ia aumaia ia te ia le olioli. Saili atu i lana fautuaga ma faalogo i ai. O ona manatu o le a faaleleia ai au amioga.





Afai e i ai sou manao ia salamo ona o le ala o loo e taulimaina ai tamaitai e sili ona latalata ia te oe, amata nei loa. Ma ia manatua o *lou* tiutetauave lena e fesoasoani ai i tamaitai i lou olaga ia maua faamanuiaga ia e oo mai i le ola ai i le tulafono a le Alii o le ola mamā. ‘Aua ne’i avea oe ma mafuaaga e lē mafai ai e se tamaitai ona mauaina ona faamanuiaga o le malumalu.

Uso e, e manaomia uma ona tatou salamo. E manaomia ona tatou ō ese mai nofoa faamalū, tuu i lalo masini faatonutonu, ma feala i luga mai le moegase faaleagaga. Ua oo i le taimi e faamoulu ai le ofutau atoatoa o le Atua ina ia mafai ona tatou auai ai i le galuega aupito sili ona taua i luga o le fogaeleele. Ua oo i le taimi e “sasau atu [ai a tatou] selesaito, ma selesele ma o [tatou] manatu atoa, mafaufau atoa, ma le malosi atoa.”¹⁷ O mana o le tiapolo sa le’i salalau atu ma le malolosi tele nai lo le mea ua i ai i nei aso. I le avea ai ma auauna a le Alii, e le mafai ona tatou momoe a o vevae ai leni taua.

O loo manaomia e lou aiga lau taitaiga ma le alofa. O loo manaomia e lau korama ma i latou i lau uarota po o le paranesi lou malosi. Ma o i latou uma e feiloai ia te oe e manaomia ona iloa pe faape’i foliga ma amioga o se soo moni o le Alii.

O’u uso pele, na filifilia outou e lo tatou Tama ia o mai i le lalolagi i leni

taimi taua ona o lou lototoa faaleagaga i le muai olaga. Ua i ai faatasi oe ma alii sili ona lelei ma totoa ua o mai i le lalolagi. Na iloa e Satani po o ai oe ma po o ai oe mai le muai olaga, ma e na te malamalama i le galuega e tatau ona faia a o le’i toe afio mai le Faaola. Ma i le mavae o le faitau afe o tausaga o le faiga o lona poto faitogafiti, ua atamai ai le tiapolo ma e lē mafai ona sui o ia.

Ma le lotofaafetai, o le perisitua ua tatou umia e matuā malosi atu nai lo maili a le tiapolo. Ou te augani atu ia te outou ia avea ma alii ma alii talavou e manaomia e le Alii ona avea ai outou. Ia i ai lou taulaiga i le salamo i *aso taitasi* ia matuā taua i lou olaga lea e mafai ona e faaaogaina ai le perisitua i le mana sili atu nai lo se isi lava taimi muamua. Ua na o le pau lava leni o le auala o le a e tausia ai oe lava ia ma lou aiga ia saogalemu faaleagaga i aso luitauina o i luma atu.

E manaomia e le Alii ni alii o ē e faamuamua ina le tulaga manuia o isi nai lo i latou lava. E manaomia e Ia ni alii o ē galulue ma le faamoemoe ia lagonaina ma le manino le siufofoga o le Agaga. E manaomia e Ia ni alii o le feagaiga o ē tausia a latou feagaiga ma le amiosa’o. E manaomia e Ia ni alii o ē naunau e tausia i latou lava ia mamā mai feusuaiga [elelele]—ni alii agavaa e mafai ona valaau atu i ai i se taimi vave e tuu atu ni faamanuiaga faatasi ma ni

loto mamā, mafaufau mamā, ma ni lima e loto [e auauna atu]. E manaomia e le Alii ni alii e loto e salamo—o alii e i ai le naunautaiga e auauna atu ma avea o se vavega o le autau a le Alii o ē umia ma le agavaa le perisitua.

Ou te faamanuia ia te outou ina ia avea ma na alii. Ou te faamanuia ia te outou i le lototele e salamo ai i aso taitasi ma aoa le auala e faaaoga ai atoa le mana o le perisitua. Ou te faamanuia ia te outou ia fesootai atu le alofa o le Faaola i lou toalu ma lau fanau ma i latou uma e iloa oe. Ou te faamanuia ia te oe ina ia *faia* ia lelei atu ma *ia* e lelei atu. Ma ou te faamanuia ia te oe a o e faia nei taumafaiga, o le a e vaai i vavega i lou olaga.

O loo tatou i ai i le galuega a le Atua Silisili Ese. O Iesu o le Keriso. O i tatou o a La auauna. Ou te molimau atu ai i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 6:9; 11:9.
2. Tagai i le Mareko 1:4; Mosaea 18:20; Alema 37:33; 3 Nifae 7:23; Moronae 3:3; Mataupu Faavae ma Feagaiga 19:21; 44:3; 55:2.
3. Tagai i le Mataupu Faavae ma Feagaiga 6:36.
4. Tagai i le Teuteronome 26:8; 2 Nifae 1:15; Mamona 6:17; Mataupu Faavae ma Feagaiga 6:20.
5. Tagai ia Russell M. Nelson, “Salamo ma le Liuaia,” *Liahona*, Me 2007, 103.
6. Tagai, mo se faataitaiga, Luka 13:3, 5.
7. Tagai i le 2 Nifae 9:23; Mosaea 4:6; 3 Nifae 9:22; 27:19.
8. Tagai ia Russell M. Nelson, “Salamo ma le Liuaia,” 103–4.
9. Tagai i le 3 Nifae 27:27.
10. Tagai i le Iuta 1:17–21; 2 Nifae 2:25, 27; 28:20; tagai foi i le 1 Nifae 8:10–12, 21–23; 11:21–22; 12:17; Mataupu Faavae ma Feagaiga 10:22; Mose 5:13.
11. Mataupu Faavae ma Feagaiga 121:36.
12. O upu ua musuia e le Alii i faaaliga ma i aoaoga o aso nei—*maualuga atu, paia atu, faatelevave, faateleina, faamalosi, sili atu, liua, toefafou, faaleleia, atiae, suia, faalolotoina, faalauteleo* upu ia o le tuputupu a’e faaleagaga (tagai i le Russell M. Nelson, “Avea ma Faataitaiga o Au Paia o Aso e Gata Ai,” *Liahona*, Nov. 2018, 113–14).
13. Ua tatou iloa “ua saoloto tagata e tusa ma la le tino. . . . Ua latou saoloto e filifili le saolotoga ma le ola e faavavau, e ala i le Puluvaiga sili o tagata uma, pe filifili le faatagataotauaina ma le oti, e tusa ma le faatagataotauaina ma le manao o le tiapolo; ona ua saili o ia ia pagatia tagata uma e pei o ia lava” (2 Nifae 2:27).
14. Tagai i le 1 Korinito 3:16–17; 6:18–20.
15. Tagai i le Iakopo 2:35.
16. Tusi na maua i le aso 4 Fep., 2019.
17. Mataupu Faavae ma Feagaiga 33:7.



Sauniga o le Taaao o le Aso Sa

SAUNIA E ELDER DALE G. RENLUND
O Le Korama a Aposetolo e Toasefululua

E Tele Mea e Manuia ai

O le tele o faamanuiaga e finagalo le Atua e foai mai ia i tatou e manaomia ai le faatinoga i la tatou vaega—o faatinoga e fua i lo tatou faatuatua ia Iesu Keriso.

O’u uso e ma tuafafine pele, e finagalo lo tatou Tama Faalelagi ma Iesu Keriso e faamanuia i tatou taitoatasi.¹ O le fesili pe faapefea ona ulu atu ma maua na faamanuiaga ua avea ma mataupu o finauga ma talanoaga faalelotu mo le tele o seneturi.² E finau nisi o faamanuiaga ua na o le faia o se mea e maua ai; ua na o a tatou galuega e maua ai. E finau isi ua uma lava ona filifilia e le Atua po o ai o le a Ia faamanuiaina ma pe faapefea foi—ma o nei faaiuga e le masuia. O manatu uma ia e lua e sese faalefaavae. O faamanuiaga mai le lagi e lē maua foi pe a faaputupu ia tele ni “taui o galuega lelei” pe faatalitali ma le leai o se faamoemoe se’i vaai pe tatou te malo i le loto. Leai, o le upumoni ua sili ona faailoa i se isi uiga ae sili atu ona talafeagai mo le sootaga i le va o se Tama Faalelagi alofa ma Ona suli faamoemoeina—o tatou. O upumoni toefuataiina ua faaalua ai o faamanuiaga e lē tau faia se mea ia maua ai, ae o faatinoga e uunaia e le faatuatua i la tatou vaega, i mea tatou te muai faia ma faifai pea, e taua.³

A o tatou iloiloina pe faapefea ona tatou mauaina faamanuiaga mai le Atua, se’i o tatou faatauina

faamanuiaga faalelagi i se faaputuga tele o fafie. Vaai faalemafaufau i le ogatotonu o i ai se tamai faaputuga fasilaau ninii e matamata ai le afi, o loo fatufatu ai i luga ni fasi laau feololo. Ona sosoo ai lea ma fafie, o tamai ogalaau, ma mulimuli o ogalaau lapopoa. Ua i ai i lenei faaputuga laau le tele o fafie mago, e mafai ai ona maua le malamalama ma le vevela mo le tele o aso. Vaai atu i talaane o le faaputuga fafie o loo i ai se laau afitusi se tasi, le ituaiga lea e i ai le òne i le tumutumu.⁴

Ina ia tatala mai le malosiaga o i le faaputuga fafie, e manaomia ona tosiina le afitusi ma faamumu ai fasilaau ninii. O le a vave lava ona ‘apo e fasilaau ninii le afi ma mafua ai loa ona mu fafie lapopoa. O le taimi lava e amata ai ona talali le afi lea, e faaauau pea seia oo ina mu uma fafie pe faasolo foi ina leai se okesene i le afi.

O le tosiina o le afitusi ma le faamumuina o fasilaau ninii o ni faatinoga iti e mafai ai ona tatala mai le malosiaga ua faamoemoeina mai fafie.⁵ Seiloga lava la e tosi le afitusi, e leai a se mea e tupu, e tusa lava po o le a le telē o le faaputuga fafie. Afai e tosi le afitusi ae le tutuina ai fasilaau ninii, o le tele o le malamalama ma le vevela e faamatuu mai e le afitusi lava ia, ua na o sina mea ma o le malosiaga mai le musaesae o fafie o le a le faamatuu maia. Afai e lē o i ai se sapalai o le okesene i soo se tulaga, e taofia le mu o le afi.

I se ala talitutusa, o le tele o faamanuiaga a le Atua e finagalo e foai mai ia i tatou e manaomia ai le faatinoga i la tatou vaega—o faatinoga e fua i lo tatou faatuatua ia Iesu Keriso. O le faatuatua i le Faaola o se mataupu faavae o le faatinoga ma le mana.⁶ Muamua tatou te faatino i le faatuatua; ona oo mai lea o le mana—e tusa ma le finagalo ma le taimi a le Atua. E taua le faasologa.⁷ E ui i lea, o le faatinoga manaomia e laititi lava pe a faatusa i faamanuiaga tatou te maua mulimuli ane.⁸

Mafaufau i le mea na tupu i gata ūogo felelei na oo mai ia Israelu



anamua i luga o le ala i le nuu folafolaina. O le ū a se gata ūogo sa lamatia. Ae o le tagata ua ūina na mafai ona faamaloloina e ala i le vaai atu i se gata apamemea na fausia e Mose ma tuu i luga o se pou.⁹ O le a le tele o le malosi e manaomia e vaai ai i se mea? O i latou uma na vaai sa mauaina mana o le lagi ma sa faamaloloina. O isi tagata Isaraelu sa ūina na lē vaai i le gata apamemea ma feoti ai. Masalo sa leai so latou faatuatua e vaai atu ai.¹⁰ Masalo sa latou lē talitonu o se faatinoga faigofie faapena na mafai ona maua ai le faamalologa folafolaina. Pe masalo foi sa latou faamaaaina ma le loto i ai o latou loto ma teenaina le fautuaga a le perofeta a le Atua.¹¹

O le mataupu faavae e faamatuā'ia ai faamanuiaga e tafe mai le Atua, e faavavau. E pei o na Isaraelu anamua, e tatau foi ia i tatou ona faatino lo tatou faatuatua ia Iesu Keriso ina ia manuia ai. Ua faaali mai e le Atua e faapea “e i ai se tulafono na folafola lē maaveesea i le lagi i luma atu o le faavaega o le lalolagi lenei, ua faavae ai i luga faamanuiaga uma—ma a tatou maua se faamanuiaga mai le Atua, e maua i le usiusitai i lenei tulafono ua faavae ai i luga.”¹² I le ta'ua ai o lenei mea, e te lē tau faia se mea ia maua ai se faamanuiaga—e sese lenei manatu—ae e ao ona e agavaa mo lenei faamanuiaga. O lo tatou faaolataga ua na o galuega ma le alofa tunoa o Iesu Keriso e oo mai ai.¹³ O le lautele o Lana taulaga togioa o lona uiga o faamanuiaga e lē mafuatia; o a tatou faatinoga iti e le faatusalia i Lana taulaga. Ae le faapea e leai se tau, ma leai se taua; i le pogisa, o se laau afitusi e tutuina e mafai ona iloa mai maila e tele. O le mea moni, e mafai ona iloa mai le lagi ona o nai faatinoga iti o le faatuatua e manaomia e maua ai folafolaga a le Atua.¹⁴

Ina ia maua se faamanuiaga manaomia mai le Atua, faatino le faatuatua, e faagaoioia ai le malosiaga faalelagi lea e faalagolago i ai le faamanuiaga. Mo se faataitaiga, o se tasi o faamoemoega o le tatalo, o le faamautuina o faamanuiaga ua finagalo le Atua e to mai, ae e faalagolago i lo tatou ōle atu iai.¹⁵ Sa tagi atu Alema mo le alofa mutimutivale,



ma na aveesea ona tiga; sa le'i toe lagā atuatuvaletia o ia i le manatuaina o ana agasala. Sa lofituina e lona olioli ona tiga—o ia mea uma ona sa ia tagi atu ma le faatuatua ia Iesu Keriso.¹⁶ O le malosiaga ola e manaomia mo i tatou, o le lava lea o le faatuatua ia Keriso e ōle atu ai ma le faamaoni i le Atua i le tatalo ma talia Lona finagalo ma [Lana] taimi mo le tali.

O le tele o taimi, o le malosiaga ola e manaomia mo faamanuiaga e manaomia ai le sili atu nai lo le tau na ona vaai atu pe ōle atu: o faatinoga e tumu i le faatuatua e faifai pea ma faisoo, e manaomia. I le ogatotonu o le seneturi 19, sa faatonu ai e Polika Iaga se vaega o le Au Paia o Aso e Gata Ai ia ō e vaavaai ma nofoia Arisona, o se itulagi toāfa i Amerika i Matu. Ina ua taunuu i Arisona, sa leai se vai a le vaega ma sa popole ne'i latou fano. Sa latou aioi atu i le Atua mo se fesoasoani. Sa le'i pine ae to mai timuga ma le kiona, na mafai ai ona latou faatumuina a latou paelo i vai ma faainu ai a latou manu. I le loto-faafetai ma le faafouina, sa latou toefoi atu i le Aai o Sate Leki ma le olioli i le agalelei o le Atua. Ina ua latou taunuu, sa latou lipoti atu faamatalaga o le latou malaga ia Polika Iaga ma tautino atu le latou faaiuga e faapea e le mafai ona faato'a Arisona.

Ina ua faalogo atu i le lipoti, sa fesili atu Polika Iaga i se alii i totonu o le potu po o le a sona manatu e uiga i le

malaga ma le vavega. Sa tali sa'o mai lenei alii, o Daniel W. Jones, “Semanu e toe faatutumu a'u vai, toe alu, ma toe tatalo foi.” Sa tuu e Uso Polika lona lima i le tauau o Uso Jones ma fai atu, “O le tagata lenei o le a taitaia le isi malaga e sosoo ai i Arisona.”¹⁷

E mafai ona tatou manatu uma ni taimi na tatou tullei ai pea i luma ma toe tatalo foi—ma maua ai faamanuiaga. O aafiaga o Michael ma Marian Holmes ua faaalia ai nei mataupu faavae. Sa ma auauna faatasi ma Michael o ni Fitugafulu Eria. Sa faagaetia lava a'u i soo se taimi e valaauina ai o ia e tatalo i a matou fonotaga ona sa iloagofie lava le loloto o lona faaleagaga; sa ia iloa le auala e talanoa ai ma le Atua. Ou te fiafia lava e faalogo o ia tatalo. E ui i lea, i le popofou o le la ulugalii, sa le'i tatalo pe auai Michael ma Marian i le lotu. Sa pisi i la'ua i le la fanau laiti e toatolu ma se kamupani konekarate faamanuiaina. Sa le'i lagona e Michael o ia o se tagata lotu. I se tasi afiafi, sa alu atu ai le la epikopo i le la fale ma faamalosiāu ia i la'ua ia amata ona tatalo.

Ina ua aluese le epikopo, sa tonu ia Michael ma Marian o le a la taumafai e tatalo. A o le'i momoe, sa la tootutuli i talaane o le la moega, ma le lē toafimalie, sa amata tatalo Michael. I le mavae ai o ni nai upu uiga ese o le tatalo, sa tu faafuasei i luga Michael, ma faapea atu, “Marian, e lē mafai ona ou faia lenei mea.” A o ia tu ai ma amata savali

ese, sa uu mai e Marian lona lima, toso mai o ia i lalo i ona tulivae, ma fai atu, “Mike, e mafai ona e faia. Toe taumafai!” I lea faamalosianga, sa maea ai se tatolo puupuu a Michael.

Sa amata ona tatolo soo le au Holmes. Sa la talia le valaaulia a se tuaoi e auai i le lotu. A o latou savavali atu i le falesa ma faalogo atu i le viiga amata, sa musumusu atu le Agaga ia i latou, “E moni lenei mea.” Mulimuli ane, sa aunoa ma le vaaia pe talosagaina, sa fesoasoani ai Michael e ao le lapisi mai le falelotu. A o ia faia, sa ia lagonaina se uunaiga manino, “O Lo’u fale lenei.”

Sa talia e Michael ma Marian ni valaauga i le Ekalesia ma auauna atu i le la uarota ma le siteki. Sa faamauina i la’ua i le tasi ma le isi, ma sa faamauina le la fanau e toa 3 ia i la’ua. Sa mulimuli mai nisi fanau, ma atoa ai le 12. Sa auauna atu faatasi le au Holmes o se peresitene o le misiona ma se soa—e faalua.

O le uluai tatolo uiga ese, o se tatolo laitiiti ae o se faatinoga sa tumu i le faatuatua lea na minoi ai faamanuiaga o le lagi. Sa fagagaina e le au Holmes le afi o le faatuatua e ala i le auai i le lotu ma auaunaga. O lo la tuuto atu i le avea ai ma soo i le aluga o tausaga na taitai atu ai i se faatuatua musaesae lea o loo uunaia pea e oo mai i lenei aso.

Peitai, e tatau ona maua e se afi se sapalai tumau o le okesene ina ia i’u ai ina tatala mai e fafie lona gafatia atoa. E pei ona faaaliga e Michael ma Marian Homes, o le faatuatua ia Keriso e manaomia ai faatinoga faifai pea ina ia faaauau ai pea ona musaesae. O a tatou faatinoga laiti e fagagaina lo tatou tomai e savavali ai i luga o le ala o feagaiga ma taitai atu ai i faamanuiaga silisili e mafai ona ofo mai e le Atua. Ae na o le pau le mea e maua ai le okesene [o le faatuatua] pe afai lea tatou te savavali pea i luma. O nisi taimi tatou te manaomia ai ona faia se aufana ma se ‘aū a o le’i oo mai se faaaliga po o fea e tatau ona tatou saili i ai mo ni meaai.¹⁸ O nisi taimi tatou te manaomia ai ona faia ni meaifagaluega a o le’i oo mai faaaliga pe faapefea ona fau se vaa.¹⁹ O nisi taimi, i le faatonuga a le perofeta a le Alii, e manaomia ai ona tatou taoina se tamai keke mai sina ga’o itiiti ma se falaoamata o ia i tatou ina ia

maua ai ma le mautinoa se ulo ga’o ma se paelo falaoamata.²⁰ Ma o nisi taimi e manaomia ona tatou “filemu ma iloa o [le Atua] o le Atua,” ma faalagolago i Lana taimi.²¹

A e mauaina soo se faamanuiaga mai le Atua, e mafai ona e faapea ua e tausisia se tulafono e faavavau lea o loo puleaina le mauaina o lena faamanuiaga.²² Ae manatua o le tulafono “na folafola le maaveesea” e le fuaina i le taimi faaletagata, o lona uiga, e oo mai faamanuiaga i le taimi a le Atua. E oo lava i perofeta anamua i le sailiga o lo latou aiga faalelagi²³ “na oti [i le] faatuatua, e lei maua mea na folafolaina, a ua iloa ai e i latou a e mamao . . . na mautinoa . . . ma talia.”²⁴ Afai e le’i mauaina lava se faamanuiaga manaomia mai le Atua—ia—e le manaomia la ona e atuatuvaale, ma tuufesili po o a nisi mea e manaomia ona e faia. Ae, faalogo i le fautuaga a Iosefa Samita ia “faia ma le fialia mea uma ua i ai i [lou] mana; ona . . . tutu [lea], ma le mautinoa atoatoa, e vaai i le . . . aao [o le Atua] e faaali mai.”²⁵ O nisi faamanuiaga e faapopololo mo se taimi o mulimuli mai, e oo lava i fanau sili ona totoa a le Atua.²⁶

I le ono masina talu ai, sa faalauiloa mai ai se fuafuaga e faatotonugalemu-i-le-aiga, ma lagolagoina-e-le-Ekalesia e aoa ai aoaoga faavae, faamalosi ai le faatuatua, ma faamalolosi ai tagata taitoatasi ma aiga. Sa folafola mai e Peresitene Russell M. Nelson o ia suiga e mafai ona fesoasoani ia i tatou ia ola ai faalecagaga, faateleina lo tatou olioli i le talalelei, ma faalolotoina lo tatou liua

i le Tama Faalelagi ma Iesu Keriso.²⁷ Ae ua tuu mai lava i lo tatou faitalia e mauaina nei faamanuiaga. E nafa i tatou taitoatasi ma le tiute e susu’e ma susesue le *Sau, Mulimuli Mai ia te A’u—Mo Tagata Taitoatasi ma Aiga*, faatasi ai ma tusitusiga paia ma isi anomea o le *Sau, Mulimuli Mai ia te A’u*.²⁸ E manaomia ona tatou talanoaina faatasi ma o tatou aiga ma uo ma faatulaga o tatou aso Sapati e faamumu ai se afi o le faatuatua. A leai, ia tatou tuu ai pea punaoa i luga o se faaputuga i o tatou fale faatasi ma le malosiaga faamoemoeina e tanumia ai pea i totonu.

Ou te valaaulia outou ia faagaoioi ma le faamaoni mana o le lagi ia maua ai faamanuiaga faapitoa mai le Atua. Faatino le faatuatua e tosi ai le afitusi ma faamumu ai le afi o galuega e tatau ai. Sapalai atu le okesene manaomia o le faatuatua a o e faatalitali ma le onosai i le Alii. Faatasi ai ma nei valaaulia, ou te tatolo ia taialaina ma taitaiina oe e le Agaga Paia, ina ia mafai ona pei oe o le tagata faamaoni o loo faamatalaina i le Faataoto, “e tele mea e manuia ai.”²⁹ Ou te molimau atu o loo soifua lo outou Tama Faalelagi ma Lona Alo Pele, o Iesu Keriso, ma o loo popole mo lo outou manuia, ma fialia e faamanuia ia te outou, i le suafa o Iesu Keriso, amene. ■

FAAMATALAGA

1. Tagai i le Mataupu Faavae ma Feagaiga 41:1; 78:17; 104:33.
2. Mo se faaitaiga, tagai i le Craig Harline, *A World Ablaze: The Rise of Martin Luther and the Birth of the Reformation* (2017), 20. O le tasi finaaga sa faia i le va o Augustine (TA



354–430) ma lana uo ia Pelagius (TA 354–420). Sa tumau le finau a Pelagius e faapea “o tagata e mautinoa lava [na i ai] i totonu o i latou e fai le lelei, ma latou te faia mea e maua ai le alofa tunoa o le Atua e ala i le galue i lena leleiga ma tausi i poloaiga uma a le Atua.” Sa matuā lē iocina e Augustine. Tagai foi i le Eric Metaxas, *Martin Luther: The Man Who Rediscovered God and Changed the World* (2017), 296. Sa aoao e Luteru e le mafai e galuega ona taitai atu i le alofa tunoa o le Atua; o le faatuatua e taitai atu i le alofa tunoa ma e mulimuli mai ai galuega lelei: “e le mafai ona tuueseeseina galuega mai le faatuatua, e pei foi ona le mafai ona tuueseese o le vevela ma le malamalama mai le afi.”

3. Tagai i le Mataupu Faavae ma Feagaiga 82:10.
4. O se afitusi o le tolauapiga lena, o se afitusi “e tosi i soo se mea”. O afitusi faonapo nei, e pei o afitusi o le umukuka, e i ai le one e olo ai nai lo le tumutumu o le laau afitusi.
5. O nei faatinoga e maua ai le “malosiaga ola” mo le musaesae. O le faaupuga “activation energy” sa faalauiloa mai i le 1889 e se saienitisi Suetena o Svante Arrhenius.
6. Tagai i le *Lectures on Faith* (1985), 3.
7. Tagai i le David A. Bednar, “Ole Atua i le Faatuatua,” *Liahona*, Me 2008, 94.
8. Tagai i le Mosaea 2:24–25.
9. Tagai i le Numera 21:6–9.
10. Tagai i le 1 Nifae 17:41.
11. Tagai i le 1 Nifae 17:42.
12. Mataupu Faavae ma Feagaiga 130:20–21.
13. Tagai i le 2 Nifae 10:24; 25:23.
14. Tagai i le Alema 60:11, 21; Dallin H. Oaks, “O Mea Iti ma le Faatauva,” *Liahona*, Me 2018, 89–92; M. Russell Ballard, “Ia Auai ma le Naunautai,” *Liahona*, Nov. 2012, 29–31.
15. Tagai i le Taiala i Tususiga Paia, “Tatalo”; tagai foi i le Moronae 7:48.
16. Tagai i le Alema 36:18–21; tagai foi i le Enosa 1:5–8.
17. Daniel W. Jones, *40 Years Among the Indians* (1960), 222.
18. Tagai i le 1 Nifae 16:23.
19. Tagai i le 1 Nifae 17:9.
20. Tagai i le 1 Tupu 17:10–16.
21. Mataupu Faavae ma Feagaiga 101:16.
22. Tagai i le Mataupu Faavae ma Feagaiga 130:20–21.
23. Tagai i le Eperu 11:16.
24. Eperu 11:13.
25. Mataupu Faavae ma Feagaiga 123:17.
26. Tagai i le Jeffrey R. Holland, “O Se Faitaulaga Sili i Mea Lelei Atali,” *Liahona*, Ian. 2000, 42–45. Sa saunao Elder Holland, “E vave oo mai nisi faamanuiga, o nisi e tuai, o nisi e le oo mai vagana le lagi; ae mo i latou e taliaina le talalelei a Iesu Keriso, e oo mai lava.”
27. Tagai i le Russell M. Nelson, “Malelega Amata,” *Liahona*, Nov. 2018, 6–8.
28. Tagai i le Quentin L. Cook, “Liuaia Loloto ma Tumau i le Tama Faalelagi ma le Alii o Iesu Keriso,” *Liahona*, Nov. 2018, 8–12.
29. Faataoto 28:20.



SAUNIA E SHARON EUBANK
Fesoasoani Muamua i le Au Peresitene Aoao o le Aualofa

O Keriso: O Le Malamalama e Susulu i le Pogisa

Afai e te lagona ua mu itiiti le sulu o lau molimau ma ua oo mai le pogisa, ia lototele. Tausi au folafolaga i le Atua.


O lo’u ofisa i le Maota o le Aualofa e i ai se vaaiga atoatoa o le Malumalu o Sate Leki. O po uma, e pei o le galuega a le uati, e ola moli o fafo o le malumalu pe a tau pogipogi. O le malumalu o se sulu e mumu tumau ma le mautinoa i fafo atu o lo’u faamalama.

I se tasi po ia Fepuari ua mavae atu, sa lē masani ai le pogisa pea o lo’u ofisa a o goto ifo le la. Ina ua ou tilotilo atu i fafo i le faamalama, sa pogisa mai le malumalu. E le’i kiina moli. Sa vave

ona ou mafaufau. Sa lē mafai ona ou vaai atu i tumutumu o le malumalu sa ou vaaia i afiafi uma mo tausaga e tele.

O le vaaia o le pogisa i mea sa ou faamoemoe e iloa atu ai le malamalama sa faamanatu mai ai ia te a’u o se tasi o o tatou manaoga taua ina ia tuputupu a’e ai o le fesootai pea i le puna o le malamalama—o Iesu Keriso. O Ia o le puna o lo tatou mana, o le Malamalama ma le Ola o le Lalolagi. A aunoa ma se





fesootaiga malosi ia te Ia, e amata ona tatou feoti faaleagaga. O le iloaia o lena mea, e taumafai ai Satani e faaagaga ia faatosinaga faalelalogi ua fetaiai ma i tatou uma. E galue o ia e faaitiitia lo tatou malamalama, talepe fesootaiga, motusia le sapalai o le eletise, ma tuua ai na o i tatou i le pogisa. O nei faatosinaga o ni tulaga masani ia i le olaga faitino, ae ua galue malosi Satani e faasea i tatou ma ta'u mai ia i tatou ua na o i tatou lava o loo feagai ma na mea.

O Nisi o i Tatou Ua Lē Fia Faia se Mea ona o le Faanoanoa

Pe a lofituina i tatou i faalavelave, pe a tiga tele le olaga ua le mafai ai ona tatou mānava, pe a fasia i tatou e pei o le tagata i le ala i Ieriko ma ua tuua a talioti, e afio mai Iesu ma liligi le suauu i o tatou manu'a, sii ma le alofa i tatou i luga, avatu i tatou i se faletalimalo, ma tausii i tatou.¹ Ia i tatou o loo faanoanoa, ua Ia fetalai mai i ai: "O le a ou . . . faamamaina avega ua tuu i o outou tau'au, e oo ia te outou tou te le lagonaina i latou i luga o o outou tua, . . . ina ia mafai ona outou iloa ma le mautinoa o A'u, o le Alii le Atua, e asiasi atu i o'u tagata i o latou puapuaga."² **E faamalo-loina e Keriso ia manu.**

O Nisi o i Tatou Ua Matuai Vaivai Lava

Na saunoa Elder Jeffrey R. Holland: "E le o faamoemoe ia tatou taufetuli saosasao e sili atu nai lo o lo tatou malosi. . . . Ae [e ui lava i lea], ou te iloa . . . e toatele outou e taufetuli saosasao tele ma e toetoe lava a uma lo outou malosi ma sapalai faalemafaufau i nisi o taimi."³ Pe a lofituina i tatou i mea ua faamoemoeina, e mafai ona tatou laa i tua ma ole atu i le Tama Faalelagi po o le a se mea e faamatuuese atu. O se vaega o lo tatou aafiaga faaleolaga o le aoaoina po o a mea e lē faia. Ae e ui lava i lea, o nisi taimi e mamafatū ai le olaga. Ua famautinoa mai e Iesu ia i tatou, "Ia outou o mai ia te au outou uma o e tigaina ma mafatia i avega o au foi e malolo ai outou."⁴

Ua naunau Keriso e auai faatasi ma i tatou i le amo ma toso ina ia faamāmāina a tatou avega. **O Keriso o le malologa.**

O Nisi o i Tatou Ua Lagonaina e Lē o i Tatou o se Tagata Masani o le Ekalesia

Mo ni mafuaaga eseesee, tatou te lē lagonaina le taliaina po o le talisapaia. Ua faaali mai e le Feagaiga Fou ni taumafaiga maoae na faia e Iesu e aapa atu ai i ituaiga uma o tagata: o

lepela, ao lafoga, tamaiti, le au Kalilaia, fafine talitane, o fafine, au Faresaio, o ē agasala, o Samaria, fafine ua oti a latou tane, o fitafita Roma, tagata mulilulua, o ē le mama i tulaga faalesauniga. I le toetoe lava o tala uma, o loo Ia aapa atu i se tasi e le masani ona taliaina i faapotopotoga.

I le Luka 19 o loo faamatalaina ai le tala e uiga i le telona sili i Ieriko e igoa ia Sakaio. Na a'e o ia i se laau ina ia iloa atu ai Iesu o loo afio ane. Sa faafaigaluegaina e le malo o Roma ia Sakaio ma vaai [tagata] ia te ia o se tagata pi'opi'o ma se tagata agasala. Na silasila atu Iesu ia te ia i luga o le laau ma valaau atu ia te ia, "Sakaio e, ia e vave ifo ia i lalo, aua e tatau ona ou nofo i lou fale i le aso nei."⁵ Ma ina ua silasila atu Iesu i le lelei o le loto o Sakaio ma mea na ia faia mo isi, na Ia taliaina lana taulaga ma fetalai atu, "Ua oo mai le faaolataga i le aiga nei i le asō, [aua] o ia [foi o se] atalii o Aperaamo."⁶

Na fetalai atu ma le agamalu Keriso ia sa Nifaē, ua "ou poloaiina ia aua nei i ai se tasi o outou e alu ese atu."⁷ Na maua e Peteru se faaaliga mamana i le Galuega 10 ina ua ia folafola atu, "Ua faasino mai e le Atua ia te au aua ou te tauina atu ua sa pe leaga se [tagata]."⁸ O se tulaga manaomia lē fetuunaia mo soo Kerisiano ma le Au Paia o Aso e Gata Ai le faaaliga o le alofa moni i le tasi ma le isi.⁹ Na tuuina mai e Iesu lea lava ituaiga o valaaulia e tasi ia i tatou lea na Ia tuuina atu ia Sakaio: "Faauta, ou te tu atu i le puipui ma tuitui atu: [afai e te] faalogo mai i lo'u leo, ma tatala mai le puipui, ou te ulufale atu ia te [oe], ma te tali sua foi ma [oe], o [oe] foi ma a'u."¹⁰ **E silasila mai Keriso ia i tatou i luga o a tatou laau.**

O Nisi o i Tatou o Loo Mafatia Faalelagona i Fesili

E le'i tele ni tausaga talu ai, na mamafatū ia te a'u ma lē fiafia i ni fesili sa lē mafai ona ou mauaina ni tali i ai. I le taeao po lava o se tasi Aso Toonai, sa fai ai sa'u miti. I le miti sa ou vaai ai i se tamai fale ma ou iloa ai e tatau ona ou alu e tu i totonu. E lima ni fata faaofuofu (arches) na siomia ai, ae o faamalama na faia i ma'a. Sa ou faitio

i le miti, i le lē fia alu i totonu ona sa matua laitiiti ma pogisa. Ona oo mai lea o se manatu i lo'u mafaufau lea na susu-nuina ai ma le onosai e le uso o Iareto ni maa i ni tioata manino. O le tioata o se maa ua faia i ai se suiga. Ina ua pa'i atu le Alii i maa mo le uso o Iareto, sa susulu i le malamalama i totonu o vaa pogisa.¹¹ Na faafuasei lava ona faatumu-lia a'u i se manao ina ia i ai i totonu o lena tamai fale e sili atu nai lo se isi lava nofoaga. O le nofoaga tonu lava lea—le nofoaga e tasi—mo a'u e “vaai” moni ai lava. Sa le'i o ese fesili ia na faalavelave mai ia te a'u, ae o le fesili sa sili ona ou mafaufau i ai ina ua ou ala i luga: O le a faapefea ona e faateleina lou faatuatua, e pei o le uso o Iareto, ina ia mafai ona liua au maa i le malamalama?¹²

Na faia o tatou faiai faaletino e saili ai le malamalamaaga ma le uiga i mea itiiti e auauai mai. Ou te lē iloa ia mafuaaga uma pe aisea ua matua mafiafia ai le veli i le olaga faitino. E le o le tulaga lenei i lo tatou atinaega faavavau tatou te maua uma ai tali. O le tulaga lea tatou te atinae ai lo tatou faamautinoaga (po o nisi taimi o lo tatou faamoemoe) i le mautinoa o mea e le o vaaia. E oo mai le faamautinoaga i auala e lē faigofie ona iloiloia i taimi uma, ae e i ai le malamalama i lo tatou pogisa. Na fetalai Iesu, “O A'u o le malamalama, ma le ola, ma le upumoni o le lalolagi.”¹³ Mo i latou o loo sailia le upumoni, atonu e foliga mai e faavalevalea i le taimi muamua se tamai potu laitiiti ma pogisa o i ai faa-malama ua faia i maa. Ae o le onosai ma fesili faamaoni, e mafai ai e Iesu ona liua o tatou faamalama o maa i le tioata ma le malamalama. **O Keriso o le malamalama e vaai ai.**



Afai tatou te salamo i a tatou agasala, o le toto mumu a le Faola e toe faafoi i tatou i le mama.



O Nisi o i Tatou Ua Lagona e Le Mafai Ona Lava lo Tatou Lelei

O le vali mumu ulaula o le Feagaiga Tuai e le gata ina felanulanuai ae e umi foi le malosi, o lona uiga o le a pipii le vali i le ie mamoe ma e le alu ese e tusa lava po o le a le tele o taimi e taina ai.¹⁴ E faaoga e Satani lenei manatu e pei o se pate: o ie mamoe papae ua pispisia i le lanu mumu ulaula e le toe foi lava i le paepae. Peitai na folafola mai e Iesu Keriso, “Ua sili ona maua luga o o'u ala i o outou ala,”¹⁵ ma o le vavega o Lona alofa tunoa e faapea, afai tatou te salamo i a tatou agasala, e toe faafoi e Lona toto mumu ulaula i tatou i le mama. E le talafeagai, ae e ui i lea e moni.

“E ui lava ina pei o ofu mumu a outou agasala, e sisina ia e pei o le kiona; e ui lava ina mumu ia e pei o le ie ulaula, e avea e pei o fulufulu mamoe”¹⁶ Na fetalai malosi mai le Alii: o ia “o le ua salamo i . . . [agasala], o ia lava lea ua faamagaloina, ma o A'u, o le Alii, e le toe manatuaina lava i latou.”¹⁷ I se isi uiga: O mai, inā tatou filifili faatasi.¹⁸ Na e faia ni mea sese; ua le ‘a'u'a'u ai.¹⁹ Sau ia te a'u ma salamo.²⁰ Ou te lē toe manatuaina lava le agasala.²¹ E mafai ona e toe atoatoa.²² Ua ia te a'u se galuega mo oe e fai.²³ **O Keriso e faasinasinaina ia fulufulu.**

Ae o a laasaga aoga? O le a le ki i le toe faafesootaia o le mana o Iesu Keriso

pe a tatou lē mautonu? Na saunoa ai Peresitene Nelson ma le faigofie tele: “O le ki o le osia ma le tausia o feagaiga paia. . . . E le o se auala faigata.”²⁴ Ia faa-totonugalemu Keriso i lou olaga.²⁵

Afai e te lagona ua mu itiiti le sulu o lau molimau ma ua oo mai le pogisa, ia lototele. Tausi au folafolaga i le Atua. Fai atu au fesili. Ia liliu ma le onosai le maa i le tioata. Liliu atu ia Iesu Keriso, o lē e alofa pea ia te oe.

Na fetalai Iesu, “O A'u o le malamalama [lea e] susulu i le pouliuli, ae ua lē malamalama i ai le pouliuli.”²⁶ O lona uiga e tusa lava po o le a le malosi e taumafai ai, e le mafai e le pogisa ona tapeina lena malamalama. Po o le a lava. E mafai ona e faatuatuaina o le a i ai Lona malamalama iina mo oe.

O i tatou, po o tagata tatou te alolofa i ai, e ono ō pogisa i se taimi lē tumau. I le tala e uiga i le Malumalu o Sate Leki, na maua e le pule o fale, o Brother Val White se valaau i le taimi lava lena. Sa matauina e tagata. O le a se mea na faaletonu i moli o le malumalu? Muamua, na o atu le aufaigaluega taitoatasi i pusa eletise uma i totonu o le malumalu ma ki taitasi moli. Ona latou suia lea o maa i le sapalai otometi o le eletise ma faataitai ia iloa ai po o le a le mea na pe ai.

E faigata ona e kiina na o oe ia moli. Tatou te manaomia ni uo. Tatou te manaomia le tasi ma le isi. E pei lava o tagata faigaluega o fale o le malumalu, e mafai ona tatou fesoasoani i le tasi ma le isi i le o mai, toe fafaga o tatou maa faaleagaga, toe lipea le mea na sese.

O tatou moli taitoatasi atonu e taipei lava ua na o se matāuila se tasi i luga o se laau. Ae tatou te faasusulu atu pea lo tatou tamai malamalama, e pei o le Lotoa o le Malumalu i le taimi o le Kerisimasi. O le mea silisili o mea uma, e pei ona uunaia e Peresitene Nelson, e mafai ona tatou aumaia le malamalama o le Faola ia i tatou lava ma tagata e taua ia i tatou e ala i le faatinoga faigofie o le tausia o a tatou feagaiga. I auala eseese, ua tau mai ai e le Alii lena faatinoga faamaoni i le mana ma le olioli.²⁷

Ou te molimau atu e pele outou. Ua silafia e le Alii le malosi o loo outou

taumafai ai. O loo outou alualu i luma. Ia faaaau pea. Na te silafia a outou osigataulaga uma lēmavaaia ma faitauina i latou mo lo outou lelei ma le lelei o i latou e te alofa i ai. E le o faia fua la outou galuega. E le o tuua na o outou. O Lona lava suafa, o Emanuelu, o lona uiga “Ua ia i tatou le Atua.”²⁸ O loo Ia faatasi moni lava ma oe.

Fai ni nai laa i luga o le ala o feagaia, e tusa lava pe ua pogisa tele e vaai mamao atu ai. O le a toe ola mai moli. Ou te molimau atu i upumoni o loo i afioga a Iesu, ma ua faataumulia i le malamalama: “Faalatalata mai ia te au ma o le a Ou faalatalata atu ai ia te outou; saili mai ia te au ma le filiga ma o le a outou maua ai au; ole mai, ma o le a outou maua ai; tuitui mai, ma o le a tatala atu ai ia te outou.”²⁹ I le suafa o Iesu Keriso, amene. ■

FAAMATALAGA

1. Tagai i le Luka 10:30–35.
2. Mosaea 24:14.
3. Jeffrey R. Holland, “Tauaveina o Avega a le Tasi ma le Isi,” *Liahona*, Iuni 2018, 30.
4. Mataio 11:28.
5. Luka 19:5.
6. Luka 19:9.
7. 3 Nifae 18:25.
8. Galuega 10:28.
9. Tagai i le Ioane 15:12.
10. Faaaliga 3:20.
11. Tagai i le Eteru 6:3.
12. Tagai i le Eteru 4:7.
13. Eteru 4:12.
14. Tagai i le “Scarlet, Crimson, Snow, and Wool,” *Ensign*, Dec. 2016, 64–65.
15. Isaia 55:9.
16. Isaia 1:18.
17. Mataupu Faavae ma Feagaiga 58:42.
18. Tagai i le Isaia 1:18.
19. Tagai i le Roma 3:23.
20. Tagai i le 3 Nifae 9:22.
21. Tagai i le Mataupu Faavae ma Feagaiga 58:42.
22. Tagai i le Luka 8:48.
23. Tagai i le Mose 1:6.
24. Russell M. Nelson, “O Meaalofa e Fa ua Ofo Mai e Iesu Keriso ia te Oe” (Faigalotu o le Kerisimasi a le Au Peresitene Sili, 2 Tes., 2018), broadcasts. ChurchOfJesusChrist.org.
25. Tagai i le Russell M. Nelson, “Why Have Faith Now? LDS President Russell M. Nelson Explains during Phoenix-Area Visit,” *Arizona Republic*, Feb. 10, 2019, azcentral.com.
26. Mataupu Faavae ma Feagaiga 6:21.
27. Tagai i le Mosaea 27:14.
28. Mataio 1:23.
29. Mataupu Faavae ma Feagaiga 88:63.



SAUNIA E ELDER QUENTIN L. COOK
O Le Korama a Aposetolo e Toasefululua

Alofa Sili mo Fanau a lo Tatou Tama

O le alofa o le uiga autu lea ma le uunaiga mo faamoemoega faaleagaga na poloaia i tatou e faatino e lo tatou perofeta pele.

O’u uso e ma tuafafine pele, o se taimi tulagaese ma taua lenei i le talafaasolopito. Ua faamanuiaina i tatou e ola i le tisipenisione mulumuli a o le’i oo i le Afio Faalua Mai o le Faaola. E latalata i le amataga o lenei tisipenisione i le 1829, le tausaga lea a o lumanai ai le faatula-gaina aloaia o le Ekalesia, sa maua ai se faaaliga faapelepele na folafola mai ai se “galuega ofoofogia” “o le a oo mai.” O lenei faaaliga na faamautu mai ai e faapea o i latou o ē mananao e auauna atu i le Atua ua agavaa mo lea auaunaga

e ala i le “faatuatua, faamoemoe, alofa mama ma le alofa, ma le manatu tasi i le mamalu o le Atua.”¹ O le alofa mama, o lona uiga “o le alofa lē pona lea o Keriso,”² ua aofia ai ma le alofa e faava-vau o le Atua mo Ana fanau uma.³

O lo’u faamoemoega i lenei taeao o le faamamafa atu lea o le matafaioi taua o lona ituaiga o alofa i le galuega faafaifeautalai, galuega o malumalu ma talafaasolopito o aiga, ma le tausiga faalelotu o le aiga e faatotonugalemu-i-le-aiga, ma lagolagoina-e-le-Ekalesia. O le



alofa o le Faaola ma le alofa o o tatou uso a tagata, o tane ma fafine⁴ o le uiga autu lea ma le uunaiga mo auunaga ma faamoemoega faaleagaga⁵ ia na poloai-ina i tatou e faatino e lo tatou perofeta pele, Peresitene Russell M. Nelson, i fetuunaiga na faasilasila mai i le 2018.

O Le Taumafaiga Faafaifeautalai e Faapotopoto Isaraelu ua Faataapeapeina

Sa vave ona ou masani i le sootaga i le va o le galuega faafaifeautalai ma le alofa i le talavou o lo'u olaga. Ina ua 11 o'u tausaga, sa ou mauaina se faamanuiaga faapeteriaka mai se peteriaka, o ia foi o lo'u tama matua.⁶ O se vaega o lena faamanuiaga e faapea, "Ou te faamanuia ia te oe i se alofa sili mo ou uso a tagata, aua o le a valaauina oe e avatu le talalelei i le lalolagi . . . ia manumalo mai ni agaga ia Keriso."⁷

Sa ou malamalama e ui lava i lo'u laitiiti i lena taimi o le faasoaina atu o le talalelei sa fua i se alofa sili mo fanau uma a lo tatou Tama Faalelagi.

Ina ua tofia le Pulega Aoao e galulue i le *Tala'i La'u Talalelei* i le 15 tausaga ua mavae, sa matou faai'uina e faapea o le uiga paia o le alofa e taua i le galuega faafaifeautalai i o tatou aso, e pei lava ona i ai e le aunoa. O le Mataupu 6 i uiga paia Faa-Keriso, o loo aofia ai le alofa mama ma le alofa, ua avea pea ma mataupu sili ona lauiloa i faifeautalai.

I le avea ai ma avefeau a le Faaola, o le toatele o faifeautalai e lagonaina lenei ituaiga o alofa, ma a latou lagona-ina, e faamanuiaina a latou taumafaiga. A maua e tagata o le ekalesia se vaaiga mamao o lenei ituaiga o alofa, lea e taua i le fesoasoani ai i le Alii i Lona faamoemoega, o le a faataunuaina le galuega a le Alii.

Sa faamanuiaina a'u e maua sina matafaioi i se faataitaiga ofoofogia o lenei ituaiga o alofa. A o ou auuina atu o se Peresitene o le Eria o Motu o le Pasefika, sa ou maua se valaau mai ia Peresitene R. Wayne Shute. A o avea ma se alii talavou, sa ia auuina atu i se misiona i Samoa. Mulimuli ane, sa ia toefoi atu i Samoa o se peresitene o le misiona.⁸ E telefoni mai ia te a'u ua avea o ia ma peresitene o le Malumalu o



Apia Samoa. O se tasi o ana faifeautalai talavou, a o avea o ia ma peresitene o le misiona, o Elder O. Vincent Haleck, lea o loo avea nei ma Peresitene o le Eria i le Pasefika. Sa i ai ia Peresitene Shute le alofa sili ma le faaaloalo mo Vince ma le aiga atoa o Haleck. O le toatele o le aiga o ni tagata o le Ekalesia, ae o le tamā o Vince, o Otto Haleck, le peteriaka o le aiga (o se tupuaga Siamani ma Samoa), sa le'i avea ma se tagata o le ekalesia. Sa iloa e Peresitene Shute sa ou auai atu i se konafesi faalesiteki ma isi fonotaga i Amerika Samoa, ma sa ia fesili mai ia te a'u pe ou te le fia nofo i le maota o Otto Haleck faatasi ma se manatu e faasoa atu le talalelei ia te ia.

Sa ma nonofo ma lo'u toalua o Mary ia Otto ma lona faletua, o Dorothy, i lo

la maota matagofie. I le mālū taeao sa ou faasoa atu ai se savali o le talalelei ma valaaulia Otto e feiloai ma faifeautalai. Sa agalelei o ia, ae sa mausali, i le teenaina o la'u valaaulia. Sa ia fai mai ua fiafia o ia i le toatele o tagata o lona aiga ua avea ma Au Paia o Aso e Gata Ai. Ae sa ia faailoa mai ma le malosi e faapea o nisi o tuua o lona tina Samoa sa avea ma uluai faifeau Kerisiano i Samoa, ma sa ia lagona se tuuto sili i lo latou faatuatuaga Faa-Kerisiano ua leva.⁹ Ae ui i lea, sa matou faamavae o ni uo lelei.

Mulimuli ane, a o sauni Peresitene Gordon B. Hinckley e faapaia le Malumalu o Suva i Fiti, sa ia fai i lana failautusi faapitoa, o Uso Don H. Staheli,¹⁰ e valaau mai ia te a'u i Niu Sila e fai ia fetuunaiga. Sa manao Peresitene Hinckley e lele atu mai Fiti i Amerika Samoa e feiloai ai ma le Au Paia. Sa fautuaina mai se faletalimalo faapitoa sa faaaogaina i ni asiasiga na muamua atu. Sa ou talosaga i ai pe mafai ona faia nisi fetuunaiga e ese ai. Sa saunoa mai Uso Staheli, "O oe o le Peresitene o le Eria; e le afaina."

Sa vave ona ou valaau atu ia Peresitene Shute ma ta'u atu ia te ia masalo ua i ai so ma avanoa lona lua



R. Wayne Shute

e faamanuia ai faaleagaga le ma uo o Otto Haleck. Ae o le taimi la lea o le faifeautalai o Peresitene Gordon B. Hinckley. Sa ou fesili i ai pe mata e tala-feagai mo le au Halecks ona talimalo ia i matou uma ma le vaega malaga a Peresitene Hinckley.¹¹ O Peresitene ma Sister Hinckley, o le la afafine o Jane, ma Elder ma Sister Jeffrey R. Holland sa avea foi ma vaega o lea aumalaga. Sa galulue faatasi Peresitene Shute ma le aiga i le faiga uma o fetuunaiga.¹²

Ina ua matou taunuu mai Fiti i le mavae ai o le faapaiga o le malumalu, sa talileleia ma le fiafia i matou.¹³ Sa matou lauga atu i lena afafi i le faitau afe o le au paia i Samoa ma matou agai atu ai loa i le maota o le aiga o Haleck. Ina ua matou faapotopoto mo le mālū taeao i le taeao na sosoo ai, sa oo ina avea Peresitene Hinckley ma Otto Haleck o ni uo lelei lava. Sa mata'ina ia te a'u lo la faia o le talanoaga lava e tasi na ma faia ma Otto i le silia ma le tausaga na muamua atu. Ina ua faailoa mai e Otto lona faamemelo mo le tatou ekalesia ae toefaamautu mai ma lona tuuto i lana lotu o loo i ai, sa tuu e Peresitene Hinckley lona lima i le tauau o Otto ma faapea atu, "Otto, ua lē lava lena mea; e tataua ona avea oe ma se tagata o le Ekalesia. O le Ekalesia lena i le Alii." Sa mafai ona e vaaia faafaatusa le paū ese atu o le ofutau tetee mai ia Otto i se lotomatala i le mea na saunoa atu ai Peresitene Hinckley.

O le amataga lea o le aoaoga faafaifeautalai faapoopo ma se lotomaulalo faaleagaga na faatagaina ai Otto Haleck ina ia papatisoina ma faamauina i le silia teisi lava ma se tausaga mulimuli ane. I le tasi tausaga mulimuli ane, sa



faamauina ai le aiga o Haleck o se aiga e faavavau i le malumalu.¹⁴

O le mea na ootia ai lo'u lotu i lena aafiaga maoae o le alofa lofituina faaleaunaga sa faalia e Peresitene Wayne Shute mo lana faifeautalai muamua, o Elder Vince Haleck, ma lona manao ia vaaia le aiga atoa o Haleck ua tuufaatasia o se aiga e faavavau.¹⁵

A oo mai i le faapotopotoina o Israelu, e manaomia ona tatou faaogatusaina o tatou lotu ma lena ituaiga o alofa ma ē ese mai lagona ua na o se tiutetauave lava¹⁶ po o le ta'usala ina i lagona o le alofa ma le auai i le faigapaaga faalelagi o le faasoina atu o le savali, le auaunaga, ma le misiona a le Faaola i le lalolagi.¹⁷

I le avea ai ma tagata o le ekalesia e mafai ona tatou faaali atu lo tatou alofa mo le Faaola ma i o tatou uso ma

tuafafine i le lalolagi atoa e ala i le faia o ni valaaulia faigofie. O le faasologa fou o sauniga o le Aso Sa ua maua ai se avanoa tulagaese mo tagata o le ekalesia e valaaulia ai ma le alofa ma le faamanuiaina uo ma paaga ia o mai ina matamata ma lagona se aafiaaga i le Ekalesia.¹⁸ O se sauniga faamanatuga faaleagaga, e faamoemoe e paia e pei o le saunoaga a Elder Jeffrey R. Holland ananafi, o le a sosoo ai ma se sauniga 50 minute e taulai atu i le Feagaiga Fou ma le Faaola po o saunoaga fitoitonu o le konafesi e taulai atu foi i le Faaola ma Lana aoaoga faavae.

E tuufesili nisi o tuafafine o le Aualofa pe aisea ua avatu ai se tofiga o le "faapotopotoina" ia i latou faatasi ma uso o le korama o le perisitua. O loo i ai ni mafuaaga mo lena mea, ma ua uma ona tuu mai e Peresitene Nelson le tele o na mea i le konafesi aoao talu ai. Sa ia faai mai, "E le mafai lava ona matou faapotopotoina Israelu e aunoa ma outou."¹⁹ I o tatou aso ua faamanuiaina i tatou pe tusa ma le 30 pasene o a tatou faifeautalai faamisiona, o tuafafaine. Ua maua ai i lena mea se uunaiga faapoopo mo tuafafine o le Aualofa ia faasoa atu ma le alofa le talalelei. O le mea o loo manaomia o se tautinoga alofa, agaalofo, ma faaleagaga a i tatou taitoatasi—alii, tamaitai, talavou, ma tamaiti—e faasoa atu le talalelei a Iesu Keriso. Afai tatou te faaali atu le alofa, agalelei, ma le lotomaulalo, e toatele o le a taliaina la tatou valaaulia. O i latou e filifili e le taliaina la tatou valaaulia o le a avea pea ma a tatou uo.

Taumafaiga a Malumalu ma Talafaasolopito o Aiga e Faapotopoto Israelu

O loo i ai foi le alofa i le totonuga-lemu o a tatou taumafaiga o malumalu ma talafaasolopito o aiga e faapotopoto Israelu i le isi itu o le veli. A tatou aoao i tofotofoga ma faigata na feagai ma o tatou tuua, o le a faalauteleina lo tatou alolofa ma le lotofaafetai mo i latou. Ua faamalositia a tatou taumafaiga o malumalu ma talafaasolopito o aiga i se tulaga iloga e fetuunaiga fou i le faasologa o sauniga i le Aso Sa ma le siitaga a le autalavou i vasega ma korama. Ua



O le auaunaga alofa a R. Wayne Shute mo lana faifeautalai muamua o Elder O. Vincent Haleck na fesoasoani e tuufaatasia ai le aiga o Haleck e faavavau.

tuuina mai e nei suiga se gauaiga vave atu ma mamana atu e aoao ai e uiga i o tatou tuua ma le faapotopotoina o Isaraelu i le isi itu o le veli. O galuega o le malumalu ma talafaasolopito o aiga ua matua faaleleia uma.

O le initoneti o se meafaigaluega mamana; o le aiga ua avea nei ma o tatou nofoaga autu o talafaasolopito o aiga. E maoae le atamamai o a tatou tagata talavou i sailiga o talafaasolopito o aiga ma o loo uunaia faaleagaga e faatino papatisoga mo o latou tuua, o ē ua latou aoao e alolofa i ai ma talisapaia. Talu mai le suiga ua faataga ai le ta'i 11-tausaga-le-matutua e faatino papatisoga mo ē ua maliliu, ua lipoti mai e peresitene o malumalu i le lalolagi atoa le matua faateleina o le auai. Na faailoa mai e se tasi o peresitene o malumalu e faapea “e ofoofogia le faateleina o tagata e faia papatisoga . . . ma o le faaopoopoga o le ta'i 11-tausaga ua aumaia le tele o aiga. . . . E oo lava i le [laiti] o o latou tausaga, e foliga mai latou te lagona se migao ma le faamoe-moega mo le sauniga o loo latou faatinoina. E matagofie le maimoa i ai!”²⁰

Ou te iloa o loo faia ma o le a faaauau pea ona faia e o tatou taitai Peraimeri ma le autalavou le galuega o malumalu ma talafaasolopito o aiga o se taumafaiga tele. E mafai e tuafafine o le Aualofa ma uso o le perisitua ona fesoasoani ma le alofa e faataunu lo latou tiutetauave taitoatasi mo malumalu ma talafaasolopito o aiga ma e ala foi i le fesoasoani atu ma le uunaia o fanau ma le autalavou ia faapotopotoina Isaraelu i le isi itu o le veli. E patino le taua o lenei mea i le aiga ma i le Sapati. Ou te folafola atu o le faatinoina ma le alofa o sauniga mo tuua o le a faamalosia ai ma puipua a tatou talavou ma aiga i se lalolagi ua faateleina le leaga. Ou te molimau patino atu foi ua maua e Peresitene Russell M. Nelson ni faaaliga loloto ma taua e fesoootai ma malumalu ma galuega faalemalumalu.

Saunia Aiga e Faavavau ma Tagata Taitoatasi ia Mau ma le Atua

O le faamamafa fou i le susesueina ma le ola ai i le talalei e faatotonugalemu-i-le-aiga, atoa ai ma punaoa o loo saunia



e le Ekalesia, o se avanoa maoae lea mo le sauniaina ma le alofa o aiga e faavavau ma tagata taitoatasi e feiloai ma mau faatasi ma le Atua.²¹

A faamauiina se alii ma se tamaitai i le malumalu, e ulufale atu i laua i le faatulagaga paia o le faaipoipoga i le feagaiga fou ma faavavau, o se faatula-gaga o le perisitua.²² La te maua faatasi ma talia faamanuiaga o le perisitua ma le mana e faatonutonu ai mataupu o le la aiga. Ua i ai i tamaitai ma alii ni matafaioi tupito e pei ona otooto mai i le “O Le Aiga: O Se Folafolaga i le Lalolagi,”²³ ae o le la tiute faatausimea e tutusa le aoga ma le taua.²⁴ E tutusa mana ia te i laua e maua ai faaaliga mo le la aiga. A laua galulue faatasi i le alofa ma le amiotonu, o a la faaiuga e faamanuiaina faalelagi.

O i latou o e saili ia iloa le finagalo o le Alii o ni tagata taitoatasi ma mo o latou aiga e tatau ona tauivi ia amiotonu, agamalu, agalelei, ma alofa. O le lotomauualalo ma le alofa o uiga iloga ia o i latou o ē saili i le finagalo o le Alii, aemaise mo o latou aiga.

O le faaatoatoaina o i tatou lava ia, faagavaaina o i tatou lava ia mo faamanuiaga o feagaiga, ma le saunia e fetaiai ma le Atua o ni tiutetauave faaletagata lava ia. E manaomia ona tatou olatutoatasi ma auai ma le naunautai i le faia o o tatou aiga ma sulufaiga mai afa

o loo siomia ai i tatou²⁵ ma “se malutaga o le faatuatua.”²⁶ Ua i ai i matua le tiutetauave ina ia aoao atu ma le alofa le la fanau. O aiga e tumu i le alofa o se olioliga, se fiafiaga, ma se lagi moni lava i le lalolagi.²⁷

O le pese e fiafia i ai lo'u tina o le “A i ai i le Aiga le Alofa.”²⁸ Soo se taimi lava e faalogo ai o ia i le fuaitau muamua, “A i ai i le aiga o le alofa,” e iloa lava lona ootia ma le loimatā. I le avea ai ma fanau sa matou iloa lava na matou ola i lena ituaiga o aiga; o se tasi lea o ana faamuamua sili ona maua.²⁹

E faaopoopo atu i le uunaiga o se siosiomaga alofa i le aiga, ua taulai atu ai Peresitene Nelson i le faatapulaaina o le faaagaina o ala o faasalalauga ia e faalavelave i o tatou faamoemoega autu.³⁰ O se tasi fetuunaiga o le a manuia ai le toetoe o soo se aiga o le faia lea o le initoneti, ala o faasalalauga faaagafesootai, ma televise o se auaua nai lo o se faalavefau, po o le mea e sili ona leaga, o se matai. O le taua mo agaga o tagata uma, aemaise lava o fanau, e tele ina tupu i totonu o le aiga. I le avea ai ma matua, e manaomia ona tatou mautinoa o mea o loo i ai i ala o faasalalauga e lelei, talafeagai mo le matua, ma ogatusa ma le siosiomaga alofa o loo tatou taumafai e atiae.

O le aoao atu i totonu o o tatou aiga e manaomia ona manino ma



faatauana³¹ ae ia faalecagaga foi, olioli ma tumu i le alofa.

Ou te folafola atu pe a tatou taulai atu i lo tatou alofa mo le Faaola ma Lana Togiola, ma faia o Ia ma toto-nugalemu o a tatou taumafaiga e faapotopoto Israelu i itu uma e lua o le veli, auauna atu i isi, ma saunia le tagata lava ia e fetaiai ma le Atua, o le a faaitiitia le faatosinaga a le fili ma o le olioli, fiafia, ma le filemu o le talalelei o le a faalauteleina o tatou aiga i le alofa FaaKeriso.³² Ou te molimau atu i nei folafolaga faaleaoaoga faavae ma tuu atu se molimau mautinoa ia Iesu Keriso ma Lana taulaga togiola mo i tatou, i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 4:1, 5.
2. Moronae 7:47.
3. Tagai i le "Alofa Mama ma le Alofa," *Tala'i La'u Talalelei: O Se Talaia mo le Galuega Faafaifeautalai*, rev. ed. (2019), 124.
4. Tagai i le Teuterenome 6:5; Mataio 22:36–40.
5. Tagai i le "Tiutetauave o Au Peresitene o Korama a Toeaina ma le Aualofa i le Galuega Faafaifeautalai a Tagata o le Au Paia ma le Galuega o le Malumalu ma Talafaasolopito o Aiga," faaliga, 6 Oke., 2018.
6. Sa faatagaina lo'u tama matua e tuu atu se faamanuiaga faapeteriaka i fanau a fanau sa nonofo i ni siteki escese. O la'u [faamanuiaga] sa tuuina mai ia te a'u i le 11 o o'u tausaga ona sa ma'i o ia ma sa mafaufau ina ne'i maluu o ia.
7. Faamanuiaga faapeteriaka na tuuina atu ia Quentin L. Cook e peteriaka Crozier

- Kimball, 13 Oke., 1951, Draper, Iuta.
8. Sa auauna atu foi Peresitene R. Wayne Shute ma lona faletua o Lorna i isi ituaiga escese o misiona i Shanghai, Saina; Amenias; Sigapoa; ma Eleni. Ina ua maluu Lorna, sa ia faaipoipo atu ia Rhea Mae Rosvall, ma sa ia auauna atu i le Misiona a Perisipeni Ausetalia. O le toafitu o lana fanau e toaiva sa auauna atu i ni misiona faamamaluina. I se gasologa o tausaga e lua o tausaga e tele sa ia auauna ai o se peresitene o le misiona i Samoa, sa auauna atu ai Elder John H. Groberg o se peresitene o le misiona i Toga. O aafiaga na la maua uma e logologoā.
9. O Otto Haleck o se taitai faasamasamanoa i le Ekalesia Faapotopotoga Kerisiano o Samoa, lea e i ai ona aa e tupuga mai le LMS (London Missionary Society). O lona tama o se tagata e tupuga mai Saimani mai Dessau, Siamani.
10. O Peresitene Don H. Staheli o loo auauna atu i le taimi nei o le peresitene o le Malumalu o Bountiful Iuta.
11. Sa i ai uma Peresitene Gordon B. ma Sister Marjorie P. Hinckley ma lo la afafine o Jane Hinckley Dudley, Elder Jeffrey R. ma Sister Patricia T. Holland, Elder Quentin L. ma Sister Mary G. Cook, ma Uso Don H. Staheli.
12. Na faailoa mai e Elder O. Vincent Haleck ia te a'u na valaaulia e lona tama ia Vince ma lona uso o David e toefoi atu mai nuu mamao e siaki le fale ma ia i ai iina mo le asiasiga a Peresitene Hinckley. Sa saunoa mai Elder Haleck na tautino e lona tama, "E leiloa po o ni agelu nei tagata." Sa ia ta'u atu i ona atalii afai o le a latou talimalo i le perofeta, e manaomia ona latou faia le fale ia atoatoa.
13. Sa faafeiloaia Peresitene Hinckley e taitai o le malo o Amerika Samoa ma le faitau afe o Samoa i le malae lakapi.
14. O le tuufaatasia o aiga e ala i le galuega faafaifeautalai filiga o loo avea ma se uiga sili o tagata Samoa ma isi tagata Polenisia.

15. Sa matua alofagia Peresitene Shute ma talisapaia lea na valaaulia ai o ia e lauga i le sauniga o le maluu o Otto Haleck i le 2006.
16. "O nisi taimi atonu tatou te muai auauna atu mai se lagona o se tiute po o se matafaioi, ae e oo lava i lena auaunaga e mafai lava ona taitai atu i tatou e utuvai mai se mea maua luga atu . . . ia auauna atu i 'se ala sili atu ona lelei' [1 Korinito 12:31]" Joy D. Jones, "Mo Ia," *Liahona*, Nov. 2018, 50).
17. Tagai i le Tad R. Callister, *The Infinite Atonement* (2000), 5–8.
18. E tatau i tagata o le Ekalesia ona faamaopopo faatasi ma faifeautalai i soo se taimi lava latou te faia ai ni valaaulia.
19. Russell M. Nelson, "Auai o Tuafafine i le Faapotopotoina o Israelu," *Liahona*, Nov. 2018, 70.
20. Lipoti a Peresitene B. Jackson ma Sister Rosemary M. Wixom, peresitene ma le faatina o le Malumalu o Sate Leki, i le Au Peresitene Aoao o le Peraimeri, Mat. 2019. Sa matauina e au Wixom "ua faateleina a latou oka o lavalava XXXS o le papatisoga e faafetaia ai le manaoga!"
21. Tagai i le Russell M. Nelson, "Malelega Amata," *Liahona*, Nov. 2018, 6–8.
22. Tagai i le Mataupu Faavae ma Feagaiga 131:1–4.
23. Tagai i le "O Le Aiga: O Se Folafolaga i le Lalolagi," *Liahona*, Me 2017, 145.
24. "O tama uma o se peteriaka i lona aiga ma o tina uma o se meteriaka e paaga tutusa i a la matafaioi tulagaese faamatua" (James E. Faust, "The Prophetic Voice," *Ensign*, May 1996, 6).
25. Tagai i le Mataupu Faavae ma Feagaiga 45:26–27; 88:91.
26. Russell M. Nelson, "Avea ma Faataitaga Lelei o le Au Paia o Aso e Gata Ai," *Liahona*, Nov. 2018, 113.
27. Tagai i le "O Se Lagi Se Aiga," *Viiga*, nu. 179.
28. "A i ai i le Aiga le Alofa," *Viiga*, nu. 181.
29. Afai e ao ona ausia leni ituaiga o alofa, o le faatonuga o loo i le Mataupu Faavae ma Feagaiga 121:41–42 e tatau ona avea ma sini: "E leai se mana po o se aafiaga e mafai pe tatou ona faatumauiina ona o le perisitua, na o i le faatauana, i le tali-tiga, i le agamaua-lalo ma le agamalu, ma le alofa faamaoni; "I le agalelei, ma le malamalama mama, e matua faalauteleina ai le agaga e aunoa ma le pepelo, e aunoa ma le faaleoleo." O le soona faitiaina o fanau e tatau ona alofia. O le faatolailaina o mea sese ma le leai o se poto e manaomia ai le aoaoga, ae le o faitioga. O agasala e manaomia ai aoaiga (tagai i le Mataupu Faavae ma Feagaiga 1:25–27).
30. Tagai i le Russell M. Nelson, "Auai o Tuafafine i le Faapotopotoina o Israelu," 69; tagai foi i le Russell M. Nelson, "Hope of Israel" faigalotu a le autalavou i le lalolagi atoa, 3 Iuni, 2018), Hope of Israel. Church of Jesus Christ.org.
31. I se lagona, o le aiga e pei lava o se a'oga e tasi se potu mo fanau o vaitausaga uma. Pe a aoao atu le 11-tausaga-le-matua, e le mafai ona tatou le amanaiaina le 3-tausaga.
32. Tagai i le Ioane 17:3; 2 Nifae 31:20; Moronae 7:47.



SAUNIA E ELDER D. TODD CHRISTOFFERSON
O Le Korama a Aposetolo e Toasefululua

Saunia mo le Toe Afio Mai o le Alii

*O Le Ekalesia a Iesu Keriso o le Au Paia o Aso e
 Gata Ai ua matuai faamalosia i se tulagaese ma
 ua poloaiina e faataunuu sauniuniga talafeagai
 mo le Afio Mai Faalua o le Alii.*

I le lua vaiaso, o le a tatou faamanatua ai le Eseta. Ua faamaonia mai e le Toetu le paia o Iesu Keriso ma le moni o le Atua le Tama. E liliu atu o tatou manatu i le Faaola, ma tatou mafaufau loloto ai i “Lona soifua le mafaatusalia ma le uiga mama lē mafuatia o Lana taulaga togiola sili.”¹ Ou te faamoemoe tatou te mafaufau foi e uiga i Lona toe afio mai o loo faatalitalia pe a “pule o Ia o le Tupu o Tupu ma . . . Alii o Alii.”²

I se taimi ua mavae i Buenos Aires, Atenitina, sa ou auai atu ai i se konafesi

ma ni taitai mai se vaega lautele eseese o tapuaiga faalelotu. O lo latou alolofa mo o latou uso a tagata sa le mafaase-seina. Sa latou tuuto atu i le laveaiina o tagata o ē na mafatia ma fesoasoani i tagata ia tulai ae i luga atu o sauaga ma le mativa. Sa ou toe mafaufau i le tele o fesoasoani agaalofo a lenei Ekalesia, e aofia ai ni galuega faatino e galulue faatasi ai ma le toatele o vaega faatua-tua o loo i ai i le konafesi. Sa ou lagona le lotofaafetai loloto mo le lima foi o tagata o Le Ekalesia a Iesu Keriso o le

Au Paia o Aso e Gata Ai lea ua mafai ai ona faia ia ituaiga auaunaga FaaKeriso.

I lena taimi, na faamaonia mai e le Agaga Paia ni mea se lua ia te a’u. Muamua, o le galuega o auaunaga i manaoga faaletino e taua ma e tataua ona faaaauau pea. O le lona lua sa le’i faamoemoeina, ae na mamana ma manino. O le mea lenei: i tua atu o le auaunaga lē manatu faapito, e matua taua lava le saunia o le lalolagi mo le Afio Faalua Mai o le Alii o Iesu Keriso.

Pe a afio mai o Ia, o faiga sauua ma le lē tonu e lē gata o le a faaitiitia, ae o le a faamutaina:

“O le a nonofo faatasi foi le lukoma le tamai mamoe, ma o le a taoto le nameri faatasi ma le tamai oti, ma o le a faatasi le tamai povi ma le tamai leona ma povi pepeti; ma o le a taitaiina i latou e le tamaitiiti. . . .

O le a latou lē faamanu’a pe faaumatia i se mea i lo’u mauga paia atoa; ona o le a tumu le lalolagi i le malamalama o le Alii e pei ona ufitia le sami i vai.”³

E lē gata o le a faaitiitia le mativa ma mafatiaga; ae o le a mouese atu:

“Latou te le toe fia aai, e le toe fia inu foi; e le ogotia i latou i le la, po o se vevela.

“Aua o le Tamai Mamoe o loo i luma o le nofoalii na te fafaga ia i tatou ma taitai ia te i tatou i puna o vai ola; e soloieseina foi e le Atua o loimata uma nai o latou mata.”⁴

E oo lava i le tiga ma le faanoanoa o le oti o le a lē toe i ai.

“I lena aso o le a lē oti se tamameamea seia matua o ia; ma o lona ola o le a pei o tausaga o se laau;

“Ma pe a oti o ia o le a lē moe o ia, o lona uiga i le eleele, ae o le a liua i le emo o le mata, ma o le a segia i luga, ma o le a mamalu lava lona malologa.”⁵

O lea la ioe, se’i o tatou faia mea uma tatou te mafaia e faamāmā ai mafatiaga ma le faanoanoa i le taimi nei, *ma* se’i o tatou tuuto atili atu i tatou lava ma le filiga i sauniuniga e manaomia mo le aso o le a faamutaina atoa ai le tiga ma le amioleaga, pe a “nofotupu lava Keriso i le lalolagi; ma . . . faafouina le lalolagi ma maua lona mamalu faaparataiso.”⁶ O le a avea ma se aso o le togiolaina ma le faamasinoga.





Sa faamatalaina ma le talafeagai e le Epikopo na muamua atu o le Lotu Anelikana o Durham, Dr. N. T. Wright, le taua o le Togiola a Keriso, Toetu, ma le Faamasinoga i le faatoilaloina o faamasinoga lē tonu ma le faasa’oina o mea uma.

Fai mai a ia “Ua atofaina e le Atua se aso o le a ia faamasinoina ai ma le tonu le lalolagi e se tagata na ia tofiaina—ma o lenei mea ua ia tuuina mai ai le faamautinoaga i tagata uma e ala i le toe faatuina mai o lenei tagata mai le oti. O mea moni e uiga ia Iesu o Nasareta, ma aemaise lava i lona toetu mai le oti, o le faavae lea o le faamautinoaga o le lalolagi e leai se uiga. E le o se mea e mulimuli ane avea ma se lē mautonu; faapea a tatou faia le faamasinoga tonu i le taimi nei tatou te lē mapumapu i le pogisa, taumafai e fausiaina se fale o le a i’u lava ina pa’ū, po o le lipea o se taavale lea o le a i’u lava ina pe. Ina ua faatuina e le Atua Iesu mai le oti, o se gaoioiga itiiti lea na aofia ai le gaoioiga sili o le faamasinoga tonu o loo i ai i se atigi, [o le] fatulaau, . . . o le faamoemoega sili. Na tautino mai e le Atua, i se auala sili ona malosi e mafaufauina, o Iesu le Nasareta sa avea moni lava ma Mesia. . . . I se tulaga sili ona ofoofogia o le talafaasolopito, na feagai [Iesu] lava ia ma se faamasinoga sauā ma le lē tonu, na sau mai le nofoaga na faatusaina ma tuufaatasia ai le tele o sauaga ma faiga lē tonu o le talafaasolopito, ia

tauaveina na vefesi, lena pogisa, lena sauā, lena faiga le tonu, ia te ia lava, ma faaumatia ai lona mana.”⁷

A o o’u i ai i le konafesi i Buenos Aires lea na ou ta’ua muamua, na faamanino mai e le Agaga ia te a’u, o Le Ekalesia a Iesu Keriso o le Au Paia o Aso e Gata Ai ua matuai faamalositia i se tulagaese ma ua poloaiina e faataunuu sauniuniga talafeagai mo le Afio Mai Faalua o le Alii; ioe, sa toefuatai mai mo lena faamoemoega. E mafai ona e maua i se isi lava mea se nuu o ē taliaina le vaitau lenei e pei ona valoiaina o le “[tisipenisione] i le faaatoaga o tau-saga” lea ua faamoemoe ai le Atua e “[faapotopoto faatasi mea uma ia tasi] ia Keriso”?⁸ Afai e te lē maua iinei se nuu ua faamoemoe i le ausiaina o mea e tatau ona ausiaina mo ē uma o soifua ma maliliu e saunia ai mo lena aso, afai e te lē maua iinei se faalapotopotoga ua loto e tuuto atu ni aofaiga tetele o taimi ma tupe i le faapotopotoina ma le sauniaina o se nuu o le feagaiga ua saunia e talia le Alii, e te lē mauaina lava la i se isi nofoaga.

I le fetalai atu ai i le Ekalesia i le 1831, na tautino atu e le Alii:

“O ki o le malo o le Atua ua tuu atu i tagata i luga o le lalolagi, ma mai iina o le a taavale atu ai i luma le talalelei i tuluiga o le lalolagi, e pei ona o le a taavale atu le maa na tofi mai le mauga e anunoa ma lima, seia tumu ai le lalolagi atoa. . . .

“Valaau atu i le Alii, ina ia alu i luma lona malo i luga o le lalolagi, ina ia maua e e o nonofo ai, ma sauni mo aso o le a oo mai, lea o le a afio mai ai i lalo le Atalii o le Tagata o i le lagi, ua laei i le pupula o lona mamalu, e fetaia’i ma le malo o le Atua ua faatu i luga o le lalolagi.”⁹

O a ni mea e mafai ona tatou faia e saunia ai i le taimi nei mo lena aso? E mafai ona tatou sauinia i tatou lava o se nuu; e mafai ona tatou faapotopoto maia le nuu o le feagaiga a le Alii; ma e mafai ona tatou fesoasoani e toefuatai le folafolaga o le faaolataga “na faia i tamā,” o tatou tuāa.¹⁰ O nei mea uma e tatau ona tupu i se fuataga maualuga atu a o le’i toe afio mai le Alii.

Muamua, ma e taua tele mo le toe afio mai o le Alii, le i ai i luga o le fogaeleele o se nuu ua saunia e talia o Ia i Lona afio mai. Na Ia fetalai mai o i latou o ē o totoe i luga o le fogaeleele i lena aso “mai lava i lē ua aupito itiiti e oo atu i lē aupito sili, . . . o le a faatumulia i le malamalama o le Alii, ma o le a vaai mata i le mata, ma o le a sii a’e o latou leo, ma o le a latou pepese faatasi ma le leo le pese fou lenei, fai mai: Ua toe aumai e le Alii Siona. . . . Ua faapotopoto e le Alii mea uma i le mea e tasi. Ua aumai e le Alii Siona i lalo mai luga. Ua ava’e i luga e le Alii Siona mai lalō.”¹¹

I aso anamua, na ave ai e le Atua le aai amiotonu o Siona ia te Ia Lava.¹² E faapena foi, i aso e gata ai o le a talia e se Siona fou le Alii i Lona toe afio mai.¹³ O Siona o ē mama loto, o se nuu e tasi le loto ma tasi le mafaufau, e nonofo i le amiotonu ma e leai sē mativa i totonu o i latou.¹⁴ Na saunua mai le Perofeta o Iosefa Samita, “E tatau ona tatou avea le faatuina o Siona ma o tatou faamoemoega silisili.”¹⁵ Tatou te faatuina Siona i o tatou aiga, uarota, paranesi, ma siteki i le lotogatasi, amioatua, ma le alofa mama.¹⁶

E tatau ona tatou faailoa atu o le faatuina o Siona na tupu i taimi faigata—“o se aso o le toasa, o se aso o le susunuina, o se aso o le faatafunaga, o le tagitu’i, o le faanoanoa, ma o le auega; ma o le a oo mai i luga o le lalolagi atoa e pei o se asiosio, ua fetalai mai ai le Alii.”¹⁷ O le mea lea, o le faapotopotoina i

siteki e avea “mo se puipuiga, ma mo se sulufaiga mai le afā, ma mai le toasa pe a sasaa mai e aunoa ma le suia i luga o le lalolagi atoa.”¹⁸

E pei lava o taimi ua mavae atu, sa tatou “potopoto soo faatasi, e anapopogi ma tatalo, ma talatalanoa, o le tasi i le tasi, e uiga i le uclefea o o [tatou] agaga. Ma . . . taumamafa i le areto ma le [vai], i le faamanatuina o le Alii o Iesu.”¹⁹ E pei ona faamalamalamaina e Peresitene Russell M. Nelson i le konafesi aoao ia Oketopa ua te’a, “O le faamoemoega lava o le Ekalesia ua leva ona i ai o le fesoasoani lea i tagata uma ia faateleina lo latou faatuatua i lo tatou Alii o Iesu Keriso ma i Lana Togiola, ia fesoasoani ia i latou i le osia ma le tausia o a latou feagaiga ma le Atua, ma ia faamallosia ai ma faamauiina o latou aiga.”²⁰ E tusa ai ma lea mea, sa ia faamamafa mai le taua o feagaiga o le malumalu, le faapaiaina o le Sapati, ma le taumamafa fiafia i aso uma i le talalelei, e faatotonugalemuina i le aiga ma lagolagoina e se mataupu aoaoina ua tuufaatasia mo suesuega i le lotu. Tatou te fia iloa e uiga i le Alii, ma e tatou te fia iloa le Alii.²¹

O le taumafaiga autu i le faatuina o Siona o le faapotopotoina lea o le nuu o le feagaiga a le Alii ua loa ona faataapeapeina.²² “Matou te talitonu i le faapotopotoina moni o Isaraelu ma le toefuataiga mai o Ituaiga e Sefulu.”²³ O tagata uma o ē o le a salamo, talitonu ia Keriso, ma papatisoina, o Lona nuu lena o le feagaiga.²⁴ Na valoia e le Alii Lava Ia a o le’i oo i Lona afio mai, o le a tala’i atu le talalelei i le lalolagi uma²⁵ “e toe aumai [Ona] tagata, o e o le aiga o Isaraelu,”²⁶ “ma ona oo mai ai lea o le iuga.”²⁷ Ua faataunuuina le valoaga a Ieremia:

“A e ui i lea, faauta, e oo mai ona po, o loo fetalai mai ai Ieova, e le toe fai ane ai tagata, O loo soifua Ieova, o Le na aveina ae le fanauga a Isaraelu nai le nuu o Aikupito;

“Ae faapea, o loo soifua Ieova, o Le na aveina ae le fanauga a Isaraelu nai le nuu i le itu i matu, ma nuu uma na i ai i latou: aua ou te faafoisia mai i latou i lo latou laueleele, na ou foaiina atu i o latou tamā.”²⁸



Na faamamafa mai pea lava pea e Peresitene Nelson faapea o le “faapotopotoina [o Isaraelu] o le mea aupito sili lea ona taua o loo tupu i le lalolagi i le taimi nei. E leai se isi mea e faatusalia i lona maoae, e leai se isi mea e faatusalia i le taua, e leai se isi mea e faatusalia i le malualii. Ma afai e te filifili ai, . . . e mafai ona avea oe o se vaega tele o lena mea.”²⁹ O le Au Paia o Aso e Gata Ai ua avea pea ma se nuu faafaifeautalai. E faitau afe na tali atu i valaau faamisiona talu mai le amataga o le Toefuataiga; e fia sefulu afe o loo auaina atu i le taimi nei. Ma, e pei ona faatoa uma ona aoao atu e Elder Quentin L. Cook, e mafai ona tatou auai *uma* i ni auala faigofie ma masani ai, i le alofa, valaauliaina o isi e auai ma i tatou i le lotu, asiasi i o tatou aiga, avea ma se vaega o la tatou li’o. O le lolomiina o le Tusi a Mamona o se faailoga lea ua amataina le faapotopotoina.³⁰ O le Tusi a Mamona lava ia o le meafaigaluega o le faapotopotoina ma le liuaina.

E taua foi i le sauniuniga mo le Afio Faalua Mai o le taumafaiga sili lea o le togiolaina o o tatou tuua. Na folafola mai e le Alii e auina mai Elia le perofeta a o le’i oo i le Afio Faalua Mai, “le aso tele ma le matautia o le Ieova,”³¹ e “faaali atu . . . le Perisitua” ma “toto i loto o fanau folafolaga na faia i tamā.”³² Na oo mai Elia e pei ona folafolaina. O le aso 3 o Aperila, 1836, o le nofoaga o le Malumalu o Katelani. I lena

lava nofoaga ma i lena lava taimi, na ia faaee atu ai le perisitua na folafolaina, ki mo le togiolaina o ē ua maliliu ma le faatasia o tane, avā, ma aiga i augatupulaga uma i le olaga nei ma le faavavau atoa.³³ A aunoa ma lena mea, o le a lē faataunuuina le faamoemoega o le foafoaga, ma i lena tulaga, o le a “fetuina” le lalolagi po o le “matuai faatafunaina.”³⁴

I le faigalotu a le autalavou a o lumanai le faapaiaiga o le Malumalu o Roma Italia, na faaali atu ai e le fiaselau o alii ma tamaitai talavou sa auai ia Peresitene Nelson ni kata na latou saunia o i ai igoa o o latou tuua. Na latou sauni e ulu atu i le malumalu e faatino papatisoga sui mo na tuua i le taimi lava na matala ai. O se taimi matuai faamalieloto, ae o se tasi o faataitaiga o taumafaiga faanatinati e faatuina Siona mo augatupulaga na muamua atu.

A o tatou taumafai ina ia filiga i le faatuina o Siona, e aofia ai la tatou vaega i le faapotopotoina o le au filifilia a le Alii ma le togiolaina o ē ua maliliu, e tatau ona tatou taofi ina ia manatua o le galuega lena i le Alii ma o loo Ia faia. O Ia o le Alii o le tovine, ma o i tatou o Ana auaina. Na Ia talosagaina i tatou e galulue i le tovine ma lo tatou malosia i lena “taimi mulimuli” ma e galue o Ia faatasi ma i tatou.³⁵ Atonu o le a sili atu ona sa’o le faapea atu ua Ia faatagaina i tatou e galulue faatasi ma Ia. E pei ona fai mai Paulo, “Na ou totoina, na



faasusuina e Apolo; a e peitai o le Atua ua faatupuina.³⁶ O Iea la o loo faanatinatiina Lana galuega i lona taimi.³⁷ O le faaaogaina o a tatou taumafaiga lē atoatoa—o a tatou “ala faatauva” — e faataunuu ai e le Alii mea tetele.³⁸

O loo fausiaina ma le mausali lenei tisipenisione maoae ma le mulimuli i lona tumutumuga—o le a tuufaatasia le Siona i le lalolagi ma Siona mai lugā i le afio mai ma le mamalu o le Faaola. Ua poloaiina le Ekalesia a Iesu Keriso ia saunia—ma o loo saunia—le lalolagi mo lona aso. Ma, i lenei Eseta, ia tatou faamanatuina moni le Toetu o Iesu Keriso ma mea uma e faatatau i ai: Lona afio mai e nofotupu mo le afe tausaga o le filemu, o se faamasino amiotonu ma le faamasinoga tonu mo tagata uma, o le tino ola pea o i latou uma o e na soifua i luga o lenei lalolagi, ma le folafolaga o le ola e faavavau. O le Toetu o Keriso o le faamautinoaga tupito lea o le a faasa’oina mea uma. Se’i o tatou faatuina Siona ia faanatinati mai ai lona aso. I le suafa o Iesu Keriso, amene. ■

FAAMATALAGA

1. “O Le Keriso Soifua: O Le Molimau a le Au Aposetolo,” *Liahona*, Me 2017, totonu o le faavaa pito i luma.

2. “O Le Keriso Soifua.”
3. 2 Nifae 21:6, 9; tagai foi i le Isaia 11:6, 9.
4. Faaaliga 7:16–17.
5. Mataupu Faavae ma Feagaiga 101:30–31.
6. Mataupu Faavae o le Faatuatua 1:10.
7. N. T. Wright, “Full of the Knowledge of the Lord” (sermon given at matins, Durham, England, Mar. 30, 2016), ntwrightpage.com.
8. Efeso 1:10.
9. Mataupu Faavae ma Feagaiga 65:2, 5.
10. Mataupu Faavae ma Feagaiga 2:2.
11. Mataupu Faavae ma Feagaiga 84:98–100.
12. Na ta’ua ma le faigofie i le mau, “Ma sa oo ina le toe i ai Siona, ona ua aveina ae i luga e le Atua i lona lava loto” (Mose 7:69).
13. Na tautino mai e le Atua: “Ma o le a Ou auina atu i lalo mai le lagi le amiotonu; ma o le a Ou auina atu le upumoni i fafo mai le elele, e molimau atu i la’u Toatasi na Fanaua; lona toetu mai le maliu; ioe, ma le toetutu mai foi o tagata uma; ma o le a Ou faia ia tafi le lalolagi i le amiotonu ma le upumoni e pei o se lolo, e faapotopoto mai i fafo la’u au filifilia mai itu e fa o le lalolagi, i se nofoaga o le a Ou saunia, o se Aai Paia, ina ia mafai e lo’u nuu ona fusua i o latou sulugatiti, ma tulimatai i le taimi o lo’u alu atu; ona o iina o le a i ai lo’u fale fetafai, ma o le a ta’ua ai o Siona, o se Ierusalem Fou. . . . Ma o le a mapu le lalolagi i va o le afe tausaga” (Mose 7:62, 64).
14. Tagai i le Mataupu Faavae ma Feagaiga 97:21; Mose 7:18.
15. *Aoaoga a Peresitene o le Ekalesia: Iosefa Samita* (2007), 186.
16. Tagai i le D. Todd Christofferson, “O Mai i Siona,” *Liahona*, Nov. 2008, 37–40.

17. Mataupu Faavae ma Feagaiga 112:24.
18. Mataupu Faavae ma Feagaiga 115:6.
19. Moronae 6:5–6; tagai foi i le Alema 6:5–6; 4 Nifae 1:12.
20. Russell M. Nelson, “Malelega Amata,” *Liahona*, Nov. 2018, 7.
21. Tagai i le Ieremia 31:34; Ioane 17:3; Mataupu Faavae ma Feagaiga 84:98.
22. E auauai ona faapotopoto mai le au filifilia i siteki o Siona, “o nofoaga ua tofia [a le Atua]” (Mataupu Faavae ma Feagaiga 109:39; tagai foi i le Mataupu Faavae ma Feagaiga 124:36).
23. Mataupu Faavae o le Faatuatua 1:10.
24. Tagai i le 2 Nifae 30:2.
25. Tagai i le Iosefa Samita—Mataio 1:31.
26. Mataupu Faavae ma Feagaiga 39:11.
27. Iosefa Samita—Mataio 1:31.
28. Ieremia 16:14–15; tagai foi i le Ieremia 23:7–8.
29. Russell M. Nelson, “Hope of Israel” (faigalotu a le autalavou i le lalolagi atoa, 3 Iuni, 2018), HopeofIsrael.ChurchofJesusChrist.org; tagai foi ia Russell M. Nelson, “Remnants Gathered, Covenants Fulfilled,” in Paul Y. Hoskisson, ed., *Sperry Symposium Classics: The Old Testament* (2005), 1–17.
30. Tagai i le 3 Nifae 21:1–7.
31. Malaki 4:5.
32. Mataupu Faavae ma Feagaiga 2:1–2.
33. Tagai i le Mataupu Faavae ma Feagaiga 110.
34. Mataupu Faavae ma Feagaiga 2:3; tagai foi i le Malaki 4:6.
35. Tagai i le Iakopo 5:71–72.
36. 1 Korinito 3:6.
37. Tagai i le Mataupu Faavae ma Feagaiga 88:73.
38. Tagai i le 1 Nifae 16:29.



SAUNIA E TAD R. CALLISTER
Peresitene Aoa o le Aoga Sa na Faamalolo Talu ai Nei

O Le Togiola a Iesu Keriso

O le Togiola a le Faaola e le gata e lē mafuatia i lona gafatia ae e faatatau foi i tagata taitoatasi.

I lenei vaitau o le tausaga, ua tatou olioli faapitoa ma manatunatu i le Togiola a le Faaola. O le mea moni o le aoaoga faavae sili lenei ona paia, faalatele mafaufau, ma aumaia lagona mamana ua iloa e lenei lalolagi po o le atulaulau. O le mea lea ua ia aumaia le faamoemoe ma le faamoemoega i o tatou olaga.

O le a la le Togiola a Iesu Keriso? I se lagona se tasi, o se faasologa o mea paia na tutupu lea na amata mai le Faatoaga o Ketese mane, faaauau atu i le satauro, ma faaiu i le Toetu o le Faaola mai le tuugamau. Sa uunaia e se alofa le mafaamatalaina mo i tatou taitoatasi. Sa manaomia ai se tagata na leai ma se agasala; o lē sa i ai le mana lē mafuatia i luga o elemene—e oo i le oti; o lē sa umia se gafatia lē faatuā’oia e puapugatia ai i taunuuga o a tatou agasala uma ma vaivaiga; ma o lē, na afio moni i lalo ifo o ia mea uma.¹ O le misiona lenei a Iesu Keriso—o Lana Togiola lenei.

O le a la lona faamoemoega? O le faia lea ia mafai e i tatou ona toefoi atu i le afio’aga o le Atua, ia avea atili e faapei o Ia, ma maua se atoaga o le olioli. Na faia lenei mea e ala i le faatoilaloina o faafitauli e fa:

1. Oti faaletino
2. Oti faaleagaga ona o Atamu ma a tatou agasala
3. O o tatou mafatiaga ma faaletonu
4. O o tatou vaivaiga ma lē atoatoa

Ae e mafai faapefea ona faataunuu e le Faaola lenei mea e aunoa ma le solia o tulafono o le faamasinotonu?

Manatu mo sina taimi i se tagata ua mafaufau e puna mai se vaalele ma le fiasia ma faia se faaiuga lē atamai ma puna ese ai mai se tamai vaalele. Ina ua puna, sa vave ona ia iloaia le faavalevalea o lana mea ua fai. Ua ia manao e tulaueleele ma le saogalemu, ae o loo i ai se faafitauli—o le tulafono o le kalave. Sa tapili ona lima ma le



Afai tatou te agasala, ua saunia e le Faaola mo i tatou se parasuti faaleagaga e ala i Lana Togiola.

saoasaoa tele, ma le faamoemoe ia lele, ae sa le aoga. Sa ia faatulaga lona tino ina ia faaopeopea pe faatifa i se pa’u lemu, ae o le tulafono o le kalave e le mataofiofia ma lē alofa mutimutivale. Na ia taumafai e faatauana lenei tulafono atu o le natura: “O se mea sese. Ou te le toe faia lava.” Ae o lana aioiga sa pa’u i taliga tutuli. E le iloa e le tulafono o le kalave se agaaloa; na te lē faia foi se tuusaunoaga. O le mea e laki ai, sa faafuasei ona lagona e le alii lea se mea i lona papatua. I le lagonaina ai o se taimi o le faavalevalea, na tuu ai e lana uo i totonu o le vaalele se parasuti [i lona tua] a o le’i puna ese. Na ia maua le uaea ma toso loa. Ma le to’amalie, na ia faaopeopea ai ma le saogalemu agai i le elele. Atonu tatou te fesili, “Pe sa solia le tulafono o le kalave, pe na galue le parasuti i totonu o lona tulafono e saunia ia tulaueleele ma le saogalemu?”

A tatou agasala, e pei lava i tatou o le alii faavalevalea lea na puna ese mai le vaalele. Po o a lava a tatou mea e fai na o i tatou, ua na o faalavelave lava o loo faatali mai i le taimi tatou te tulaueleele ai. E tatou ona tatou usitai i le tulafono o le faamasinotonu, lea e pei foi o le tulafono o le kalave, e sa’olele ma e lotofaamagalo. E na o le pau le mea e mafai ona faaolaina ai i tatou ona ua saunia ma le alofa mutimutivale e le Faaola mo i tatou, e ala i Lana Togiola se parasuti faaleagaga. Afai tatou te faatuatua ia Iesu Keriso ma salamo (o lona uiga tatou te faia la tatou vaega ma toso mai le uaea), ona tatala mai lea o mana o le puipuga a le Faaola mo tatou, ma mafai ai ona tatou tulaueleele e aunoa ma le faamanualiaina faaleagaga.

Peitai, e na o le pau le mea e mafai ai, ona sa faatoilalo e le Faaola faafitauli e faia e mafai ona taofia lo tatou alualu i luma faaleagaga.

1. Oti. Sa Ia faatoilalo le oti e ala i Lona Toetu mamalu. Sa aoa mai le Aposetolo o Paulo, “Aua faapei ona oti uma ia Atamu, e faapea foi ona faaolaina uma ia Keriso.”²

2. Agasala. Na faatoilalo e le Faaola le agasala ma le ta’usalaina mo i latou uma o ē salamo. E matua loloto ma mae’ae’a Lona mana faamama lea sa

folafola mai e Isaia, “E ui lava ina pei o ofu mumu a outou agasala, e sisina ia e pei o le kiona.”³

E i ai nisi taimi sa ou feiloai ai i nisi o le Au Paia lelei o loo i ai ni faafitauli i le faamagaloina o i latou lava ia, o ē sa aunoa ma le iloa na latou tuuina ma le le sa’o ni tapulaa i mana togiola o le Faaola. E aunoa ma le iloa, ua latou liuaina se Togiola le i’u i se togiola e gata lea e le taulimaina ai a latou agasala po o vaivaiga patino. Ae o se Togiola le i’u, ona na te faaofiaina ma totogia agasala uma ma vaivaiga, faapea ai foi ma sauaga uma po o tiga e mafua ona o isi.

Na faia e Truman G. Madsen leneci matauga toafimalie:

“Afai e i ai nisi o outou ua faaseseina i talitonuga e faapea ua mamao tele le tou o . . . ua ia te outou le āu oona o le agasala lea ua faigata ai ona toe avea oe ma tagata semanu na tataua ona avea ai oe—ona e faafofoga mai lea ia te a’u.

“Ou te molimau atu e le mafai ona e goto ifo i le loloto tele nai lo le mea e mafai ona oo i ai le malamalama ma le atamai ofoofogia o Iesu Keriso. Ou te molimau atu a i ai lava se aloiafi se tasi o le loto e salamo ma taumafai, *e i ai o Ia iina*. Sa le’i na ona afio ifo o Ia i ou tulaga; na afio ifo o Ia i *lalo* o mea uma, ‘ina ia mafai ona i ai o ia, o le malamalama o le upumoni, i mea uma ma ala atu i mea uma.’ [Mataupu Faavae ma Feagaiga 88:6.]”⁴

O le tasi mafuaaga e matua taua e malamalama ai i le Togiola a le Faaola ma ona faatatauga le mafuatia e faapea, faatasi ai ma le malamalamaaga faateleina e oo mai ai se manao faateleina e faamagalo i tatou lava ma isi.

E ui atonu tatou te talitonu i mana faamama o Keriso, ae o le fesili e tele ina tulai mai: “E faapefea ona ou iloa pe ua faamagaloina a’u i a’u agasala?” Afai tatou te lagonaina le Agaga, o lona uiga o le tatou molimau lena ua faamagaloina i tatou, pe o loo tupu le faagasologa o le faamamaina. Sa aoao mai Peresitene Henry B. Eyring, “Afai ua e lagonaina le aafiaga a le Agaga Paia . . . , atonu e te avea lena mea o se faamaoniga faapea o loo aoga le Togiola i lou olaga.”⁵

Ua fesili nisi, “Ae afai ua faamagaloina a’u, aisea ou te lagonaina ai pea le ta’usalaina?” Masalo i le alofa mutimutivale o le Atua o le manatuaga o lena ta’usalaga o se lapataiga, o se ituaiga o “faailo taofi” faaleagaga lea, masalo mo se taimi, e alaga mai pe a tatou fetaia’i ma nisi faaososoga: “Aua ne’i alu i lalo i lena auala. Ua e iloa le tiga na te aumaia.” I leneci lagona, e fai ma puipuiga, ae le o se faasalaga.

Pe mafai pea la, ona manatuaina a tatou agasala ae saoloto pea mai le ta’usalaga?

Sa manatua e Alema ana agasala, e oo lava i tausaga talu ona mavae lona salamo. Ae ina ua ia tagi atu ia Iesu mo le alofa mutimutivale, sa ia faapea atu, “Sa ou le toe manatuaina o’u tiga; ioe, sa ou le toe lagā atuatuvaletina au i le manatuaina o au agasala.”⁶

Na mafai faapefea ona ia manatuaina ana agasala ae leai se tiga po o le ta’usalaga? Ona afai tatou te salamo, e “fanauina [i tatou] i la le Atua.”⁷ E avea i tatou, e pei ona fai mai ai tusitusiga paia, o “tagata fou”⁸ ia Keriso. Faatasi ai ma le faamaoni atoatoa ua mafai nei

ona tatou faapea, “E le o a’u o le alii po o le tamaitai lea sa solia na agasala i le tuanai. O a’u o se tagata fou ma liuaina.”

3. O Mafatiaga ma Faaletonu. Na valoia e Alema e faapea o Keriso “o le a afio atu o ia, ma mafatia i tiga ma puapuga ma faaososoga o ituaiga eseese uma.” Aisea? “Ina ia mafai ona faatu-muina ona loto i le alofa mutimutivale, . . . ina ia mafai ona ia silafia e tusa ai ma la le tino, le ala e fesoasoani ai i ona tagata, e tusa ma o latou vaivaiga.”⁹

E faapefea ona Ia faataunuunuina leneci mea? O nisi taimi Na te aveesea le mafatiaga, o nisi taimi Na te faamalosia i tatou ia onosai, ma o nisi taimi Na te tuu maia ia i tatou se vaaiga e faavavau e malamalama atili ai i lo latou natura le tumau. I le mavae ai ona taofia o Iosefa Samita i le Falepuipui i Liperate pe tusa ma le lua masina, sa i’u na ia alaga atu, “Le Atua e, o fea o i ai oe?”¹⁰ Nai lo le tuuina mai o se toomaga vave, sa tali mai le Atua, “Lo’u atalii e, ia filemu lou agaga; o lou tiga ma ou puapuga o le a nao sina minute laitiiti; ma ona oo lea, a fai



e te talitalia lelei, o le a faacaina oe e le Atua i luga.”¹¹

Ua malamalama nei Iosefa o ona aafiaga oona sa na o sina taimi itiiti pe a faatusatusa i le faavavau. I lenei malamalamaaga sili atu, sa ia tusi atu ai i le Au Paia mai lea lava sela e tasi i le falepuipui, “Ia tatou faia ma le fiafia mea uma ua i ai i lo tatou mana; ona mafai lea ona tatou tutu, ma le mautinoa atoatoa, e vaai i le faaolataga a le Atua.”¹² Ona o le Togiola a le Faaola, ua mafai ai ona tatou maua se vaaiga e faavavau lea e maua ai le uiga i o tatou tofotofoga ma le faamoemoe mo lo tatou toomaga.

4. O Vaivaiga ma Lē Atoatoa. Ona o Lana Togiola, ua i ai i le Faaola mana gafatia, o nisi taimi tatou te faasino i ai o le alofa tunoa,¹³ lea e mafai ona fesoasoani ia i tatou e faatoilaloina o tatou vaivaiga ma lē atoatoa ma o lea e fesoasoani ai ia i tatou i la tatou malaga ia avea atili e faapei o Ia.

Sa aoao mai Moronae: “Ioe, o mai ia Keriso, ma faaatoatoaina ia te ia, . . . ma o lona alofa tunoa e mafai ai ona outou atoatoa ia Keriso.”¹⁴ E foliga mai pe a ma le lua metotia po o ni auala tatou te faaoga ai na mana gafatia ia e mafai ona faaleleia—e faaatoatoa ai—i tatou.

Muamua, o sauniga faaola. Ua ta’u mai e tusitusiga paia, “O ona sauniga, ua faaalua ai le mana o le faale-atua.”¹⁵ O nisi taimi, atonu tatou te mafau fau i sauniga o se lisi o mea e fai—ua tatau ai mo le faaeaga; ae o le mea moni o sauniga taitasi e matala ai se mana faaleatua lea e fesoasoani ia i tatou ia avea atili e faapei o Keriso. Mo se faataitaiga:

- Pe a papatisoina i tatou ma maua le meaalofo o le Agaga Paia, e faamamaina i tatou—o lea e paia atili ai e faapei o le Atua.
- Ma le isi, e ala i le Agaga Paia, e mafai ona faamalalamaina o tatou mafau fau ma faamalulūina o tatou loto ina ia mafai ai ona tatou mafau fau ma lagona atili e pei o Ia.
- Ma pe a faamauina i tatou o ni ta’itoalua, tatou te mauaina le āiā i “nofoalii, malo, itumalo, ma mana”¹⁶ o ni meaalofo mai le Atua.



O se auala lona lua mo nei mana gafatia o meaalofo ia a le Agaga. Ona o le Togiola a Keriso, ua tatou agavaa ai e mauaina le meaalofo o le Agaga Paia ma ana meaalofo faaleagaga e o mai faatasi ai. O nei meaalofo o ni uiga paia o le faaleatua o le mea lea, o taimi taitasi tatou te maua ai se meaalofo a le Agaga, e avea atili i tatou e pei o le Atua. E le masalomia o le mafuaaga lena e fautuaina ai lava i tatou e tusitusiga paia i le tele o taimi e saili i nei meaalofo.¹⁷

Sa aoao mai Peresitene George Q. Cannon: “E leai se tasi e tatau ona faapea mai, ‘Oi, e le mafai ona ou tuua lenei mea; o lo’u a natura lea.’ E le ta’uamiotonuina ai o ia, ona o le mafuaaga ua folafola mai e le Atua e . . . tuuina mai meaalofo o le a aveesea ai [o tatou vaivaiga]. . . . Afai e i ai se tasi o i tatou e lē atoatoa, o lo tatou tiute le tatalo mo le meaalofo lea o le a faia i tatou ia atoatoa ai.”¹⁸

I se aotelega, ua tatou maua mai le Togiola a le Faaola le ola mo le oti, “le matagofie e sui ai le lefulefu,”¹⁹ le faamalologa mo tiga, ma le atoatoa mo le vaivaiga. O le vaifofo lea a le lagi i faafitauli ma tauviga o lenei lalolagi.

I le vaiaso faaiu o le Faaola i la le tino nei, sa Ia fetalai ai, “E maua foi outou e le puapuaga i le lalolagi: a ia outou lototetele; ua ou manumalo i le lalolagi.”²⁰ Ona sa faatinoina e le Faaola Lana Togiola, e leai la se malosiaga i fafo atu po o se mea e tupu po o se tagata—leai se agasala po o se oti po o

se tete’aga—e mafai ona taofia i tatou mai le mauaina o le faaeaga, pe afai lena tatou te tausia poloaiga a le Atua. Faatasi ma lena iloa, e mafai ona tatou fetaomi atu i luma ma le fiafia ma le mautinoa tonu o loo faatasi le Atua ma i tatou i lenei sailiga faalelagi.

Ou te molimau atu o le Togiola a le Faaola e le gata e lē mafuatia i lona gafatia, ae e faataui i tagata taitoatasi—lea e le gata na te toefaafoi atu i tatou i le afioaga o le Atua, ae tatou te mafai ai foi ona avea atili e pei o Ia—le sini silisili o le Togiola a Keriso. Ou te tuuina atu ai la’u molimau mautinoa ma le agaga faafetai i lena tulaga i le suafa o Iesu Keriso, amene. ■

FAAMATALAGA

1. Tagai i le Mataupu Faavae ma Feagaiga 88:6.
2. 1 Korinito 15:20–22.
3. Isaia 1:18.
4. Truman G. Madsen, *Christ and the Inner Life* (1978), 14.
5. Henry B. Eyring, “Gifts of the Spirit for Hard Times,” *Ensign*, June 2007, 23.
6. Alema 36:19; tagai foi i le Alema 36:20–21.
7. Alema 36:23; tagai foi i le Alema 36:24–26.
8. Mosaea 27:26.
9. Alema 7:11–12.
10. Mataupu Faavae ma Feagaiga 121:1.
11. Mataupu Faavae ma Feagaiga 121:7–8.
12. Mataupu Faavae ma Feagaiga 123:17.
13. Tagai i le Bible Dictionary, “Grace”; tagai foi i le Taiala i Tusitusiga Paia, “Alofa tunoa,” scriptures.ChurchofJesusChrist.org.
14. Moronae 10:32.
15. Mataupu Faavae ma Feagaiga 84:20.
16. Mataupu Faavae ma Feagaiga 132:19.
17. Tagai i le 1 Korinito 12:31; Moronae 10:30; Mataupu Faavae ma Feagaiga 46:8.
18. George Q. Cannon, “Saili Atu i Meaalofo Faaleagaga,” *Liahona*, Ape. 2016, 80.
19. Isaia 61:3.
20. Ioane 16:33.



SAUNIA E PERESITENE RUSSELL M. NELSON

“Sau, Mulimuli Mai ia te A’u”

Ua valaaulia i tatou e Iesu Keriso ia ui i le ala o feagaiga e toefoi atu ai i le aiga i o tatou Matua Faalelagi ma faatasi ai ma i latou tatou te alolofa i ai.

O’u uso e ma tuafafine pele, ua ma fiafia lava ma lo’u toalua o Wendy e faatasi ma outou i lenei taeao o le Sapatu. E tele mea ua tutupu talu mai le tatou konafesi aoao talu ai. Ua faapaiaina malumalu fou i Concepción, Chile; Barranquilla, Kolomupia; ma Roma, Italia. Ua tatou lagonaina se liligi faa’ua mai o le Agaga i nei mea paia na tutupu.

Ou te faamalo atu i le toatele o tamaitai (ma alii) ua faitauina talu ai nei le Tusi a Mamona ma maua ai le olioli ma oa natia. Ua musuia lava a’u i lipoti e uiga i vavega ua mauaina.


Ou te maofa i alii talavou ta’i 11-tausaga-le-matutua o ē, ua avea nei ma tiakono, ua tufa atu ma le agavaa le faamanatuga i Aso Sa taitasi. Ua latou ō atu i le malumalu faatasi ma tamaitai talavou ta’i 11-tausaga-le-matutua, o ē ua aoao ma auauna atu nei ma le nautaitai o ni Ofagāpi. O loo tala’i atu e alii talavou ma tamaitai talavou uma ia upumoni o le talalelei ma le manino ma le talitonuga maumaututu.

Ou te olioli i fanauti ma le autalavou o loo fesoasoani e aoao atu le

talalelei i totonu o o latou aiga a o latou galulue faatasi ai ma o latou matua e mulimuli i le mataupu aoao ina e faatotonugalemu-i-le-aiga, ma lagolagoina-e-le-Ekalesia.

Na matou mauaina lenei ata o Blake e fa-tausaga-le-matua, o lē, i le taeapo lava o se Aso Toonai na ia toso maia se tusi Lotu ma alaga, “Ua manaomia ona ou fafaga lo’u agaga!”

Blake, ua faagaetia lava matou ia te oe ma isi o loo filifili e fafaga o latou agaga e ala i le taumamafa i upumoni o le talalelei toefuataina a Iesu Keriso.



O Blake e fa-tausaga, o lē na manaomia ona “fafaga lo’u agaga.”

Ma ua matou fiafia i le iloaina e toatele o loo mauaina le mana o le Atua i o latou olaga a o latou tapuai ma auauna atu i le malumalu.

E pei ona silafia e le toatele o outou, sa oo lo matou aiga i se tete’aga faa-momoiloto i le tolu masina talu ai ina ua tuua e lo ma afafine o Wendy lenei olaga faaletino. I aso faaii o lana tau-iviga ma le kanesa, sa faamanuiaina ai a’u i le avanoa na faia ai le ma talanoaga faamavae o se tamā-ma-se-afafine.

Sa ou uuina lona lima ma ta’u atu ia te ia le tele o lo’u alofa ia te ia ma lo’u lotofaafetai i le avea ai o a’u ma ona tamā. Sa ou fai i ai: “Sa e faaipoipo i le malumalu ma faamamaluina ma le faamaoni au feagaiga. Sa oulua talisa-paiaina ma lau tane ni fanau se toafitu i le lua aiga ma tasi a’e i latou ia avea ma ni soo tuuto o Iesu Keriso, ni tagata totoa o le Ekalesia, ma ni tagatanuu faisaofaga. Ma ua latou filifilia ni taitoalua e i ai na lava uiga auau mama e tasi. Ua matua mitamita tele lou tamā ia te oe. Ua e aumaia ia te a’u se olioli tele!”

Sa ia tali lemu mai, “Faafetai, Tamā.”

O se taimi faamomoiloto ma loimata maligi mo i ma’ua. I lona olaga 67-tausaga, na ma galulue faatasi ai, pepese faatasi, ma sa tele ina faasee faatasi i le aisa. Ae i lona afiafi, sa ma talanoa i mea sa sili atu ona taua, e pei o feagaiga, sauniga, ususitai, faatuatua, aiga, faamaoni a’ia’i [i le va ma le toalua], alofa, ma le ola e faavavau.

Ua ma misia tele le ma afafine. Peitai, ona o le talalelei toefuataina a Iesu Keriso, matou te lē popole ai ia te ia. A faaauau pea ona matou faamamalu i a matou feagaiga ma le Atua, matou te ola ma tulimatai atu e toefaatasi ma ia. O le taimi nei, o loo matou auauna i le Alii iinei ae o loo ia auauna ia te Ia iina—i le parataiso.¹

O le mea moni, sa ma asiasi atu ma lo’u toalua i Parataiso i le amataga o lenei tausaga—O Parataiso, Kalefonia. E pei ona tupu ai, sa faatulagaina ai le matou asiasiga iina e itiiti ifo ma le 40 itula talu ona malaga ese atu lo ma afafine mai lenei lalolagi. O ma’ua, faatasi ma Elder Kevin W. Pearson ma lona faletua, o June, sa faamalolosia e le Au Paia o le Siteki o Chico Kalefonia.



Sa matou iloina lo latou faatuatua tele, o ā latou auunaga, atoa ai ma vavega na tutupu e oo lava i le taimi na maumauina ai a latou mea ma lotonutimomoia mai le afi sili ona faataumaoui i le talafaasolopito o Kalefonia.

A o i ai iina, sa umi se taimi o matou talanoa ma se alii leoleo talavou, o Ioane, o se tasi o le toatele o uluai tagata totoa na tali atu. Sa ia faamatalaina le mafiafia o le pogisa na oo ifo i luga o Parataiso i le aso 8 o Novema, 2018, a o sosolo saosasaoa atu le afi ma susunuina le aai, ma faatafunaina fale ma fanua ma meatotino e pei o se mala ma leai ma se mea na tuua ae na o faaputugā efuefu ma alaāsu piliki.

Mo le 15 itula, sa fealuai ai Ioane [i le taavale] i se pogisa mafiafia sa faatumulia i mea sa saosasaoa le susunuina ma le taufaamataua a o ia fesoasoani i lea tagata ma lea tagata, lea aiga ma lea aiga ia sosola ese atu i le

saogalemu—ma faia na mea uma i le lamatia ai o lona lava ola. Ae i le taimi o lena luitau malosī, o le mea sa matua popole ai Ioane o lana fesili sili ona taua: “*O fea e lo’u aiga?*” I le tele o itula uumi taufaamataua o lea tiga, sa mulimuli ane ia iloa sa aveese atu i latou i le saogalemu.

O le tala i le popolega o Ioane mo lona aiga ua uunaia ai a’u e talanoa atu i le asō ia te outou atonu o loo fesili pe a latalata atu i le faaiuga o lou olaga faaletino, “*O fea e lo’u aiga?*” I lena aso o le a oo mai pe a e faamaeaina lou vaavaaiga faaletino ma ulufale atu i le lalolagi o agaga, o le a e faafesagai ma lena fesili faigata matuitui: “*O fea o i ai lo’u aiga?*”

Ua aoao mai e Iesu Keriso le ala e toefoi atu ai i lo tatou aiga e faavavau. E sili atu le malamalama o Ia i le fuafuaga a lo tatou Tama Faalelagi o le alualu i luma e faavavau nai lo se isi lava o i tatou. E sili i lo mea uma, o Ia o le maa ‘au’au o le fuafuaga atoa. O Ia o lo tatou Togiola, lo tatou Faamalologa, ma lo tatou Faaola.”

Talu mai le taimi ne tutuliese ai Atamu ma Eva mai le Faatoaga o Etena, ua ofo mai ai lava e Iesu Keriso Lona aao malosī e fesoasoani ia i latou uma o ē filifili e mulimuli ia te Ia. Ua tusia faatele i tusitusiga paia e faapea, e ui i ituaiga uma o agasala mai ituaiga uma o tagata, ae o loo faaloaloa mai pea Ona aao.²

O loo faananau fua mai le agaga i totonu o i tatou taitoatasi mo le alofa faaleaiga ia tumau e faavavau. O loo i ai pea i pese alofa faamama’i se manatu sese e faapea, o le alofa na o le pau lea o le mea e te manaomia pe afai e te manao ia faatasia e faavavau. Ma e talitonu sese nisi o le Toetu o Iesu Keriso ua maua ai se folafolaga o le a toe faatasi tagata uma ma ē pele ia i latou pe a mavae le oti.

O le mea moni, sa matua faamanino mai e le Faaola lava Ia e ui ua faamautinoa mai e Lona Toetu o le a toetutu moni tagata uma o ē soifua mai ma ola e faavavau,³ ae e tele atu isi mea e manaomia pe afai tatou te mananao ia maua le faamanuiaga maua luga o le faaeaga. O le faaolataga o se mataupu e patino i le tagata, ae o le faaeaga o se mataupu faaleaiga.

Faafofoga i upu nei na fetalai i ai le Alii o Iesu Keriso i Lana perofeta: “O feagaiga konekarate, ioega, tautinoga, tautoga, folafolaga, tu, sootaga, mafutaga, po o faamoemoega uma, e lē faia ma osia ma faamauina i le Agaga Paia o le folafolaga, . . . e leai se aoga, ‘auga, po o le malosī i le toetutu mai ma pe a mavae le toetutu mai le oti; ona o konekarate uma e le faia mo leni faamoe-moe e i ai se iuga pe a oti tagata.”⁴

O lea la, o le a le mea e manaomia mo se aiga ina ia faaeaina ai e faavavau? Tatou te agavaa mo lena faamanuiaga e ala i le osia o feagaiga ma le Atua,



I le taimi o se asiasiga i Parataiso, Kalefonia, na iloa ai e Peresitene Nelson le tele o le faatuatua, auunaga, ma vavega.



tausia o na feagaiga, ma le mauaina o sauniga taua.

E moni lenei mea talu mai le amata o taimi. O Atamu ma Eva, Noa ma lana avā, Aperaamo ma Sarai, Lia ma Sarai, ma isi uma soo tuuto o Iesu Keriso—talu mai le foafoaga o le lalolagi—na osia ia lava feagaiga e tasi ma le Atua. Ua latou mauaina ia sauniga lava e tasi ia na tatou faia o ni tagata o le Ekalesia toefuataiina a le Alii i aso nei, o na sauniga ua tatou mauaina i le papatisoga ma i totonu o le malumalu.

Ua valaaulia e le Faaola tagata uma ia mulimuli atu ia te Ia i vai o le papatisoga ma, i le taimi e tatau ai, ia osia ni feagaiga faaopoopo ma le Atua i totonu o le malumalu ma maua ma faamaoni i na sauniga taua faaopoopo. E manaomia nei mea uma pe afai tatou te mananao ina ia faaecaina faatasi ma o tatou aiga ma le Atua e faavavau.

E tiga matuitui lo’u loto ona o le toatele o tagata o e ou te alofa i ai, o e ou te faamemelo i ai, ma o e ou te faaloalo i ai e teenaina Lana valaaulia. Latou te le ano i aioiga a Iesu Keriso ina ua Ia augani mai, “Sau, mulimuli mai ia te au.”⁵

Ou te malamalama i le mafuaaga e tutulu ai le Atua.⁶ Ou te tagi foi mo ia uo ma tagata o aiga. O i latou o ni alii ma ni tamaitai lelei, e tuuto atu i o latou

tiutetauave faaleaiga ma faalemalo. Latou te foai atu ma le agalelei o latou taimi, malosi, ma punaoa. Ma e lelei atu le lalolagi ona o a latou taumafaiga. Ae ua latou filifili e lē osia ni feagaiga ma le Atua. Latou te le’i mauaina sauniga ia o le a faaecaina ai i latou faatasi ma o latou aiga ma fusia faatasi ai i latou e faavavau.⁷

E maeu lo’u moomoo ia mafai ona ou asiasi ia i latou ma valaaulia i latou ia mafaufau mamafa i tulafono a le Alii e faatatau i le agavaa. Ou te mafaufau lava po o le a sa’u tala e mafai ona fai atu ina ia mafai ai ona latou lagonaina le tele o le alofa o le Faaola ia i latou ma oo ina iloa le tele o lo’u alofa ia i latou, ma ia iloa le auala e mafai ona maua ai e tamaitai ma alii tausi-feagaiga se “atoatoaga o le olioli”⁸

E manaomia ona latou malamalama e ui o loo i ai se nofoaga mo i latou pe a mavae lenei olaga—faatasi ma alii ma tamaitai lelei o ē na filifili foi e lē osia ni feagaiga ma le Atua—ae e lē o le nofoaga lena o le a toe faatasia ai aiga ma tuu atu i ai le avanoa e ola ma alualu ai i luma e faavavau. E lē o le malo lena o le a latou lagonaina ai le atoatoaga o le olioli—o le alualu i luma ma le fiafia e le gata.⁹ E na o le pau le auala e oo mai ai na faamanuiaga silisili o faamanuiaga uma e ala lea i le ola ai i se malo

selesitila faaecaina faatasi ma le Atua, lo tatou Tama Faavavau; o Lona Alo, o Iesu Keriso; ma tagata o o tatou aiga lelei, ta’uaogaina ma agavaa.

Ua musuia a’u e fai atu i a’u uo ia e mumusu:

“I lenei olaga, e le faamalieina oe i se tulaga lua i soo se mea. Ae, a e teenaina atoa le taliaina o le talalelei toefuataiina a Iesu Keriso, o loo e filifili e faamalieina oe mo le tulaga lua.

“Sa fetalai le Faaola, ‘E tele mea e nonofo ai i le maota o lo’u Tama.’¹⁰ Peitai, afai e te lē filifili e osia ni feagaiga ma le Atua, o loo faamalieina la oe mo se tau i sili ona lē lava mo le faavavau atoa.”

Ou te toe faatauana atu i a’u uo ia e mumusu i le faapea atu:

“Sasaa atu lou loto i le Atua. Òle atu ia te Ia pe le moni nei mea. Fai se taimi e suesue ai Ana afioga. Ia suesue moni lava! Afai e te alofa moni i lou aiga ma afai e te manao ina ia faaecaina faatasi ma i latou i le faavavau atoa, totogi le tau i le taimi nei—e ala i suesuega moni ma tatalo faatauana—ia iloa nei upumoni e faavavau ona tausisi lea i ai.

“Afai e te le o mautinoa pe e te talitonu moni i le Atua, amata la iina. Ia malamalama o le leai o ni aafiaga ma le Atua, e mafai ai e se tasi ona masalosalo i le i ai moni o le Atua. O lea la, tuu oe lava ia i se tulaga e amata ai ona maua aafiaga faatasi ma Ia. Faalotomaulalo oe lava ia. Tatalo ia i ai mata e vaaia ai le aao o le Atua i lou olaga ma i le lalolagi o siomia oe. Òle atu ia te Ia e ta’u atu ia te oe o loo i ai moni lava o Ia iina—pe afai Na te silafia oe. Òle atu ia te Ia po o a ni Ona lagona e uiga ia te oe. Ona e faalogo lea.”

E i ai sa’u uo pele faapena e tapula ona aafiaga ma le Atua. Ae sa ia faananau ina ia faatasi ma lana avā ua maliu. O lea sa ia fesili mai ai ia te a’u e fesoasoani atu ia te ia. Sa ou uunaia o ia ia feiloai ma a tatou faifeautalai ina ia malamalama ai i le mataupu faavae a Keriso ma aoao i feagaiga o le talalelei, o sauniga, ma faamanuiaga.

Lea sa ia faia. Ae sa ia lagonaina o le auala sa la’ua fautua atu o le a ia manaomia ai ona faia le tele na’ua o

suiga i lona olaga. Fai mai o ia, “O na poloaiga ma feagaiga ua faigata tele mo a’u. Ma le isi, e lē mafai ona ou totogia le sefuluai, ma e leai so’u taimi e auaina atu ai i le Ekalesia.” Ona ia fesili mai lea ia te a’u, “O le taimi lava ou te oti ai, faamolemole ia faia galuega talafeagai o le malumalu mo lo’u toalua ma a’u ina ia mafai ai ona toe faatasia i ma’ua.”

O le mea e faafetai ai, e le o a’u o le faamasino o lenei tagata. Ae ou te fesiligia le aoga o galuega sui o le malumalu mo se tagata sa maua le avanoa ina ia papatiso ai i lenei olaga—ina ia faauuina i le perisitua ma maua faamanuiaga o le malumalu a o i ai iinei i le olaga faaletino—ae na faia le faaiuga ma le iloa e teena lena auala.

O’u uso e ma tuafafine pele, ua valaaulia i tatou e Iesu Keriso ia ui i le ala o feagaiga e tofoi atu ai i le aiga i o tatou Matua Faalelagi ma faatasi ai ma i latou tatou te alolofa i ai. Ua Ia valaaulia i tatou ia, “Sau, mulimuli mai ia te au.”

O lenei, i le aveai ai ma Peresitene o Lana Ekalesia, ou te augani atu ia te outou ua faataumamau outou lava mai le Ekalesia ma outou tou te le’i saili moni lava ia iloa o le Ekalesia a le Faaola ua toefuataiina mai. Ia fai le galuega faaleagaga ia iloa ai mo outou lava, ma faamolemoe ia fai nei loa. O le a uma le taimi.

Ou te molimau atu o loo soifua le Atua. O Iesu o le Keriso. Ua toefuatai mai Lana Ekalesia ma le atoaga o Lana talalelei e faamanuia ai o tatou olaga i le olioli, iinei ma le olaga a sau. Ou te molimau atu ai i le suafa o Iesu Keriso, amene. ■

FAAMATALAGA

1. Tagai i le Alema 40:12–14.
2. Tagai i le Ieremia 27:5; Mataio 23:37; Luka 13:34; Alema 5:33; 3 Nofae 9:14.
3. O le a oo mai le Toetutu i tagata uma ona o le manumalo o Keriso i le oti (tagai i le Alema 11:41–45; 40; Mataupu Faavae ma Feagaiga 76; Mose 7:62).
4. Mataupu Faavae ma Feagaiga 132:7.
5. Luka 18:22.
6. Tagai i le Ioane 11:35; Mose 7:28–29.
7. Tagai i le Mataupu Faavae ma Feagaiga 76:50–70.
8. Mataupu Faavae ma Feagaiga 138:17.
9. Tagai i le Mosaea 2:41; Alema 28:12.
10. Ioane 14:2.



Saunia o le Afiafi o le Aso Sa

SAUNIA E PERESITENE DALLIN H. OAKS
Fesoasoani Muamua i le Au Peresitene Sili

Faamamāina e le Salamo

Ona o le fuafuaga a le Atua ma le Togiola a Iesu Keriso, e mafai ona faamamāina i tatou e ala i le faagasologa o le salamo.

I le olaga faaletino ua noatia ai i tatou i tulafono a tagata ma tulafono a le Atua. Sa ou maua lea aafiaga e lē masani ai o le faamasinoina o amioga matuiā i lalo uma o nei tulafono e lua—i le amataga a o aveai ma se faamasino o le Faamasinoga Maua luga i Iuta ma i le taimi nei o se uso o le Au Peresitene Sili. O le eseesega na ou lagonaina i le va o tulafono a tagata ma tulafono a le Atua ua faalateleina ai lo’u talisapaia o le moni ma le mana o le Togiola a Iesu Keriso. I lalo o tulafono a tagata, o se tagata ua ta’usalaina i solitulafono sili ona matuiā e mafai ona falepuipui i le olaga atoa e aunoa ma se avanoa e palola ai. Ae e ese i lalo

o le fuafuaga o le alofa mutimutivale a se Tama Faalelagi alofa. Ou te molimau atu o nei agasala lava e tasi e mafai ona faamagaloina i le olaga nei ona o le taulaga togiola a lo tatou Faaola mo agasala a “i latou uma o e ua i ai le loto momomo ma le agaga salamo” (2 Nifae 2:7). E togiolaina e Keriso ma e moni Lana Togiola.

O le agalelei ma le alofa o lo tatou Faaola ua faailoaina i le viiga lea faato’a uma ona lagiina e le aufaipese.

*O mai ia Iesu; Ua alofa,
Ma lavea’i outou ua se.
E taitai e lona alofa
Outou mai le pogisa.¹*





O le taulaga togiola a Iesu Keriso ua matala ai le faitotoa mo “[tagata uma ia] salamo . . . ma o mai ia te ia” (Mataupu Faavae ma Feagaiga 18:11; tagai foi i le Mareko 3:28; 1 Nifae 10:18; Alema 34:8, 16). Ua lipoti mai e le tusi a Alema o le salamo ma le faamagaloga e oo lava ia i latou sa amioleaga ma avea ma tagata faamasaaatoto (tagai i le Alema 25:16; 27:27, 30). O la’u savali i le asō o se savali o le faamoemoe mo i tatou uma, e aofia ai i latou o ē ua lē toe avea ma tagata o le Ekalesia e ala i le tapē o le igoa po o le aveesea o le igoa. O i tatou uma o tagata agasala e mafai ona faamamāina e le salamo. “O le salamo mai agasala e le faigofie,” sa aoao mai ai Elder Russell M. Nelson i se konafesi aoao ua mavae. “Ae e matua tauia le tau!”²

I. Salamo

O le salamo e amata i lo tatou Faaola, ma o se olioli, ae le o se avega. I le faigalotu o le Kerisimasi ia Tesema talu ai, sa aoao mai ai Peresitene Nelson: “O le salamo moni e le o se mea e

faatasi ona tupu. O se avanoa e le taitai muta. E *taua tele* i le alualu i luma ma le mauaina o le filemu o le mafaufau, mafanafana, ma le olioli.”³

O nisi o aoaoga aupito silisili e uiga i le salamo o loo i ai i le lauga a Alema i le Tusi a Mamona i tagata o le Ekalesia ia na mulimuli ane ia faamatalaina o le i ai i se tulaga o le “lē talitonu tele,” “faafefeteina . . . i luga i le faamaualuga,” faatasi ai ma loto ua tuu “i luga o oa ma mea lē aoga o le lalolagi” (Alema 7:6). E tofua tagata o leni Ekalesia toefuataiina ma le tele o mea e aoaoina mai aoaoga musuia a Alema.

Tatou te amata i le faatuatua ia Iesu Keriso, ona “o ia lea e afio mai na te aveese agasala a le lalolagi” (Alema 5:48). E tatau ona tatou salamo aua, e pei ona aoao mai Alema, “sei vagana ai ua outou salamo, e lē mafai lava i soo se ala ona outou mautofi i le malo o le lagi” (Alema 5:51). O le salamo o se vaega taua o le fuafuaga a le Atua. Ona o le a agasala tagata uma i lo tatou olaga faaletino ma vavaeese ai mai le afioaga o le Atua, o lea e “lē mafai

ona faaolaina” le tagata e aunoa ma le salamo (Alema 5:31; tagai foi i le Helamana 12:22).

Sa aoaoina leni mea mai le amata. Sa poloaiina Atamu e le Alii, “Ia aoao atu i lau fanau, e ao i tagata uma, i soo se mea lava, ona salamo, po o o le a leai se ala e mafai ai ona latou mautofi i le malo o le Atua, ona e leai se mea lē mama e mafai ona mau iina, pe mau i ona luma” (Mose 6:57). E tatau ona tatou salamo i a tatou agasala uma—o a tatou faatinoga uma po o le lē faatinoina o mea e feteenai ma poloaiga a le Atua. E leai se tasi e tuusaoloto mai ai. O le afiafi ananafi na lu’iina ai tatou e Peresitene Nelson; “Uso e, e manaomia ona tatou salamo uma.”⁴

Ina ia faamamaina e le salamo, e tatau ona tatou lafoai ese a tatou agasala ma ta’uta’u atu i le Alii ma i Lana faamasino i le olaga nei i mea e manaomia ai (tagai i le Mataupu Faavae ma Feagaiga 58:43). Sa aoao mai Alema e faapea e tatau foi ona tatou “aumai galuega o le amiotonu” (Alema 5:35). O nei mea uma o se vaega o le valaaulia faisoo mai tusitusiga paia ia o mai ia Keriso.

E manaomia ona tatou aai ma feinu i le faamanatuga i aso Sapatati taitasi. I lena sauniga tatou te osia ai feagaiga ma mauaina faamanuiaga e fesoasoani ia i tatou e faatoilaloina amioga uma ma manaoga o loo polokaina i tatou mai le atoatoa lea e valaauliaina i tatou e lo tatou Faaola ia ausia (tagai i le Mataio 5:48; 3 Nifae 12:48). Pe a tatou “faafiti [i tatou lava] mai mea uma e le faale-atua, ma alolofa i le Atua ma o [tatou] manatu atoa, mafaufau, ma le malosi atoa,” ona tatou mafai lea ona “atoatoa ia Keriso” ma “faapaiaina” e ala i le faamaligiina o Lona toto ia “paia, ua aunoa ma se ila” (Moronae 10:32–33). E mau lea folafolaga! E mau lea vavega! O se faamanuiaga lava!

II. Tali Atu o le Tagata Lava ia ma Faamasinoga o le Olaga Nei

O le faamoemoe e tasi o le fuafuaga a le Atua mo leni olaga faaletino o le “tofotofoina” lea o i tatou “e vaai pe [tatou] te faia mea uma o soo se mea e poloaiina ai i [tatou] e le Alii lo [tatou]

Atua” (Aperaamo 3:25). I le avea ai ma se vaega o lenei fuafuaga, tatou te tali atu ai i le Atua ma i Ana auaua filifilia, ma o le tali atu o le tagata lava ia o le a aofia ai uma faamasinoga i le olaga nei ma faalelagi.

I le Ekalesia a le Alii, o faamasinoga i le olaga nei mo tagata o le ekalesia po o tagata faaolioli o le ekalesia e faatautaia e taitai o ē saili atu i le taitaiga faalelagi. O le latou tiutetauave lena o le faamasino o tagata o loo saili atu ia o mai ia Keriso ia maua le mana o Lana Togiola i luga o le ala o feagaiga e tau atu i le ola e faavavau. O faamasinoga i le olaga nei e iloa ai pe ua sauni se tagata mo le papatisoga. Pe o agavaa se tagata mo se pepa faataga e auai ai i le malumalu? Pe o se tagata o lona igoa sa aveesea mai faamaumauga a le Ekalesia ua lava le salamo e ala i le Togiola a Iesu Keriso, ina ia toefaaulufale mai e ala i le papatisoga?

Pe a faamaonia e se faamasino o le olaga nei na valaauina e le Atua se tagata mo le alualu i luma atili, e pei o avanoa o le malumalu, na te lē faailoga ina lena tagata o sē ua atoatoa, ma na te lē faamagaloina se agasala. Sa aoao mai Elder Spencer W. Kimball e faapea, pe a mavae le mea na ia ta’ua o le “aveesea [o] faasalaga,” faaleolaga nei, “e tatau foi i le [tagata] ona saili ia maua mai i le Atua o le lagi se salamo faaiu, ma e na o ia e mafai ona faamagaloina agasala.”⁵ Ma afai e tumau pea amioga ma



manaoga agasala e lē salamoina seia oo i le Faamasinoga Mulimuli, o se tagata e lē salamo o le a tumau pea le lē mamā. O le tali atu mulimuli o le tagata lava ia, e aofia ai le aafiaga o le faamamaāga faaiu o le salamo, e i le va o i tatou taitoatasi ma le Atua.

III. Toetu ma le Faamasinoga Mulimuli

O le faamasinoga lea e tele ina faamatalaina i tusitusiga paia o le Faamasinoga Mulimuli lea e sosoo ma le Toetutu (tagai i le 2 Nifae 9:15). E tele mau o loo ta’ua e faapea “tatou te laulaututu uma lava i luma o le nofoa-faamasino o Keriso” (Roma 14:10; tagai foi i le 2 Nifae 9:15; Mosaea 27:31; e faamasinoina e tusa ma galuega na faia i le tino faaletino” (Alema 5:15; tagai foi i le Faaaliga 20:12; Alema 41:3; 3 Nifae 26:4). O le a faamasinoina tagata uma

“e tusa ma a latou galuega” (3 Nifae 27:15) ma “e tusa ma . . . manaoga o o latou loto” (Mataupu Faavae ma Feagaiga 137:9; tagai foi i le Alema 41:6).

O le faamoemoega o lenei Faamasinoga Mulimuli o le fuafua lea pe tatou te ausia mea na faamatalaina e Alema o se “liuga tele o le loto” (tagai i le Alema 5:14, 26), lea tatou te avea ai ma tagata fou, e “lē toe i ai [se] manao e fai mea leaga, ae ia faia mea lelei e lē aunoa” (Mosaea 5:2). O le faamasino o lenei mea o lo tatou Faaola, o Iesu Keriso (tagai i le Ioane 5:22; 2 Nifae 9:41). A mavae Lana faamasinoga o le a tatou tautino atu uma “ua tonu ana faamasinoga” (Mosaea 16:1; tagai foi i le Mosaea 27:31; Alema 12:15), ona o Lona silisiliese (tagai i le 2 Nifae 9:15, 20) na Ia maua ai se malamalama atoatoa e uiga i a tatou amioga ma manaoga uma, i mea uma na e amiotonu pe ua salamoina ma mea na e lē amiotonu ma lē salamoina pe lē suia.

Ua faamatalaina e tusitusiga paia le faagasologa o lenei Faamasinoga Mulimuli. Ua aoao e Alema o le faamasinotonu a lo tatou Atua e manaomia ai i le toetutu le “tatau ona toefuatai o mea uma i o latou tulaga e tatau ai” (Alema 41:2). O lona uiga “afai sa lelei a latou galuega i le olaga lenei, ma sa lelei manaoga o o latou loto, . . . i le aso gataaga, [o le a] toefuatai i latou i le mea ua lelei” (Alema 41:3). E faapena foi, “afai ua leaga a latou galuega [po o o latou manaoga] o le a toefuatai ia te i latou mo le leaga” (Alema 41:4–5; tagai foi i le Helamana 14:31). O lea, sa aoao ai e le perofeta o Iakopo e faapea i le Faamasinoga Mulimuli “o i latou o e amiotonu o le a amiotonu pea, ma o i latou o e ua eleelea o le a eleelea pea” (2 Nifae 9:16; tagai foi i le Mamona 9:14; 1 Nifae 15:33). O le faagasologa lena e muamua atu i lo tatou tulaga a o le’i ta’ua e Moronae “o le pa faamasino logomalie a le Ieova silisili, le Faamasino Faavavau o e o ola ma e ua oti” (Moronae 10:34; tagai foi i le 3 Nifae 27:16).

Ina ia mautinoa o le a tatou mamā i luma o le Atua, e tatau ona salamo a o le’i oo i le Faamasinoga Mulimuli (tagai i le Mamona 3:22). E pei ona ta’u atu e Alema i lona atalii agasala, e le mafai ona tatou natia a tatou agasala i luma o





le Atua, “ma e *vagana ai ua e salamo* o le a tutu o se molimau e faasaga ia te oe i le aso gataaga” (Alema 39:8; ua faaopopo le faamamafa). O le Togiola a Iesu Keriso ua tatou maua ai le ala lava e tasi e ausia ai le faamamaāga e manao-mia e ala i le salamo, ma o lenei olaga faaletino o le taimi lea e faia ai. E ui ua aoaoina i tatou e faapea o nisi salamo e tupu i le lalolagi o agaga (tagai i le Mataupu Faavae ma Feagaiga 138:31, 33, 58), ae e le mautinoa lena mea. Sa aoao mai Elder Melvin J. Ballard: “E matua faigofie atu le faatoilaloina ma auauna atu i le Alii pe a tuufaatasia uma le tino ma le agaga ia tasi. O le taimi lenei e sili atu ona faatosinaina tagata ma aafia gofie ai i se faatinoga. . . . O le olaga lenei o le taimi lea e salamo ai.”⁶

A tatou salamo, tatou te maua le faamautinoaga a le Alii o a tatou agasala, e aofia ai a tatou amioga ma manaoga, o le a faamamāina ma o lo tatou faamasino mulimuli alofa mutimutivale o le a “lē toe manatuaina lava i latou” (Mataupu Faavae ma Feagaiga 58:42; tagai foi i le Isaia 1:18; Ieremia 31:34; Eperu 8:12; Alema 41:6; Helamana 14:18–19). O le faamamaina e le salamo, e mafai ai ona tatou agavaa mo le ola e faavavau, lea sa faamatalaina e le Tupu o Peniamina o le “mau faatasi ma le Atua i se tulaga o le fafia e lē gata” (Mosaea 2:41; tagai foi i le Mataupu Faavae ma Feagaiga 14:7).

I le avea ai ma se isi vaega o le “fuafuaga o le toefuataiga” a le Atua (Alema

41:2), o le a toefuatai mai e le Toetutu “mea uma . . . i o latou autino tatau ai ma atoatoa” (Alema 40:23). E aofia ai i lenei mea le faaatoatoaina o o tatou lē atoatoa ma faaletonu *faaletino* e maua i le olaga faitino, e aofia ai le fanau mai po o mafatiaga po o faamai.

Pe faaatoatoaina e lenei toefuataiga i tatou mai i o tatou manaoga uma lē paia ma lē mafaatoilaloina po o vaisu? E lē mafai lena mea. Ua tatou iloa mai faaaliga o aso nei o le a faamasinoina i tatou mo o tatou *manaoga* faapea ai foi ma a tatou amioga (tagai i le Alema 41:5; Mataupu Faavae ma Feagaiga 137:9) ma e oo lava i o tatou *mafaufauga* o le a ta’usalaina ai i tatou (tagai i le Alema 12:14). E lē tatau ona tatou “faatuai le aso o lo [tatou] salamo” seia oo i le oti, sa aoao mai ai Amoleka (Alema 34:33), ona o le agaga lava e tasi na umia o tatou tino i lenei olaga—pe e ā le Alii pe ōu le tiapolo—“o le a i ai le mana e umia ai o [tatou] tino i lena lalolagi e faavavau” (Alema 34:34). Ua i ai i lo tatou Faaola le mana ma ua tu sauni e faamama i tatou mai le leaga. O le taimi lenei e saili atu ai i Lana fesoa-soani e salamo ai i o tatou manaoga ma mafaufauga leaga pe lē talafeagai ina ia faamamāina ai ma saunia e tutu i luma o le Atua i le Faamasinoga Mulimuli.

IV. O Aao o le Alofa Mutimutivale

O le vaega tupito o le fuafuaga a le Atua atoa ai ma Ana poloaiga uma

o Lona alofa lea mo i tatou taitoa-tasi, lea e “silisili atu ona manaomia i mea uma . . . ma silisili ona olioli i le agaga” (1 Nifae 11:22–23). Sa faamautinoa mai e le perofeta o Isaia e oo lava i ē amioleaga pe a latou “foi mai ia Ieova . . . ona alofa mai lea o ia . . . [ma] na te matua faamagaloina” (Isaia 55:7). Sa aoao mai Alema, “Faauta, ua ia auina mai se valaaulia i tagata uma, ona ua faaloaloa mai ia te i latou aao o le alofa mutimutivale” (Alema 5:33; tagai foi i le 2 Nifae 26:25–33). Sa fetalai atu le Alii toetu ia sa Nifae, “Faauta, ua faaloaloa atu ia te outou lou lima alofa mutimutivale, ma o soo se tasi e sau, o ia lea o le a ou taliaina” (3 Nifae 9:14). Mai nei aoaoga ma le tele o isi aoaoga faatusitusiga paia, ua tatou iloa ua tatala mai e lo tatou Faaola alofa Ona aao e talia alii ma tamaitai uma i tuutuuga alofa ua uma ona Ia faataatiaina e olioli ai i faamamāniaga aupito silisili ua i ai i le Atua mo Ana fanau.⁷

Ona o le fuafuaga a le Atua ma le Togiola a Iesu Keriso, ou te molimau atu i se “susulu atoatoa o le faamoe-moe” e alofa le Atua ia i tatou ma e *mafai* ona faamamāina i tatou e ala i le faagasologa o le salamo. Ua folafola mai ia te i tatou “afai [tatou te] fetaomi atu i luma, ma taumamafa fafia i le afi-oga a Keriso, ma tumau e oo i le iuga, faauta, ua faapea ona fetalai mai o le Tama: o le a outou maua le ola e faavavau” (2 Nifae 31:20). Tau ina ia tatou faia uma faapena, ou te aioi ma tatalo ai i le suafa o Iesu Keriso, amene. ■

FAAMATALAGA

1. “O Mai ia Iesu,” *Viiga*, nu. 65.
2. Russell M. Nelson, “Salamo ma le Liuaia,” *Liahona*, Me 2007, 102.
3. Russell M. Nelson, “O Meaalofa e Fa ua Ofo Mai e Iesu Keriso ia te Oe” (2018) faasalalauga o le Faigalotu o le Kerisimasi a le Au Peresitene Sili, 2 Tes., 2018). broadcasts.ChurchofJesusChrist.org.
4. Russell M. Nelson, “E Mafai Ona Tatou Faia ia Lelei Atu ma Ia Tatou Lelei Atu,” *Liahona*, Me 2019, 69.
5. *The Teachings of Spencer W. Kimball*, ed. Edward L. Kimball (1982), 101.
6. Melvin J. Ballard, in Melvin R. Ballard, *Melvin J. Ballard: Crusader for Righteousness* (1966), 212–13.
7. Tagai Tad R. Callister, *The Infinite Atonement* (2000), 27–29.



SAUNIA E ELDER JUAN PABLO VILLAR
O Le Fitugafulu

Faamalolosi o Tatou Maso Faaleagaga

E pei lava o le faitau ma le aoao e uiga i maso e lē lava lea e fausia ai maso, e faapena foi o le faitau ma le aoao e uiga i le faatuatua e aunoa ma se faatinoga faaopoopo e lē lava lea e fausia ai le faatuatua.

Ou te faafetai lava mo le faamanuiaga o le mauaina o se tino faitino, o se meaalofo ofoofogia lea mai lo tatou Tama Faalelagi. E silia ma le 600 maso i o tatou tino.¹ O le tele o maso e manao-mia ai le faamalositino ina ia i ai i se tulaga lelei e faatino ai a tatou gaoioiga i aso taitasi. E mafai ona tatou faaaluina le tele o taumafaiga faalemafaufau e faitau ma aoao ai e uiga i o tatou maso, ae afai tatou te manatu o le faia o lenei mea o le a tatou malolosi atu ai, o le a tatou lē fiafia la. E na o le pau le mea e tuputupu a'e ai o tatou maso pe a tatou faaagaina i latou.

Ua ou iloa o meaalofo faaleagaga e faapena foi o latou uiga. E manaomia foi ona faamalositino ina ia tuputupu a'e ai. O le meaalofo faaleagaga o le faatuatua, mo se faataitaiga, e le na o se lagona po o se uiga; o se mataupu faavae o le faatinoga lea e masani ona faaali mai i tusitusiga paia e fesootai i le veape faamalositino.² E pei lava o le faitau ma le aoao e uiga i maso e lē lava

lea e fausia ai maso, e faapena foi o le faitau ma le aoao e uiga i le faatuatua e aunoa ma se faatinoga faaopoopo e lē lava lea e fausia ai le faatuatua.

Ina ua 16 o'u tausaga, sa sau i le fale i se tasi aso, lo'u uso matua, o Ivan, na 22 tausaga i lenei taimi, ma faamatala mai i le aiga ni nai talafoa. Sa ia

filifili e papatiso i Le Ekalesia a Iesu Keriso o le Au Paia o Aso e Gata Ai. Sa tilotilo atu ma le lē mautonu o matou matua ia te ia, ma ou te manatua lo'u le malamalama atoa i le mea na tupu. O se tausaga pe ā mulimuli ane, sa ia tuuina mai ai nisi talafoa faate'ia: na ia filifili e auauna atu o se faifeautalai o le Ekalesia, o lona uiga o le a matou lē toe vaai ia te ia mo le lua tausaga. Sa lē'i fiafia o'u matua i lenei tala; ae peitai, sa ou vaai ia te ia se naunautaiga manino lea na faateleina ai lo'u faamemelo mo ia ma le faaiuga na ia faia.

I masina mulimuli ane, a o auauna atu Ivan i lana misiona, sa ou maua le avanoa e fuafua ai se tafaoga ma nisi o uo aoga. Sa matou mananao e faamnatu le faaiuina o o matou tausaga i le aoga maualuga ma faaalu ni nai aso i le matafaga.

Sa ou tusia se tusi i lo'u uso faifeautalai, e ta'u i ai la'u fuafuaga o se tafaoga i le taumafanafana. Sa ia tusi mai o le nuu sa ia tala'i ai e ui atu ai i lo'u nofoaga faamoemocina. Sa ou filifili o se manatu lelei le afe i ai e asi o ia. Faatoa ou iloina lava mulimuli ane e le tatau i aiga ona asia ia faifeautalai.

Sa ou faia fetuunaiga uma. Ou te manatua le saofai i luga o le pasi ma mafaufau i mea manaia uma o le a ma faia faatasi ma Ivan i lenei aso la matagofie. O le a fai se ma mālū o le taeao, tala-talanoa, taaalo i le oneone, faala—oka se manaia o le taimi o le a ma mauaina!

Ina ua taunuu le pasi i le fale faatalipasi, sa ou vaai o tutu mai Ivan





i autafa o se isi alii talavou, e ofutino papae ma fusiua uma i laua. Sa ou oso ese mai le pasi, sa ma feopoai, ma sa ia faailoa mai lana soa. E aunoa ma le faa-maumauina o se isi minute, sa ou ta'u-ina i lo'u uso a'u fuafuaga mo le aso, ae na lilo i manatu mea ua faatulagaina e Ivan. Sa ia tilotilo mai ia te a'u, ataata, ma fai mai, "Ioe! Ae, e tatau ona faia ni nai feau muamua. E te fia sau ma i ma'ua? Sa ou ioe i ai, ma mafaufau o le a lava le ma taimi ma te fiafia mulimuli ai i le matafaga.

I lena aso, mo le silia ma le 10 itula, sa ou savalia magaala o lena aai ma lo'u uso ma lana soa. Sa ou ataata atu i tagata i le aso atoa. Sa ou feiloai i tagata ou te lei vaai muamua i ai i lo'u olaga. Sa matou talanoa i tagata uma, tu'itu'i i faitotoa o tagata e le masani ai, ma asiasi i tagata na aoaoina e lo'u uso ma lana soa.

I se tasi o na asiasiga, sa aoao atu e lo'u uso ma lana soa e uiga ia Iesu Keriso ma le ata o le faolataga. Na faafuasei lava ona taofi Ivan ma tilotilo mai ia te a'u. I lo'u te'i, sa ia talosaga mai ma le faaaloalo ia te a'u e faasoa atu o'u manatu e uiga i mea o loo aoaoina. Na filemu le potu, ma sa tilotilo uma mai tagata ia te a'u. Faatasi ai ma ni nai faigata, sa i'u ina ou mauaina ni upu ma faasoa atu o'u lagona e uiga i le Faaola. Ou te le iloina pe na sa'o pe sese mea na ou faasoina atu. E le'i faasa'oa lava a'u e lo'u uso; i se isi itu, sa ia faafetai mai ia te a'u mo le faasoina atu o o'u manatu ma lagona.

I le aluga o na taimi na ma faatasi ai, sa lei faaaluina e lo'u uso ma lana soa se minute e tasi e aoao faapitoa mai ai se lesonea ia te a'u, ae sa ou maua se malamalama sili atu nai lo talanoaga uma ua mavae sa ou faia ma ia. Sa ou molimauina le suia o foliga a o mauaina e tagata le malamalama faaleagaga i o latou olaga. Sa ou vaai i le ala na maua ai e nisi o i latou le faamoemoe i savali, ma sa ou aoaoina le auala e auauna atu ai i isi ma faagalo a'u lava ma o'u lava manaoga. Sa ou faia le mea na aoao mai e le Faaola: "Ai se tasi e fia mulimuli mai ia te a'u, aua ne'i usiusitai o ia ia te ia."³

O le toe tepa i tua, ua ou iloa ai sa tuputupu ae lo'u faatuatua i lena aso aua sa tuuina mai e lo'u uso ia te a'u le avanoa e faatino ai. Sa ou faaogaina a o matou faitau i tusitusiga paia, saili tagata e aoao atu, molimau atu, auauna atu i isi, ma faaauau ai pea. Ma te le'i taele faala lava i lena aso, peitai sa taele lo'u loto i le malamalama mai le lagi. Ou te le'i vaai lava i se oneone se tasi mai le matafaga, peitai sa ou lagona le tuputupu ae o lo'u faatuatua e pei o se tamai fatu o le sinapi.⁴ Ou te le'i faaaluina le aso la o se turisi, ae sa ou maua ni aafiaga matagofie, ma le leiloa-ina, sa ou avea ma se faifeautalai—e aunoa ma le avea ma se tagata o le Ekalesia!

Avanoa e Faamalosia ai Maso Faaleagaga

Faafetai i le Toefuataiga o le talalelei, ua mafai ai ona tatou malamalama

i le auala e fesoasoani mai ai lo tatou Tama Faalelagi e atiae a tatou meaalofa faaleagaga. E foliga mai o le a Ia tuuina mai ia i tatou avanoa e atiae ai na meaalofa nai lo le na o le tuuina mai o i latou ia i tatou e aunoa ma se tau-mafaiga faaleagaga ma faaletino. Afai tatou te ogatusa ma Lona Agaga, o le a tatou aoao ia iloa na avanoa ona galue loa lea i ai.

Afai tatou te saili le onosai atili, atonu tatou te iloa ai e manaomia ona tatou faaitaia a o faatalitali mo se tali. Afai tatou te mananao ia alolofa atili i o tatou tuaoi, e mafai ona tatou faafailleina e ala i le saofai i autafa o se tagata fou i le lotu. E faapena foi le faatuatua; pe a oo mai le masalosalo i o tatou mafaufau, o le faalagolago i folafolaga a le Alii o le a manaomia e agai ai i luma. O lena auala ua tatou faaogaina ai maso faaleagaga ma atinaeina i latou i ni punavai o le malosai i o tatou olaga.

Atonu o le a le faigofie i le amataga, ma e mafai foi ona avea ma se luitau tele. O afioga a le Alii, e ala mai le perofeta o Moronae, e faatatau ia i tatou i aso nei: "Ma afai e o mai tagata ia te au o le a ou faaali atu ia te i latou o latou vaivaiga. Ou te avatu i tagata ia vaivaiga ina ia faalotomaulalalo ai i latou; ma ua lava lou alofa tunoa mo tagata uma o e e latou te faalotomaulalalo i latou lava i ou luma; aua afai latou te faalotomaulalalo i latou lava i ou luma, ma [maua pe faatino le] faatuatua . . . ia te au, ona ou faia lea o mea vaivai ia avea ma mea malolosi ia te i latou."⁵

Ou te faafetai mo lo'u uso o Ivan, o le sa le gata ina faasoa mai le talalelei ia te a'u ae sa ia valaaulia a'u ia ola ai ma iloa o'u vaivaiga. Sa ia fesoasoani mai ia te a'u ia talia le valaaulia a le Matai: "Sau, mulimuli mai ia te a'u"⁶—ia savali e pei ona savalia e le Faaola, saili e pei ona sailia e le Faaola, ma alofa e pei ona alofa mai le Faaola ia i tatou. I masina mulimuli ane, i le mavae ai o lo'u aafiaga faafaifeautalai, sa ou filifili ai e papatiso ma auauna atu i sa'u lava misiona.

Se'i o tatou taliaina le valaaulia a Peresitene Russell M. Nelson ma o mai ma le loto i ai i le Faaola⁷ e ala i le

faailoaina o na maso o loo manao-mia tele se faagaioiga faaleagaga ma amata ona faaagaina i latou. O se tuuga umi ma mamao leni, o se malafoni, ae le o se tuuga saosaoa, ia aua la ne'i galo na gaioiga faaleagaga itiiti ae faifaisoo lea o le a faamalo-sia ai na maso taua faaleagaga. Afai tatou te mananao e faateleina lo tatou faatuatua, ona tatou faia lea o mea e manaomia ai le faatuatua.

Ou te tuu atu la'u molimau o i tatou o fanau a se Tama Faalelagi alofa. E alofa Lona Alo o Iesu Keriso ia i tatou. Na afio mai o Ia i leni lalolagi e faaali mai ia i tatou le ala ma ofofua mai Lona soifua e aumai ai ia i tatou le faamoemoe. Ua valaaulia i tatou e le Faaola e mulimuli i Lana faataitaiga atoatoa, ia faaoga lo tatou faatuatua ia te Ia ma Lana Togiola, ma ia faalatele atu meaalofo uma faaleagaga ua faamanuiaina ai i tatou. O Ia o le Ala. O la'u molimau lea i le suafa o Iesu Keriso, amene. ■

FAAMATALAGA

1. *Encyclopedia Britannica*, s.v. "Human Muscle System," last modified Apr. 26, 2018, britannica.com/science/human-muscle-system.
2. Tagai, mo se faataitaiga, Alema 5:15; 32:27; 34:17; Moronae 7:25; Mataupu Faavae ma Feagaiga 44:2.
3. Mataio 16:24.
4. Tagai Luka 17:6.
5. Eteru 12:27.
6. Luka 18:22.
7. Tagai Russell M. Nelson, "Faamalosia Ia i le Galuega Nei," *Liahona*, Me 2018, 118–19.



SAUNIA E ELDER GERRIT W. GONG
O Le Korama a Aposetolo e Toasefululua

Leoleo Mamoe Lelei, Tamai Mamoe a le Atua

E valaauina i tatou e Iesu Keriso i Lona siufofoga ma i Lona suafa. Na te saili ma faapotopoto i tatou. Na te aoao mai i tatou i le ala e auauina atu ai i le alofa.

Uso e ma tuafafine pele, na i ai se taimi sa faigata ai ona e moe ma taumafai ai e faitau faalemafaufau ni mamoe? A o feosofi ae mamoe fulufulua i luga o le pa, e te faitauina: 1, 2, 3, . . . 245, 246, . . . 657, 658 . . .¹

I lo'u la tulaga, o le faitauina o mamoe ou te le fia moe ai. Ou te popole i le misi po o le leiloa o se tasi, ma o lena mea ou te ala ai lava.

Faatasi ai ma le tamaitiiti leoleo mamoe lea na avea ma tupu, ua tatou tautino atu ai:

"O Ieova o lo'u leoleo mamoe o ia; e leai se mea ou te mativa ai.

"Na te ave au i le mea e i ai le vao mu'a ou te taoto ai: na te taitai ia te au i tafatafa o vai e tafe lemu.

"Na te faafoisia mai lo'u agaga."²

I leni vaitau o le Eseta, tatou te faamanatu ai le Leoleo Mamoe Lelei, o Ia foi o le Tamai Mamoe a le Atua. Mai Ona suafa uma faalelagi, e leai se isi [suafa] e sili ona maaleale ma sili ona taua. E tele mea ua tatou aoao mai le faatauga a le Faaola ia te Ia Lava o se Leoleo Mamoe Lelei ma mai

molimau faaperofeta e uiga ia te Ia o le Tamai Mamoe a le Atua. O nei matafaioi ma faatusa e felagolagomai ma le mamana—o ai e sili ona fesoasoani i tamai mamoe faapelepele taitasi nai lo le Leoleo Mamoe Lelei, ma o ai e sili atu ona avea ma o tatou Leoleo Mamoe Lelei nai lo le Tamai Mamoe a le Atua?

"Aua ua faapea lava ona alofa mai o le Atua i le lalolagi ua Ia aumai ai Lona Atalii e Toatasi," na fanaua, ma na ofo mai e le Alo e Toatasi na Fanaua a le Atua Lona soifua i le usiusitai naunautai i Lona Tama.³ Na molimau mai Iesu, "O a'u le leoleo mamoe lelei: e tuu atu e le leoleo mamoe lelei lona ola e sui a'i mamoe."⁴ Na i ai ia Iesu le mana e tuu atu ai Lona soifua ma le mana e toe aumai ai.⁵ I le tuufaatasia ai ma Lona Tama, ua tulagaese ai le faamanuiaina o i tatou e lo tatou Faaola, e le gata i le avea ai ma o tatou Leoleo Mamoe Lelei ae o le Tamai Mamoe foi a le Atua.

I le avea ai ma lo tatou Leoleo Mamoe Lelei, e valaauina i tatou e Iesu Keriso i Lona siufofoga ma i Lona suafa. Na te saili ma faapotopoto i



tatou. Na te aoao mai i tatou i le ala e auauina atu ai i le alofa. Se'i o tatou mafaufau i autu nei e tolu, e amata i Lona valaau mai ia i tatou i Lona siufofoga ma i Lona suafa.

Muamua, o lo tatou Leoleo Mamoe Lelei “e valaau e ia i ana lava mamoe i o latou igoa. . . . Ua latou iloa lona leo.”⁶ Ma, o lona lava suafa ua ia valaauina ai outou, o le suafa lava lea o Keriso.”⁷ A o tatou saili ma le manatu moni e mulimuli ia Iesu Keriso, e oo mai musumusuga ia faia ni mea lelei, alofa i le Atua, ma auauna atu ia te Ia.⁸ Pe a tatou suesue, mafaufau loloto, ma tatalo; pe a tatou faafouina e le aunoa feagaiga o le faamanatuga ma le malumalu; ma pe a tatou valaauliaina tagata uma e o mai i Lana talalelei ma sauniga, ua tatou usiusitai i Lona siufofoga.

I o tatou aso, ua fautuaina i tatou e Peresitene Russell M. Nelson ina ia valaau le Ekalesia toefuataina i le igoa na faaalai mai e Iesu Keriso: O Le Ekalesia a Iesu Keriso o le Au Paia o Aso e

Gata Ai.⁹ Na fetalai mai le Alii, “Soo se mea tou te faia, ia outou faia i *lo’u igoa*; o lea ia outou faaigoa ai le ekalesia i *lo’u igoa*; ma ia outou valaau atu i le Tama i *lo’u igoa* ina ia faamanuia mai o ia i le ekalesia ona o a’u.”¹⁰ I le lalolagi atoa, i o tatou loto ma fale, tatou te valaau atu i le Tama i le suafa o Iesu Keriso. Ua faafetai ai mo faamanuiaga agaalofo o a tatou tapuaiga, suesueina o le talalelei, ma gaoioiga anoa faaleaiga e faatotonugalemu-i-le-aiga, ma lagolagoina-e-le-Ekalesia.

Lona lua, e saili ma faapotopoto mai e le Leoleo Mamoe Lelei i tatou i totonu o Lana lafu e tasi. Na Ia fetalai mai, “O ai ea so outou e ana mamoe e selau, afai e leiloa le tasi, e le tuua e ia le ivagafulu ma le iva i le vao, ae alu ma saili i le na leiloa, *seia maua*?”¹¹

E aapa atu lo tatou Faaola i le toatasi faapea ma le iva sefulu ma le iva, e masani lava i le taimi lava e tasi. A o tatou auauna atu, tatou te faamamaluina le ivasefulu ma le iva o ē tumau ma

le lē mafaagaectia, e tusa lava pe tatou te faanaunau atu i le toatasi ua se ese. E saili ma laveai i tatou e lo tatou Alii “mai nofoaga uma,”¹² “mai tuluiga e fa o le lalolagi.”¹³ Na te faapotopotoina i tatou e ala i le feagaiga paia ma Lona toto togiola.¹⁴

Sa ta’u atu e lo tatou Faaola i Ona soo i le Feagaiga Fou, “Ua ia te au foi isi mamoe e le o i lenei lotoa.”¹⁵ I Amerika, na molimau atu le Alii toetu i fanau o le feagaiga a Liae, “O outou o a’u mamoe.”¹⁶ Ma na fetalai atu Iesu ma e i ai foi isi mamoe o le a faalogo i Lona siufofoga.¹⁷ O se faamanuiaga le avea ai o le Tusi a Mamona ma se tasi o molimau o loo molimau mai i le siufofoga o Iesu Keriso!

Ua valaaulia e Iesu Keriso le Ekalesia e talia tagata uma o ē faalogo i Lona siufofoga¹⁸ ma tausi Ana poloaiga. E aofia i le aoaoga faavae a Keriso le papatisoga e ala i le vai ma e ala i le afi ma le Agaga Paia.¹⁹ Sa fesili Nifae, “afai na tataui i le Tamai Mamoe a le Atua, o lē ua Paia, ona papatiso i le vai, ina ia faataunuuina mea tonu uma, o lea la, ua lē sili atu ea ona tataui ia te i tatou, ua lē paia, ona papatiso, ioe, i le vai lava!”²⁰

I le asō, ua finagalo lo tatou Faaola o mea tatou te faia ma le tagata o avea ai i tatou o le a valaauliaina ai isi e o mai, ma mulimuli mai ia te Ia. O mai ma saili i le alofa, faamalologa, fesootaiga, ma le feagaiga o loo i ai ia te Ia, e aofia ai ia totonu o malumalu paia o le Atua, lea e mafai ai e sauniga paia o le olataga ona faamanuiaina tagata uma o aiga, ma faapotopoto ai Isaraelu i itu uma e lua o le veli.²¹

Lona tolu, i le avea ai ma “Leoleo Mamoe o Isaraelu,”²² ua faaalai mai e Iesu Keriso le ala o loo auauna atu ai ma le alofa leoleo mamoe o Isaraelu. Afai e fesili mai lo tatou Alii pe tatou te alolofa ia te Ia, e pei ona Ia faia ia Simona Peteru, o le a aioi mai lo tatou Faaola: “Fafaga i a’u tamai mamoe. . . . Fafaga i a’u mamoe. . . . Fafaga i a’u mamoe.”²³ Ua folafola mai e le Alii afai e fafaga e Ana leoleo mamoe Ana tamai mamoe ma mamoe, e “le toe fefefe [i latou o i Lana lafu], latou te le matatau foi, e leai so latou e le iloa.”²⁴

Na lapatai mai lo tatou Leoleo Mamoe Lelei e lē tatau i Leoleo Mamoe o Isaraelu ona momoe,²⁵ pe taapeape pe mafua ai ona se ese mamoe,²⁶ pe vaaia ni a tatou lava auala mo ni a tatou lava manuia.²⁷ O Leoleo Mamoe Lelei e faamalosia, faamalolo, fusia lē ua gau, toe au mai lē ua tuliesea, saili i lē ua se.²⁸

Ua lapatai mai foi le Alii e uiga i auauna, o ē “le manatu foi o ia i mamoe,”²⁹ ma “perofeta pepelo o e o mai ia te outou i ofu faamamoe, ae i totonu o luko feai lava i latou.”³⁰

E olioli lo tatou Leoleo Mamoe Lelei pe a tatou faaagaina le faitalia a tagata taitoatasi ma le faamoemoe ma le faatuatua. E vaavaai atu i latou o i Lana lafu i lo tatou Faaola ma le lotofaafetai mo Lana taulaga togiola. Ua tatou osi feagaiga ia mulimuli ia te Ia, e le o le filemu, tauaso, pe “matamuli,” ae o le manao ma o tatou loto ma mafaufau atoa ia alofa atu i le Atua ma o tatou tuaoi, tauave avega a isi ma olioli i le fiafiaga o isi. A o tuuto saoloto atu e Keriso Lona finagalo i le finagalo o le Tama, o lea ia tatou tauave ai foi ma le migao i o tatou luga Lona suafa. Tatou te saili atu ma le fiafia ia auai i le galuega o le faapotopotoina ma le auauna atu i fanau uma a le Atua.

Uso e ma tuafafine, o Iesu Keriso o lo tatou Leoleo Mamoe Lelei atoatoa. Ona sa Ia tuuina mai Lona soifua mo i tatou ma ua toetu nei ma le mamalu, o Iesu Keriso foi, o le Tamai Mamoe atoatoa a le Atua.³¹

O le Tamai Mamoe a le Atua mo le taulaga sa faaataata mai i le amataga.



Na ta’u atu e le agelu ia Atamu o lana taulaga “o se faatusa lea o le taulaga a le Toatasi na Fanaua e le Tama,” lea e valaauliaina ai i tatou ia “salamo ma valaau atu i le Atua i le suafa o le Alo e faavavau.”³²

O Tama Aperaaamo, o lē na faavaeina faamanuiaga o feagaiga mo malo uma o le lalolagi, na tofo i le uiga o le ofoina atu o lona atalii e toatasi.

“Ona fai atu lea o Isaako i lona tama o Aperaaamo, ua faapea atu, Lo’u tama e; ona tali mai lea o ia, Lo’u atalii e, o a’u lenei. Ona fai atu lea o ia, Faa-uta i le afi ma fafie: ae o fea le tamai mamoe . . . ?”

“Ona tali mai lea o Aperaaamo, Lo’u atalii e, e aumai e le Atua se tamai mamoe māna.”³³



Na muai vaaia ma olioli aposetolo ma perofeta i le misiona na muai faauuina a le Tamai Mamoe a le Atua. Na molimau mai Ioane i le Lalolagi Tuai ma Nifae i le Lalolagi Fou e uiga i “le Tamai Mamoe a le Atua,”³⁴ “ioe, o le alo lava o le Tama Faavavau[,] . . . le Togiola o le lalolagi.”³⁵

Na molimau mai Apinati i le taulaga togiola a Iesu Keriso: “O i tatou uma, e pei o mamoe, ua se ese; ua tatou taitasi ma liliu atu le tagata i lona lava ala; ma ua faafafa e le Alii i ona luga amiole-tonu a i tatou uma.”³⁶ Na ta’ua e Alema le taulaga maoae ma mulimuli a le Alo o le Atua o le “mea e tasi e sili atu ona taua nai lo ia mea uma.” Ua faamalosiau mai Alema, ia “Maua le faatuatua i le Tamai Mamoe a le Atua”; “o mai ia, ma aua le fefefe.”³⁷

Na faasoa mai e se uo pele le ala na ia maua ai lana molimau faapelepele e uiga i le Togiola a Iesu Keriso. Sa ia ola a’e ma talitonu o le agasala e aumaia i taimi uma faasalaga mamafa na mafua mai ia i tatou lava ia. Sa ia ôle atu i le Atua ia malamalama i le avanoa e maua ai le faamagaloga faalelagi. Sa ia tatalo ia malamalama ma iloa le auala e mafai ona faamagalaga ai e Iesu Keriso i latou o ē salamo, pe mafai faapefea e le alofa mutimutivale ona faamalicia le faamasinogatonu.

I se tasi aso sa taliina ai lana tatalo i se aafiaga liuaina faaleagaga. Na tamoe mai i fafo o le faleoloa se alii talavou atuatuvaale o loo siiina ni taga meaai na gaoia se lua. Sa ia tamoe atu i se auala pisi, tuliloa atu e le pule o le faleoloa, lea na mauaina o ia ma amata ona ee ma tauaimisa. Nai lo le lagonaina o le faamasinoina o le alii talavou fefe e pei o se gaoi, sa faafuasei lava ona faatuumulia la’u uo i le agaalofo tele mo ia. Sa aunoa ma le fefe po o le popole mo lona lava saogalemu, sa ia savali sa’o atu ai i alii e toalua ia o loo finau. Sa ia faapea atu, “O le a ou totogia meaai. Faamolemole tuu o ia e alu. Faamolemole tuu mai ou te totogiina meaai.”

O le uunaia ai e le Agaga Paia ma le faatumulia i se alofa na te le’i lagonaina muamua, na fai atu ai la’u uo, “Na pau le mea sa ou manao e fai o le fesoasoani ma faasaoina le alii talavou.” Na fai mai



la'u uo na amata ona ia malamalama ia Iesu Keriso ma Lana Togiola—o le auala ma le mafuaaga ma le alofa mama ma le atoatoa o le a naunau ai Iesu Keriso e ositaulaga e avea ma ona Faaola ma Togiola, ma pe aisea na ia manao ai ia avea ai o Ia.³⁸

Leitiaio tatou pepese ai:

*Le leoleo mamoe lelei,
Saili mamoe ua se.
Aumai latou ma fiafia,
I se tau na telē.*³⁹

I le avea ai ma Tamai Mamoe a le Atua, ua silafia e lo tatou Faaola le taimi tatou le lagona ai le tuatoatasi, faata'uvaaina, lē mautonu, po o le fefe. I se faaaliga, na vaai Nifae i le mana o le Tamai Mamoe a le Atua ua “[alu ifo] i luga o le au paia o le ekalesia a le Tamai Mamoe, ma luga o tagata o le feagaiga a le Alii.” E ui o le a “faataapeapeina i luga o le lalolagi atoa . . . sa faaaupegaina i latou i le amiotonu ma le mana o le Atua i le mamalu tele.”⁴⁰

O lenei folafolaga o le faamoemoe ma le faamafanafana e aofia ai o tatou aso.

Pe na o oe le tagata o le Ekalesia i lou aiga, a'oga, fale faigaluega, po o alalafaga? E i ai ni taimi e lagona ai le laititi pe maotua o lau paranesi? Na e siitia atu i se nofoaga fou, atonu ma se gagana po o tu ma aga e lē masani

ai? Atonu o ou tulaga faaleolaga ua suia, ma o mea e te lē'i mafaufauina ua fetaia'i ma oe i le taimi nei? Ua faamautinoa mai e lo tatou Faaola ia i tatou, po o a lava o tatou tulaga, po o ai lava i tatou, i upu a Isaia: “Na te sapaia tamai mamoe i ona lima, ma tauave i latou i lona fatafata, na te taitai filemu i mamoe ua fananau.”⁴¹

Uso e ma tuafafine, e valaau mai lo tatou Leoleo Mamoe Lelei ia i tatou i Lona siufofoga ma i Lona suafa. Na te saili, faapotopoto, ma afio mai i Ona tagata. E ala mai i Lana perofeta soifua ma i tatou taitoatasi, Na te valaaulia ai tagata uma ia saili le filemu, faamoemoega, faamalologa, ma le olioli i le atoa toaga o Lana talalelei toefuataiina ma i Lana ala o le feagaiga. E ala i le faataitiga, Na te aoao mai ai ia leoleo mamoe o Isaraelu ia auauna atu i Lona alofa.

I le avea ai ma Tamai Mamoe a le Atua, o le misiona paia a Iesu na muai faauuina ma olioli ai aposetolo ma perofeta. O Lana Togiola, e lē i'u ma faavavau, e totonugalemu lea i le fuafuaga o le fiafia ma le faamoemoega o le foafoaga. Na faamautinoa mai ia i tatou Na te tauaveina i tatou i talaane o Lona fatu.

Uso e ma tuafafine pele, tau ina ia tatou mananao ia “avea o ni soo lotomauualalalo o le Atua ma le Tamai Mamoe,”⁴² atonu i se aso ia tusia o tatou igoa i le tusi o le ola a le Tamai Mamoe,⁴³ ia usuina le pese a le Tamai Mamoe,⁴⁴ ia valaauliaina i le

tausamaaga a le Tamai Mamoe.⁴⁵

I le avea ai ma Leoleo Mamoe ma se Tamai Mamoe, Ua Ia valaau mai: toe O Mai “i le malamalama moni . . . o [lou] Togiola, . . . [lou] leoleo mamoe sili ma le faamaoni.”⁴⁶ Ua Ia folafola mai “ona o lona alofa tunoa e mafai ai ona [tatou] atoatoa ia Keriso.”⁴⁷

I lenei vaitau o le Eseta, tatou te vivii atu ia te Ia:

“Ua tataua lava le Tamai Mamoe!”⁴⁸

“Osana i le Atua ma le Tamai Mamoe!”⁴⁹

Ou te molimau atu e uiga ia te Ia, lo tatou Leoleo Mamoe Lelei atoatoa, o le Tamai Mamoe atoatoa a le Atua. Na te valaauina i tatou i o tatou igoa, i Lona suafa—o le suafa paia o Iesu Keriso—amene. ■

FAAMATALAGA

1. Ua fautua mai se pese iloga:
*Pe a ou popole ma lē mafai ona moe,
Faitau o'u faamanuiaga nai lo mamoe.
Ou te tulemoe i le faitauina o o'u faamanuiaga.*
(Irving Berlin, “Count Your Blessings
Instead of Sheep” [1952])
2. Salamo 23:1–3.
3. Ioane 3:16.
4. Ioane 10:11.
5. Tagai i le Ioane 10:15, 17–18.
6. Ioane 10:3–4.
7. Alema 5:38; tagai foi i le Alema 5:37–39, 59–60.
8. Tagai i le Moronae 7:13; Mataupu Faavae ma Feagaiga 8:2–3.
9. Tagai i le Russell M. Nelson, “O Le Igoga Sa'o o le Ekalesia,” *Liahona*, Nov. 2018, 87–89.
10. 3 Nifae 27:7; faapoopo le faamamafa.
11. Luka 15:4, faapoopo le faamamafa; tagai foi i le Mataupu Faavae ma Feagaiga 18:15.
12. Esekiele 34:11–12; tagai foi i le Ieremia 31:10; Esekiele 34:6, 11–14; Mika 5:8; Mataio 10:6; 15:24. O nei valoaga o le faataapeapeina ma valoaga ma folafolaga o le faapotopotoina faafeagaiga o se autu faifai pea lea a perofeta, e aofia ai ma Perisitene Russell M. Nelson.
13. 1 Nifae 22:25.
14. Tagai i le Eperu 13:20.
15. Ioane 10:16; tagai foi i le 3 Nifae 15:21; 16:1, 3; Mataupu Faavae ma Feagaiga 10:59–60.
16. 3 Nifae 15:24; tagai foi i le 3 Nifae 15:17, 21.
17. Tagai i le 3 Nifae 16:1, 3; tagai foi i le Mataupu Faavae ma Feagaiga 10:59–60.
18. Tagai i le Mosaea 26:21.
19. Tagai i le 2 Nifae 31:13–14, 21.
20. 2 Nifae 31:5; tagai foi i le Alema 7:14.
21. Tagai Malaki 4:5–6; Ioane 15:9–13; Mosaea 25:18; Helamana 11:21; tagai foi ia Russell M. Nelson, “Hope of Israel” (faigalotu a le autalavou i le lalolagi atoa, 3 Iuni, 2018), HopeofIsrael.ChurchofJesusChrist.org; Russell M. Nelson, “O Le Faapotopotoina o Isaraelu ua Faataapeapeina,” *Liahona*, Nov. 2006, 79–82.

22. Salamo 80:1.
23. Ioane 21:15–17; tagai foi i le mataupu atoa.
24. Ieremia 23:4.
25. Tagai i le Nauma 3:18.
26. Tagai i le Ieremia 23:1; 50:6, 44.
27. Tagai i le Isaia 56:11; Esekielu 34:2–6.
28. Tagai i le Esekielu 34:2–6.
29. Ioane 10:13.
30. 3 Nifae 14:15; tagai foi i le Mataio 7:15; Alema 5:60.
31. Tagai i le 2 Nifae 9:10–12. E ala i le faatolaloina o le oti faaletino ma le vavae ese faaleagaga, ua mafai ai e le Tamai Mamoe a le Atua ona faapotopotoina ia mea uma ina ia i ai, i le taimi nei ma le faavavau, se Leoleo Mamoe e tasi.
32. Mose 5:7–8.
33. Kenese 22:7–8; tagai foi i le Iakopo 4:5.
34. Ioane 1:29; 1 Nifae 11:21.
35. 1 Nifae 11:21, 27.
36. Mosaea 14:6; tagai foi i le Isaia 53:6.
37. Alema 7:7, 14–15.
38. Conversation with Pornthip “Tippy” Coyle, Feb. 2019, faaagaina i le faatagaga.
39. “Pele i le Leoleo Mamoe,” *Viiga*, nu. 135. O isi viiga ia e faailoa mai ai lo tatou Leoleo Mamoe ma Ana mamoe e aofia ai [viiga] nei: “The Lord My Pasture Will Prepare,” *Hymns*, no. 109:
*The Lord my pasture will prepare
 And feed me with a shepherd’s care.
 His presence will my wants supply,
 And guard me with a watchful eye.
 My noonday walks he will attend
 And all my silent midnight hours defend.
 “Ia ‘Ou Aoao Atu,” Viiga, nu. 176:
 Au mamoe se ou te su’e;
 Ma aumai ia te oe.
 Le Tama e ou te leoleo;
 Ma fafaga i latou.
 “O Mai Alo o le Atua,” Viiga, nu. 200:
 Le galuega nei ua fai,
 Isaraelu toe aumai,
 Ma aumai i Siona e viia le Alii.
 O mai mamoe ua se, faalogo i le Leoleo.*
40. 1 Nifae 14:14; tagai foi i le 1 Nifae 13:35, 37; “O tusiga] manino ma pele [o le a] . . . oo mai . . . e ala mai i le meaalofo ma le mana o le Tamai Mamoe. . . . Afai [tatou] te tumau e oo i le iuga . . . o le a faalaina [i tatou] i le malo tumau-faavavau o le Tamai Mamoe.”
41. Isaia 40:11.
42. Helamana 6:5.
43. Tagai i le Faaaliga 21:27.
44. Tagai i le Faaaliga 15:3; Mataupu Faavae ma Feagaiga 133:56.
45. Tagai i le Faaaliga 19:9; Mataupu Faavae ma Feagaiga 58:11; tagai foi i le Faaaliga 7:17: “Aua o le Tamai Mamoe . . . na te fafaga ia i latou, ma taitai ia te i latou i puna o vai ola; e soloiescina foi e le Atua o loimata uma nai o latou mata”; Faaaliga 22:1: O le “vaitafe manino o le vai o le ola, e manino e pei o le maa tioata, ua tafe ifo mai le nofoalii o le Atua ma le Tamai Mamoe.”
46. Helamana 15:13.
47. Tagai i le Moronae 10:32–33.
48. Faaaliga 5:12.
49. Mataupu Faavae ma Feagaiga 109:79.



SAUNIA E ELDER DAVID A, BEDNAR
O Le Korama a Aposetolo e Toasefululua

Saunia e Maua Mea Manaomia Uma

O le a oo mai faamanuiaga tauia pe a tatou tauivi e faataunuu lo tatou tiutetauave faaletagata lava ia e aoao ma fiafia i le talalelei toefuataina a Iesu Keriso.


O polokalama ma gaoioga a Le Ekalesia a Iesu Keriso o le Au Paia o Aso e Gata Ai ua atili faatotonugalemuina i le aiga ma lagolagoina e le Ekalesia, e pei ona faamaoniaina i faasologa o fetuunaiga na faasilasila atu talu ai nei i konafesi aoao. Ua fautuaina i tatou e Peresitene Russell M. Nelson: “E anoa-noai mea o le a oo mai. . . . Taumafa au fualaaui vaitamini. Ia lava sau malologa. O le a faafiafiaina.”¹

Ou te tatalo ma valaaulia le fesoa-soani a le Agaga Paia a o tatou iloiloaina

faatasi nisi o taunuuga autu o aafiaga o nei fetuunaiga faifai pea i le Ekalesia toefuataina a le Alii.

Aoaoina o le Talalelei e Faatotonugalemu-i-le-Aiga ma Lagolagoina-e-le-Ekalesia

Sa avea a’u ma Elder Craig C. Christensen ma se soa i se konafesi faaletaitai perisitua talu ai nei, ma sa ia faaagaina ni fesili faigofie se lua e faa-mamafa ai le mataupu faavae o le faa-totonugalemu i le aiga ma lagolagoina e





le Ekalesia. Sa ia fautuaina e faapea nai lo le toefoi atu i o tatou aiga pe a maca sauniga Lotu i le Aso Sa ma fesili, “O a mea sa e aoaoina e uiga i le Faaola ma Lana talalelei ananei i le lotu?” e tatau ona tatou fesili atu i a tatou sauniga i le Ekalesia, “O a mea na e aoaoina e uiga i le Faaola ma Lana talalelei i leni vaiaso i totonu o lou aiga?” O le tausiga lelei o le aso Sapati, o le mataupu aoaoina fou, ma le faasologa o sauniga ua toefetuunai ua fesoasoani uma ia i tatou ia aoao le talelelei i totonu o o tatou aiga ma le lotu.

Ua i ai i tagata taitasi o Le Ekalesia a Iesu Keriso o le Au Paia o Aso e Gata Ai se tiutetauave faaletagata lava ia e aoao ma ola i aoaoga a le Alii ma ia maua sauniga o le faaolataga ma le faaeaga i le pule e tatau ai. E le tatau ona tatou faamoemoe i le Ekalesia o se faalapotopotoga e aoao pe ta’u mai ia i tatou mea uma tatou te manaomia ona iloa ma faia ia avea ai ma soo tuuto ma tumau ma le lototoa e oo i le iuga.² Ae, o lo tatou tiutetauave patino o le aoao lea o mea e tatau ona tatou aoaoina, ia ola e pei ona tatou iloa e tatau ona tatou ola ai, ma ia avea ma tagata ua finagalo le Matai ia avea ai i tatou. Ma o o tatou aiga o le faatulagaga sili lea mo le aoaoina, ola ai ma le avea ai.

A o tamaitiiti, sa aoao ai Iosefa Samita e uiga i le Atua mai lona aiga. O ana taumafaiga ia iloa le finagalo o

le Atua mo ia na mafua ai ona sailiili Iosefa mo le upumoni mai le tele o lotu eseese Kerisiano, mafaufau loloto ma le filiga i tusitusiga paia, ma tatalo ma le faamaoni i le Atua. Ina ua toefoi atu le taulealea o Iosefa Samita i lona aiga mai le Vao Paia i le taimi lava na maca ai ona faali atu le Tama ma le Alo, sa ia muamua lava talanoa i lona tina. Ma a’o ia “faalagolago atu i le magalafu, sa fesili atu [lona] tinā po o le a le mea ua tupu. Sa tali atu [Iosefa], ‘Aua e te popole, o loo lelei mea uma—o loo lelei lava a’u.’ Ona [ia] fai atu lea i [lona] tinā, ‘Ua ou iloa nei mo a’u lava ia.’”³ O le aafiaga o Iosefa ua maua ai se mamana mamana o le aoaoina lea e tatau ia i tatou taitoatasi ona mulimuli ai. E manaomia foi ona tatou iloa mo i tatou lava ia.

O le faamoemoega laualuga lava o le fuafuaga a le Tama Faalelagi e mo Ana fanau ia avea atili e faapei o Ia. O le mea lea, ua Ia tuuina mai ai ia i tatou ni avanoa taua e tuputupu a’e ai ma alualu i luma. O lo tatou tautinoga e aoao ma ola e tusa ma le upumoni ua faatuputeleina le taua i se lalolagi o loo “vāvāo”⁴ ma ua matua faateteleina le fenumiai ma le amioleaga. E le mafai ona tatou faamocmoe e tau na ona auai i sauniga a le Ekalesia ma auai i polokalama ma faapena ona maua ai uma atina’ega faaleagaga ma le puipuiga o le a tatou mafai ai ona “tetea atu pe a oo i le aso vale.”⁵

“Ua i ai i matua se tiute paia e tausia a latou fanau i le alofa ma le amiotonu.”⁶ E fesoasoani atu taitai musuia o le Ekalesia, o faiaoga, ma gaoioiga i taumafaiga a tagata taitoatasi ma aiga ia tuputupu a’e faaleagaga. Ma e ui tatou te manao-mia uma le fesoasoani e fetaomi ai i luma i le ala o feagaiga, ae o le tiutetauave sili lava mo le atia’eina o le malosiaga faaleagaga ma le tumau mausali ua taoto lea i luga o i tatou taitoatasi.

Manatua, le manao o Nifae, le atalii o le perofeta o Liae e fia vaai, faalogo, ma iloa mo ia lava e ala i le mana o le Agaga Paia mea sa aoaoina e lona tama i le faaaliga o le laau o le ola. Sa manino lava le manaomia e Nifae ma sa faamauina i lona talavou e ala i le faataitiga ma aoaoga a ona “matua lelei.”⁷ Ae, e pei o Iosefa Samita, sa ia naunau e aoao ma iloa mo ia lava.

Afai na o le pau le mea e te iloa ma ou iloa e uiga ia Iesu Keriso ma Lana talalelei toefuataiina o mea e aoao mai e isi tagata pe ta’u mai ia i tatou, o lona uiga o le faavae o a tatou molimau ia te Ia ma Lana galuega mamalu i aso e gata ai o loo fausia i luga o le oneone.⁸ E le mafai ona tatou faalagolago atoa atu pe nono mai le malamalama ma le iloa o le talalelei mai i isi tagata—e oo lava ia i latou tatou te alolofa ma faatuatuaia.

Sa aoao mai ma le taua tele e le Perofeta o Iosefa Samita e faapea e

manaomia e tagata taitoatasi o le Au Paia o Aso e Gata Ai ona malamalama mo ia lava “i mananu ma faamoemoega o le Atua i lo tatou o mai ai i lenei lalolagi.”⁹

“Pe mafai ona tatou faitau ma malamalama i mea uma ua tusia mai aso o Atamu, i le fesootaiga o le tagata i le Atua ma agelu i se olaga i le lumanai, e itiiti lava sina mea tatou te iloa e faatatau i ai. O le faitau i aafiaga o isi, po o faaaliga na tuuina atu ia i *latou* e le mafai ona aumaia ia i *tatou* se malamalama atoatoa e uiga i lo tatou tulaga ma le sootaga moni i le Atua. *O le malamalama i nei mea e na o le pau le ala e maua ai o aafiaga ia e auala mai i sauniga a le Atua ua faatuina mo lena faamoemoega.*”¹⁰

O le mafai ai ona ausia o lenei faamoemoega faaleagaga silisili mo tagata taitoatasi ma aiga o se tasi lea o mafuaaga autu o polokalama ma gaioiga a Le Ekalesia a Iesu Keriso o le Au Paia o Aso e Gata Ai ua atili faatotonugalemuina i le aiga ma lagolagoina e le Ekalesia, i lenei vaitau faapitoa o le tisipenisione o le atoaga o taimi.

O Aafiaga o le Aoaina e Faatotonugalemu-i-le-Aiga ma Lagolagoina-e-le-Ekalesia

Se’i o’u aoteleina atu ni nai aafiaga autu o le aoaina o le talalelei lea ua faateleina atili le faatotonugalemuina i le aiga ma lagolagoina e le Ekalesia.

O le nofoaga autu sili lava e aoao ai faifeautalai, o totonu o o tatou aiga; o nofoaga autu e aoao ai faifeautalai lona lua o loo i ai i Provo, Manila, Aai o Mekisiko, ma isi nofoaga. O a tatou vasega o le Aoga Sa sili ona aoga, o suega faaletagata lava ia ma faaleaiga i nofoaga o loo tatou aumau ai; e aogā ae e lona lua, o vasega ia o le Aoga Sa o loo faia i o tatou falelotu.

O nofoaga autu o talafaasolopito o aiga ua i ai nei i totonu o o tatou aiga. O le lagolagosua faaopoopo mo a tatou galuega sailiili o talafasolopito o aiga o loo maua foi i o tatou falelotu.

O vasega taua o sauniuniga mo le malumalu e tupu i totonu o o tatou aiga; e taua ae o vasega lona lua mo sauniuniga mo le malumalu e mafai foi ona faatautaia faavaitaimi i o tatou falelotu.

O le faia o o tatou aiga ma malutaga paia ma saogalemu lea e mafai ai ona tatou “tutu i nofoaga paia”¹¹ e taua i nei aso e gata ai. Ma e pei ona taua le aoaina e faatotonugalemu-i-le-aiga ma lagolagoina-e-le-Ekalesia mo lo tatou malosiaga faaleagaga ma le puipuiga i aso nei, o le a sili atu foi ona taua tele i le lumanai.

Aoaina ma le Sauniuniga mo le Malumalu e Faatotonugalemu-i-le-Aiga ma Lagolagoina-e-le-Ekalesia

Faamolemole ia mafaufau pe faapefea ona faatatau le mataupu faavae o le “faatotonugalemu i le aiga ma lagolagoina e le Ekalesia” i a tatou sauniuniga faaletagata lava ia ma le agavaa e maua ia sauniga paia ma feagaiga i totonu o le maota o le Alii.

O le mea moni, e sili atu ona aoga sauniuniga mo le malumalu i totonu o o tatou aiga. Ae e toatele tagata o le Ekalesia e le o mautinoa po o a mea e mafai ma mea e le mafai ona talanoaina ma le talafeagai e faatatau i aafiaga o le malumalu i fafo mai o le malumalu.

Sa faamatala mai e Peresitene Ezra Taft Benson le mafuaaga o loo tupu ai lenei lē mautinoa:

“O le malumalu o se nofoaga paia, ma o sauniga i totonu o le malumalu o ni mea paia. Ona o lona paia, o nisi taimi tatou te mumusu ai e fai atu se faamatalaga e uiga i le malumalu i a tatou fanau ma fanau a fanau.

“O se taunuuga, o le toatele e le o atiaaina se manao moni e o atu i le malumalu, ae pe afai foi latou te o atu i ai iina, latou te faia e aunoa ma se malamalamaaga tele e saunia ai i latou mo matafaioi ma feagaiga latou te ulu atu i ai.

“Ou te talitonu o se malamalamaaga lelei po o se iloa o le a le mafaatusalia le fesoasoani tele i le saunia o o tatou talavou mo le malumalu . . . [ma] o le a faaosofia i totonu o i latou se manao e saili o latou faamanuiaga o le perisitua e pei lava ona sailia ai e Aperaamo.”¹²

E lua ni taiala autu e mafai ona fesoasoani ia i tatou e ausia ai lea malamalama lelei na faamamafa mai e Peresitene Benson.



Taiala #1 *Ona tatou te alolofa i le Alii, e taua lava ona tatou talanoa e le aunoa i le faaaloalo e uiga i lona maota paia. E le taua ona tatou ta’u atu pe faamatala foi faatusa faapitoa e fesootai ma feagaiga tatou te maua i totonu o sauniga paia o le malumalu. Pe tatou te talanoaina foi faamatalaga paia ua tatou folafola patino atu i totonu o le malumalu e le faailoa atu.*

Taiala #2 *O le malumalu o le maota o le Alii. O mea uma i totonu o le malumalu e faasino atu i tatou i lo tatou Faaola, o Iesu Keriso. E mafai ona tatou talanoaina faamoemoega autu ma aoaoga faavae ma mataupu faavae e fesootai ma sauniga ma feagaiga o le malumalu.*

Na fautua mai Peresitene Howard W. Hunter: “Ia tatou faasoa atu i a tatou fanau ia lagona faaleagaga tatou te maua i totonu o le malumalu. Ma ia tatou aoao atu ia te i latou i se naunautaga sili atu ma sili atu ona toamalie, mea e mafai ona tatou ta’u atu ma le talafeagai e uiga i faamoemoega o le maota o le Alii.”¹³

I augatupulaga mai i le Perofeta o Iosefa Samita ia Peresitene Russell M. Nelson, o faamoemoega faaleaoaoga faavae o sauniga ma feagaiga o le malumalu ua aoaina i auililiga e taitai o le Ekalesia.¹⁴ O se puna tele o punaoa o loo i ai i lomiga, o leo, atavitiu, ma isi mananu e fesoasoani ia i tatou ia aoao e uiga i sauniga amata, faaeega paia, faaipoipoga, ma isi sauniga o faamauga.¹⁵ O loo maua foi faamatalaga e uiga i le mulimuli i le Faaola e ala i le



mauaina ma le faamamaluina o feagai-
ga ia tausia le tulafono o le usiusitai,
le tulafono o le taulaga, le tulafono o
le talalelei, le tulafono o le ola mama,
ma le tulafono o le faapaiaga.¹⁶ E tatau
ona faamasani tagata uma o le Ekale-
sia i anomea lelei tele o loo maua i le
temples.ChurchofJesusChrist.org.

Na faamamafa mai e Peresitene
Russell M. Nelson le paleni taua i le va
o le natura paia o sauniga o le malu-
malu ma faamatalaga taua e uiga i
malumalu o loo lolomi ma faasalalauina
e le Ekalesia ia e sa'olele, talafeagai, ma
maua mo tagata lautele. Sa ia faama-
talaina mai: “Ou te fautua atu i tagata
o le ekalesia . . . ia faitau atu o loo i le
Taiala i Tusitusiga Paia e fesootai i le
malumalu, e pei o le ‘Faauu,’ ‘Feagaiga,’
‘Taulaga,’ ma le ‘Malumalu.’ Atonu e fia
manao se tasi e faitau le Esoto, mataupu
26–29, ma le Levitiko, mataupu 8. O
le Feagaiga Tuai, faapea ai foi ma tusi
a Mose ma le Aperaa mo i le Penina
Tautele, o loo faamamafa ai le amataga
faanamua o galuega faalemalumalu ma
le natura o le tumau o ona sauniga.”¹⁷

Mafaufau la pe a fesili sou atalii
po o se afafine, “Sa ta’u mai e se tasi
ia te a’u i le aoga e i ai ofu uigaese e
ofu i totonu o le malumalu. E sa’o
lena mea? Ua maua se ata puupuu i
luga o le temples.churchofjesuschrist.
org ua faaulutalaina “Laei Paia o le
Malumalu.” O lenei punaoa lelei tele

ua faamalamalama mai ai le auala na
talai ai e alii ma tamaitai i aso anamua
musika paia, ituaiga eseese o tatalo,
laei faafaatusa faalelotu, o tãga, ma
sauniga e faailoa atu o latou lagona sili
ona patino o le tuuto atu i le Atua. O
lea, e lagolago ai e le Ekalesia sauni-
uniga e faatotonugalemu i le aiga mo
faamanuiaga mamalu o le malumalu e
ala i aoaoga atu ma punaoa ofoofogia
e pei o lenei vitio. Ua tele faamatalaga
aoga ua avanoa mo outou.¹⁸

A o tatou tauivi ai e savavali i le
agamalu o le Agaga o le Alii,¹⁹ o le a
faamanuiaina i tatou ia malamalama ma
ausia i totonu o o tatou aiga le paleni
talafeagai i le va o mea e talafeagai ma
mea e le talafeagai ona talanoaina e
uiga i sauniga ma feagaiga paia o le
malumalu.

Folafolaga ma le Molimau

Ou te masalo o nisi o outou o loo
tuufesili pe mata o lou aoaoina o le tala-
lelei e mafai moni ona faatotonugalemu
i le aiga ma lagolagoina e le Ekalesia.
Masalo pe na o oe le tagata o le Ekale-
sia i lou aiga, pe o i ai foi sou toalu e
le lagolago, po o se matua nofotoatasi,
pe o nofo na o oe o se tagata nofofua
po o se tasi o le Au Paia o Aso e Gata Ai
ua tete’a ma le toalu, ma atonu o loo
i ai ni au fesili e uiga i auala e faatatau
ai nei mataupu faavae ia te oe. Atonu o
oulua o se tane ma se ava o loo tilotilo

i le tasi ma le isi ma fesili, “E mafai ona
ta faia lenei mea?”

Ioe, e mafai ona oulua faia! Ou te
folafola atu o le a tafe atu faamanuiaga
gafatia ma iloa manino i lou olaga. O le
a matala faitotoa. O le a susulu le mala-
malama. O le a faateleina lou gafatia e
tumau ma le filiga ma le onosai.

Ou te molimau atu ma le olioli
tele o le a oo mai faamanuiaga tauia
pe a tatou tauivi e faataunuu lo tatou
tiutetauave faaletagata lava ia e aoao
ma fafia i le talalelei toefuataina a Iesu
Keriso. E mafai moni ona tatou “saunia
mea manaomia uma.”²⁰ Ou te folafola
atu ai ma molimau atu i le suafa paia o
le Alii o Iesu Keriso, amene. ■

FAAMATALAGA

1. Russell M. Nelson, i le “Latter-day Saint Prophet, Wife and Apostle Share Insights of Global Ministry,” Newsroom, Oct. 30, 2018, newsroom.ChurchofJesusChrist.org.
2. Tagai i le Mataupu Faavae ma Feagaiga 121:29.
3. Iosefa Samita—Talafaasolopito 1:20.
4. Mataupu Faavae ma Feagaiga 45:26.
5. Efeso 6:13.
6. O Le Aiga: O Se Folafolaga i le Lalolagi,” *Liahona*, Me 2017, 145.
7. 1 Nifae 1:1.
8. Tagai i le Mataupu 7:24–27; 3 Nifae 14:24–27; 18:13.
9. *Aoaoga a Peresitene o le Ekalesia: Iosefa Samita* (2007), 211.
10. *Aoaoga: Iosefa Samita*, 419; ua faaopoopo le faamamafa.
11. Mataupu Faavae ma Feagaiga 101:22.
12. *Aoaoga a Peresitene o le Ekalesia: Ezra Taft Benson* (2014), 174; faaopoopo le faamamafa; tagai foi ia Ezra Taft Benson, “What I Hope You Will Teach Your Children about the Temple,” *Ensign*, Aug. 1985, 8.
13. *Aoaoga a Peresitene o le Ekalesia: Howard W. Hunter* (2015), 165.
14. Tagai, mo se faaitaiga, ia James E. Talmage, *The House of the Lord* (1912), 99–101.
15. Tagai ia James E. Talmage, *The House of the Lord*, 89–109; Russell M. Nelson, “Sauniuniga a le Tagata Lava Ia mo Faamanuiaga o le Malumalu,” *Liahona*, Iulai 2001, 37–39; Boyd K. Packer, *The Holy Temple* (1980), 153–55.
16. Tagai i le *The Teachings of Ezra Taft Benson* (1988), 121; James E. Talmage, *The House of the Lord*, 100; *Saunia e Ulufale Atu i le Malumalu Paia* (tamaitusi, 2002).
17. Russell M. Nelson, “Ia Saunia mo Faamanuiaga o le Malumalu,” *Liahona*, Oke. 2010, 47.
18. Mo se faaitaiga, maimoa i se vitio o le maimoaga o le Malumalu i Roma Italia, pe sutesue aoaoga faaperofeta e uiga i malumalu (tagai temples.ChurchofJesusChrist.org).
19. Tagai i le Mataupu Faavae ma Feagaiga 19:23.
20. Mataupu Faavae ma Feagaiga 109:15.



SAUNIA E ELDER KYLE S. MCKAY
O Le Fitugafulu

O Le Agalelei Vave o le Atua

E ui lava o loo tatou faatalitali ma le onosai i le Alii, ae e i ai faamanuiaga faapitoa e oo vave mai ia i tatou.

I le tele o tausaga ua mavae, na sau ai lo'u atalii e lima tausaga le matua ma fai mai, "Tama, ua ou iloa se mea. Ua ou iloina nei o le *toetiiti* mo oe o se taimi umi tele mo a'u."

Pe a fofogaina mai e le Alii po o Ana auauna ni faamatalaga e pei o le, "Ua le toe tele ni aso mai le taimi nei" po o le "Ua le o toe mamao le taimi," e mafai ona faauigaina moni lava o se olaga atoa pe umi atu.¹ O Lana taimi, ma o Lana taimi masani, e ese mai o tatou taimi. O le onosai o le ki lea. A aunoa ma lena mea, e le mafai ona tatou atiae pe faaalua le faatuatua i le Atua i le ola ma le olataga. Ae o la'u savali i le asō e faapea, e ui lava o loo tatou faatalitali male onosai i le Alii, ae e i ai faamanuiaga faapitoa e oo vave mai ia i tatou.

Ina ua pu'eina Alema ma lona nuu e sa Lamanā, sa latou tatalo mo se laveaiga. Sa le'i vave ona laveaiina i latou, ae a o latou faatalitali ai ma le onosai mo le laveaiga, na faaalua e le Alii Lona agalelei i ni faamanuiaga vave faapitoa. Na vave ona Ia faamalulūina loto o tagata sa Lamanā ina ia latou lē faasiotia i latou. Sa Ia faamalosia foi le nuu o Alema ma faamāmā a latou avega.²

Ina ua i'u ina laveaiina i latou, sa latou malaga atu i Saraemila, lea na latou toe faamatalaina ai lo latou aafiaga i se aofia na maofa. Sa maofa le nuu o Saraemila, ma "ina ua latou mafaufau i le *agalelei vave o le Atua*, ma lona mana i le laveaiina o Alema ma ona uso . . . mai le pologa, sa latou sii ae o latou leo ma momoli atu le faafetai i le Atua."³

O le agalelei vave o le Atua e oo mai i tagata uma o e valaau atu ia te Ia ma le manatu tonu i ai ma le faamoemoega atoatoa o le loto. E aofia ai i lenei mea i latou o e tagi atu ma le faananau tele,

pe a foliga mai ua matuai mamao tele le laveaiga ma ua foliga ua faaumiumi puapuaga, e oo lava i le faateteleina.

Na faapena foi se perofeta talavou o le sa puapuaga i le toetoe lava a maliu ai i le malulu o le lua a o le'i tagi atu: "Le Atua e, o fea o i ai oe? . . . O le a le umi e taofia ai lou aao . . . ? Ioe, le Alii e, o le a le umi . . . ?"⁴ I le tali mai, sa le'i vave lavea'ia e le Alii ia Iosefa, ae sa vave ona Ia fofoga atu le filemu.⁵

E tuuina mai foi e le Atua le faamoemoe vave mo le laveaiina mulimuli ane.⁶ E tusa lava po o le a, po o fea foi, o Keriso ma e ala atu ia Keriso o loo i ai pea le faamoemoe e susulu pupula mai i o tatou luma.⁷ I se taimi vave i o tatou luma atu.

E le gata i lea, ua Ia folafola mai: "O lo'u *agalelei* e le mavae atu lea nai ia te oe."⁸

E sili i mea uma, o le alofa o le Atua e vave lava. Faatasi ai ma Paulo, ou te molimau atu e leai se mea e mafai ona "faatelescina mai i tatou i le alofa o le Atua, o loo ia Keriso Iesu."⁹ E oo lava i a tatou agasala, e ui atonu latou te faatelescina i tatou mai Lona Agaga mo se taimi, ae e le mafai ona faatelescina i tatou mai le tumau ma le vave o Lona alofa paia faamatua.

O nisi nei o auala e "faamanuia vave mai lava o ia ia te [i tatou]."¹⁰ Ia, ina ia aumaia nei mataupu faavae i le taimi nei ma faalatalata mai, ou te faasoia atu ai ia te outou ni aafiaga o ni tagata se toalua o o la olaga e tutu o ni molimau o le agalelei vave o le Atua.

Mai lava le taimi sa talavou ai o ia, sa tauivi Emile ma vaisu o vailaau



faasaina. O le faataitai i ai na oo atu ai i mausa, ma o mausa na i'u ina avea ma vaisu lea na faapologaina ai o ia mo le tele o tausaga, e ui na i ai ni vaitaimi lelei. Na natia ma le faaeteete e Emile ona faafitauli, aemaise lava i le mavae ai o le avea o ia ma se avā ma se tina.

O le amataga o lona laveaiga na le'i lagonaina e pei o se laveaiga. O le tasi le minute, sa faia ni siaki masani faafomai a Emile, a o le isi [minute] ua avatu o ia i se taavale a le falemai i se nofoaga e togafiti ai tagata ua taofia. Sa amata ona ia popolevale a o ia mafaufau ai i le valavala ai ma lana fanau, lona toalua, lona aiga.

I lena po, i le tuuatoatasi ai i se potu malulu ma pogisa, sa faapupuu ai Emile i luga o lona moega ma tagima-susu. O lona tomai e mafaufau lelei ai na faaitiitia seia i'u lava ina, faatoilalo-ina le atuatuvaile, fefe, ma le leaga o le pogisa i lena potu ma i lona agaga, sa mafaufau moni lava Emile o le a oti o ia i lena po. Tuuatoatasi.

I lena tulaga atuatuvaile, na i'u lava ina maua e Emile le malosi e oso ese ai mai le moega ma tootuli ifo i ona tulivae. E aunoa ma se tāga faafoliga ia sa avea i nisi taimi ma vaega o tatalo na faia muamua, sa lafoai atoa atu e Emile o ia lava i le Alii a o ia aioi atu ma le faananau, “Le Atua pele, ou te manao-mia Lau Afio. Faamolemole fesoasoani mai ia te a'u. Ou te le fia tuua na o a'u. Faamolemole, fesoasoani mai ia ou lavātia lenei po.”

Ma i lena lava taimi, e pei ona sa Ia faia ia Peteru, na faaloaloa atu e Iesu Lona aao ma pu'e mai lona agaga 'a tofatumoanaina.¹¹ Na oo mai i luga o Emile se toafimalie, lototele, mautinoa, ma le alofa ofoofogia. Sa lei toe malulu le potu, sa ia iloa ua le o toe tuua na o ia, ma mo le taimi muamua lea talu mai le taimi sa 14 ai ona tausaga, sa iloa e Emile o le a lelei mea uma. A o ia “ala mai i le Atua,”¹² sa moe Emile ma le filemu. Ma ua faapea ona tatou vaai ai “afai tou te salamo ma lē faamaaaina o outou loto, o le taimi nei lava o le a faataunuu ai le fuafuaga tele o le togiloina ia te outou.”¹³

Sa umi se taimi o le faamaloloina ma le laveaiina tumau o Emile—o



masina o togafitiga, aoaoga, ma fau-tuaga, lea na lagolagoina ai o ia ma o nisi taimi na tauaveina e Lona agalelei. Ma sa faaauau atu pea lena agalelei mo ia a o ia ulu atu i le malumalu faatasi ma lona toalua ma le fanau ina ia faamauiina faatasi e faavavau. E pei o le nuu o Saraemila, ua tuuina atu nei e Emile le faafetai a o ia tomanatu ai i le agalelei vave mai o le Atua atoa ai ma Lona mana i le laveaiina mai o ia mai le nofopologa.

Ia, mai le olaga o se isi toa e talitonu. I le aso 27 o Tesema, 2013, na faafeiloai ai ma le fiasia e Alicia Schroeder ana uo pele, o Sean ma Sharla Chilcote, o ē na faafuasei lava ona tutu atu i lona faitotoa. O Sean, sa avea foi ma epikopo a Alicia, na tuuina atu ia te ia lana telefoni feaveai ma fai atu ma le faamaoni, “Alicia, ma te alofa ia te oe. E tatau ona e taliina le valaau lenei.”

O le toalua o Alicia, o Mario, sa i luga o le telefoni. Sa i ai o ia i se eria maotua ma nisi o le la fanau i se malaga ua leva ona faamoemoeina e alu i luga o le kiona. Sa i ai se faalavelave matautia na tupu. Sa manu'a tigaina Mario, ma o le la atalii e 10 tausaga le matua, o Kalepo, ua maliu. Ina ua ta'u atu e Mario ma loimata ia Alicia le maliu o Kalepo, sa lofituina o ia i le te'i ma le fefe e toaititi i tatou o le a iloina. Na pa'u ai o ia i lalo. O le pipili ai i le tiga lēmafaamatalaina, sa lē mafai ai e Alicia ona tautala pe minoi.

Sa vave ona siina o ia i luga e Epikopo ma Sister Chilcote ma opoina o ia. Sa latou fetagisi ma matua faanoa-noa faatasi mo se taimi. Ona tuuina atu lea e Epikopo Chilcote se faamanuiaga ia Alicia.

O le mea na sosoo ai e le mala-malama i ai se tasi e aunoa ma sina malamalamaaga e uiga i le Togiola a Iesu Keriso ma le agalelei vave o le Atua. Na tuuina lemu e Epikopo Chilcote ona lima i luga o le ulu o Alicia ma, ma se leo tetetete, na amata ona tautala. Na lagona e Alicia ni mea se lua e pei o fetalai e le Atua Lava Ia. Muamua, sa ia lagona lona igoa, Alicia Susan Schroeder. Ona ia faalogo lea ua talosagaina e le epikopo le pule mai le Atua Silisiliese. I lena lava taimi—i le faaleoina o lona igoa ma le mana o le Atua—sa faatumulia Alicia i se filemu e le mafaamatalaina, alofa, mafanafana, ma le *olioli*. Ma sa faaauau ai pea ia te ia.

Ioe o le taimi nei, o loo faavavau pea Alicia, Mario, ma lo latou aiga ma misia Kalepo. E *faigata!* Soo se taimi lava ou te talanoa ai ia te ia, e faatumulia mata o Alicia i loimata a o ia faamatalaina lona alofa tele ma lona misia tele o lana tama tama. Ma e tumau pea le susu o ona mata a o ia faamatalaina le lagolagoina o ia e le Laveai Sili i ala o ona tulaga faigata uma, e amata mai i Lona agalelei vave i le taimi o ona faanoanoaga matuitui ma faaauau ai pea i

le taimi nei i le faamoemoe susulu o se faatasiga matagofie “e le o toe mamao ni aso o i luma.”

Ua ou iloaina o nisi taimi e fatuina ai e aafiaga o le olaga le fenumiai ma fesouaiga ia e mafai ona faigata ai ona maua, pe iloa, pe faatumauiina le ituaiga o toomaga lea na oo mai ia Emile ma Alicia. Ua ou oo foi i taimi faapea. Ou te molimau atu, i le aluga o na taimi, o le faasaoina o i tatou o se faailoaga agamalu ma mamana lea o le agalelei vave o le Atua. Manatua, o Isaraelu anamua na i’u foi ina laveaiina e “lena lava Atua e tasi o le na faasaoina i latou”¹⁴ i lea aso ma lea aso.

Ou te molimau atu o Iesu Keriso o le Laveai Sili, ma i Lona suafa, ou te folafola atu ai afai e te liliu atu ia te Ia ma le manatu moni ma le faamoemoega atoatoa o le loto, o le a Ia laveaiina outou mai mea uma o loo taufaamata’u e faaitiitia pe faatamaiaina lou olaga po o le olioli. Atonu o lena laveaiga o le a umi atu nai lo lou manao—masalo o le olaga atoa pe umi atu. O lea, ina ia tuuina atu ia te outou le mafanafana, lototele, ma le faamoemoe, e lagolago ai ma faamalosia outou i lena aso o le laveaiga mulimuli, ou te faamalo atu ia te outou ma molimau atu i le *agalelei vave o le Atua* i le suafa o Iesu Keriso, amene. ■

FAAMATALAGA

1. Tagai, mo se faaitaiga, Alema 7:7; 9:26; Mataupu Faavae ma Feagaiga 88:87.
2. Tagai i le Mosaea 23:28–29; 24:14–15.
3. Mosaea 25:10; ua faapoopo le faamamafa.
4. Mataupu Faavae ma Feagaiga 121:1–3.
5. Tagai i le Mataupu Faavae ma Feagaiga 121:7.
6. Tagai i le Alema 58:11: Ioe, ma sa oo ina asiasi mai le Alii lo tatou Atua ia i matou ma ni tautinoga o le a ia laveaiina i matou; ioe, . . . ma faatonu i matou ia matou faamoemoe mo le laveaiga mai ia te ia.” Tagai foi Mataupu Faavae ma Feagaiga 121:7–8.
7. Tagai i le “Ia Viia Oe le Atua, mo le Perofeta,” *Viga*, nu. 10.
8. Isaia 54:10; faapoopo le faamamafa.
9. Roma 8:39.
10. Mosaea 2:24.
11. Tagai i le Mataia 14:31.
12. Alema 5:7.
13. Alema 34:31.
14. 1 Nifae 5:15.



SAUNIA E ELDER RONALD A. RASBAND
O Le Korama a Aposetolo e Toasefululua

Fausia se ‘Olo o le Faaleagaga ma le Puipuiga

A tatou ola i le talalelei a Iesu Keriso, a tatou faalagolago atu i le Togiola a le Faaola ma fetaomi atu i luma ma le faatuatua, e faamalositia i tatou e faasaga i togafiti a le tiapolo.

O’u uso e ma tuafafine pele, a o taunuu mai ai lenei konafesi i lona faaiuga, ou te tuuina atu le faafetai i lo tatou Tama i le Lagi mo fautuaga, upumoni, ma faaaliga na fofogaina mai i lenei pulelao i aso e lua ua mavae. Ua aoaoina i tatou e auauna a le Atua ua valaauina e fofogaina mai Ana afioga paia. Ua faamanatu mai e le Alii ia i tatou i faaaliga o aso e

gata ai, “Pe i lo’u lava leo po o . . . [i] leo o a’u auauna, ua tutusa lava.”¹

I le vaavaai atu i lenei potopotoga toatele o le Au Paia, ma le mafaufau i tagata o loo maimoa mai i le konafesi aoao i le lalolagi atoa, ou te mafaufau i le faapotopotoina i le Tusi a Mamona ina ua faaali atu Iesu Keriso ia sa Nifae i le mavae ai o Lona faasatauroga. Sa





Ia aoao i latou i le talalelei ona fautua atu lea, “Ia outou o atu i o outou fale, ma mafaufau i mea ia na ou fai atu ai, ma ole atu i le Tamā, i lou igoa, ina ia outou malamalama.”²

“Ia outou o atu i o outou fale, ma mafaufau” o le laasaga e sosoo ai ina ia matuā faalolotoina upu a perofeta ma taitai o le Ekalesia ia na fofogaina i lenei nofoaga paia. O aiga e faatotonu-galemu-ia-Keriso o ‘olo ia mo le malo o le Atua i le lalolagi i se aso, e pei ona valoia, pe a “sasaa ai e [le tiapolo] i loto o le fanauga a tagata, ma faaosso i latou ia feita e faasaga i mea lelei.”³

Na fausia e tagata ‘olo i le talafaasolopito atoa ina ia taofia ai le fili i fafo. E masani lava, o na ‘olo e aofia ai se ‘olo puipui lea e [tutu] ai tagatavaai—e pei o perofeta—e lapatai mai e uiga i malosiaga taufaamatau ma osofaiga o le a oo mai.

I uluai taimi o paionia i Iuta, o le tamā o le tamāmatua o lo’u tama o Thomas Rasband ma lona aiga o nisi ia o uluai tagata na ulufale atu i le Vanu o Heber i Mauga matagofie o Wasatch i Iuta ma nofoiaina.

I le 1859, na fesoasoani Thomas e fausia le ‘olo o Heber, lea na fausia mo lo latou puipuga. O se fausaga faigofie o ogalaau vavae, na faatutu i talaane o le tasi i le isi, ma fau ai le pito i fafo o le ‘olo. O fale laau na fausia i totonu o le ‘olo e faaoga ai lona puipui masani. O le fausaga na maua uma ai le puipuga

ma le saogalemu mo na aiga paionia a o latou atiae o latou aiga ma tapuai atu i le Alii.

E faapena foi i tatou. O o tatou aiga o ‘olo ia e faasagatau atu i mea leaga o le lalolagi. I totonu o o tatou aiga tatou te o mai ia Keriso e ala i le aoao e mulimuli i Ana poloaiga, e ala i le suesueina o tusitusiga paia ma tatalo faatasi, ma e ala i le fesoasoani i le tasi ma le isi ia tumau i luga o le ala o feagaiga. O le faamamafa fou i suesuega faaletagata lava ia ma faaleaiga i totonu o le aiga e ala i le mataupu aoaoina *Sau, Mulimuli Mai ia te Au* ua mamanuina e “faalolotoina [ai] lo tatou liua ma fesoasoani ai ia te i tatou ia avea atili e faapei o Iesu Keriso.”⁴ O le faia o lea mea, o le a avea ai i tatou ma tagata e pei ona ta’ua e Paulo o “tagata fou”⁵ faatasi ma o tatou loto ma agaga ua ogatasi ma le Atua. Tatou te manaomia lona malosi e fetaiai ai ma ‘aloese ai mai osofaiga a le fili.

A o tatou ola ma le tuuto e oo mai ona o le faatuatua ia Iesu Keriso, o le a tatou lagonaina le i ai o le filemu o le Agaga Paia, o lē e taitai i tatou i le upumoni, musuia i tatou ina ia ola agavaa mo faamanuiaga a le Alii, ma molimau mai o loo soifua le Atua ma e alofa ia i tatou. E tupu mea uma nei i totonu o le ‘olo o o tatou lava aiga. Ae ia manatua, o o tatou aiga e malolosi e pei lava o le malosi faaleagaga o i tatou taitoatasi i totonu o aiga.

Na aoao mai Peresitene Russell M. Nelson, “I aso a sau, o le a lē mafai ona ola ai faaleagaga e aunoa ma le taiala, taitaiga, faamafanafanaga, ma le faatosi-naga faifai pea a le Agaga Paia.”⁶ I le avea ai ma perofeta soifua, tagatavaai, ma talifaaaliga a le Alii i lenei vaitaimi, o le tagatavaai i luga o le ‘olo o lo tatou malutaga, O Le Ekalesia a Iesu Keriso o le Au Paia o Aso e Gata Ai, na te iloa atu gaioiga a le fili.

Uso e ma tuafafine, o loo tatou tau ma Satani mo agaga o tagata. Na tusia lona o le taua i lo tatou muai olaga. Na liliu ese Satani ma le tasi vaetolu o fanau a lo tatou Tama i le Lagi mai i Ana folafolaga o le faecaga. Tālu mai lona taimi, o loo tau pea auauna a le fili ma [tagata] faamaoni o ē ua filifilia le fuafuaga a le Tama.

Ua iloa e Satani ua faitaulia ona aso ma e le’o toe lava se taimi. I lona atamai ma le taufaasese, o le a lē manumalo lava o ia. Peitai, o lana taua ia manumalo i o tatou agaga taitoatasi e faaaauu pea.

Mo lo tatou saogalemu, e tatau ona tatou fausia se ‘olo o le faaleagaga ma le puipuga mo o tatou lava agaga, o se ‘olo e le mafai ona ulufale mai i ai lē tiapolo e toatasi.

O Satani o se gata atamai, e tolotolo i totonu o o tatou mafaufau ma loto pe a tatou lē faamallosia lo tatou puipuga, feagai ma se lē fiala, pe ua leai se faamoemoe. Na te faaososo i tatou i viiga, o se folafolaga o le toafimalie, mafanafana, po o ni lagona lelei e lē tumau pe a faanoanoa. Na te ta’uamitonuina le faamaualuga, agaleaga, lē faamaoni, lē faamallicina, ma le ola lē mama, ma e i ai taimi e mafai ona tatou “te’a atu ma le toe lagonaina.”⁷ E mafai ona tuua i tatou e le Agaga. “E faapena ona olegia e le tiapolo o latou agaga, e ta’ita’i ifo ai i latou ma le faaeteete i seoli.”⁸

E faapena foi, e masani ona tatou lagonaina le malosi tele o le Agaga pe a tatou lagiina viiga i le Atua i upu faapenei:

*Le Atua le ‘olo malosi,
Le ‘olo e lē ma vaivai.
Na te fesoasoani mai,
Ne’i manumalo mea faigata.*⁹

A tatou fausiaina se ‘olo o le malo-siaga faaleagaga, e mafai ona tatou teenaina faaosoosoga a le fili, fulitua ia te ia, ma lagona le filemu o le Agaga. E mafai ona tatou mulimuli i le faataitiga a lo tatou Alii ma le Faaola, o lē, ina ua faaosoosoina i le vao, na fetalai atu “Satani e, ina alu ese ia oe i o’u tua.”¹⁰ E ao ona aoao i tatou taitoatasi e ala i aafiaga o le olaga pe faapefea ona faia lena mea.

O lena faamoemoega amiotonu o loo faamatalaina lelei i le Tusi a Mamona ina ua saunia e Kapeteni Moronae sa Nifāe e fetalai ma osofa-iga mai se autau Amalekia taufaasese, saua, fia manao i le pule. Na fausia e Moronae ‘olo e puipuia ai sa Nifāe “ina ia mafai ona latou ola mo le Alii lo latou Atua, ma ina ia mafai ona latou faatumauiina o le mea ua taua e o latou fili o le faamoemoe o Kerisiano.”¹¹ Na “mausali [Moronae] i le faatuatua ia Keriso,”¹² ma sa faamaoni “i le tausia o poloaiga a le Atua . . . ma le tetee atu i le amioletonu.”¹³

Ina ua o atu sa Lamana i le taua, sa latou ofo i sauniuniga a sa Nifāe, ma sa faatoilaloina i latou. Na faafetai sa Nifāe “i le Alii lo latou Atua, ona o lona mana le mafaatusalia i le laveaiina o i latou mai lima o o latou fili.”¹⁴ Na latou fausia ‘olo mo le puipuiga i fafo, ma sa latou fausia le faatuatua i le Alii o Iesu Keriso i totonu—loloto i o latou agaga.



O a nisi o auala e mafai ai ona tatou faamalosia i tatou lava i taimi faigata ina ia tatou avea ma “mea faigaluega i aao o le Atua e faataunuu ai lenei galuega tele.”¹⁵ Se’i tatou tagai i tusitusiga paia.

Tatou te usiusitai. Na poloai e le Alii le Tama ia Liae e toe auina atu ona atlii i Ierusalema e “saili talafaamaumau, ma aumai i latou i lalo iinei i le vao.”¹⁶ Sa le’i fesiligia lava e Liae; na te le’i tomanatu pe aisea ae pe faapefea foi. E faapena foi Nifae, o lē na tali atu, “O le a ou alu ma fai mea ua poloaiina e le Alii.”¹⁷

O tatou faatino ea i le usiusitai ma le loto i ai e pei o Nifae? Pe o tatou mananao ea e fesiligia poloaiga a le Atua e pei ona faia e uso o Nifae, o ē ona o le leai o se faatuatua na i’u ai ina la fulitua i le Alii? O le usitai, e faatinoina faatasi ma le “paia o le loto,”¹⁸ o le mea ua finagalo ai le Alii mai ia i tatou.

Tatou te faalagolago i le Alii, o lē na fetalai atu ia Iosua, a o ia sauni e taitai Isaraelu i le nuu folafolaina, “Ia e faamalosi ma loto tele; aua e te fefe, aua e te mata’u; aua o Ieova lou Atua o loo ia te oe i mea uma e te alu i ai.”¹⁹ Na faatuatuaina e Iosua na upu ma apoapoi atu i tagata: “Ina faapaiaina

ia outou e outou; aua o a taeao e faia e Ieova o vavega i o outou luma.”²⁰ Na vaeluaina e le Alii le vai o Ioritana, ma na faamutaina le fesēsēā’i o Isaraelu mo le 40 tausaga i le vao.

Tatou te tutu atu mo le upumoni e pei ona faia e le perofeta o Apinati i le Tusi a Mamona. I le pucina, ma aumaia i luma o le Tupu o Noa ma ana faitaulaga amioleaga, na aoao atu e Apinati Tulafono e Sefulu ma tala’i atu ma le mamana o le a “afio mai i lalo [Keriso] lava ia i totonu o le fanauga a tagata, ma . . . togiola e ia ona tagata.”²¹ Ona ia tautino atu lea, ma le faatuatua loloto i totonu o ia, “Le Atua e, talia mai ia lo’u agaga,”²² ma sa “mafatia [Apinati] i le oti i le afi.”²³

Tatou te osia ma faafou a tatou feagaiga e ala i le taumamafa i le faamanatuga ma e ala i le tapuai atu i le malumalu. O le faamanatuga o le totonugalemu lea o a tatou tapuaiga i Aso Sa, lea tatou te maua ai le folafolaga ina ia “maua pea lona Agaga e faatasi ma i [tatou].”²⁴ Faatasi ai ma lena sauniga paia tatou te tautino atu e ave i o tatou luga le suafa o Iesu Keriso, ia mulimuli ia te Ia, ma ia talia a tatou tiutetauave i lenei galuega paia e pei ona sa Ia faia.



I totonu o le malumalu, e mafai ona tatou “tuu ese mea o lenei lalolagi”²⁵ ma lagona le faatasi mai o le Alii ma Lona filemu maoae. E mafai ona tatou taulai atu i o tatou tuua, o o tatou aiga, ma le ola e faavavau i le afioaga o le Tama. E leitia a saunoa Peresitene Nelson talu ai nei i Roma: “O le lelei e afua mai i lenei malumalu e matua lē mafuatiaina lava.”²⁶

E tatau ona tatou maua le amiosa’o e faia ai mea uma tatou te faia. E tatau ona tatou atiaaina le iloaitino ma le amio pulea ina ia tatou lē fuafuaina pea mea e sa’o ma mea e sese. E tatau ona tatou mafaufau i le upu a Peteru, le uluai Apostolo o le Ekalesia na lapatai mai, “Ia outou faautauta, ia outou mataala, ona o lē ua fai outou mona fili, o le tiapolo lea, o loo fealualuai o ia e pei o se leona tagi, ua saili se tasi e ‘aina e ia.”²⁷

A o tatou faamallosia ma le maelega a tatou ‘olo, o le a avea i tatou e faapei o Iesu Keriso, e pei o Ona so’o moni, faatasi ai ma o tatou lava agaga i Lona puipuiga.

O lau molimau ia Iesu Keriso o lou lava ia ‘olo patino lena, o le puipuiga mo lou agaga. Ina ua fausia e le tama o lo’u tamamatua ma ana uo paionia le ‘Olo o Heber, sa latou tuu taitasi oga-laau i luga seia oo ina “[fusimau faatasi le olo o] le fale atoa”²⁸ ma sa puipuia ai i latou. E faapena foi le molimau. O lea mea ma lea mea tatou te maua ai se molimau mai le Agaga Paia a o Ia fetalai mai i o tatou lava agaga, ma aoao mai le “[upumoni] i le mea lilo.”²⁹ A tatou ola i le talalelei a Iesu Keriso, a tatou faalagolago atu i le Togiola a le Faaola

ma fetaomi atu i luma ma le faatuatua, ae le o le fefe, e faamallosia i tatou e faasaga i togafiti a le tiapolo. O a tatou molimau e faafesootaia i tatou i le lagi, ma e faamanuiaina i tatou i le “moni o mea uma lava.”³⁰ Ma, e pei o paionia na puipuia e se ‘olo, ua siomia saogalemu i tatou i aao alofa o le Faaola.

Na aoao mai le perofeta o Eteru, “O le mea lea, soo se tasi e talitonu i le Atua e mafai moni lava ona faamoe-moe mo se lalolagi sili atu ona lelei, ioe, se nofoaga lava i le aao taumatau o le Atua, o le faamoemoe lea e sau mai le faatuatua, e fai ma taula i agaga o tagata, lea o le a latou mautinoa ma mausali ai, ma faatumulia ai pea i galuega lelei e le aunoa, ma taitaiina ai e viia le Atua.”³¹

Ou uso e ma tuafafine pele, ou te tuua outou faatasi ma la’u faamanuiaga ina ia o atu ma le mautinoa i le Alii ma i Lana talalelei. Faauouo i latou na o loo tautevateva ma faatasi ai ma le malosia o le Agaga i totonu ia te outou, ia toe taitai i latou ma le agaalofoa i le ‘olo o le faaleagaga ma le puipuiga. Saili “e avea e faapei o Iesu”³² i mea uma tou te faia, e tetea atu ai i le tiapolo ma faaososoga, ia salamo, e pei ona apoapoiina ai i tatou ananafi e lo tatou perofeta pele, ia faamaoni i le loto, ia amiotonu ma mamā, faaali atu le agalelei ma le alofa mamā, ma ia alofa i le Alii lo outou Atua i le tuuto o se soo moni.

O a tatou molimau o le talalelei a Iesu Keriso, o o tatou aiga, o o tatou auaiga, ma lo tatou auai i Le Ekalesia

a Iesu Keriso o le Au Paia o Aso e Gata Ai o le a avea ma o tatou ‘olo patino o le puipuiga e siomia ai i tatou ma puipui i tatou mai le mana o le tiapolo e toatasi. Ou te molimau atu ai i lenei mea i le suafoa o lo tatou Alii ma le Faaola, o Iesu Keriso, amene. ■

FAAMATALAGA

1. Mataupu Faavae ma Feagaiga 1:38.
2. 3 Nifae 17:3.
3. 2 Nifae 28:20,
4. *Sau, Mulimuli Mai ia te Au—Mo Tagata Taitoatasi ma Aiga: Feagaiga Fou 2019*, v.
5. 2 Korinito 5:17.
6. Russell M. Nelson, “Faaaliga mo le Ekalesia, Faaaliga mo o Tatou Olaga,” *Liahona*, Me 2018, 96.
7. 1 Nifae 17:45.
8. 2 Nifae 28:21.
9. “Le Atua le ‘Olo Malosi,” *Viiga*, nu. 41.
10. Luka 4:8.
11. Alema 48:10.
12. Alema 48:13.
13. Alema 48:16.
14. Alema 49:28.
15. Alema 26:3.
16. 1 Nifae 3:4.
17. 1 Nifae 3:7.
18. Mataupu Faavae ma Feagaiga 46:7.
19. Iosua 1:9.
20. Iosua 3:5.
21. Mosaea 15:1.
22. Mosaea 17:19.
23. Mosaea 17:20.
24. Mataupu Faavae ma Feagaiga 20:77.
25. Mataupu Faavae ma Feagaiga 25:10.
26. Russell M. Nelson, i le Tad Walch, “President Nelson Refers to Apostles Peter and Paul During Rome Temple Dedication,” *Deseret News*, Mar. 10, 2019, deseretnews.com.
27. 1 Peteru 5:8.
28. Efeso 2:21.
29. Salamo 51:6.
30. Moronae 10:5.
31. Eteru 12:4.
32. “O Loo Ou Taumafai e Avea e Pei o Iesu,” *Tusi-pese a Tamaiti*, 78.



SAUNIA E PERESITENE RUSSELL M. NELSON

Malelega Faaiu

Tau ina ia tatou faapaiaina ma toe faapaiaina o tatou olaga e auauna atu i le Atua ma Ana fanau—i itu uma e lua o le veli.

Ou uso e ma tuafafine pele, a o tatou oo mai ai i le faaiuga o leni konafesi faasolopito, tatou te faafetai i le Alii mo Ana musumusuga ma le puipuiga. E aoaoina ma faagaetiaina i tatou e savali.

E le'i atofaina ni autu i failauga. Sa tatalo i latou taitoatasi mo faaaliga faaletagata lava ia i le sauniaina o a latou savali. Ia te a'u, e ofoofogia le auala e matuā fesootai lelei ai na autu i le tasi ma le isi. Pe a outou suesueina [ia savali], saili atu e aoao mea o loo tau-mafai le Alii e aoao atu ia te oe e auala atu i Ana auauna.

Ua mamalu lava musika. Tatou te matuā faafetai tele i le toatele o tagata musika o ē ua tuufaatasia a latou taleni e aumai ai le Agaga o le Alii i sauniga taitasi. Ma ua Ia faamanuiaina tatalo ma le faapotopotoga i sauniga uma. O le mea moni, ua toe avea foi le konafesi ma se taumafataga tele faaleagaga mo i tatou uma.

Matou te faamoemoe ma tatalo o le a avea fale o tagata taitoatasi o le ekalesia ma se malutaga moni o le faatuatua, lea e mafai ona afio ai le Agaga o le Alii. E ui i finauga o loo siomia ai i tatou, e mafai lava ona avea le fale o se tasi ma se nofoaga faaleagaga, se nofoaga o suesuega, tatalo, ma le faatuatua e

mafai ona tuufaatasia ma le alofa. E mafai ona avea moni lava i tatou ma soo o le Alii, tutu atu ma tautatala atu mo Ia i soo se mea tatou te i ai.

O le sini a le Atua e tataua ona avea ma a tatou sini. E finagalo o Ia i Lana fanau ia *filifili* e toefoi atu ia te Ia, ua saunia, ua agavaa, ua maua faaeeaga paia, ua faamauiina, ma faamaoni i fea-gaiga ua osia i totonu o malumalu paia.

Ua 162 nei a tatou malumalu ua faapaiaina. O uluai malumalu o loo tutu o ni faatusa o le faatuatua ma le

vaaiga mamao a o tatou paionia pele. O malumalu taitasi na latou fausiaina na tupu mai ia latou osigataulaga ma taumafaiga maoae faaletagata lava ia. E tu malumalu taitasi o se maataua ofo-fogia i le palealii o ausiaga a paionia.

O lo tatou tiutetauave paia la o le tausia o ia [malumalu]. O le mea lea, o nei malumalu paionia o le a lē pine ae faagasolo le toefaafouga ma le faaleleia mo se vaitaimi, ma, mo nisi, o se toefua-taiga tele lava. O le a faia taumafaiga e faasao ai tulaga maoti faasolopito iloga o malumalu taitasi i soo se mea e mafai ai, faasaoina o le matagofie faagaetia ma galuega faatufugaga tulaga ese o tupulaga ua loa ona mavae atu.

Ua maea ona faalauiiloa atu auiliiliga mo le Malumalu o St. George Iuta. O fuafuaga mo le toefaafouga o le Malu-malu o Sate Leki, Lotoa o le Malumalu, ma le palasa e sosoo atu e latalata ane i le Maota o Ofisa o le Ekalesia o le a faasila-sila atu i le Aso Faraile, 19 Aperila, 2019.

O le a toefaafouina foi Malumalu o Manti ma Logan Iuta i tausaga o lumanai. A sauniaina na fuafuaga, o le a faalauiiloaina atu foi.

O leni galuega o le a manaomia ai ona tapunia malumalu taitasi mo se vai-taimi. E mafai e tagata o le Ekalesia ona faaaauu pea ona olioli i tapuaiga i le malumalu ma auaunaga i isi malumalu o lata ane. A maea ia galuega faatino taitasi, o le a toefaapaiaina ia malumalu faasolopito taitasi.



Uso e ma tuafafine, tatou te faaaloalo i se malumalu o le maota sili ona paia lea i le Ekalesia. A tatou faasilasila atu ni fuafuaga e fausia se malumalu *fou*, e ave ma se vaega o la tatou talafaasolopito paia. O leni, faamolemole ia faafofoga ma le totoa ma le faaaloalo. Afai ou te faasilasila atua se malumalu i se nofoaga e faapitoa ia te oe, e mafai ona ou fautua atu ia tau lava o le punou o lou ao ma fai se tatalo leleoa o le agaga faafetai i lou loto. Matou te lē mananao i soo se alalaga leotetele e faaitiitia ai le natura paia o leni konafesi atoa ai ma malumalu paia o le Alii.

O le asō matou te fiafia lava e faasilasila atu fuafuaga e fausiaina nisi malumalu i nofoaga nei:

Pago Pago, Amerika Samoa; Aai o Okinawa, Okinawa; Neiafu, Toga; Vanu o Tooele, Iuta; Moses Lake, Uosigitone; San Pedro Sula, Honduras; Antofagasta, Chile; Budapest, Hungary.

Faafetai lava, o’u uso e, ma tuafafine.

A tatou talanoa e uiga ia tatou malumalu tuai ma fou, talosia ia faailoa atu e i tatou taitoatasi e ala i a tatou amioga o i tatou o ni soo moni o le Alii o Iesu Keriso. Tau ina ia tatou faafouina o tatou olaga e ala i lo tatou faatuatua ma le faalagolago ia te Ia. Tau ina ia tatou mauaina le mana o Lana Togiola e ala i lo tatou salamo i aso taitasi. Ma tau ina ia tatou faapaiaina ma toe faapaiaina o tatou olaga e auauna atu i le Atua ma Ana fanau—i itu uma e lua o le veli.

Ou te tuua lo’u alofa ma la’u faamanuiaga ia te outou, ma faamautinoa atu ia te outou o loo faaauau pea faaliga i le Ekalesia leni a le Alii. O le a faaauau pea seia oo ina “faataunuu faamoemoega o le Atua, ma fetalai ai le Ieova Silisili ua maea le galuega.”¹

Ou te faamanuia ai ia te outou ma ou te molimau atu ai o loo soifua le Atua! O Iesu o le Keriso! O Lana Ekalesia leni. O i tatou o Lona nuu. I le suafa paia o Iesu Keriso, amene. ■

FAAMATALAGA

1. *Aoaoga a Peresitene o le Ekalesia: Iosefa Samita* (2007), 151.

Lipoti Faafuainumera, 2018

Mo le silafia e tagata o le Ekalesia, ua tuuina mai e le Au Peresitene Sili le lipoti faafuainumera leni e faatatau i le tuputupu ae o le Ekalesia e oo mai i le aso 31 o Tesema, 2018.

IUNITE A LE EKALESIA

O Siteki	3,383
Misiona	407
Itu	547
Uarota ma Paranesi	30,536

TAGATA AUAI O LE EKALESIA

Aofaiga o Tagata Auai	16,313,735
Tamaiti Fou o Faamaumauga	102,102
Tagata Liliu Mai na Papatisoina	234,332

FAIFEAUTALAI

Faifeautalai Faamisiona	65,137
Faifeautalai Auauna Atu a le Ekalesia	37,963

MALUMALU

O Malumalu na Faapaiaina i le 2018 (Concepción Chile ma Barranquilla Kolomupia)	2
O Malumalu na Toefaapaiaina i le 2018 (Houston Texas ma Jordan River Iuta)	2
O Malumalu o loo Faaagaina e oo mai i le Faaiga o le Tausaga	161

Faasino Upu o Tala o le Konafesi

O le lisi lea o aafiaga na filifilia mai saunoaga o le konafesi aoao, e mafai ona faaaoaga i suesuega a le tagata lava ia, afiafi faaleaiga, ma isi aoaoga. O le numera o loo faasino i le itulau muamua o le lauga.

Neil L. Andersen	(34) O se alii e tosina atu i le itupa e tasi ua tumau faamaoni i ana feagaiga. O se fafine e le'i faaipoipo na taulai atu i le auauna atu.
D. Todd Christofferson	(81) Ua faaalua e le autalavou i Italia ia Peresitene Russell M. Nelson kata o le malumalu ua saunia mo o latou augatuaa.
Carl B. Cook	(51) O se "Vaega o le Auuso" o e na faamallosia ma fesoasoani e liua mai le tasi ma le isi i Botswana ua faamanuiaina le anoanoai o olaga e ala i le auaunaga faafaifeautalai. Ua potopoto faatasi korama a le Perisitua ma faamanuia Carl B. Cook talavou.
Quentin L. Cook	(76) O se valaaulia mai ia Peresitene Gordon B. Hinckley ua fesoasoani e taitai atu le tamā o Elder O. Vincent Haleck i le papatisoga.
Becky Craven	(9) Ua faititi se tagata molimau e lei taumafai le enisinia nofoaafi e liliu le nofoaafi a o lei taia se taavale na mau i luga o le auala o le [nofoaafi].
Sharon Eubank	(73) E le'i ola moli o le po i fafo o le Malumalu o Sate Lekī. Ua tuuina atu e se miti ia Sharon Eubank le manao e faateleina lona faatuatua.
Gerrit W. Gong	(97) Ina ua mavae le lagonaina o le agaaloa mo se tagata gaioi, ua amata ona malamalama se uo a Gerrit W. Gong ia Iesu Keriso ma Lana Togiola.
Brook P. Hales	(11) Ua iloa e atalii e toalua a Brook P. Hales e silafia e le Atua le faaiuga mai le amataga i le tali mai i tatalo. "E mavae atu foi lenei mea" na avea ma mautauave o se fafine faatuatua o le na taliaina lona tauaso.
Mathias Held	(31) Ua auai Mathias ma Irene Held i le Ekalesia i le mavae ai ona iloaitino le upumoni e ala i le suesue ma le Agaga.
David P. Homer	(41) A o avea ai ma se pasese i luga o se vaalele laitiiti, ua aoao e David P. Homer le taua o le faalogo i le leo sa'o. Ua aoao e David P. Homer ma lona toalua e mafai ona telegese le oo mai o tali i tatalo. Ua tumau le uso o David P. Homer e oo i iuga e ui i faigata.
Kyle S. McKay	(105) Ua faamafanafanaina ma lagolagoina se fafine o loo tauivi ma le vaisu o fualaau faasaina ma se tina e ona le atalii na malui i se faalavelave e le Laveai Sili.
Russell M. Nelson	(67) Ua tauva se tina ma lana fanau teine ma taaloga mo le gauaiga o alii i le latou aiga. (88) Ua talanoa Russell M. Nelson ma lona afafine o Wendy "i mea e sili ona taua" i le taimi o le la "talanoaga faatofa o se tamā ma se afafine." Ua mafaufau se leoleo na fesoasoani i tagata e sosola ese mai se afi mu saesae, "O fea lo'u aiga?" Ua teena e se uo a Russell M. Nelson le faia o suiga e agavaa ai mo faamanuiaga o le talalelei.
Dallin H. Oaks	(60) O tagata aoaga o loo matamata i se taifau o loo tololoto atu i se squirrel na leai ma se tasi na fesili, "O fea o le a tau i ai lenei mea?" O se tietiega e lima po ma le lima ao a se ulugalii Kolomupia ina ia faaipoipo i le malumalu ua suia ai le auala la te lagona ai e uiga i le faaipoipoga o le malumalu ma le talalelei.
Dale G. Renlund	(70) Ua fesoasoani le "uluai tatalo uiga ese" i se tagata e le toaga e lagona se uunaiga i le lotu "o Lo'u maota lenei."
Ulisses Soares	(6) Ua totoina e se tina nofotoatasi i loto o lana fanau ia faamanuiaga o le talalelei.
Gary E. Stevenson	(47) I le avea ai o se ositaulaga i le aoga mauulaga, na teena ai e se Aposetolo o le lumanai le matamata i se ata tifaga e le talafeagai, ma tuuina atu le lototele i se uo.
Juan Pablo Villar	(95) I le mavae ai o le faaalua o se aso e talai ai ma lona uso faifeautalai, ua tonu ai ia Juan Pablo Villar ina ia papatiso ma auauna atu i se misiona.
Takashi Wada	(38) Ua auai le tina o Takashi Wada i le Ekalesia i le mavae ai ona pa'i atu le Alii i lona loto e ala i se galuega agalelei a se tamaitiiti.
W. Christopher Waddell	(19) Faafetai i taumafaiga o le auaunaga mai i aiga ma uo, ua toe opomauina ai e le uso o W. Christopher Waddell le talalelei i se taimi puupuu ao lei malui o ia.



Elder Rubén V. Alliaud

Fitugafulu o le Pulega Aoao

Na 14 tausaga o Rubén Alliaud ina ua tuua e ia lona aiga i Atenitina ina ia faaalu se tausaga faatasi ma lona uncle i le Iunaite Setete. O lona tamā, o Rubén Reynaldo Alliaud, na maluu muamua atu, ma sa amata ona maua Rubén “i se agaga fouvale.”

Na auina atu e lona tinā popole, o María, o ia i Houston, Texas, e nonofo ai ma lona tuagane, o Manuel Bustos, ma lona aiga. E tasi lava le tulaga sa ia talosaga atu ai i le aiga a lona tuaganae: “Aua nei faasoa atua a outou talitonuga faale-Au Paia o Aso e Gata Ai i la’u tama.”

Ae ui i lea, o le agaga o le talalelei, na fiafia ai le talavou tauivi. Sa ia matauina le auala na tuu faatasi ai e le Ekalesia le aiga o Bustos e ala i le tatalo ma le auaunaga, ma sa mafai ona ia matauina le anoanoai o kopi o le Tusi a Mamona i luga o fata o lona potu.

I le fia iloa, sa ia toso maia i lalo se kopi ma maua ai le folafolaga a Moronae e mafai ona ia iloina e ala i le tatalo e moni le Tusi a Mamona.

“O lena folafolaga na ou ootia ai,” o le saunoaga lea e le Fitugafulu o le Pulega Aoao fou na faatoa valaauina. “Na ou manao e faitau le tusi.”

Sa ia manatu mamafa i le folafolaga a Moronae, maua se tali mautu, ma ta’u atu i lona uncle faateia ua ia manao e papatiso. Na toe auina atu e Uncle Manuel ia Rubén i le taimi lava lena i Atenitina e talosaga mo le faatagaga a lona tinā. E lei umi ae papatisoina o ia. Talu mai lena taimi, na faamalositia e le talalelei toefuataiina le olaga o Elder Alliaud.

Na soifua mai Rubén Vicente Alliaud i le aso 8 o Ianuari, 1966, i Buenos Aires. Na ia faaipoipo atu ia Fabiana Bennett Lamas i le Malumalu o Buenos Aires Atenitina i le aso 17 o Tesema, 1992. E toaono o la alo.

Na maua e Elder Alliaud se faailoga faaloia mai le Iunivesite o Belgrano, i Buenos Aires, ma sa fiafia i se matata faaletulafono lautele, e faapitoa i loia o soligatulafono. Talu mai le 1998 na ia galue o se paaga faapulega mo le Alliaud & Asociados.

Na ia auauna atu o se Fitugafulu Eria, peresitene o le Misiona o Atenitina Córdoba, peresitene o se siteki, fautua maua luga, epikopo, peresitene o le korama a toaina, ma se faifeautalai i le Misiona a Iurukuei Montevideo. I le taimi o lana valaauga, sa ia auauna atu o se faiaoga inisitituti, fesoa-soani muamua i le au peresitene o le Nofoga Autu e Aoao ai Faifeautalai i Atenitina, ma o le faatonu o le va i fafo. ■



Elder Jorge F. Zeballos

Fitugafulu o le Pulega Aoao

Sa auai Miguel ma Iris Alvarado i le Ekalesia i Puerto Rico i le 1977 ina ua ono tausaga o le la tama tama o Jorge. Sa papatisoina Jorge laitiiti i le lua tausaga mulimuli ane ma e lei misia lava se sauniga i le Sapati.

“Peitai o lo’u liua na tupu ina ua ou 16,” na saunoa ai le Fitugafulu faatoa valaauina o le Pulega Aoao.

I le aoga maua luga, sa amata ona ia auauna atu o se peresitene o lana vasega seminare i lona nuu o Ponce. Na aoaoina e tamaiti aoga le Tusi a Mamona i lena tausaga. O lona tiutetauave fou na uunaia ai ni iloiloaga faaletagata lava ia.

“Sa ou fesili ia te a’u lava ia, ‘Pe ou te iloa moni ea e moni le Tusi a Mamona?’ E faapefea ona ou peresitene i la’u vasega seminare pe afai ou te le iloa pe moni le tusi?”

Sa ia pikiina i luga lana kopi o le Tusi a Mamona ma mo le taimi muamua amata ona faitauina ma le naunautai.

“Na ou tootuli i lalo ma sa ou tatalo, ma sa ou iloina i lena lava taimi e moni,” na ia fai mai ai.

E tumau pea ona avea le Tusi a Mamona ma se faatosi-taga taua i le olaga o Elder Alvarado.

Ao auauna atu i se misiona faaifeautalai i le Misiona a Florida Tampa, sa ia faasoaia atu le Tusi a Mamona i tagata uma na ia aoaoina. Mulimuli ane, sa ia suesue i le tusi faatasi ma lona toalua ma le la fanau e toatolu. I le avea ai ma peresitene o le Misiona a Puerto Rico San Juan, sa ia tuuina atu se lu’i i ana faifeautalai ia alolofa ma faasoa atu le Tusi a Mamona.

I le taimi nei, i le avea ai ma se Fitugafulu o le Pulega Aoao, o loo tumau pea le naunau o Elder Alvarado e valaau-lia isi ia iloa upumoni e suia ai olaga o le Tusi a Mamona.

Sa soifua mai Jorge Miguel Alvarado Pazo i le aso 21 o Novema, 1970. I le aso 19 o Tesema, 1992, sa ia faaipoipo atu ai ia Cari Lu Rios i le Malumalu o Uosigitone D.C.

Ina ua mavae le suesue ai i pulega faapisinisi i le Iunivesite o Puerto Rico, sa ia faigaluega i vaega eseese o le pulega faapisinisi i Puerto Rico ma le Iunaite Setete. Sili ona lata mai, sa ia faigaluega ai i le laumua o le Ekalesia i le Aai o Sate Lekia o se pule faavaomalo mo Auaunaga o le Ola Tutoatasi.

Na auauna atu Elder Alvarado o se Fitugafulu Eria, peresitene o se siteki, fautua maua luga, peresitene o se paranesi, ma se taitai misiona a se uarota. ■



Elder Hans T. Boom

Fitugafulu o le Pulega Aoao

Ina ua valu tausaga o Elder Hans T. Boom, na masii atu lona aiga mai Amsterdam i le aai o Breda, o loo i le vaega i saute o Netalani. O lona tamā, o se alii Take na soifua a’e i Initonesia ma o se tagata liliu mai i le Ekalesia, sa [ia] lagona e tatau ona tuua e lona aiga le aai tele ma toefoi atu i tupuaga a ona augatama.

O le taimi na faaaluina e Elder Boom ma lona aiga i lona tamai paranesi na faamaonia le avea ai ma se faavae o aoaoga o le auaunaga faaleEkalesia—auaunaga ua ia tuuina atu ai lona ola atoa ma o le a faaauau pea ona tuuina atu i lenei valaauga fou o se Fitugafulu o le Pulega Aoao.

“O mea uma ua ou avea ai ma mea uma ua ou maua ou te nofo aitalafu ai i le Alii ma o avanoa ua Ia tuuina mai ia te au e aoao ai ma tuputupu ae ai,” na ia saunoa mai ai.

Na soifua mai i le aso 13 o Iulai, 1963, i Amsterdam ia Hans ma Ankie Boom, o Hans Theodorus Boom o le ulumatu lona lua i le fanau e toafa a le au Booms. Na aoao atu e ona matua le talalelei i totonu o le latou aiga ma uunaia le la fanau ina ia galulue malosi.

I le 18 o tausaga, na auauna atu ai Elder Boom i le Misiona a Egelani Lonetona i Sasae. I ni nai masina talu ona maea lana misiona, sa ia feiloai ai i lona toaluia i le lumanai, o Ariena Johanna “Marjan” Broekzitter, i se konafesi mo talavou matutua o le Ekalesia. Na faaipoipo le ulugalii i le aso 27 o Iulai, 1984, i Rhon, Netalani, ma na faamauiina i le tolu aso mulimuli ane i le Malumalu o Lonetona Egelani. E toatolu o la alo tama.

Sa galue Elder Boom o se failautusi i le puleaoga o le Kolisi a Markenhage ma o se tagata e tofia tagata faigaluega mo le Franchise Development Benelux. I le taimi o lona valaauga o se Pulega Aoao, sa galue o ia o se pule o fefaatau-aiga mo le MacLean Agencies.

Na auauna atu Elder Boom o se Fitugafulu Eria, fesoasoani i se au peresitene o se siteki, peresitene o Alii Talavou o se siteki, peresitene o se paranesi, ma se fesoasoani i se au peresitene o se paranesi. I le taimi o lona valaauga, na auauna atu o ia o se faiaoga inisitituti ma se tagata faisau-niga o le malumalu i Le Malumalu o Hague Netherlands. ■



Elder L. Todd Budge

Fitugafulu o le Pulega Aoao

Ao avea Todd Budge ma se tama talavou, sa aoaoina o ia e ona matua i le auala e saili ai le finagalo o le Alii. I lona olaga atoa, sa ia taumafai ai e faaaoaga lona faataitaiga i soo se filifiliga.

I tausaga mulimuli ane, ina ua mavae ona faamautuina o ia ma lona toaluia i se fale ma se fanau e tolima, sa ia lagona ni musumusuga faaleagaga e tuua lana galuega i le faletupe ma mea tautupe. O le suiga o le a manaomia ai se ositaulaga maoae mo ia ina ia faamautuina i se matata fou.

Ina ua mavae taumafaiga ma sauniuniga e tele e suia ia matata, sa feiloai ia Elder Budge ma se tasi e tulaga ese lava e tuuina atu ia te ia se fautuaga. Na fautua atu e lenei tagata ia Elder Budge e nofo i lana matata tautupe, faamanatu atu ia te ia o le a ia maua le tele o avanoa e fautua atu ai ma fesoasoani i tagata. “Tatou te mana’omia tagata e amiosa’o i mea tau pisinisi,” na ta’u atu ia te ia e le tagata.

Sa mafaufau Elder Budge o lona fetaiaiga o se alofa mutimutivale mai le Alii. “Ou te manatu sa Ia fia silafia po o fea o i ai lo’u loto,” na ia fai mai ai. “E silafia e le Alii lo’u loto, Na te le manaomia le taulaga, ma ou te talitonu e mafai ona Ia faaaoaga a’u mo Ana faamoemoega e aunoa ma le suia o se matata.”

O lana matata na faataga ai o ia e avea ma faatosinaga mo le lelei i le lalolagi faapisinisi, e oo lava i le tatalaina o faitotoa e faasoa atu ai le talalelei i Iapani.

Sa soifua mai Lawrence Todd Budge i le aso 29 o Tesema, 1959, i Pittsburgh, Kalefonia, ISA, ia Lowell Jensen ma Deanna Price Budge. Sa ia feiloai ia Lori Carpenter ao la tausaga muamua i le Iunivesite o Polika Iaga. Valu masina talu ona ia toe foi mai mai le auauna atu i le Misiona a Iapani Fukuoka, sa la faaipoipo ai i le Malumalu o Logan Iuta. E toaono le la fanau.

Ina ua mavae ona faauu mai BYU i le 1984 ma se faailoga o le tagata malaga i mea tau tamaoaga, sa faigaluega Elder Budge mo le Kamupani a Bain & Iapani; Citibank, N.A.; ma le GE Capital. Sa avea o ia ma peresitene ma faatonusili aoao o le Tokyo Star Bank Limited i le 2003, auauna atu o se taitaifono o faatonu a le faletupe mai le 2008 i le 2011.

Na avea Elder Budge ma Fitugafulu Eria, peresitene o le Misiona a Iapani Tokyo, peresitene o le siteki, epikopo, peresitene o le korama a toaina, ma le peresitene o Alii Talavou a se siteki. ■



Elder Ricardo P. Giménez

Fitugafulu o le Pulega Aoao

O le a umi ona manatuaina pea e tagata o le Ekalesia i Antofagasta, Chile, le konafesi aoao ia Aperila 2019 mo le fofogaina atu o se malumalu i le lumanai iina ma le valaauina o se atalii moni, o Elder Ricardo P. Giménez, o se Fitugafulu o le Pulega Aoao.

A o ia mafau fau ai i tiutetauave o lona valaauga fou, na maua e Elder Giménez le faatuatua ma le lototele i le faaupuga “Po o ai lava e valaauina e le Alii, e faaagavaaina e le Alii” (Thomas S. Monson, “Duty Calls,” *Ensign*, May 1996, 44).

“Ua ou aoaoina lena faaupuga i le tele o taimi i le tuanai, ma i le taimi nei ua ou taumafai e faaoga ia te a’u lava ia,” o lana saunoaga lea. “E valaau oe e le Tama Faalelagi. Na te silafia oe. O lea ia tau lava o le alu atu ma fai mea ua Ia finagalo ai, ma o le a lelei mea uma.”

Na soifua mai Ricardo Patricio Giménez Salazar i le aso 28 o Novema, 1971, o le ulumatua o fanau e toa lua na fanauina e Ricardo Benjamín Giménez Gimeno ma Myrto Lucisca Amalia Salazar Signorini. Na ia auai i le Ekalesia i le 11 o ona tausaga ma na siitia atu ma lona tinā ma lona tuafafine i Santiago, Chile, i le mavae ai o le teteaga a ona matua.

I le 1995, na ia feiloai ai ia Catherine Ivonne Carrazana Zúñiga i Santiago ina ua amata ona auai [Catherine] i le uarota a [Ricardo] ao nofo [Catherine] iina i sona uncle. Na faamauiina i laua i le Malumalu o Santiago Chile i le aso 12 o Setema, 1997, ma o ni matua o ni fanau se toa lua.

Na maua e Elder Giménez lona faailoga i le tausitusi ma le suetusi i le Iunivesite o Santiago i le 1997 ma se faailoga o le matua o faiva i pulega faapisinisi i le Iunivesite o Chile i le 2003. Na amata lana galuega faapolofesa i le kamupani maina, ma iu ai ina agai atu i faamatalaga o tekinolosi o se faatonu o tupe mo le Computer Sciences Corporation i Latina Amerika. Na ia toefoi mai i le maina i le 2012, mua-mua i le Sierra Gorda Mining ma sosoo ai ma le Kamupani Robinson Nevada Mining.

I le taimi o lona valaauga, na auauna atu Elder Giménez o se fesoasoani i se au peresitene o se siteki. Na ia auauna atu foi o se Fitugafulu Eria i le Eria i Saute o Amerika i Saute, peresitene o se siteki, fautua maua luga, epikopo, fesoasoani i se au epikopo ma i se au peresitene o Alii Talavou o se uarota, ma se faifeautalai faamisiona i le Misiona a Chile Concepción. ■



Elder Peter M. Johnson

Fitugafulu o le Pulega Aoao

I le mavae ai ona talia e Peter M. Johnson, o le atalii o se supavaia o meatotino ma se avetaavale laitiiti, se sikolasipi i le Iunivesite o Polika Iaga-Hawaii, na ia maua o ia lava o tu i luma o se faiaoga inisitituti.

“A [le] o lou auai i le Ekalesia i le auala sa’o, po o le a fai sina umi mo oe,” na ta’u atu ai e le faiaoga.

Na sa’o lava le faiaoga. I le silia ma le tausaga mulimuli ane, na “anapogi ai ma tatalo [Peter] mo se tali.” Na papatisoina o ia i le aso 16 o Aokuso, 1986.

O Peter Matthew Johnson, o le lona fa o le fanau e toa-lima na soifua mai ia McKinley Johnson ma Geneva Paris Long i le aso 29 o Novema, 1966, i Queens, Niu Ioka, ISA.

Na tete’a ona matua ina ua 11 ona tausaga, ma sa siitia atu lona tinā i Hawaii. Tasi le tausaga mulimuli ane, na auai atu ai Peter i le Malo o Isalama ma avea ma se Mosalemi. Na tuuina atu e lenei faalapotopotoga le taiala ma le lagolago ma na saunia ai o ia e opomauina le talalelei a Iesu Keriso.

I le 15 o ona tausaga, na siitia atu ai Peter i Hawaii ma nonofo faatasi ai ma lona tinā O iina, na ia iloa ai taaloga—aemaise o le pasiketipolo—ma amata galue ai e agai i le aotauina i le iunivesite, [avea] ma tagata o Le Ekalesia a Iesu Keriso o le Au Paia o Aso e Gata Ai, auauna atu faaifeautalai i le Misiona a Alapama Birmingham, ma faaipoipo atu i le malumalu ia Stephanie Lyn Chadwick i le 1990. O le ulugalii, lea na feiloai a o taaalo pasiketipolo i le Iunivesite o Iuta i Saute, e toafa o la alo.

“Ua ou i ai iinei e auauna atu i le Alii,” o le saunoaga lea a Elder Johnson i lona valaauga i le Fitugafulu. “Po o le a lava le tagatanuu po o le aganuu po o le nofoaga ou te sau ai, o lo’u tofiga o le auauna atu i le Alii ma lo’u loto atoa, mafau-fau, ma le malosi ma ia fai ma sui o le Alii i Ona tagata. E alofa le Faaola ia i tatou uma. O i tatou o atalii ma afafine o le Atua.”

Na maua e Elder Johnson ni faailoga o le tagata malaga ma le matua o faiva i le tausitusi mai le Iunivesite o Saute Iuta ma se PhD i le tausitusi mai le Iunivesite o le Setete o Arisona. Sa ia galue o se polofesa faiaoga i le BYU-Hawaii, polofesa lagolago i le Iunivesite o Polika Iaga, ma polofesa faiaoga i le Iunivesite o Alapama. Na ia auauna atu o se Fitugafulu Eria, peresitene o se siteki, failautusi o mea tautupe a se siteki, ma se taitai misiona o se uarota. ■



Elder John A. McCune

Fitugafulu o le Pulega Aoao

I le amataga o lana matata faapisinisi, sa faia ai e Elder John A. McCune se talanoaga ma lana pule lea na vave lava ona manino mai e le tele se silafia o le tamaloa e uiga i Le Ekalesia a Iesu Keriso o le Au Paia o Aso e Gata Ai. Sa fesili atu lana pule ia Elder McCune pe aisea e le sisiva ai ma ‘ai kuki tagata o le Au Paia o Aso e Gata Ai.

“E manino lava ou te ‘ai kuki,” na tau atu e Elder McCune i lana pule ma se ataata, ma milimili lona manava. “Ou te manatu ua e fenumiaia i matou ma se isi tagata.”

Ao la talanoa, sa faamaonia atu e Elder McCune lenei manatu sese e uiga i le Ekalesia. O lona talanoaga sa taitai atu ai isi talanoaga e uiga i le talalelei a Iesu Keriso ma toe faamautu atu ai mo Elder McCune le taua o le saunia i taimi uma e faasoa atu le talalelei.

“O i tatou o soo o le Faaola o Iesu Keriso, po o fea lava tatou te i ai, i soo se nofoaga, i soo se avanoa,” na saunoa ai Elder McCune. “Ua tofu i tatou ma galuega ma matata, peitai ua i ai iina e lagolago ai o tatou aiga ma tuu i tatou i tulaga e faasoa atu ai le talalelei. O lo tatou tiutetauave autu lena o ni soo o Iesu Keriso.”

Sa soifua mai John Allen McCune i Santa Cruz, Kalefonia, ISA, i le aso 20 Iuni, 1963, ia Clifford ma Joan Schulthies McCune. Na soifua muamua lava o ia i Nyssa, Oregon, ISA.

Ina ua maea lana misiona i Fukuoka, Iapani, sa faaipoipo atu Elder McCune ia Debbra Ellen Kingsbury i le Malumalu o Sate Lek i le 1984. O i laua o ni matua o se fanau e toafa ma o loo alala ma papaaao i Midway, Iuta, ISA.

Ua maua e Elder McCune se faailoga o le tagata malaga faasaienisi i mea tautupe mai le Iunivesite o Polika Iaga ma se faailoga o le matuaofaiva i pulega o mea tau faapisinisi i mea tautupe mai le Iunivesite o Kalefonia, Los Angeles (UCLA). Sa galue o ia o se sui peresitene sinia ma pule faatonusili mo le Capital Investment Advisors mai le 1997 i le 2012. Ona ia auauna atu lea o se peresitene o le Misiona a Iuta Provo ao lei avea ma sooupu o foai mo meaalofa autu a le LDS Philanthropies.

Sa auauna atu Elder McCune o se Fitugafulu Eria i le taimi o lona valaauga fou. Sa auauna atu foi o ia o se peresitene o se siteki, epikopo, fesoasoani i se au epikopo ma i se au peresitene o se paranesi, ma se peresitene o le korama a toeaina. ■



Elder James R. Rasband

Fitugafulu o le Pulega Aoao

Ina ua valaauina Elder James R. Rasband i le au peresitene o se siteki i tausaga ua mavae, sa ia lagona le lē saunia. “O se mea sese lenei mea,” sa ia mafaufau ai.

Sa ia lagona se lē agavaa talitutusa o se 19 tausaga o loo ulufale atu i le Nofoaga Autu mo le Aoaina o Faifeautalai i Provo i le sauniuniga mo se misiona talai i Seoul, Korea i Saute. “E faafefea ona ou faia lenei mea?” na ia mafaufau ai.

I tulaga uma e lua, o le tali e tutusa lava: “Ia tumau ai. E oo mai le olioli.” Pe, i upu a lona tinā, “E le lava se sapaalai o tagata atoatoa a le Alii. Na o le alu lava e galue.”

E lagona e Elder Rasband nisi o lona le mautonuga i le taimi nei ao ia agai atu i lona valaauga fou o se Fitugafulu o le Pulega Aoao, peitai na te silafia le tali: “E na o le manao-mia lava e lo tatou Tama Faalelagi o i tatou e o e galulue ma faasoa atu le savali o le faamalologa ma le olioli o Lona Alo ma le taulaga togiola a Lona Alo.

Sa soifua mai James Richard Rasband i Seattle, Uosigitone, ISA, ia James E. ma Ester Rasband i le aso 20 o Mati, 1963. Sa ia ola ae i Pebble Beach, Kalefonia, ISA, i se fale pe a ma le 200 iata le mamao mai le tausiusiuga o le sami.

Sa feiloai Elder Rasband ia Mary Diane Williams o se tagata i le tausaga muamua i le Iunivesite o Polika Iaga. Sa la fetusia ai ao ia susesue i fafo atu i le lima tausaga i Isaraelu ma i lana auaunaga i le Misiona a Korea Seoul. Sa la faaipoipo i le Malumalu o Los Angeles Kalefonia i le aso 11 o Aokuso, 1984. O i la’ua o matua o se fanau e toafa.

Ina ua toe foi mai mai lana misiona, sa ia faamaeaina lana faailoga o le tagata malaga i le Igilisi ma susesuega i Near Easter i BYU i le 1986 ma mauaina se faailoga o le juris doctor mai le Aoga Faaloia a Harvard i le 1989. I le mavae ai o le lima tausaga o faigaluega o se loia i Seattle, sa ia toe foi i BYU i le 1995 e auai i le vasega o faiaoga a le Aoga Loia a J. Reuben Clark. Sa ia auauna atu o se faaao o le aoga faaletulafono mai le 2009 i le 2016, ina ua ia avea ma sui peresitene faaakatemia o le BYU.

Na avea Elder Rasband ma Fitugafulu Eria, peresitene o le siteki, fesoasoani i se au peresitene o le siteki, fautua maua luga, epikopo, peresitene o Alii Talavou a se uarota. ■



Elder Benjamin M. Z. Tai

Fitugafulu o le Pulega Aoao

O le tamamatua o Elder Benjamin M. Z. Tai na pueina, faa-falepuipuiina, ma fasiotia e le autau a Iapani lea na osofaia Hong Kong i le taimi o le Taua Lona II a le Lalolagi.

I le tele o tausaga mulimuli ane, na feiloai ai Elder Tai i lana avā o le lumanai, o Naomi Toma, mai Iapani, a o auauna atu o se peresitene o le korama a toaina i lana uarota o tamaiti aoga i le Iunivesite o Polika Iaga. Sa auauna atu Naomi o se peresitene o le Aualofa.

Ina ua ta’u atu e Benjamin i lona tamā, o se Pulega Aoao faamalolo faamamaluina o Elder Kwok Yuen Tai, sa ia tafao faamasani ma faamoemoe e faaipoipo ia Naomi, e le’i faaalua e lona tamā se lagona ita. O le mea moni, na o mai matua o Naomi, o Rikuo ma Fumiko Toma, i Hong Kong e asiasi i matua o Benjamin. Na matauina e ona matua [Naomi] o le talalelei a Iesu Keriso na mafai ai ona la faaipoipo. Sa faaipoipo le ulugalii i le Malumalu o Sate Lekia i le aso 23 o Tesema, 1995. O i laua o ni matua o se fanau e toaono.

“Ma te o mai mai ni aganuu e esecese, ae o loo i ai ni mataupu faavae o le faatuatua ma le ositaulaga o loo faasoaina,” na saunoa ai Elder Tai. E silafia e Elder Tai o na mataupu faavae o le faatuatua ma le ositaulaga o le a fesootei ai o ia ma le Au Paia o Aso e Gata Ai i le lalolagi atoa.

Na soifua mai Benjamin Ming Zhe Tai i le aso 20 o Me, 1972, i Hong Kong ia Kwok Yuen ma Hui Hua Tai. O le galuega a lona tamā na avatua le aiga i le salafa o le lalolagi a o le’i malaga atu i Kalefonia i Saute, ISA, lea na faaali ai e Elder Tai ona tausaga talavou. I lo latou aiga, na faaali atu ai e ona matua se tusitaai o i ai upu nei o tusia ai i le gagana Saina: “A o a’u nei ma lo’u aiga, matou te auauna ia Ieova” (Iosua 24:15). Na avea lenei [mau] ma mautauave a le aiga o Tai.

I le maea ai ona auauna atu i le Misiona a Melepone Ausetalia, na mauaina e Elder Tai se faailoga o le tagata malaga i mataupu faasaienisi mai le BYU i le 1996 ma se faailoga o le matua o faiva o pulega faapisinisi mai le Iunivesite o Kalefonia, Los Angeles (UCLA), i le 2003. Sa galue o ia i Iapani ma Hong Kong i teugatupe teufaafaigaluega ma le atinaeina o fanua faatau.

Na auauna atu Elder Tai o se Fitugafulu Eria, peresitene o le itu, fesoasoani i se au peresitene o le itu, failautusi faapi-toa o le itu, peresitene o le korama a toaina, peresitene o le paranesi, ma se faiaoga o le Aoga Sa. ■



Elder Alan R. Walker

Fitugafulu o le Pulega Aoao

O le aoaoina ma le faatofuina o ia lava i aganuu fou ua avea ma se mea fiafia e fai o le olaga atoa mo Elder Alan R. Walker, lea o le a auauna lelei ia te ia i lona valaauga o le Fitugafulu o le Pulega Aoao.

Sa soifua mai i Buenos Aires, Atenitina, ia Victor Adrian Walker ma Cristina Ofelia Sparrow Walker i le aso 2 o Ianuari, 1971, sa ola ae Alan Roy Walker i vaega esecese o Amerika i Matu ma Amerika i Saute.

Sa ia faaaluina ona tausaga ao lailaiti i Atenitina ao lei siitia atu lona aiga i Boston, Masatusa, ISA, ma mulimuli ane i le Aai o Mekisiko, Mekisiko, mo le galuega a lona tamā.

“O le aoaoina o le Igilisi sa avea ma se faamanuiaga ofoofogia,” na ia fai mai ai. Ma o le tuputupu ae i le talalelei na faataga ai o ia e atiinae lana molimau ma saunia ai i lona lailaiti mo se misiona. Ina ua mavae le auai i le Iunivesite o Polika Iaga mo se tausaga, sa auauna atu Elder Walker o se faifeautalai faamision i le Misiona a Tenesi Nashville.

Ina ia fesoasoani i le toe faamalosiā mai o lona tamā mai se faalavelave tuga, na faatuai ai e Elder Walker ana fua-fuaga e toe foi i le aoga ina ua mavae lana misiona ma toe foi atu ai i Atenitina. O le taimi lena na ia feiloai ai ia Ines Marcela Sulé i se siva a le inisitituti. Valu masina mulimuli ane, i le aso 12 o Aokuso, 1993, ua la faaipoipo i le Malumalu o Buenos Aires Atenitina. O le aso na sosoo ai, na siitia atu ai le ulugalii talavou i Provo, Iuta, ISA, lea na faamaea ai e Elder Walker lana tikeri o le tagata malaga i mataupu tau tamaoaiaga i le 1996.

Sa faigaluega Elder Walker mo le tolu tausaga o se tagata e nafa pisinisi i le Citibank, ono tausaga o se taitai faama-opoopo mo le Ekalesia i le Eria i Saute o Amerika i Saute, 11 tausaga i le Eria o Mekisiko, sili ona lata mai o se taitai mo meatotino mo le Eria i Saute o Amerika i Saute. I le 2010, na valaauina ai Elder Walker e pulefaamalumalu i le Misiona a Mekisiko Monterrey i Sasae.

O le au Walker, faatasi ai ma le afafine, e fiafia e auauna atu i isi, femalagaai, ma faamasani i nofoaga ma tagata fou.

Ao lei valaauina o se Fitugafulu o le Pulega Aoao, na auauna atu Elder Walker i vaega esecese o le Ekalesia, e aofia ai le Fitugafulu Eria, fesoasoani i le au peresitene o se siteki, fautua maua luga, epikopo, fesoasoani i le au epikopo, ma se taitai misiona a se uarota. ■



Mark L. Pace

Peresitene Aoao o le Aoga Sa

Faatasi ai ma se faatalanoaga ua uma ona seti mo le mea o le a avea ma se valaauga e auauna atu o se Peresitene Aoao fou o le Aoga Sa, na tuuina atu ai e Uso Mark L. Pace se tautinoga ma le agaga tatalo.

“Tama Faalelagi, po o le a lava Lou finagalo mo a’u e fai, ou te fiafia e fai,” na ia tatalo ai. “Ia silafia ua ou tautino atoa atu i ai.”

Fai mai Uso Pace o lona manaoga autu i lona valaauga fou o le faamanuia atu, lagolago, ma uunaia tagata o le Ekalesia. “Matou te mananao e tuuina atu mea uma ua ia i matou,” na ia fai ai e uiga i le Au Peresitene Aoao fou o le Aoga Sa.

Sa soifua mai Mark Leonard Pace i le aso 1 o Ianuari, 1957, i Buenos Aires, Atenitina, ia Lorin Nelson ma Marylynn Haymore Pace. I lona taimi, sa pulefaamalumalu le tamā o Uso Pace i le Misiona a Atenitina.

Sa feiloai atu Uso Pace i lona toalua o le lumanai, o Anne Marie Langeland, ao avea le toalua ia o ni uo ‘aoga i le vasega lua i le Aai o Sate Leki, Iuta, ISA. Mulimuli ane, ao auai i ni aoga mauafuluga eceese i le aai, sa la toe fesootai i le taimi o se gaioiga tuuafaatasi a le seminare. Sa la fetusia i le tasi ma le isi mo nai tausaga na sosoo ai ao malaga faatasi atu [Anne] ma lona aiga i Nouei, lea na pulefaamalumalu ai lona tamā i le Misiona a Nouei Oslo, ao auauna atu Uso Pace i le Misiona i Sepania Madrid. Sa la faaipoipo i le Malumalu o Sate Leki i le aso 21 o Novema, 1978, ma o ni matua o se fanau e toafitu.

Sa faauu Uso Pace mai le Iunivesite o Iuta ma se faailoga o le tagata malaga i mataupu tau tamaoaga i le 1980, ma se faailoga o le matua o faiva i pulega faapisinisi mai le Aoga Faapisinisi a Harvard i le 1982. Ina ua mavae sina taimi na faigaluega ai i le Price Waterhouse i le Aai o Niu Ioka, sa ia auai atu i le Kamupani a Boyer i le Aai o Sate Leki, galue ai i pisinisi mo le atinaega o fanua faatau mai le 1984 i le 2012. I le mavae ai o se tofiga e tolu tausaga o se peresitene o le Misiona a Sepania Barcelona, sa ia auai i le Kamupani a Gardner i le 2015, faiga o atinaega o fanua faatau.

I lona taimi e uiga i lona valaauga fou, sa auauna atu Uso Pace o se Fitugafulu Eria. O ona valaauga o le Ekalesia sa i ai e aofia ai le fesoasoani i se au peresitene o se siteki, fautua mauafuluga, epikopo, fesoasoani i se au epikopo, peresitene o le korama a toeaina, peresitene o Alii Talavou a le uarota, ma se Taitai sikauti. ■



Milton Camargo

Fesoasoani Muamua i le Au Peresitene Aoao o le Aoga Sa

Na toeitiiti atoa le tausaga o faia e Helio da Rocha Camargo, o se faifeau muamua i se isi ekalesia, se filifiliga ina ia papatiso i totonu o Le Ekalesia a Iesu Keriso o le Au Paia o Aso e Gata Ai. I se taimi puupuu mulimuli ane, na tonu ai foi i lona toalua, o Nair Belmira da Rocha Camargo, e mulimuli i le faaitaiga a lona toalua ma papatisoina foi.

I lona taimi, sa maitaga Nair i le atalii a le ulugalii, lea o le a la faaigoaina ia Milton. O le faaiuga autasi a le au Camargos e auai i le Ekalesia o le a faamanuiaina ai e faavavau augatupulaga o le lumanai o o la aiga.

O Brother Milton da Rocha Camargo na soifua mai i le aso 10 o Mati, 1958, i São Paulo, Pasila. O Brother Camargo, na lagolagoina i le aso 6 o Aperila, 2019, o se Fesoasoani Muamua i le Au Peresitene Aoao o le Aoga Sa, na saunoa mai, ua faamanuiaina o ia i le tuputupu ae o se tagata o le Ekalesia.

“E silafia taitoatasi i tatou e le Alii,” na ia saunoa mai ai. “O Ana fuafuaga mo i tatou taitoatasi e sili atu ona tele nai lo le mea e mafai ona tatou mafaufau ai.”

Na feiloai Brother Camargo i lona toalua, o Patricia, a o pule faamalumalu lona tamā i le Misiona a Pasila Rio de Janeiro i le faaiuga o le 1970. Na faaipoipo le ulugalii i le aso 4 o Ianuari, 1980, pe a ma le tausaga talu ona toe foi mai Brother Camargo mai lana misiona o se faifeautalai faamisiona i le Misiona Potukale Lisbon. E toatolu o la fanau.

I tausaga o le popofou o le la ulugalii, na nonofo ai le au Camargos i Rio de Janeiro, lea na faamaea ai e Brother Camargo se faailoga o le tagata malaga faaenisinia mai le Inisitituti Militar de Engenharia. Na ia maua mulimuli ane se faailoga o le matua o faiva o pulega faapisinisi mai le Iunivesite o Polika Iaga.

I lona olaga atoa faigaluega, na tuuto atu ai e Brother Camargo lona taimi ma le malosi e aoao ai isi tagata. Sa ia faigaluega mo le tele o iunivesite, e aofia ai le Laureate Brazil Online Education, Universidad Tecnológica de México, ma sili ona lata mai nei o le BYU-Pathway Worldwide o se sui peresitene o mataupu aoaoina.

Na auauna atu Brother Carmargo o se Fitugafulu Eria, peresitene o le Misiona a Pasila Porto Alegre i Saute (1997–2000), fesoasoani i se au peresitene o le Nofoaga Autu e Aoao ai Faifeautalai i Pasila (2002–5), epikopo, peresitene o le misiona a le siteki, ma se peresitene o le korama a toeaina. ■



Jan E. Newman

*Fesoasoani Lua i le Au Peresitene
Aoao o le Aoga Sa*

I le avea ai ma faifeautalai talavou o loo auauna atu i Strasbourg, Farani, na maua e Jan E. Newman se aafiaga faaleagaga lea na faamalosia ai lana molimau ma mafai ai ona ia lagonaina le alofa o le Tama Faalelagi. O lenei aafiaga na oo mai a o ia faitauina upu a le perofeta o Alema i le Tusi a Mamona e faatatau i le totoina o le fatu o le talalelei i o tatou loto (tagai Alema 32:28; 33:22–23).

“Na ou faitau e faapea afai e te faia se avanoa mo lenei fatu i lou loto, o le a tupu, ma o le a e lagona moni le malena a’e o nei lagona,” na saunoa ai Brother Newman. “Ou te manatua le faitauina o lenei mea ma le molimau malosi tele mai o le Agaga ia te a’u e moni. Na ou lagonaina na [lagona] o le malena a’e. O le a le galo lava lenei mea i lo’u olaga atoa.”

O lenei [lagona] ma isi aafiaga na fesoasoani e faamalosia ai le molimau o le talalelei a Brother Newman ma saunia ai o ia mo se auaunaga o le olaga atoa o se tane, tamā, ma se soo o Iesu Keriso.

Na soifua mai Jan Eric Newman i le aso 16 o Aperila, 1960, i Jerome, Idaho, ISA, ia George Raymond ma Dora Walker Newman. Na tausia a’e o ia i Overton, Nevada, ISA. O lona tamā o se tagata liliu mai, o lona tinā o se tagata o le Au Paia o Aso e Gata Ai mo le tele o augatupulaga.

Na ia atiae se molimau i le laitiiti o ona tausaga ma auauna atu o se faifeautalai faamisiona i Farani ma Peleseuma. Ina ua maea lana misiona, na maua e Brother Newman se faailoga o le tagata malaga i le faaFarani mai le Iunivesite o Polika Iaga. Na matuai fiafia tele o ia i lana faailoga lea na ia mafaufau ai e avea ma se faiaoga o le gagana Farani ae nai lo lenei na [ia] filifili e tulitulimatagauina se galuega i le kamupani o polokalama [komepiuta]. Sa ia galue o se tagata faipisinisi mo le silia ma le 30 tausaga, faavaeina ni nai kamupani o polokalama [komepiuta] faamanu-iaina. I le taimi nei, o ia o se paaga i le SageCreek Partners, o se kamupani o tekinolosi i Alpine, Iuta.

Na faaipoipo Brother Newman ia Lucia Price i le Malumu o Oakland Kalefonia i le aso 18 o Aokuso, 1984. O i laua o ni matua o se fanau e toaono ma e nonofo i Elk Ridge, Iuta.

Na auauna atu Brother Newman o se peresitene o se siteki, epikopo, peresitene o Alii Talavou o se uarota, Taitai Sikauti, ma se tagata faigaluega o le malumu. Mai le 2006 i le 2009, na ia auauna atu o se peresitene o le Misiona a Nebraska Omaha. ■



Faaauau le Auaunaga a Peresitene Nelson

Ele’i umi talu ona maea le konafesi aoao ia Oketopa 2018, ae malaga atu Peresitene Russell M. Nelson i **Peru, Bolivia, Parakuei, Iurukuei, ma Chile**, lea na ia asia ai tagata o le ekalesia ma faifeautalai ma faia ni faigalotu, e aofia ai se faigalotu a le autalavou i Chile lea na auai le 1,500 [o talavou] ma faasalalauina atu ai foi i le atunuu atoa. Na ia saunoa atu i tagata o le ekalesia i le faaSipaniolo, faapaia le Malumu o Concepción Chile, ma feiloai i taitai o le malo i le lotofale.

E afe ma afe tamaitai na tali atu i luga o ala o faasalalau faaagafesootai i le valaaulia a Peresitene Nelson e lipoti mai o latou aafiaga i lu’i e fa na ia tuuina atu i le konafesi aoao ia Oketopa 2018: (1) anapogi mai ala o faasalalau faaagafesootai ma faasalalau le lelei mo le 10 aso, (2) faitau le Tusi a Mamona e oo atu i le faaiuga o le 2018, (3) auai soo i le malumu, ma (4) auai ma le atoatoa i le Aualofa. “Ou te fia faafetai atu ia te outou uma mo le tali mai i a’u valaaulia,” o le saunoaga lea a Peresitene Nelson, ma faailoa atu le faamoemoe “o nei valaaulia taitasi ua atili ai ona e latalata atili i le Faaola.”

Na pule faamalumu Peresitene Nelson i le falelauasiga o lona afafine, o Wendy Nelson Maxfield, o lē na maliu ina ua mavae se taua lototoa ma le kanesa. “O o matou loimata



Ua faafeiloaia Peresitene Russell M. Nelson ma Elder Enrique R. Falabella o le Fitugafulu i le faigalotu i Lima, Peru.

o le faanoanoa o le a liua i loimata o le faamoemoe a o matou maua se vaaiga e faavavau,” na ia saunoa mai ai. Na ia saunoa e uiga i lona afafine i le taimi o se konafesi faapitoa mo tagata o le ekalesia i le Siteki o Chico Kalefonia, lea e aofia ai iunite e lua mai Parataiso na afaina i le afi. “Ua tou silafia e tofu tagata uma ma luitau,” o lana saunoaga lea. “Afa i te manao ia lagona le lelei atili, faagalo oe lava ma auauna atu i se isi tagata.”

I **Arisona, ISA**, na valaaulia ai e Peresitene Nelson se aofia e 65,000 tagata o le ekalesia na potopoto i se fale taalo “e fesoasoani e faapotopoto Isaraelu i itu uma o le veli.” Na tusia foi e Peresitene Nelson koluma o malo faaaloaloga i le nusipepa o le *Arizona Republic* na uunaia ai tagata “e vaai atu i [le Alii] ma faia o Ia ma totonugalemu o lou olaga.” Sa ia auai i se faatalanoaga na faasalalau i luga o le televise a le setete; faia ni taumafataga faatasi ma taitai faalemalo, faaleaoga, ma faaletapuaiga; ma faia se sauniga o fesili ma tali ma talavou nofofua matutua.

Talu mai le taimi na faauuna ai o ia i le aso 14 o Ianuari, 2018, ua asia e Peresitene Nelson atunuu e 5, 16 malo ma teritori, ma aai e 24, femalagaai i ni maila e 55,000 (88,515 km). ■

Taitaiga Musuia

I le taimi nei, i le vaitaimi o le au peresitene o Peresitene Russell M. Nelson:

- Ua toe faatulagaina korama a le perisitua.
- O le auaunaga (ministering) ua suia ai nei faiaoga o aiga ma faiaoga asiasi.
- O se polokalama fou mo le atiinaeina o le tagata lava ia mo tamaiti ma le autalavou ua fatuina.
- O lomiga fou o le tusipese ma le *Tusipese a Tamaiti* o loo sauniaina.
- O taiala fou mo faatalanoaga o le autalavou e epikopo ua faatulagaina.
- Ua tuuina mai se faamamafa i le valaauina o le Ekalesia i lona igoa atoa.
- Ua tuuina i luga o le initoneti valaauga mo misiona i le I.S ma Kanata.
- Ua toe faaigoaina le Aufaipese a le Tapeneko i le Aufaipese a le Tapeneko i le Lotoa o le Malumalu.
- Ua amataina le sutesueina o le talalelei e faatotonugalemu i le aiga ma lagolagoina e le Ekalesia, e aofia ai le suia o sauniga o le Aso Sa i le lua itula.
- E lua sefulu fitu malumalu fou ua fofogaina atu.
- Ua na o le tolu ni mea taua a le Ekalesia ua le toe faaauuaina.
- O le siitia atu mai le Peraimeri ma le autalavou, faauuga o le perisitua, ma pepa faataga o le malumalu a le autalavou ua mafai nei ona faia ia lanuani nai lo taimi o aso fanau.
- Ua mafai nei e faifeautalai tamaitai ona laeiina ofu vae lelei.
- O faamatalaga e fesootai ma le galuega o le malumalu ua uma ona fetuunaia.
- Ua fatuina ni misiona fou ma toe fetuunaia ia tuaoi, ma tapunia ni nofoaga autu se lua mo le aoaoina o faifeautalai.
- Ua mafai nei ona faamanuia ma papatisoina fanau a matua LGBT, ma ua faamaninoina mai aiaiga faavae e faatautau i faaipoipoga i le itupa e tasi.

Ma ua folafola mai e Peresitene Nelson faapea pe a faatonu mai e le Alii, e tele isi mea o le a oo mai! ■

Faaogatusaina o le Mataupu Aoaina a le Seminare ma le *Sau, Mulimuli Mai ia te A'u*

O sutesuega o le seminare i le lalolagi atoa o le a le pine ae faaogatusaina ma le mataupu aoaina ma faasologa o le *Sau, Mulimuli Mai ia te A'u*, o se suiga o le a faaleleia ai le auala e sutesue ai le talalelei e faatotonugalemu i le aiga ma lagolagoina e le Ekalesia e ala i se sutesuega tuufaatasia i le fale, Aoga Sa, ma le seminare.

E amata atu i le 2020, o le a sutesue e vasega seminare le tusitusiga paia lava e tasi o loo faaogaina mo le mataupu aoaina o le *Sau, Mulimuli Mai ia te A'u* i tausaga taitasi. Nai lo le mulimulitai i se kalena o le tausaga faaleaoga, o le a mulimuli le kosi sutesue o le seminare i le kalena faaletausaga.

E ui o sutesuega i le seminare o le a faaauau pea ona faavae i tusitusiga paia, o le mataupu aoaina o le a faatatau atili i aoaoga faavae ma o le a fesoasoani e faamalosia, puipuia, ma saunia le autalavou mo ni misi-ona, faaipoipoga, ma auunaga i le Ekalesia. ■

Faitau se tusiga e sili ona auilili—lea e aofia ai se sootaga i se vitio o taitai o le Ekalesia, e aofia ai Elder Holland, o loo talanoaina le suiga—i le [ChurchofJesusChrist.org/go/519122](https://www.ChurchofJesusChrist.org/go/519122).



Faailoga o le Faapaiaaga “Lumanai Maoae”

O le a i ai se lumanai maoae, le mafaatusalia a le Ekalesia,” na saunoa ai Peresitene Russell M. Nelson i le faapaiaaga o le Malumalu o Rome Italia ia Mati 2019. “Ua na o lo tatou fausiaina o se faavae mo le lumanai.”

I le faapaiaaga, na potopoto faatasi ai uso uma o le Au Peresitene Sili ma le Korama a Aposetolo e Toasefululua, mo le uluai taimi, i se nofoaga e tasi i fafo atu o le lunaite Setete. “I le avea ai ma Aposetolo a Iesu Keriso i aso nei,” na saunoa ai Peresitene Nelson, “o le savali o loo tatou faasoaina atu i le asō o le savali lava e tasi lea na faasoa atu e Aposetolo anamua—o loo soifua le Atua ma o Iesu o le Keriso.”

E le gata i le faapaiaina o le malumalu, na saunoa atu foi Peresitene Nelson i le autalavou i le itu o le malumalu ma feiloai ai ma Pope Faranisisi, o se uluai taimi lea ua faia ai se talanoaga aloaia a se Peresitene o le Ekalesia ma le ulu o le Ekalesia Katoliko Roma. ■

Faitau i manatu faaalua e uiga i le Malumalu o Roma Italia ma tagai i ata mai Roma i le [ChurchofJesusChrist.org/prophets-and-apostles](https://www.ChurchofJesusChrist.org/prophets-and-apostles).

Aiaiga Faavae, Taualumaga, Punaoa Fou

Faamatalaga i malumalu. Na tuuina mai e le Au Peresitene Sili se faamatalaga i le aso 2 o Ianuari, 2019, fai mai se vaega: “I le aluga o nei seneturi e tele, o faamatalaga e faatatau i galuega faalemalumalu ua fetuunaia i lea taimi ma lea taimi, e aofia ai le gagana, metotia o le fausiaina, fesoootaiga, ma le tausaiaina o faamaumauga. Ua aoao mai perofeta o le a leai se mutaaga i ia fetuunaiga e pei ona faatonuina mai e le Alii i Ana auauna.”

Siitaga o tamaiti ma le autalavou.

Ua faamaea nei e tamaiti le Peraimeri ma siitia atu le autalavou mai le vasega e tasi po o le korama i le vaitausaga e sosoo ai ia Ianuari nai lo le maea ai o o latou aso fanau. O le uiga foi o lenei mea ua mafai e le autalavou ona maua se pepa faataga e faatapulaa le faaogaina o le malumalu mo le uluai taimi ia Ianuari o le tausaga e atoa ai le latou tai 12 tausaga ma e mafai ona faauuina alii talavou i le Peristua Arona ia Ianuari o le tausaga e atoa ai le latou tai 12 tausaga.

Isi avanoa mo le auaunaga. Ua faalauiiloa mai e le Auaunaga Alofa a le AAG lana faigapaaga ma le JustServe.org e faalauiiloa ai le galuega taimua o le #YouCanDoSomething, e valaaulia ai tagata e auauna atu i le lotoifale ma foai atu i galuega lelei i le lalolagi ina ia fesoasoani e suia le lalolagi. Ina ia amata, asiasi i le itulau “How to Help” i le LDSCharities.org.

Punaoa fou mo le auaunaga. O le uepisaite. O le Auaunaga Lenei (ministering.ChurchofJesusChrist.org) ua toefaafou faatasi ma tusiga ma vitio faapoopo. O punaoa i luga o le saite e mafai ona fesoasoani i tagata faitau e aapa atu i le agaalofo, fausia sootaga anoa atili, faaleleia a latou tomai o le faalogo ma isi. O anotusi fou e aofia ai tusiga o Mataupu Faavae o Auaunaga lea ua lolomiina i mekasini *Ensign* ma le *Liahona* e fesoootai i saunoaga o le konafesi aoao e uiga i le

auaunaga, ma vitio e mafai ona faasoaina, upusii, ma mau.

Faamoemoe ma le faamalologa mo tagata na aafia i le sauaina. O se uepisaite fou a le Ekalesia, abuse.ChurchofJesusChrist.org, ua tuuina mai punaoa ma meafaigaluega aoga mo tagata ua aafia i le sauaina ma mo i latou o e mananao e fesoasoani e taofia le sauaina. Ua tuuina atu foi e le Au Peresitene Sili se tusi i le aso 26 o Mati, 2019, e uunaia ai taitai o le Ekalesia e aapa atu i le alofa e fesoasoani ia i latou o loo mafatia mai le sauaina. Faatasi ai ma le tusi o se punaoa o faamatalaga na toefaafou ai taiala mo le auala e fefautuaai ai e epikopo ma au peresitene o siteki tagata na aafia i le sauaina i feusuaiga ma le pe faapefea ona faatautaia faatalanoaga ma tagata o le Ekalesia. Na faalauiiloa foi e le Ekalesia se vitio, “Protect the Child,” ma toefaafou tusiga o Autu o le Talalelei i le sauaina.

Vaega fou ma polokalama. O le Fuafuaga o le Suesuega o loo faaalua ai le faafouga sili ona lata mai o le polokalama Gospel Library e mafai ai e oe ona seti se faatulagaga mo le suesueina o soo se anotusi e maua i le polokalama. O Sauniga ua Saunia o se

meafaigaluega fou a le FamilySearch lea e faafaigofie ai le sailiga o igoa mo le malumalu, e tuuina atu ia te oe le tele o le taimi e auauna ai i lou aiga ma fiafia i faamanuiaga o le malumalu. Ma e i ai i le FamilySearch le toeitiiti atoa le tolu tasene o gaoioiga fou e faia i le aiga, e pei o le “Walk Where They Walked,” e fesoasoani ai e faaauai tagata laiti i tala faasolopito o aiga. Ua mafai ona maua gaoioiga i gagana e 10.

Lē fautuaina gaoioiga tetele. E ui e ono talafeagai le faamanatuina o aganuu ma talafaasolopito i le lotoifale, ae ua lē fautuaina nei e le Ekalesia gaoioiga tetele e pei o tauvaga a tamaitai [pageants]. E tolu tauvaga a tamaitai [pageants] o le faaauau pea: o le Tauvaga a Tamaitai [Pageant] i Ilinoi, ISA, ma le lagolago mai le laumua o le Ekalesia; o le Tauvaga a Tamaitai [Pageant] o le Mesa i Arisona, ISA, i lalo o le taitaiga a le eria; ma le Tauvaga a Tamaitai [Pageant] Peretania, i lalo o le taitaiga a le eria, e tai fa tausaga ma fai. Ua faamutaina foi e le Ekalesia faafiafiaga faaleaganuu a le autalavou ao lei faapaiaina le malumalu ae e fiafia i faigalotu a le autalavou faatasi ma taitai o asiasi mai o le Ekalesia. ■



O le a siitia atu tamaiti ma le autalavou mai le vasega e tasi po o le korama i le vaitausaga e sosoo ai ia Ianuari nai lo le maea ai o o latou aso fanau.



O malumalu o le vaitau o Paionia, e aofia ai le Malumalu o Sate Leki, o le a toefaafou, ma o le a fausia nisi malumalu fou se valu.

Ua Fofogaina Mai Malumalu Fou e Valu, Toefaaleleia Malumalu Faasolopito

Na faaii e Peresitene Russell M. Nelson le konafesi aoao ia Aperila 2019 i le fofogaina mai o malumalu fou e valu ma le toefaaleleia o malumalu e fa o le vaitau o paionia, e aofia ai isi faamatalaga e uiga i le toefaaleleia o le Malumalu a Sate Leki.

O le a fausia malumalu fou i Pago Pago, Amerika Samoa; Aai o Okinawa, Okinawa; Neiafu, Toga; Vanu o Tooele, Iuta; ISA; Moses Lake, Uosigitone, ISA; San Pedro Sula, Honduras; Antofagasta, Chile; ma Budapest, Hungary.

O fuafuaga mo se toefaaleleiga tele o le Malumalu o Sate Leki o le a aofia ai le toefaaleleia o le Lotoa o le Malumalu ma le palasa e sosoo ai e lataane i le Fale o le Ofisa o le Ekalesia i le Aai o Sate Leki, Iuta, ISA. O malumalu i St. George, Manti, ma Logan, Iuta,

ISA, o le a toe faafou foi i se taimi lata mai. “O lenei galuega o le a manaomia ai ona tapunia malumalu taitasi mo se vaitaimi.” o le saunoaga lea a Peresitene Nelson. “E mafai e tagata o le Ekalesia ona faaaau pea ona olioli i tapuaiga i le malumalu ma auaunaga i isi malumalu o lata ane. A maea ia galuega faatino taitasi, o le a toefaapaiaina ia malumalu faasolopito taitasi.”

Talu mai le avea ai ma Peresitene o le Ekalesia ia Ianuari 2018, ua fofogaina mai e Peresitene Nelson malumalu fou e 27. Talu mai le konafesi aoao talu ai nei ia Oketopa 2018, ua faapaiaina malumalu i Roma, Italia; Barranquilla, Kolomupia; ma Concepción, Chile. ■

Mo se lisi atoa o malumalu ma o latou tulaga, alu i le [temples.ChurchofJesusChrist.org](https://www.ChurchofJesusChrist.org).

Aiaiga Faavae mo Fanau a Matua LGBT, Faaipoipoga a Tagata o le Itupa e Tasi

Omatua o e ua faailoa mai i latou lava o se tagata e faatauataane, faatauafafine, pe aafia i mea uma ia e lua [bisexual], po o se tasi ua suia lona itupa [transgender] ua mafai nei ona talosagaina le faamanuiaina o a latou fanau o ni pepe laitii e sē tasi e agavaa o umia le Perisitua Mekisateko, ma ua mafai foi ona papatisoina a latou fanau pe a atoa lo latou valu tausaga e aunoa ma se faatagaga mai le Au Peresitene Sili, na faasilasila mai ai e Peresitene Dallin H. Oaks, Fesoasoani Muamua i le Au Peresitene Sili, i le taimi o le sauniga mo taitai i le konafesi aoao.

E le gata i lea, e ui o loo mafaufau pea i le faaipoipoga a tagata i le itupa e tasi “o se solitulafono ogaoga,” o le a le toe taulimaina e le Ekalesia o se “liliuese” mo faamoemoega o aoaiga a le Ekalesia. “O amioga le mama i fegalegaleaiga faatauataane po o le faatauafafine o le a taulimaina i le auala lava e tasi,” na saunoa ai Peresitene Oaks.

O nei suiga i le aiaiga faavae “e le o se suiga i aoaoga faavae o le Ekalesia e faatatau i le faaipoipoga po o le poloaiga a le Atua e tusa ai ma le legavia po o le ola mama,” na tusia ai e le Au Peresitene Sili i se faamatalaga aloaia. O le aoaoga faavae o le ata o le faaolataga ma le taua o le ola mama o le a le suia.”

Na saunoa Peresitene Oaks e tatau ona fesoasoani aiaiga faavae i aiga ua aafia, ma, “e le gata i lea, o taumafaiga a o tatou tagata ia faaali atu ai le malamalama sili atu, agaaloa ma o le alofa e tatau ona faateleina ai le faaaloalo ma le malamalama i totonu o tagata uma o faamoemoega lelei.” ■

Faamamafaina Atu o le Igoa Sa’o

I na ia faasino i Le Ekalesia a Iesu Keriso o le Au Paia o Aso e Gata Ai i lona igoa talafeagai, o loo ua amatalia suiga i alaleo o fesootaiga.

Suiga i Uepisaite

- Ua suitalaga le ChurchofJesusChrist.org i le LDS.org e avea ma igoa aloaia o le uepisaite a le Ekalesia.
- I ni nai masina, o le a suitalaga le Newsroom.ChurchofJesusChrist.org i le MormonNewsroom.org.
- O le ComeUntoChrist.org o le a iu ina suitulaga i le Mormon.org, lea o loo toegaosia e tuuina atu i ona tagaga matamata autu (i fafo atu o le Ekalesia) se aafiaga faapatinoina sili atu.

Suiga i Alaleo o Faasalalauga Faaagafesootai

- Ua suia faitotoa autu uma o faasalalauga faaagafesootai a le Ekalesia ina ia faamamafa atu ai le igoa o le Ekalesia a le Faaola.
- E mafai e tagata o le ekalesia ona filifili e auai i se vaega [fou] o le Facebook ua ta’ua “O Le Ekalesia a Iesu Keriso o le Au Paia o Aso e Gata Ai—Musumusuga ma Talafou” ina ia malamalama ai e uiga i talafou ma vaega fou o le Ekalesia ma ia fausia nuu ma fesootaiga i le Ekalesia.

O Suiga i Polokalama Feaveai

- O Musika Paia [Sacred Music] ua suitulaga i le LDS Music.
- O le polokalama Gospel Library o le a tumau e le suia.

O suiga faaopoopo e mafai ona faamoemoeina a o tatou galulue faatasi e faamamafa atu le igoa o le Ekalesia a le Faaola, O Le Ekalesia a Iesu Keriso o le Au Paia o Aso e Gata Ai. ■

Fesoasoani Taumafaiga a Fesoasoaniga Alofa i le Faitau Afe

Na auai le faalapotopotoga a le fesoasoaniga alofa a le Ekalesia, Auaunaga Limafoai a le AAG, i ni galuega faatino e 2,885 i atunuu e 141 i le tausaga ua tuanai, galulue faatasi ma faalapotopotoga faapaaga o fesoasoaniga alofa e 1,900. Talu mai le 1985, ua tuuina atu e le Auaunaga Limafoai a le AAG le silia ma le \$2.2 piliona i fesoasoaniga—e aofia ai tinoitupe, sapalai o mea e manaomia, foai atu i tulaga tau oloa i atunuu ma teritori e 197, e tusa ai ma lipoti faale-tausaga 2018 a le Auaunaga Limafoai a le AAG lea na faasilasila mai i le aso 19 o Fepuari, 2019.

Ua faaosofia taumafaiga o fesoasoaniga alofa a le Ekalesia e ala i le agaalofo ma le alofa mo fanau uma a le Atua ma faamamafa atu nei mataupu faavae taiala—tausiga o i latou e matuai manaomia le fesoasoani, uunaia le ola tutoatasi, ma le faalauiloaina o tulaga faavolenitia ma auunaga. O nei mataupu faavae, e faavae

i luga o le faatuatua ia Iesu Keriso, e faamalositia tagata taitoatasi ma aiga e tusa lava po o le a le ituaiga tagata, tapuaiga, po o le tagatanuu.

E fesoasoani le Ekalesia i le tali atu i faalavelave faafuasei (e aofia ai taumafaiga faavolenitia), auaunaga mo e leaga le vaai, tausiga o tinā ma pepe faatoa fananau mai, vai mama ma tumama, tuiipui, faaavanoa ina o nofoa faataavalevale ma mea e fesoasoani e savavali ai, fesoasoani i tagata e saunia meaai mo i latou lava e faaoga ai vaifofo ma punaoa i le lotoifale, ma fesoasoaniga vave ma mo se taimi umi mo tagata sulufai. Na auai foi le Ekalesia i galuega faatino i nuu i le lotoifale i setete e 43 ma itumalo i le I.S. ma Kanata e fesoasoani i e leai ni fale, toe faatula-gaina o tagata sulufai, ma isi mea e manaomia.

“Matou te lagona le agaga faafetai tele ma le fesootaiga ma tagata uma taitoatasi o e na saofagā i le manuia o le galuega fesoasoaniga alofa i le 2018,” na saunoa ai Sister Sharon Eubank, peresitene o le Auaunaga Limafoai a le AAG ma le Fesoasoani Mua-mua i le Au Peresitene Aoao o le Aualofo. Fai mai o ia o le lipoti e fai ma sui o le agalelei o le faitau fia sefulu ma afe o tagata. ■

Faitau i le lipoti atoa i le ldscharities.org.



O se tausima’i pasi i Initonesia o loo tu i autafa o se tinā fou. Ua faamaeaina e tausima’i pasi i lenei nofoaga autu mo le fanauina [o pepe] se kosi Fesoasoani i Pepe e Manava [Helping Babies Breathe] na faatautaia e le Auaunaga Limafoai a le AAG.

Talafou mo Faifeautalai

Faafesootai atu i le aiga. Ua faataga-ina nei faifeautalai ona fesoootai atu i o latou aiga i vaiaso taitasi i aso o sauniuniga e ala i feau tusitusia, feau i luga o le initoneti, valaau i telefoni, ma talanoaga faavitio e faaopoopo atu i tusi ma imeli.

Meafaigaluega mo le fuafuaina mo faifeautalai faasauniuni. Ua mafai ona fesoasoani se meafaigaluega fou mo le fuafuaina o le misiona i luga o le initoneti mai le Matagaluga o Faifeautalai a le Ekalesia i faifeautalai faasauniuni ina ia sili atu ona faautauta ma mafaufau loloto ao latou filifili po o afea o le a sili atu ai ona latou saunia e auauna atu i le Alii o se faifeautalai.

Auauna atu i misiona. E amata atu ia Ianuari 2019, ua ta'ua faifeautalai talavou o auaunaga a le ekalesia o "faifeautalai o auaunaga." O talavou matutua uma o e na talosaga mo se auaunaga faafaifeautalai o le a faia i lea lava ala e tasi, e ala i se faitotoa i le initoneti, ma o valaauga uma o le misiona—pe o se misiona talai po o se misiona o le auaunaga—e sau mai le perofeta. O talavou nofofua agavaa ona o mafuaaga eseese ua tuusaunoaina mai le auauna atu i se misiona talai e mafai ona valaauina i se misiona o auaunaga.

E mafai e tuafafine faifeautalai ona laeiina ni ofuvae. Ua i ai nei i faifeautalai faamisiona le filifiliga o le laeiina o ofuvae i le taimi o gaoioiga masani o aso uma, e ui e tatau i tuafafine ona faaauau le laeiina o ofutalaloa po o sakete pe a auai i le malumalu ma le taimi o sauniga o tapuaiga i le Aso Sa, kona-fesi faaletaitai ma faalesone, sauniga o papatisoga, ma faigalotu o nofoaga autu mo le aoaoina o faifeautalai. O le laeiina o ofuvae e mafai ona fesoasoani e puipuia tuafafine mai i siama e maua mai le namu, faamafanafanaina

tuafafine i tau malulu, ma faigofie ai mo tuafafine ona tietie i uila.

Misiona ua toefatuina, tuaoi ua toe faatulagaina. E fa misiona fou ua fatuina, ae sefululua misiona o le a tuuina i totonu o misiona o i ai nei. O ia suiga e oo mai i lea taimi i lea taimi ina ia fetuunai i fuainumera o faifeautalai o loo auauna atu. O misiona fou o Democratic Republic of the Congo Kinshasa East, Guatemala Antigua, Peru Limatambo, ma Philippines Antipolo. O matua o faifeautalai o loo auauna atu i misiona ua aafia—pe ua fatuina pe le toe i ai—o le a maua faamatagala faaopoopo mai a latou peresitene o misiona.

Fetuunaia fuainumera o nofoaga autu e aoao ai faifeautalai. Ina ia sili atu ona aoga faalauaitele nofoaga autu e aoao ai faifeautalai i le lalolagi atoa, ua tapunia nofoaga autu i Atenitina, Sepania, Chile, ma le Ripapelika Tominiko.

Faatasi ai ma le tapuniga, o le a faagaioioia e le Ekalesia nofoaga autu e aoao ai faifeautalai e 11, i nofoaga o Pasila; Kolomupia; Egelani; Kana; Kuatemala; Mekisiko; Niusila; Peru; Filipaina; Provo, Iuta, ISA; ma Aferika i Saute.

Vitio o le saogalemu. O faasologa fou o vaega 12 o vitio *The Safety Zone* ua mamanuina e faateleina ai le saogalemu o faifeautalai faamisiona e 65,000 o loo auauna atu i le taimi nei faapena foi ma i latou o le a auauna atu. O le vitio muamua ua mamanuina e maimoa ai faifeautalai faasauniuni ma o latou matua pe a maca ona maua se valaauga o le misiona ma ao lei ulufale atu i se nofoaga autu e aoao ai faifeautalai. I le NAF, o le a toe maimoa ai le faifeautalai i le vitio muamua e faapena foi i isi [vitio] e 11. O le a tuuina soo atu faamanatu o le saogalemu i faifeautalai i a latou misiona. ■



Ua Faamamaluina Aloaia e Kueiti [Kwait] le Ekalesia

Ua mauaina e le Ekalesia le aloaia-ina faamamaluina mo ona taitai faalelotoifale ma faalapopotoga mai le Setete o Kueiti [Kuwait]. Toeitiiti atoa le 300 tagata o Le Ekalesia a Iesu Keriso o le Au Paia o Aso e Gata Ai e nonofo ma galulue i Kueiti; latou te o mai mai le tele o atunuu i le salafa o le lalolagi. O le aloaiaina faamamaluina faalemalo ua mafai ai ona auauna lelei atu taitai i le

lotoifale i manaoga o tagata o le ekalesia i Kueiti [Kuwait].

Ua faaalai e Epikopo Terry Harradine o le Uarota a Kueiti, Siteki a Manama Bahrain le agaga faafetai i le malo o Kueiti mo le faatagaina o le saolotoga e tapuai ai i Kueiti, aemaise lava mo tagata faigaluega mai fafo, ma mo le uunaia o le faapalepale faalelotu i totonu o le atunuu. ■

Mo nisi faamatalaga e uiga i sauniga a korama a toaina ma le Aualofa, tagai i le *Tusitaulima 2: Taitaiina o le Ekalesia*, 7.8.1, 9.4.1, ChurchofJesusChrist.org.

O fesili nei e mafai ona fesoasoani i faiaoga ao latou fuafua e faaaoga se savali o le konafesi aoao e aoao atu.

- [illegible]

Manatu mo Gaoioiga

E tele lava ni auala e fesoasoani atu ai i tagata e aoao mai savali o le konafesi aoao. O nisi nei o nai faataitaiga: atonu o i ai nisi au auala o le a sili ona aoga i lau korama po o le Aualofa.



- ***Talanoa i vaega.***

Vaevae tagata i ni vaega laiti, ma atofa atu i vaega taitasi ni vaega eseese o le savali o le konafesi e faitau ma talanoaina. Ona fai atu lea i vaega taitasi e faasoa mai se upumoni sa latou aoaoina. Pe e mafai foi ona e faatulagaina ni vaega mai tagata o e na suesue i isi vaega ma tuu atu ia i latou e faasoa atu i le tasi ma le isi mea sa latou aoaoina.

- ***Tali fesili.***

Valaaulia tagata e tali i fesili e pei o [fesili] nei e uiga i le savali o le konafesi: O a ni upumoni o le talalelei o tatou mauaina i lenei savali? E mafai faapefea ona tatou faaogaina nei upumoni? O a valaaulia ma faamanuiga na folafola mai na tuuina atu? O le a se mea o aoao mai e lenei savali ia i tatou e uiga i le galuega o loo finagalo le Atua tatou te faia?

- ***Faasoa atu upusii.***

Valaaulia tagata e faasoa atu ni upusii mai le savali o le konafesi lea na musuia i latou e faataunuu a latou tiutetauave i le galuega o le faaolataga. Uunaia i latou e mafaufau pe faapefea ona latou faasoa atu nei upusii e faamanuia ai se isi tagata, e aofia e pele ia i latou ma tagata latou te auauna atu i ai.

- ***Faasoa se lesona faitino.***

Ia muai valaaulia ni nai tagata e aumai ni mea faitino mai le fale e mafai ona latou faaogaina e aoao atu ai e uiga i le savali o le konafesi. I le fonotaga, fai atu i tagata e faamatala mai pe faapefea ona fesoatai na mea faitino i le savali.

- ***Saunia se lesona e aoao atu i le fale.***

Fai atu i tagata e galulue i ni paga e fuafua ai se lesona o le afiafi faaleaiga e faatatau i le savali o le konafesi. E mafai faapefea ona tatou faatatauina lenei savali i o tatou aiga? E mafai faapefea ona tatou faasoa atu lenei savali i tagata tatou te auauna atu i ai?

- ***Fetufaa'i atu mea na tutupu [ia te oe].***

Faitau faatasi nisi o faamatalaga mai le savali o le konafesi. Fai atu i tagata e faasoa mai ni faataitaiga mai tusitusiga paia ma mai i o latou olaga lea e faaalua ai pe faamalosi ai le aoaoga faavae lea na aoaoina i nei faamatalaga.

- ***Aoao e uiga i se mau.***

Valaaulia tagata e faitau se mau faasino i le savali o le konafesi. Fai atu ia i latou e talanoa i le auala e mafai ai ona fesoasoani ia aoaoga o loo i le savali latou te malamalama atili ai i le mau.

- ***Sue se tali.***

Ia muai fatuina ni nai fesili e mafai ona taliina e faaogaina ai le savali o le konafesi. Ia taulai atu i fesili ia e uunaiaina le mafaufau loloto po o le faaogaina o mataupu faavae o le talalelei (tagai *Aoao Atu i le Ala a le Faaola*, 31-32). Ona tuu atu lea i tagata e filifili se fesili ona sue lea o tali i le savali. Valaaulia i latou e talanoa ia latou tali i ni vaega toalaite.

- ***Sue se fasifuaitau.***

Valaaulia tagata e saili i le savali o le konafesi, e vaa-vaa mo fuaitau lea e taua ia i latou. Fai atu ia i latou e faasoa mai ni fasifuaitau ma mea sa latou aoaoina mai i ai. E faapefea ona fesoasoani nei aoaoga ia i tatou e faataunuu ai le galuega a le Alii?

- ***Fatu se mea.***

Valaaulia tagata e fai se pepa lautele o i ai se savali po o se faailogatusi lea e aofia ai se faamatalaga musuia puupuu mai le savali o le konafesi. Tuu atu ia i latou se avanoa e faasoa atu ai se mea sa latou faia. ■

**Fusia ma le
Saogalemu (Sa I Ai
Lo'u Atalii e Toatasi
Ma i Latou), saunia
e Julie Rogers**

*“E lē toe muta lava mafatiaga
i lenei lalolagi, totonu o le
Ekalesia ma fafo atu, o lea ia
vaai ai i soo se itu ma o le a
e maua ai se tasi o ona tiga e
foliga mai ua mamafatū tele e
tauave ma o lē e foliga mai e lē
toe uma lona lototiga. O le tasi
auala ia ‘manatua [ai] pea o
ia’ o le auai lea ma le Fomai
Sili i Lana galuega lē muta o le
aveesega o avega mai ia i latou
o ē mafatia ma aveese tiga o i
latou o ē faanoanoa.”*

Elder Jeffrey R. Holland
o le Korama a Aposetolo e
Toasefululua, “Faauta i le
Tamai Mamoe a le Atua,” 46.



© JULIE ROGERS, E LE MAFAI ONA KOPIINA



“A tatou talanoa e uiga ia tatou malumalu tuai ma fou, talosia ia faailoa atu e i tatou taitoatasi e ala i a tatou amioga o i tatou o ni soo moni o le Alii o Iesu Keriso,” na saunoa mai ai Peresitene Russell M. Nelson i le sauniga faaiu o le Konafesi Aoao Faaletausaga Lona 189 o le Ekalesia. “Tau ina ia tatou faafouina o tatou olaga e ala i lo tatou faatuatua ma le faalagolago ia te Ia. Tau ina ia tatou mauaina le mana o Lana Togiola e ala i lo tatou salamo i aso taitasi. Ma tau ina ia tatou faapaiaina ma toe faapaiaina o tatou olaga e auauna atu i le Atua ma Ana fanau—i itu uma e lua o le veli.”

O LE EKALESTIA A
IESU KERISO
 O LE AU PAIA O ASO
 E GATA AI